

古今詩話







# 國家圖書館藏 | 古籍題跋叢刊

國家圖書館 / 編

GUO JIA TU SHU GUAN CANG

GU JI TI BA CONG KAN

第4冊



北京圖書館出版社



國家圖書館藏古籍題跋叢刊

第4冊

北京圖書館出版社

## 第四冊目錄

藏書題識·····	一
小眠齋讀書日札·····	一五一
可廬著述十種叙例·····	三二五
知聖道齋讀書跋尾·····	四六一
四部寓眼錄·····	五九七



書籍流傳藉乎刊刻大江南北不乏好古之人昔時珍秘之本近日頗多精槩固不患傳布之難矣第昔人意見所到常于流覽之餘信筆而書散漫不復收拾其議論之卓絕往往無由傳述即或感慨時事紀述景光短幅長篇皆從卷軸中醞釀而出後人讀之借資不淺顧可任其飄零散佚失已哉昔竹垞先生輯明詩綜搜羅評跋列入者凡二十五家亦云富矣顧此外豈無遺佚且繼出之筆墨又不知凡幾今人刻書不能一一輯入書中手蹟輾轉流傳終歸灰燼傷何如之



余家藏弁無多言家鄉前輩所儲傳歸架上者簡端冊尾朱墨猶新爰於繕閱之時鈔寫成帙即已刻者亦簡列一二用誌珍惜之懷其中已失之書據朱朗齋所訂書錄錄之而朗齋跋語則低一字書于後以其昔年編錄頗費苦心且于書多所正定也若夫旁搜遠采侈示大觀則力有未逮姑就所有而彙錄之稍資攷證之一助云嘉慶甲子臘月二九日春

園汪璐記



藏書題識目

卷一

經部書七種


史部書五十九種

卷二

子部書三十五種

卷三

集部書七十六種





卷四

集部書三十九種

卷五

補遺

藏書題識卷一

錢唐汪璐仲連甫手輯

經部

周易原意二卷 抄自序載補遺

國朝張世瑩撰字寓椿號無夜錢唐人乾隆甲子領鄉薦第一

朱文藻記曰此書周錯手抄按無夜先生壽登七旬而卒

此書是四十以前未舉時所作祇上下二經不及繫辭以下其云來歲當更增入經史子集云云其後續完與否竟不可知余生也晚得見先生者僅數面頗聞流俗悠悠之

口謂先生注易語多不經今觀此書六屬訓詁常譚無甚  
矜異時人未見其書及序論大旨徒見其舉止迂疎不合  
時宜遂併其書同聲毀之余謂舉者習經譚何容易天下  
焉有纔閱五月而能注一經了無遺憾之理但先生天資  
高妙潛心禪學頗有頓悟之境此書雖成之速視鈍根人  
終身無事識力者固相去萬里也觀序作經世今標題作  
原意殆由經始未成姑以原意目之恐是吾友皆山所為  
是書原稿藏其家人間傳鈔僅見此本宜珍惜之



讀書管見二卷

元王充耘撰

王三省跋曰讀書管見多前賢未發之意而訓釋明暢一洗  
世儒牽強補鑿之謬有功於九峯也鉅矣郡政之暇余過後  
渠先生精舍論尚書馬先生出此示之携歸公退之室讀之  
忘倦爰命訓導秦蘭校正刻之郡齋嘉靖乙未六月

儀禮章句翼四篇儀禮集說七篇儀禮今古文一卷又補遺

國朝周錯撰字皆山錢唐諸山

朱文藻記曰此書周錯手稿錯吾友也與東軒主人魚亭

先生極友善先生嘗以論史屬藻而以論經屬周君此稿

甫就未及半而先生辭去使先生無故此書當觀其成矣

周君潛心讀書而賦性迂避僻立論又好摘先儒之過臨江

鄉人之語誠足求其失

嘗與魚亭先生書云前日見臨江鄉人甚嚴自來注家指斥前儒之

說有詈罵便為居心不醺弟因思附論大不可存但先儒之說弟所去取皆非偶言則又不能默默不知如何乃免

譏議

然庸人千論必有一得知其說者當有以考其是非

也文藻又不通是經不敢妄為去取姑存之以不沒其用

心而已年來與周君疎濶不知其所業進退然觀是書知其用功之勤當不間也

吹豳錄五十卷

國朝吳穎芳撰字西林仁和臨江鄉布衣

朱文藻曰先生諳樂律親試諸器故知之審而論之確不同空為臆說者特館于振綺堂主人索其書鈔為十冊

說文解字五音韻譜十二冊

朱文藻案曰漢許慎說文解字十四卷序目一卷宋初徐



鉉校定為三十卷始一終亥本也先是鉉苦許氏偏旁與  
密不可意知因令弟錯以切韻補其四聲庶幾檢閱力省  
功倍名曰說文韻譜其書十卷此本十二卷無刊姓氏年  
月大要仍韻譜之舊而分析其卷也今世始一終亥善本  
甚尠通行于世者惟此本而有識者往往譏其失許氏本  
意非復說文面目云

說文解字繫傳四十卷附考異二十八篇附錄二卷

繫傳南唐徐鍇撰考異附錄朱文藻撰

朱文藻跋云南唐徐鉉說文解字繫傳四十卷今世流傳  
蓋歟吾杭惟城東郁君陞宣購藏鈔本昨歲因吳江潘君  
瑩中獲謁吳下宗丈文游從其揅架借得此事歸而錄之  
復取郁本對勘勘譌闕之處二本多同其不同者十數而已  
正譌補闕無可疑者不復致說其有與今說文互異及傳  
中引用諸書隨案頭所見有與今本異者並為錄出作考  
異二十八篇又采諸書中論列繫傳及徐氏事蹟者別為  
附錄分上下二篇並附于後又此書惟校寫一過無別本

說文凝錦錄一卷

國初萬光泰撰字循初秀水人

丁敬身朱跋云茅簷坐雨聊閱一過家書盡煇復審靡從  
豈能釋然于懷俟神明澄澈再作片牘消遣敬身記

史部

三國志六十五卷

晉陳壽撰宋裴松之集注

朱文藻曰此南監板卷中有墨筆注語乃丁亥年有書賈



持馮夢禎所刻三國志求售中有此注因合數手竟日夜  
錄之按馮刻志中有朱筆評語標籤題目曰馬巽倩評閱  
又每卷尾各有朱書繕閱年月皆李師周筆師周字廷基  
一字東方卷首有又有跋語三條一曰五月十七日燈下  
偶閱二序表傳時疎雨蛙步甚覺有味一曰此六巽倩先生  
評閱余得其評閱文選復購得其三國志吾以重購價購  
後起者慎毋以重價易也戊申冬杪基志于正本堂西牖  
一曰至申至邠歷有八載今觀昔語殊為不美姑存之以

以示勉耳其卷中別有朱墨筆及夾紙細書字跡信是杭世駿董浦所注今取監本錄一過又別錄為補注一書馮本亦並存當珍惜之

### 三國志補注六卷

朱文藻曰此書文藻手鈔往歲丁亥有書賈以三國志求售見其上方多墨筆細注不書姓名觀其筆跡是前輩杭世駿手書杭字大宗號董浦武林耆宿也余既合數人力錄藁于史書之上又別為莊書一通釐為六卷題曰三國

志補注蓋其中引用諸條皆裴輦注所未備也

# 宋史筆斷十二卷

正誼齋編集不著撰人姓名

卷首上方墨書云作書者必能求聖人之道養浩然之氣惜乎姓名不傳俟後訪問博識者卷末書云是書陳義推事咸中理道指夷簡安石之奸邪別王旦王曾之得否可謂不惑俗評矣惜冠準之不做虜司馬公之右安石英裁其言乎甲午春後渠識又朱書云此書詞則後世之規義則先王之旨



不駁迂有體有用尤足起人忠正之氣妙作妙作

朱文藻曰卷中亦多硃墨評點不知何人手筆

### 遼史拾遺二十卷

國朝厲鵬撰字太鴻號樊榭錢唐人

朱文藻曰此書文藻乙酉歲初館振綺堂首抄是書先是書賈以抄本求售檢校闕卷四之一後又得手彙主人屬余彙錄成完書釐為二十卷越歲戊子吳西林同館復取郁陞宣本校過遂成善本

史糾十七篇

明婁上朱明鎬昭芭撰

其書糾史之失自三國迄宋遼金而  
晉書闕然

朱文藻曰此書抄本案盧抱經先生文弢嘗云頃借得明  
人朱明鎬史糾兩本疑係刪節此書有人記云一百四十  
六頁今所見本前六十三頁北周仁完之後七十八頁合  
計之尚少五頁云云今此本則前七十三頁北周後共後  
五十八頁合計之較抱經所見又闕十頁矣

宋史記二百五十卷列傳第七十五以下皆闕僅存九十四卷

明王惟儉撰字損仲河南人

朱文藻曰此書小山堂鈔本自凡例目錄以迄六十六皆  
朱筆評點改抹六十七卷以下則無據居易錄稱改正目  
錄是湯義仍親筆此本目錄當依湯本朱筆騰寫而卷中  
間有朱書一清案語一清者小山堂主人趙谷林先生之  
子字誠夫也又有丁敬身墨筆標籤蓋小山主人聚書父  
子賓客環坐校勘之勤於此可見其七十五以下闕卷鮑  
綠飲嘗云王氏圖書沉於汴水此半部從水中撈起世間

流傳惟此而已然考之靜志居詩話云損仲宋史記予從  
吳興抄得之未見出人意表則吳興潘本潘昭度見全書  
傳抄非一不知何時得見也

### 十六國春秋一百卷

魏崔鴻撰字彥鸞

朱文藻曰吳丈西林常云此書非崔鴻原本似是後人取  
晉載記文託名者以太平御覽引用崔書多卷中所不同  
故也文藻案晉載記文與此敘述大異似非取之偽託若

以為非元本則不可知辛郊之冬振綺族人欣然重刻才數十版不竣工而罷

### 十國春秋一百十四卷

國朝吳任臣撰字志伊仁和人

朱文藻曰此書康熙十七年回回堂彙賢齋梓行其書大率裒集舊文不加論斷即以南唐而論紀傳皆取馬陸二書連綴成篇雜采他書馬注及其大端補入正文然引用諸書或有謬誤不能悉加改正如徐鉉傳載說文通釋四



十卷說文繫傳四十卷通釋即繫傳中標目楷書只四十卷宋史藝文志誤分為二書而此處亦仍其偽謄蓋采輯羣書難于校訂理勢然也此書板已散佚印本無多當藏之卷中間有墨筆著論是吳石蒼手筆尤可貴也

### 江南野史十卷

宋龍衮撰

朱竹垞跋云江南野史鄭樵藝文志載有二十卷此本止錄十卷當再于別志察之案通考引晁氏曰凡八十四傳今此

本止三十四傳其非完書明矣

錦里耆舊傳四卷缺卷一至卷四

宋句延慶撰字昌裔平陽人

姚咨跋曰是編得之門人秦汝操氏汝操又得之沈辨之氏  
惜乎祇後四卷缺前四卷未得為全書大抵古書之存于世  
者多殘缺不全先達邵文莊公嘗云麟角鳳毛奚以多為愚  
于是編亦云嘉靖戊午冬十一月月幾望勾吳皇山人姚咨  
舜咨甫識時年六十有四

丁希曾跋云竹所見只三卷此多一卷洵是善本第卷帙詮  
次非舊丁亥冬仲飽丈以文從吳中歸贖得明時舊抄因為  
勘正并錄明人兩跋于後正見此書在洪武年尚完好也冬  
至前三日錢唐丁傳誌

朱文藻曰此書抄本不精丁亥歲飽飲買得吳下本借

此本屬丁希曾校過改正處甚多且補書書錄解題一條  
姚咨跋一則又在家道人跋一則是洪武年舊跋

吳越備史四卷補遺一卷雜考一卷

吳越掌書記范垌巡官林禹撰抄本

吳焯尺牘卷首跋云案此編正卷四補遺一為卷凡五卷帙似與通考後一條合而實非也今以前一條所見之年考之此編第三卷已盡石晉開運四年依陳氏當止此今第四卷盡開寶元年陳氏所云闕者已全豈散佚後復得耶抑後增補耶陳氏云又增三卷至雍熙四年今補遺一卷終俟之世考宋氏倣卒於真宗端拱元年即雍熙四年之明年陳氏志其闕今并仍其舊矣今觀補遺卷首原稱後人增補因前補

者既闕而後人重補之第采本傳與家傳以足成此書耳至  
第四卷末有錢中孚錄寫題名錢渙又署跋尾洵為儼所撰  
原本古今卷帙或有歸併第十二卷不應簡畧如是當未儼  
原序考訂也康熙己未夏五月兩甯乘暇考訂因記繡谷亭  
主

又卷末跋云偶客吳興得吳越二十四世孫受微刊本中小  
傳頗多刪節缺畧其後序題萬歷庚子此本前有馬蓋臣論  
亦屬明嘉靖間定本至萬歷時不知何以又有刪削此抄本



為當時林范原撰本亦尚未可定也據受徵刊本武王二卷  
文穆王忠獻王吳越國王各一卷凡五卷吳越備為一卷云  
是越中比部德洪所纂則前有錢中孚跋尾者原是五卷此  
抄本標題誤也卷帙雖合稽之陳氏之論究難定此本為林  
范原本乙未六月十有九日繡谷亭主再記

### 朝鮮史畧六卷

不知作者

朱文藻曰此書明萬歷丁巳所刊字畫端楷卷末各有校

書題名一莆中郭天中聖僕二吳郡趙宦光凡夫三吳郡  
黃習遠伯將四吳郡葛一龍震父五閩中何璧玉長六株  
陵廖孔悅傳生

東國史畧六卷附百夷傳一卷

東國史畧即朝鮮史畧而易其名百夷傳錢古訓撰字未詳

武肅十六世孫餘姚人

趙琦美東國史畧跋曰東國史畧六卷不著姓氏于燕京馮  
滄洲仲纓齋頭見之因借錄一冊其書雖簡畧而上下數千

年間事歷歷可指諸掌至如幽奇理亂之跡亦少槩見可謂  
東國之良史也滄洲別有東國通鑑三十冊為東明石大司  
馬星取去聞其史更精於此惜不得覩之馮常從事于東征  
有全城之功而不見賞今鬱鬱長安索五斗不能侏儒之飽  
腹也悲夫萬厯庚戌三十八年季<sup>秋</sup>朔後三日海虞清常道人  
趙畸美書于金臺承恩寺之邸中

又跋曰予欲集古今叢史患遐陬之弗及周知矣歲庚戌補  
考在京師閑步刑部街因見此書遂買之錄一冊以隨奚囊

蓋亦山經水志之一班云萬曆三十八年庚戌十一月十有  
三日清常道人趙琦美識

朱文藻曰此書本趙清常家藏鈔本二跋是清常墨蹟有  
印其後歸于孫慶曾家百夷傳有夏原吉後序並詩

李侍郎經進六朝通鑑博議十卷

宋李燾撰

朱文藻曰此書從鮑淶飲借得影鈔宋本屬兜子運復影  
鈔後半冊而自為鈔其前半冊按侍郎乞尚史學劄子大

旨不過欲朝廷制策取士宜兼採用六朝不得專尚漢唐  
及觀其第一卷序論之旨則深欲主上堅恢復之志審制  
敵之策故其書一名制敵得通鑑博議合為百篇離為十  
卷其用意深矣

類編皇朝中興大事記講義二十七卷

宋呂中撰起高宗迄寧宗

卷末止名字朱書跋云高宗時事讀之頗醒人心目至孝宗  
而平衍無足觀矣光寧迂腐可厭幾成廢物其意亦趨附時

相耳不足道也崇禎丁丑七月十日道迄于<sup>姑</sup>蘇道上是日  
始聞脫距之報

宋季三朝政要六卷

不知作者明張萱刊並序

目錄前題云理宗國史載之過此無復可攷今將理度兩朝  
聖政及幼主本末纂集成書以備他日史官之采擇云

肅皇外史四十六卷

明范守己撰紀世宗一朝事



朱文藻曰此書鈔本中有朱書補注不知何人卷首有澹生堂印又有山陰祁氏印首葉有印文曰澹生堂中儲經藉主人手校無朝夕讀之欣然忘飲食典衣市書恆不給後人但念阿翁僻子孫益之守弗失曠翁銘

### 明列朝實錄

朱文藻曰已上實錄十一部

據書錄實  
十二部

俱係鈔本吳石倉

家藏中間有朱筆校勘處每部各有存缺單一紙是石倉手書今較原單新缺之卷亦多此外尚有太祖憲宗熹宗

三朝未備其惠帝景帝當代革除已編入太宗英宗之內莊烈帝本無實錄其穆宗實錄但有其名雖存實缺須求善本悉為鈔補誠快事也

### 兩漢詔令六卷

宋程俱輯

陳德跋曰余有嗜書之癖見片紙隻字輒掇而藏之癸丑之夏見杜氏童偶挈管韓二字趙彥生含元齋集併兩漢詔令裝璜雖不甚佳然鐫法頗類宋人手迹因嚮而有之以資耳

目之一助云爾萬歷癸丑孟秋十日汝章子書于綠陰深處  
未有陳德圖書

獨斷二卷 鼎宋抄本

漢蔡邕撰

未有跋云邕采古及漢興以來百度類見此書而傳本多誤  
淳熙乙亥建人熊克刊于赤城書院且聞嘉祐間有余擇中  
者嘗為改正釋以己意題曰新定獨斷恨未之見也七月十

日記

唐會要一百卷鈔

宋王溥撰

朱文藻曰是書乾隆丙戌借得厲本鈔十之四明年丁亥又借得瓶花齋本補完俱未校過其中卷七之十卷九十二九十三原書缺失襍寫他書兩本俱同無從補正今並闕而不錄按朱竹垞跋云第七卷至第九卷失去襍以他書第十卷亦有錯襍文字九十二卷缺第二翻以後九十三九十四二卷全缺云云與此本小有不合

近事會元五卷

宋李上交撰

簡末跋云太歲乙酉避亂于洋蕩之村居是年六月夏悶  
無聊遂手書此本二十日而畢是秦季所藏余從孫岷自借  
抄之七月六日孱守玄人記

歷代帝王傳國璽譜一卷玉璽博聞一卷

譜宋滎陽鄭文寶撰祇四葉末有嘉靖辛丑伍忠光跋博聞  
九葉末題阜昌宋隆夫書于淮西旡為州之官舍想即其人

作也後有成化辛卯姑蘇吳寬跋隆夫元時人也

趙清常曰曰予家有傳國璽譜未見所謂玉璽博聞也癸

卯二月九日因謝弔至赤岸李氏譚間因及此書予異其

書名即令童錄于冊冊中其間原多行草童懵不知書多錄冊

謫馬又急于解維不及一校因以意改數字未得悉釐正

之尚俟異日再圖一閱此中所載事大畧與譜所紀同不

足多也此公博雅多蓄異墳如錄鬼簿湘山野錄等書正

多也又說其里中人有宋本管子云清常道人志




寶祐四年登科錄一冊宋刻已失

朱文藻曰此書因文天祥而存也前有殘缺處二十餘  
葉後缺文文山廷對策及門謝表中間模糊之處亦多  
乾隆丁亥得飽綠飲所藏鈔本缺者補之互異者標識  
于上兩家藏本畧稱完善惟以朱刪已下尚有二十四  
人未詳廷對策下門謝表前缺文一段並無從考補為  
憾

歷代建官攷一冊



題曰豫章李國祥休徵撰錢唐陳伊傑我人訂  
無序不知  
撰人時代

吳石倉跋云此吾友陳我人手訂之書我人早逝無子其  
弟以此售吾其撰人為豫章李休徵無從考其時代矣

### 石倉記

龍飛紀畧八卷

明吳朴撰

朱文藻案朴又有秘閣元龜政要十六卷趙一清跋曰

右秘閣元龜政要不詳作者姓氏閱其書知為閩之漳  
州人嘉靖時嘗從征安南者按吳朴龍飛紀畧自序云  
先大夫范長劉辰除和遺事太祖大見欣納臣于征伐  
禮樂采而輯之久藏巾笥以議處安南為與議者聞于  
當道流遁數遠提學副使田行文取覽直名為國朝綱  
目云云其中論斷語亦多徵用之則是書疑即朴所作  
朴字華甫漳州詔安人所謂副使田即吾鄉先達田公  
汝成叔禾也書凡十六冊首葉有曾在李鹿山處圖記

李公諱馥亦閩人嘗撫吾浙以事罷去不數年間所藏  
遂散亡流失良可慨矣又檢諸簿錄中惟絳雲頭書目  
有之冊數與此合而不注明卷數按明太祖以壬辰起  
兵是書始於丙申太祖在位三十一年是校終于二十  
八年首尾俱有遺脫內失甲辰至丁未四年事又失丁  
巳至己未三年事而行款點畫之舛誤者不可悉數是  
本既為虞山錢氏舊鈔宜其精善完好而紕繆若此信  
乎藏書之難也予方苦足疾兀坐無聊因取高皇文集

并實錄諸書參校庶幾十得其五云雍正九年冬至前  
二日勿藥子記此書插架所未備近在書局見此書惜  
勿藥手跋考據精詳錄歸附此既存趙文且因此益見  
吳氏之學也

## 關史二卷

唐參寥子撰

趙昱曰唐關史下上卷得西亭汪氏鈔本勿遽錄就復得  
秀野草堂刊本勘訂正謬字數百然細閱刊本尚多舛錯

亦未稱為完善也雍正丙午除夕前一日谷林識

邵氏聞見錄二十卷

宋邵伯溫撰

未有跋云嘉靖十三年夏日對宋本校勘一過前本與中間一冊在予家四十年始得輾完可見奇書則不能遇也

保之保之野竹居士謹記

揮麈前錄

卷四後錄卷十二餘話卷三錄卷三

宋王明清撰

朱文藻曰右書四種合為一書裝六冊皆鈔本吳石倉  
手校有印觀其筆記雖省墓必携之舟中前輩讀書之  
勤于此可見

曲消舊聞十卷

宋朱弁撰字少張徽州人

末有跋云辛丑正月元宵後二日石倉校畢然譌字猶未  
盡也

清波別志三卷

宋周輝撰字昭禮淮海人

楚頤正跋曰吳陵周氏昭禮客遊都城居清波門日往來湖山間把酒賦詩悠然自得其樂或謂可追和靖之風流比有傳其所著清波三志讀之起敬不但如前所云

吳焯跋曰稗海中有清波雜志觀昭禮此序前志係十二卷稗海刪摘僅存三卷續文獻通考有此目不著卷帙是編係別志宋人說部中最佳筆也

又曰余觀前志中昭禮自云祖居錢唐後洋街此後跋云



居近清波門即以所居之地名其書猶周密居癸辛街即稱癸辛雜識是也就李遵待郎抄本今藏繡谷亭康熙乙未夏至展觀因記

又曰此編載中興諸事燦然可觀其論平燕始末足以參決正史戊戌上元吳焯手識

朱文藻曰此書鈔本吳焯字尺鳧繡谷其家庭有古藤一本花時爛漫如繡梅亭其上顏曰繡谷因以自號藏書最富其子名城字敦復號歐亭嗜書能善繼之余見

時年已七十矣其增蓄書處曰瓶花齋距振綺堂數百武而近兩家主人常以文酒娛佳日借書之伴往來無虛日今俱相繼辭世追憶舊事不覺黯然

### 朱氏筆記六冊

明朱文樸睢陽人

朱文藻曰此書抄本無序卷末有睢陽世家印蓋文手藁也不署撰人姓名祇從第五冊見其自叙家世始知姓名案題名碑成化甲辰進士二甲十名朱文直隸蘇

卅府崑山縣民籍益知文本世籍睢陽其母鄭孺人家  
崑山因寄藉焉

國朝名臣言行畧四卷

明劉廷元撰常州人

二十卷未有跋云辛丑

嘉平朔日積雪初晴午前酬應吊

事歸坐北軒繙閱盡此卷歲行暮矣此中佳趣恐未能常

亨耳希真書佳趣之佳末闕一畫當是避其家諱

昭忠錄一卷

不知作者皆宋末殉難諸人列傳鈔本

未有朱跋云此書字多譌謬取原本校之改正一二未能盡也當再求善本勘過庚戌秋七月初七日記

夏忠靖公遺事一卷

明夏蘊輝撰諱原吉字維喆

朱跋云甲戌夏先外父自山左量移江右便道歸南余逗遛鹿城晤公爽內弟於水閣圖書滿架中有夏公遺事一集假以携歸又于內父尺牘居見夏公小照即摘數語于

上以示高山之仰一時兩快俱無意遇之庚寅中秋六日  
丹臣記

鄭端簡公年譜七卷

公諱曉號浚泉明鄭履洵刻鄭履淳論注洵淳公二子

朱文藻云後有墨筆三坊行云景山錢老先生編次并序

養白馮老先生集文并序二叙付梓未完據此則是書  
履淳出其家藏文稿畧為撰集錢馮兩公實有編次之  
力而書成之日則履洵刻之兩序未刻當候異日耳

四明文献志九卷補志一卷

明李堂撰字堇山郡人

朱文藻曰此書抄本中英全謝山跋語一紙是乾道四  
明志跋無預此書慮其散失其文不傳故仍附卷中而  
并錄其文曰四明志乘于天下為最完自胡尚書寶慶  
志吳丞相開慶志袁學士延祐志王總管至正志楊教  
授成化志張尚書嘉靖志無佚失足以豪矣顧以不得  
張制使乾道志為恨歲在戊午自京旋里重登范氏天

一閣其書在焉不知前此何以不及省錄也為之狂喜  
而揚之小玲瓏山館馬氏杭之小山堂趙氏皆未借鈔  
顧予猶疑非足本嘗見成化志中于慈谿遐追山二廟  
下紀劉毅胡赧諫吳越無納土事謂出自乾道志今竟  
無之則脫簡尚多然要屬難得之書可寶愛也鮎埼亭  
長全祖望按小山堂抄本書多歸振綺堂乾道四明志  
抄本獨不見

小號錄一卷

宋徐光溥撰

末題云至正壬寅九月廿五日丁郊華亭孫道明寓於洒  
北村居映雪齋時年六十又六日也又一行云虞山錢曾  
遵王藏書

烈女傳一卷

國朝吳穎芳撰字西林

朱文藻云此即西林翁手寫本乾隆丁亥所作先是魚  
亭先生官西曹時留意各省節烈案件欲撰成烈傳以



表揚之屬解組歸寓同曹尹嘉銓亨山先生俾胥抄錄  
各司節烈案件起乾隆初元迄二十八年而止郵寄數  
冊乃屬翁撰成列傳一卷其後以卷中尚少陝西廣西  
雲南貴州及遼東諸省又斷以三十年為限尚少二年  
時湯憲吉甫在京師續寓書托其叔芻棠齋先生公  
餘之暇檢得成案二冊携歸正欲續撰以補未備而魚  
亭先生已捐館舍不獲究其志可悲也已卷中序一篇  
亦翁所代述之作蓋將為版行地也

吳郡志五十卷有二部一部茂苑韓氏藏板宋刻抄補一部

汲古閣刊

宋范成大撰趙汝談序

毛晉跋曰余應童子試受業于伯曄高師師為府學博士  
員率予登大成殿禮夫子像次謁韋刺史祠見西廡方策  
半架塵封蠹蝕抽而視之迺吳郡志不知何人所作何代  
所鑄也泉從太史錢師榮本樓獲宋刻范文穆公吳郡志  
珎為髻珠亦不知其版何在也適禹修方公為雲間刺史  
葺理郡志馳書招予與眉山先生共事因携此帙入頑仙

廬眉公開卷見門類總目擊節嘆賞得未曾有題數語于  
後時有史辰伯在座眉公指謂余曰貴郡文獻都在此老  
腹笥中史因掀髯縱譚撫卷曰此志為趙宋紹定刻板藏  
學官韋刺史祠中余恍然昔年所見深愧童蒙覲面失之  
亟理棹入吳門再拜韋祠但見朽木五片疊香爐下摸板  
尋行與藏本無二叩訪其餘已入庖丁鑿烟矣此題汲古閣刊本  
朱文藻曰此書卷一至十八皆宋刻十九抄本二十至  
二十二宋刻二十三已下俱抄茂苑韓氏所藏有元覽

閣書畫印又一部是汲古閣刊本有毛晉跋觀跋語則宋本吳郡志真當寶如拱璧也毛氏去今又百數十年重刻之書已不多觀况宋刻耶

太平寰宇記二百卷目錄二卷

宋樂史撰

朱文藻曰此書抄本精楷缺卷第四第二十九三十第一百七一百八第一百十三至一百十九案朱竹垞云

康熙癸亥抄自濟南王祭酒池北書庫闕七十餘卷後

二年復借昆山徐學士傳是樓本繕寫補之尚缺河南  
道第四卷江南西道第十一至十七卷聞黃岡王少詹  
購得上元焦氏所藏足本及詢之則卷數殘闕同為今  
此本所闕較竹垞所闕同而又加闕二十九三十一百  
七一百八共四卷此四卷似尚可補何時再覓善本足之

### 吳中舊事一卷

不署姓氏

据顧跋知是元陸友仁撰吳郡人

末跋云余嘗見陸友仁書吳中舊事一卷于衡山先生几

上後數年過蒼雲館見已裝帙且用松雪翁印印之遂假  
歸亦錄一冊仍係徐顯克昭所著稗史雜錄友仁小傳于  
後以見非松雪翁也筆隆慶改元丁卯四月安雅生顧德育  
記時年六十有五

乾道臨安志三卷

宋周深撰字彥廣吳興人

厲鶚宋本跋曰乾道臨安志十五卷宋臨安尹吳興周深  
彥廣所修也此宋槧本僅一卷至三卷無序目可稽觀其

稱孝宗為今上紀牧守至淙而訖其為乾道志無疑吾郡志乘之傳世者北宋圖經久矣無有愚南渡建為行都則此志居首今孫君晴崖從都下獲此乾道志雖僅什之一二而當年宮闕官署及城中橋梁坊巷具存職官亦燦如指掌武林掌故之書莫有或先焉者淙尹京時撩湖浚渠綽有政績其書更可寶也

朱文藻曰此書影抄宋本乾隆己丑七月從鮑涑飲處見孫氏所藏宋槧本屬跋在卷首因校勘改正數字而

錄厲跋于卷末

武林舊事十卷

題曰四水潛夫輯序曰乾道馮煦間三朝授受兩宮奉親  
古昔所無一時殷文物之盛號中元祐豐亨豫泰至賢祐  
景定則幾于政宣矣予曩于故家遺老得其梗槩及客修  
門間聞退璫老監譚先朝舊事輒耳諦聽如小兒觀優終  
日夕不少倦既而曳裾貴邸耳目益廣朝歌暮嬉酣翫歲  
月謂人生正復若姑山初不肖承平樂事為難遇也及時移



物換憂患飄零追想昔遊殆如夢寐而感慨係之矣歲時  
擅藥酒酣耳熱時為小兒女戲道一二未必不反以夸言  
欺我也每欲萃為編如呂榮陽雜記而加詳益元老夢華  
而近雅病忘慵惰未能成書世故紛來想終于不暇紀載  
因撫大槩雜然書之青燈夜永時一展卷恍然類昨日事  
而一眴朋遊淪落如晨星霜葉而余亦老矣噫盛衰無常  
年運既往後之覽者能不興愴我吾歎之悲乎四水潛夫書  
又第七卷序曰是書叢勝無足言然間有典章一二可觀故

好事者或取之然遺闕故不少也近見陳源家所藏德壽宮起居注及吳居父甘昇所編逢辰等錄雖皆瑣碎散漫參考旁證自可互相發揮又皆乾瀉春親之事其一時承顏養志之娛燕閒文物之盛使觀之者錫類之心油然而生于世教民彝豈不補哉因輯為一卷以為此書之重然余所得而聞者不過此數事耳若二十八年之久余雖不得盡知而盡紀之然即其所知其所不知蓋亦可以想見矣因益所未備通為十卷雜然書之既不能有所次第而

不暇文其言詞貴乎紀實且使世俗易知云爾

汲古閣舊本二跋其一曰武林舊事乃弁陽老人草窗周密公謹所集也刊本此第六卷山村仇先生所藏本終十卷後歸西河莫氏余就假于莫氏因手抄成全書以識歲月于家塾至元後戊寅正月忻孝德用和父

其二曰此二冊余假于太子太保遂安伯陳公家同年友文部副郎黃君廷用錄之以歸余云宏治乙卯夏四月望  
祝靖跋

嘉靖重刻本叙跋二首卷首叙曰夫省方觀民因俗考政  
固所以資監戒而志興衰者也有宋播遷江表建國錢唐  
當時臣辟謂竄枕戈嘗膽修政治兵以復君父之讐雪中  
原之恥惟恐後者也願宴安樂樂曰事嬉遊峻宇雕牆窮  
極嗜欲更不知有二帝蒙塵不共戴天之憾此乾坤何等  
時也何暇于流連光景沈酣節者序我昔人稱魯大綱予亦  
謂南宋之大綱厥亦有在乃棄而不講馴至民風國體日  
以陵夷迄于崖山之溺可痛也四水潛夫不知其何許人

編錄是書津津然若道其一時之盛者予意是編當與吳越春秋並觀則前大巡來公所以存而刻之之意歟予所以由觀感而興監戒者當自得之矣舊梓漫蕪不可讀而因翻之云嘉靖三十九年歲在庚申秋七月十六日杭州府知府閩中陳柯謹書

卷末跋曰杭郡地卑益不可以國宋高宗南播樂其湖山之秀物產之美遂建都焉傳五帝享國百二十有餘年雖曰偏安其制度禮文猶足以彷彿東京之盛可恨者當時

之君臣忘君父之讐而沉酣于湖山之樂竟使中原不復  
九廟為墟數百載之下讀此書者不能不為之興歎書凡  
六卷四水潛夫輯亦不知為誰其紀武林之書較他書為  
備因命工刊置郡庠俾博雅者有考焉武林杭郡名正德  
戊寅孟夏巡按浙江監察御史奉天宋廷佐題

繡谷亭吳氏藏抄本跋曰武林舊事十卷元周密公謹撰  
此虞山毛氏舊本余得挿諸架即瑛七修類藁云公謹居  
齊之東作齊東野語居杭癸辛街作癸辛雜識泗水出山

東號泗水潛夫居華不注號弁陽老人第此編皆叙行都  
事似不應題泗水今此本作四水當別有義意卽瑛又云  
舊事十二卷杭刻其六全者在吳人袁飛卿家海蓋姚士  
鏡麟刻五卷其第一基待詔諸篇此本無之當為錄補尚  
缺一卷耳康熙戊戌春王十九日<sup>有</sup>繡谷亭主

又曰是歲閏中秋又得毛氏汲古閣舊本方見潛夫原序  
并卷尾元明人二跋亟為錄補此書凡三校閱矣

又曰己亥春再取汲古舊本校讐凡脫誤處並從是正疑

者標注于旁蓋古今名色不同未可以文理斷也是日病起鑒閣垂絲海棠盛開坐觀竟日點終此卷

又曰修門地名也文山指南錄序六有臯亭山距修門三十里今杭郡志不聞有是名即卷中白石茅灘諸名亦湮沒難考矣明日望月起再書

又曰又明日飯罷錄補漏葉三處各數百字病餘頭目森然第無以銷長晝然晴牕拂凡心地轉覺清涼後之讀是書者可無牴牾之疑矣大凡舊籍不經校讐終非善本且



傳抄尤多魯魚帝虎之憾萬卷豈易盡閱惟日不足苦心者自知之

又曰是日吾友徐研廬以建溪舟行詩見示吳中顧翰林俠君來訪不晤而去俠君刻元詩余有元人集百餘種尚俟商榷也

又曰吾友鄭芷畦湖錄云四水者湖城以茗水餘不水前溪水北流水合而入于郡城之雲溪故有四水之名舊人詩四水交流雲、聲是也據此則四水乃湖之地名公謹

生于湖中年遷杭晚仍歸老弁山又號弁陽老人則四水  
潛夫之號亦猶是耳古本作四水洵乎不謬然余疑此義  
十年方得其說實為快心己亥中秋日焯書

厲鶚墨蹟跋云修門出處見宋王招魂辭中李善注郢城  
門也郢蓋楚都宋人遂借為都門之稱若吾杭地名則無  
此也繡谷先生偶誤不可以不辨乾隆壬戌九月五日厲  
鶚記追思吾友下世已十年不禁泫然

朱文藻曰此書二本一是小山堂鈔本十卷一是嘉靖庚

申陳柯重刻本鈔刻諸跋全錄如右見前輩校書苦心案  
七修類稿作十二卷誤也姚士麟續刻五卷第一基待詔  
諸篇本即前刻遺六卷中諸色伎藝之未全者續刻補足  
之是名為五卷實四卷也

新編武林紀事六卷續編二卷

仁和樂間道人吳璿類編

陳堯道書後畧曰或曰子今年老矣宜安靜願養何必勞  
碌若此乎予曰昔仕懷寧時遇鄉先生李巨川云年老觀

書猶暮夜以燭夜若非燭一物無所見老年非書則益昏  
昧一無所知矣予愛其言有理故自忘其勞焉及考葆光  
錄載吳陳瓚字錫用年逾九十耳目聰明猶勤于筆硯我  
朝名臣鄭楷著潛溪采景濂行賁云先生惟刻意于學自  
少至老未嘗一時去書不觀且視近甚明夜然燈于几卧  
絺幘中閱蠅頭小書一黍上能作十餘字皆可辨點畫若  
先達樂閑吳公年八十餘獨坐一室不設床枕注書立言  
手不釋卷此三人者真天地間之完人而為吾輩之所當

法者也余因錄完紀事附書于末簡以表景仰之意兼以自勵爾時隆慶辛未季夏吉旦和仁曲江陳堯道撰

朱文藻曰此書抄本卷數與陳跋合但開卷第一條題曰德壽宮賞月第四十七不知其第四十六已上如何也陳跋詳述老年好書之勤可為後世勤學之助

東城雜記二卷鈔

國朝厲鶚撰

朱文藻曰此文藻手鈔樊榭先生吳邑鄉名宿登賢書舉



博學宏詞科博覽羣書初居南湖其後移家東園暇日  
采錄諸書遂成是編不加詮次名曰襍記振綺主人得  
其初稿有年乾隆丁亥又得其手書續稿因合前後錄  
為二卷

### 西吳里語四卷

明宋雷撰自號吳興市隱居士湖州人載湖州事

吳石倉首冊尾跋云丙午花朝日石倉老人校閱于清溪  
縣官署時年七十次冊云花朝後一日石倉又校畢此本

末張之闕惜未補也三冊云十三日燈下又畢此本四冊  
云十四日又畢此本時積雨初霽日射牕櫺老眼為之頻  
豁石倉記

朱文藻曰此書抄本有二其一卷首缺數頁其一卷首  
全而第二冊尾缺一葉是吳石倉手校過並存之

豫章雜記二冊

題曰泰和郭子章輯

首冊卷末有葉燾翁手書跋云小隱書一卷余得之一友

人案頭自稱為敬虛子亦不知其姓氏據序文年月則在世廟時人也書首崇櫟許終順昌山人一皆高尚之士亦皆記傳之所習聞習見者獨所引楊慈湖遺書云人生一世只忙迫一場便休真令人言下惕然廣翁識此是他本跋語不知何以真此冊

南詔野史一卷

明郡人倪君撰

朱文藻曰此書抄本得之吳山書有楊升菴序一篇信是真蹟嘉靖庚戌升菴成滇時留意滇中志乘得見此



書書序卷首可珍也

崑崙河源彙考一卷

國朝萬斯同撰字季野四明人

朱文藻曰此書抄本萬氏懲世儒言崑崙之謬博采羣書上自禹貢山海經水經史漢晉唐諸史下逮元史河源志柯九思序明祖實錄一統志肅鎮志悉考而辨之成書一卷乾隆辛卯四月吾友鮑錄飲得抄本一冊于書肆余假歸東軒屬友人抄為一冊卷首林佶有叙是

書大指究論崑崙古今遠近之殊專為潘昂霄河源志而論而泛及治河之法謂觀是書可得由源而及其流不思崑崙之辨明初無補于河患之治也特其考據之勤成一家言而已此書無刻本說見紀元稟考序中

### 澄懷錄二卷

宋周密撰字公謹號弁陽道人三齊人

厲鶚跋曰勝情勝具兼之為難弁陽老人于簡冊中作卧游想大是安樂法也所綴葺語雖時見于他書如下卷沈

廬山姜白石數則流傳絕少足令閱者竊心從小山堂主人借抄畢訂正缺訛三四處歸之丙午長至日樊榭厲鶚書  
南谿書院志四卷

明方溥撰

卷首副葉墨筆記云雍正乙卯春三月得此書失韋齊文公兩公像及序目首張數葉訪得足本當摹補之後序亦闕尾端居室記二十八日

萬卷堂家藏藝文目一冊

明宗室睦樗撰自號東陂居士

曹溶墨筆題詞曰有明宗室工藝文者莫多于隆萬而灌甫宗正為之最考其持躬謹潔多門內之行蒙勅獎風諸藩今觀其書目部分完整卷逾數萬所嗜在此故能剗削豪習與古作者並馳也孫北海少宰初令祥符獨就其第鈔經注二百餘冊載歸京師崇禎壬子賊決河隄書堂付之巨浸徒有其目存耳予因慨太平難覩以二百七十年金甌無缺而自楊文貞葺文淵閣書目外未嘗一遺求書之使設校讐之官

亦當時之缺典也。道不終衰，固宜有若灌甫者出任其責。然灌甫竭一生心力所致，止于斯異書，猶不謂盡。出今之號為藏書者，不過斥金帛有餘，羅市肆所習見，吾知聖賢典籍其不至漸漸滅者，亦倖焉而已。倦叟記。

菜竹堂書目一冊

明葉盛撰

書厨銘曰：櫝必謹鎖，必牢收；必審閱，必高子子孫孫惟學。數借非其人，亦不孝。

聚樂堂藝文目錄四冊

不著姓名

朱尋尊跋曰此係西亭王孫著錄王孫嘗刊李鼎祚周易  
集解每翻刊聚樂堂名世所傳萬卷堂目都無卷數不若  
此本之該備也康熙丁丑日北至竹垞老人識

絳雲樓書目二冊

樓為錢牧齋藏書之所

曹溶題詞曰虞山宗伯生神廟盛時早歲科名交游滿天

下盡得劉子威錢功甫楊五川趙汝師四家書更不惜重  
資購古本書賈聞風奔赴捆載無虛日用是所積充牣幾  
埒內府視葉吾莊吳文定及西亭王孫或過之中年構拂  
水山房鑿壁為架度其中四方從游之士不遠千里行膝  
修贄乞其文刻繫牲之石為先世光榮者絡繹門外自王  
弇州李大泌以還此事殆希見也宗伯文價既高多與清  
流往還好延引後進大為壬人所嫉一躓不復起晚歲浮  
沉南國操委蛇術容其身所薦某某大異平居所持論物

論為之頡頏北上未久稱疾告歸居紅豆山庄出所藏書  
重加繕治區分類聚裊絳雲樓上大櫝七十有三碩之自  
喜曰我晚而貧書則可云富矣甫十餘日其甥女中夜與  
乳媪嬉樓上翦燭地悞落紙堆中遂燼宗伯樓下驚起燄  
已漲天不及救俄頃樓與書俱盡予聞駭甚特過唁之謂  
予曰古書不存矣尚有割成明臣誌傳數百本俱厚四寸  
餘在樓外予昔年志在國史聚此今已灰冷子便可取去  
予心艷之長者前未敢議值則應曰諾、別宗伯亟訪葉



聖野託其轉請聖野以稍遲越旬日已為松陵潘氏購去  
歎息而已今年從友人得其書目手抄一過見不列明人  
集偏于瑣碎雜說收錄無遺方知云厚四寸者即割文集  
成之非虛語也予以後進事宗伯而宗伯絕歎曲丙戌同  
客長安丁亥戊子同僦居吳苑時時過予每及一書能言  
舊刻若何新板若何中間差別幾何驗之纖悉不爽蓋于  
書無不讀去他人徒好書東高閣者遠甚然大偏性為未  
愛惜古人者有二端一所收必宋元版不取近人所刻及

抄本雖蘇子美葉石林三沈集等以非舊刻不入目錄中  
一好自矜嗇傲他氏以所不及片楮不肯借出儘以單行  
之本燼後不復于人間予深以為鑒偕同志申借書約以  
書不出門為期第兩人各列所欲得時代先後卷帙多寡  
相敵者彼此各自覓人寫之寫畢各以奉歸崑山徐氏四  
明范氏金陵黃氏皆以為善流通而無藏慝之患法甚便  
予又念古人詩文甚夥其原本首尾完善通行至今者不  
過十二三自宋訖元其名著集佚者及今不為收羅將遂

滅沒可惜故每從他書中隨所見別出補綴成編以存大槩如孫明復劉原父范蜀公等頗可觀宗伯地下聞之必以為寒乞可笑然使人盡此心古籍不亡斷自今日始矣又曰自宗伯倡為收書虞山遂成風俗馮氏陸氏葉氏皆相效尤毛子晉錢遵王最著然皆不及宗伯賈人之狡獪者率歸虞山取不經見書楮墨稍陳者雖極柔茹靡爛用法牽綴洗刷如新觸手以楮襲其裏外則古錦裝褙之往往得善價他方所莫及也然此目猶有可疑者昔予遊長

安堂上列書六七千冊宗伯間日必來來則徧徧架上遇  
所乏鉅恒借鈔如是數四予私冀異日遂可借宗伯書也常  
請曰先生必有路振九國志劉恕十國紀年南歸幸告借  
宗伯許諾丁亥予絜春寓閭門宗伯先在拙政園相見首  
及二書疾應曰我家無此書曩言者妄爾予以先輩之言  
誠不敢再請嗣後弔其笑坐久忽自歎曰我有惜書癖畏  
因借展轉失之子曾欲得九國志十國紀年我實有之不  
以借子今此書永絕矣使抄本在予可還鈔也予不樂而

退乃目錄亦並無此二書宗伯暮年鍵戶注佛經于書無所不采禪林推為該博何故道藏則瑣細必收釋氏雖法苑珠林宗鏡錄等俱不載近人刻有學集集中體制頗擬議宋文憲公其文集當朝夕省覽目亦缺之足徵目非其全宗伯真不可測也安得起九原而問之

昭德先生讀書後志二卷附志上下二卷

宋晁公武撰

吳焯後志跋曰昭德晁氏既校井氏所藏書目作讀書志

四卷復收錄未備作後志二卷此編是也瀉祐中三衢游  
釣始彙集并附志衍為二十卷番陽黎安朝毀以傳世前  
志杜鵬舉序黎氏刻時已失之僅存昭德自序今世行讀  
書志此後序亦在焉第此編既單行挿架不可不補亦以  
見昭德冥搜遐索之苦心且此編盡采入文獻通考以今  
校之頗有牴牾讀通考者當留意焉戊戌三春從石倉先  
生假此本傳錄誤字正多余本意為校正仍歸石倉校之  
都成善本春盡日焯手識

吳允嘉後志跋曰戊戌首夏廿有一日往古蕩祝楊老姊  
八十壽舟中與繡谷本參校謁關者俱以硃筆增改稱善  
本也石倉自記

吳焯附志跋曰此踵晁氏讀書後志而作故并後志分為  
五卷內閣書稱前志別為一刻而此二志係七卷以今考  
之第五卷分上下帙耳實無七卷也昭德之門人姚應績  
將後志併入前志中衍為二十卷馬氏盡采入通考不同  
者蓋當時槧樣各別流傳互異學者未可尊馬氏而畧趙

氏也書以質之石倉先生戊戌清和繡谷焯記

讀書敏求記四冊

國初錢曾撰

吳焯跋曰絳雲未燼之先藏書至三千九百餘部而錢遵王此記凡六百有一種皆紀宋版及書之次第完缺古今不同手披目覽類而載之牧翁畢生之菁華萃于斯矣書既成局真枕中出入每自携靈踪微露竹垞謀之甚力終不可見竹垞既應召後二年典試江左遵王會於白



下竹垞故令客置酒高譙約遵王與偕私以黃金翠裘予  
侍書小史啟鐫預置楷書生數十於密室中半宵寫成而  
仍返之當時所錄并絕妙好詞在焉詞既刻函致送王漸  
知竹垞詭得且恐其流傳于外也竹垞乃設誓以謝之竹  
垞既重違故人之命又懼此書之將滅沒也暮年始一授  
族子寒中余聞之久也然知其嚴秘勿肯與近者校讐諸  
書寒閔予之勞竟許以贈余以白金一斤為壽再拜受之  
亦設誓詞焉嗟乎書乃天地大公之物也然有可傳有必

不可傳正如修丹者既成人皆可餌而烹煉之方非堅精凝潔者弗能守然猶可傳者丹之法而必不可傳者丹之道大道在人非其人莫與即斯志也已書之卷末示我後人康熙五十六年三月十八日錢唐吳焯

又曰造王撰成此書秘之篋中知交罕得見者也竹齋檢討校士江南日龔方伯遍召諸名士大會秦淮河造王與焉是夕私以黃金青鼠裘與侍史啓篋得是編命藩署廊吏抄錄錄并得絕妙好詞既而詞先刻造王疑之竹垞為之

設誓而謝不<sub>已</sub>輕授人也晚年稍稍傳出江南舊家間有  
之余從馬寒中得授此本惜其字多謬誤蓋當時半宵寫  
成未經校對其間書疑不多宋版元抄要皆奇秘真書林  
之寶也吾友敬身丁氏獲此本于石門呂氏此又從竹垞  
亡<sub>亡</sub>後其家竊錄而出錯誤更多偶以予所藏本校其大槩  
尚未盡也嗟乎牧翁以萬<sub>十</sub>金錢購置奇書而遂王耳聞目  
見盡平生之效力僅載此六百餘種所<sub>以</sub>謂選其精華觀者  
不當以尋常書錄視之也雍正甲辰冬五月廿又六日燈

下書焯

又第二冊卷尾跋曰雍正甲辰至月蟬花居士取禦見溪  
呂氏明農草堂善本手校是月小盡燈下記

又曰丙午秋闈後以趙用亨新刻本再校

又第四冊卷尾跋曰十二月十日校畢并呂氏本叅勘付  
城南丁敬身焯記

又曰明年乙巳再校一過小年朝石門舟中記

又曰又明年丙午吳興趙用亨已將此書梓行惜其謫字

過多與之校正又對一遍此本中又改正數字是秋重九  
後二日

趙昱跋曰是本向吾友丁敬身借鈔有繡谷手校記語謫  
謬處十正八九間石門袁舒雯家藏善本俟再取校之甲  
辰除夕小山堂錄攷畢谷林

吳城跋曰此書向為曝書亭藏有鈔本珍秘不出先君子  
以重價購得之稼翁晚年力不能守元鈔宋槧雨散雲飛  
而此書遂流落人間吾友趙君用亨為刻之於吳興卷端

冠序一首借先友傳編修玉筭之名傳不知也偶於書肆中見之大怒且以舊史官三字為犯時忌徧告當時欲毀其版幾先丐請賴先子解紛得寢然用亨亦因此愧憤不復刷印示人矣信乎古今典籍傳與不傳蓋有一定之數不可強也乾隆丁巳小除日錢唐吳城記于瓶花齋

吳玉墀跋曰絳雲一炬秘本不可復見造王著敏求記一書後人賴之以攷證天水鏤版行世為功典籍匪淺當時不乏文人必借玉筭太史之名以弁其首較之題碑祝嘏

不猶愈乎玉筍翁何亟亟於求毀耶亦可謂不愛古名者  
矣小谷跋時甲申臘月既望燈下

朱文藻曰此書抄本小山堂從丁瀧泓借鈔其後繡谷  
亭藏本覆校三次改抹之處此本未經是正乾隆丁亥  
八月一日主人從甌亭先生借得屬余重校三日而畢  
向所未經是正及疑謄標識者悉加改正凡百餘字是  
本洵完善矣

金石錄三十卷

宋趙明誠撰

卷末朱筆跋云甲子中秋月寒鑑樓閱畢無善本校勘正其脫誤展卷釐然吳興金玉生

姚世钰墨筆跋云右趙氏金石錄三十卷卷首有印記知為曹氏古林舊抄本古林多藏書尤富於金石文字號稱賞鑑家然如此本訛字最多畧不一校何歟嘗見何義門先生跋新刻蘇子美集云近人讀書但備數而不求善本雖倦圃竹垞猶不免觀此逾信姚世钰記甲子中秋



又云新城王尚書稱章邱大司徒謝儋敏公刻集古金石  
二錄惜江南未見流布無從購蓄也世鈺又書

藏書題識卷二

錢唐汪璐仲連甫手輯

子部

王充論衡三十卷

明程榮校

卷末墨筆序畧曰其文已充字仲任著論衡八十五篇二

錢闕

十餘萬言既作之後中土未有傳者蔡邕入吳會始得之  
恆秘玩以為譚助故時人言嫌伯喈得異書或搜求其帳  
中隱處果得論衡抱數卷持去邕丁寧之曰惟我爾與共

之勿廣也其後王朗來守會稽又得其書及還許下時人  
稱其才進或曰不見異人當得異書問之果以論衡之益  
由是遂見傳而流行四方今殆千歲撰六帖者但摘而為  
備用作意林者止鈔而同諸子吳鄉好事者往往自守書  
牘為家寶然其篇卷脫漏文字踏駁魯魚甚眾亥豕益訛  
或首尾顛躓而不聯或句讀轉易而不紀是以覽者不能  
通其讀焉余幼好聚書於論衡尤多購獲自一紀中得俗  
本七率二十七卷其一程氏西齋所貽蓋今起居舍人彭

公乘曾所對正者也又得史館本二各三十卷乃庫部郎  
中李公秉前所校勘者也余嘗獲寢食討尋衆本雖畧經  
修改尚互有關遺意其謄錄者誤有推移校勘者忘加刪  
削致條綱紊亂旨趣乖違倘遂傳行必差理實今研覈數  
本之內率以少錯者為主然後互質疑繆沿造本源譌者  
譯之散者聚之忘者追之俾斷者仍續闕者復補惟古今  
字有通用者稍存之又為改正塗注凡一萬一千二百五  
十九字

學的二卷

不著姓名

書內夾小簡其畧云前學的一書蒙諭諄諄寄回時弟又走商之芳谷兄鑒定以為元時花箋所印舊板無疑且收藏印是潘喜曾家藏本弟貶其值以一兩一錢得之明午欲作一友人湯餅會之資敬歸高齋又云南樓中所藏遠山積雪研山近聞質在兄處便中乞賜一觀以久不見此石至今往來於心也歟云脊兄先生大人弟成頤首

南華摸象記八卷

國朝張世瑩撰

自序畧曰余既夙抱痼疾心悸體尪禪誦之餘惟讀莊子  
因詳為之釋共八卷具見總論細之非諄解不明之患乃  
模棱穿鑿之患有負先聖不貴說破之旨所願大般若人  
以金篦豁開正眼方知此書純以象示象中之意語不能  
顯嘿不能藏既全象在目即經文已落圈續余所注釋不  
過摸足云柱摸腹云甕摸尾云帚摸背云床之一場笑具爾

朱文藻曰此書抄本無夜生平力學於此用心彌苦此書惟二本一為家藏稿本一即此本也宜彌愛之

元門易髓圖一冊

宋郭汝賢撰字禹錫號月窟子茗溪人

卷末題曰茗溪後學世姓朱名敏字子惠從道改名納字一中號紫矣散號丹霞仙子又仙頂人山繼派悟學修煉參傳焚香稽首拜書時宣德元年口月甲午午時記

能政齋漫錄十八卷 吳石倉抄本

宋吳曾撰字虎臣臨川人

吳石倉跋曰此書從繡谷借錄其院亭先生一跋暨尺牘自識四則皆考據詳悉故並錄之石倉自記

吳尺牘識云此書中所載詩文頗有可為本集拾遺如南豐懷友之類差可喜其人口士議論無足採者原本出焦弱侯家誤謬最甚學徒程生雲上俾其兩弟傳錄見貽識其厚意康熙辛卯秋日焯書

又云聞之毛文介季云此書從秘閣抄出者本缺首尾二



卷焦弱侯家所傳本遂以第二卷分作兩卷第十七卷分作兩卷其實非完書倦圃與竹垞皆不知也幸聞所未聞炳燭記之焯又書

又云所著雖小書安有開卷即辨論樓羅二字一道即顯然可知為闕佚不特失却序引也焯又書

又云趙景和雲厖漫鈔云曾于秦益公當國時上所業得官紹興癸酉自勅局改右承奉郎主奉常簿為玉牒檢討官秦薨不敢出其第十九自稱不樂京局且能委曲時好

恐以罪去以此惑後人據此則其人乃咸陽之下客耳既云有第十九卷則即十八卷皆有亦非完書也壬辰二月焯又書

朱文藻曰此書二部一為吳石倉抄本一為小山堂抄本今阮亭跋已蠹蝕不全阮亭跋之前別錄周輝清波別志一則亦以蠹蝕不錄

### 吹劍錄

宋余文豹撰

朱文藻曰此書小玲瓏山館抄本蓋揚州馬氏之書也  
序前題云此編已刊行板留書肆不可復得因刪舊添  
新再與續集並刊今此書一冊不分卷不知所謂續集  
者在其中否耶案知不足齋有范欽手鈔吹劍錄外集  
序稱續三為四以驗其學之進否云云知范氏所錄是  
第四集矣欽有手跋云借之揚州守芝山錄之四日而  
就計其書五十葉日四錄畢亦云勤矣行書精妙令人  
觀之不忍釋手既為吾友所得不能割愛也附記于此

靜齋至正直記四卷

元孔行素撰自號關里外史

歸有光跋畧曰余恬于世味雅好流覽一日過別業得是  
編於鄉塾學究家按其書舊至正間舊物厯世綿遠已不  
免有磨糊脫漏之患因攜歸袖而讀之乃知是公本洙泗  
苗裔而流寓平陵家世奕葉簪纓非編紙白屋之比顧其  
時丁勝國末造兵燹蝟興人無寧宇於崎嶇避地之際備  
得人情物態之詳筆諸簡牘久而成編雖其文未雅馴而

持己處家之方貽謀燕翼之訓亶々各有當于道誠舉而體諸身心見諸行事即進而並於古人不難余故喜而手錄焉且為訂其舛譌以俟付之剞劂以廣其傳

又題曰孔齊字行號靜齊曲阜聖裔隨父居溧陽後避兵四明父字退之曾補建康書吏

輟耕錄三十卷

明陶宗儀撰字九成號南村天台人

朱文藻曰此書有二部一為萬厯戊寅華亭徐球取友

人楊氏所刻校正缺褻數十版序而行世中有抄補一冊朱筆小字是吳石倉所注末有成化己丑彭瑋跋并毛晉跋共三葉亦石倉所屬一為萬厯甲辰王圻序而增刻增多孫大雅序送陶九成東歸詩卷歸棹發秋江圖是皆可存也

莫越集記二卷鈔

元末熊太古撰豫章人

朱文藻曰此書抄本業自序作於至正乙未而卷中有

云遼金猶力戰而亡我朝棄宗社幸沙漠本根已喪矣  
云云則是乙未以後矣

格古要論十三卷刻祇五六兩卷餘俱缺

明曹昭撰字明仲雲間人

卷末墨筆跋云嘉靖乙未夏季得於武林道中是日甚暑  
覽之不覺清凉月泉

識遺十卷

題曰嘿耕羅壁字蒼甫

吳岫跋曰考據確而精論斷審而正記載書苑高品故宋  
元著述家多援引之然傳隔日久間有亥豕舛亡欲借一  
善本訂之遍索不得也岫藏篋中六十年不輕以借人隆  
慶三年姑蘇方山吳岫識

末有朱筆跋云梅雨初霽破工終日用朱墨校勘然闕疑  
鎮多也惡熱逼觸大不可奈即呼燈同藥城先生作送梅  
詩以解之雍正乙巳五月二十有一日意林識

又墨筆夾籤云丙午養月得新安西亭汪氏善本羈入題



語一節疏注三條庶幾完足邢子才一適復思矣時叢桂  
褪胞辛香初襲覺筆硯間秋意可人。載讐

朱文藻曰案羅璧未審何時人而卷中已載德祐北狩事  
恐吳岫跋稱宋元人多引之者謫也姑附元人之末俟  
再審定

勿菴歷算書目一卷

國朝梅文鼎撰字定九宣城人

朱文藻曰此書抄本按目中所載書凡八十種計歷法

書五十八種算法書二十二種厯算之學傳于此矣著  
書之富亦茂以加矣

農書三卷蠶書一卷於潛令樓公耕織織二圖詩一卷抄

萬作林跋曰

聖祖仁皇帝南巡時江南人士出其

藏書進獻者甚多內有陳勇專農書秦觀蠶書於潛公耕織

二圖詩三書皆宋版也奉

敕合為一編付

內廷收貯按三書積書家罕有著錄書者樓公耕織二圖  
詩該邪亦止載其目其文闕焉

今上御極之二年

特詔儒臣纂輯農書

欽

定書名曰授時通考以明我朝敦本務農之至治昭示  
來茲司寇涇南先生董其成因請出是編俾與事者采輯  
余時適寓先生齋得與觀焉夫農蠶之事古來著述紛繁  
瀏覽雖竟是編卷帙無多提綱挈領已得十之六七而樓  
公耕織二詩閭閻疾苦情狀畢具若聚億萬農夫紅女于  
寸楮中三復吟咏令人太息不置遂提筆抄錄閱日告跋  
昔祖先懷蓼公曾令於潛民風號稱淳朴豈樓公遺澤猶

未泯耶今讀其詩惻然循吏之言真可云洞悉民隱矣凡  
為民牧者宜各置一編于座右乾隆三年戊午秋七月望  
日荆溪萬作霖甘氏書并識

又曰樓公孫洪跋語未載公名按樓大防鑰耕織圖後序  
云高宗皇帝紹興中興備知民瘼伯父璠時為於潛令念  
農夫蠶婦之作苦究訪始末為耕織二圖耕自浸種以至  
入倉凡二十一事織自浴蠶以至翦帛凡二十四事為之  
圖繫以五言詩賜對之曰遂以進呈玉音嘉獎宣示後宮

又按宋瀛題耕織圖卷後云宋高宗時四明樓璘作耕織  
圖上進今觀此卷蓋所謂耕織圖也逐段之下有憲聖慈  
烈皇后題字皇后姓吳配高宗其書絕相類豈璘進圖之  
或命翰林待詔重摹高后題之耶向以此書世所罕覩或  
疑為大防作者同寓張子崑喬考訂確據之故并識之作  
霖再筆

朱文藻曰此書小山堂京師抄本憶往歲長水香樹翁  
書末索樓公耕織圖詩時儲藏書藉未經細編乃與主

人徧求無圖書集耕織部中亦未備此詩今觀諸序跋  
方知此書從秘府抄出人間流傳絕少卷中楷法  
醇古尤可珍也

### 丹魚譜一卷

明陳子經撰字引川杭人

卷末題云天啟辛酉仲春新安李氏惺我錄人間流傳蓋  
無幾矣

### 蟹畧四卷

宋高似孫撰字續古

卷末題云澤國風霜後漁郎網罟前波濤愁欲避朝野急  
於賢螃蟹無能事鱸魚不值錢須知畢吏部不讓季鷹先  
嘉靖十年歲次辛卯閏六月吉姑蘇金閭柳僉錄畢蟹畧  
作此詩志後

負暄野錄二卷

不著姓名

王東跋曰右負暄野錄一帙莫如何人所述其發明古今

碑刻及諸翰墨法又附以文房四寶之許蓋博雅之士也  
先君碑茅雲山草錄而不及楷謄遂致紙板散亂至正七  
年五月初吉梅雨連日因理故書而緝之

俞洪跋曰陳樵與范石湖張于湖姜白石同時

又失載姓名跋曰說郛中有負暄雜錄二卷補遺一卷為宋崑山

蘭谷顧文薦撰此名野錄亦宋陳樵撰與張孝祥姜堯年同  
時別是一人負暄二字亦偶同耳讀者當自知之

衍極五卷



題曰莆田鄭杓子經述劉有定能靜釋

卷末題曰癸卯正月借章明遠藏本手抄竣于五月四日  
中多譌字未及盡訂當俟別本

### 廣川畫跋六卷

宋董道撰

未有朱書云添改廿剔去二字又墨書云咸寅秋季以青  
銅錢百廿文得之己卯初冬以武林舊抄本校

### 苦瓜和尚話語錄一卷

不著姓名

張沅跋曰宋王孫趙彞齋者其品峻絕千古其画妙絕一世品不以画重而画益以品重也宋亡隱居廣陳鎮山水之外別無興趣詩酒之外別無記託田更野老之外別文無契孤昂潔肅之標如雲中之龍雪中之鶴不可昵近者也乃今之大滌非昔之彞齋乎其人同其行同其履變也無不同蓋彞齋之後復一彞齋數百載下可以嗣芳徽可以並幽躅矣兩先生之隱德吾知頡頑西山之餓夫固然耳且

其浩浩落落之懷一皆寓于筆墨之際所謂品高者韻自  
勝焉吳觀大滌子論画鉤元挾奧獨抒胸臆文乃簡質古  
峭莫可端倪直是一子海內不乏解人當不以予言為河  
漢也雍正六年戊申秋七月戲邱生張沅書於江上之畏  
廬

南宋画院譜二冊

國朝厲鶚撰

自序曰宋中興時思陵幾禔之間癖耽藝學命畢良史開

權塲收北來散佚書畫而院人粉繪往往親灑宸翰以寵  
異之故百餘年間待詔祇候能手輩出亦宣政遺風也顧李  
唐以下所作如晉文公復國圖觀潮圖之類託意規諷不  
一而足庶幾合于古畫史之遺不得與一切應奉玩好等  
余家古杭每樂稽諸人名蹟考夢梁錄武林舊事等書姓  
氏存者寥寥豈以其畫院少之歟暇日因據圖繪寶鑑畫  
史會要二書如各如干人遍搜名賢吟咏題跋與夫收藏賞  
鑒語薈萃成帙名曰南宋畫院譜自愧家乏秘冊見聞狹

陋幸好古君子之助我焉康熙辛丑小雪日錢唐厲鶚書  
南宋院畫錄八卷

國朝厲鶚撰

朱文藻曰此亦厲氏手藁即前書次第錄之有二冊一  
冊卷一卷八一冊卷二之七添注繁蕪尚非清本余嘗  
借得鮑錄飲精校本携來思一重抄而不獲竟歸之矣  
兩書外間傳本絕少當珍護之

張米菴直蹟日錄三卷

舊抄

明張丑撰

吳焯跋曰庚子九月在禁苑佛廬觀終此卷又碧鷄漫志  
祝京兆隅本與說郭畧不同皆非能事勘定有不足據俟  
檢錄書時核一遍當不可少二十三日繡谷手書又曰張  
丑字青甫號米菴玉峯人又字廣德崇禎朝人又曰米菴  
清河書畫舫頗稱淹洽此係續錄皆從目所見者詳諦審  
慎非比他著錄家游戈掠影之譚冬十月朔日仍徙居禁  
城朝陽門西席氏之廬再記又曰後三年癸卯夏四月從

石門呂氏得清河書畫舫抄本凡二十緒谷再記

冰鑑七篇 附印史末抄本

不著姓名

姚首源跋曰予家有冰鑑七篇不著撰人名宛似一手世  
無刻本悲其湮沒故錄之觀人之法孔有度之辭焉孟有聯眸  
子之論聖賢所重吾輩其不可知乎此編固切于用非同  
泛書亦兼賞其文辭云爾

稽神錄五卷拾遺一卷

南唐徐鉉撰

朱筆跋云錄畢校一過原本為嘉靖間句吳姚舜咨抄本  
頗有魯魚處尚擬覓別本勘之壬寅清和日識卷首墨筆  
題云照宋<sup>本</sup>改正

後有朱筆跋云右稽神錄一冊予往歲從家仲借得本也  
近又從錢道王借得一本其中章法間有不同蓋知是兩  
本<sub>以下云云近邊</sub>  
<sub>本</sub>訂不能詳錄

塵史三卷精抄



宋王得臣撰

卷末跋曰塵史三卷通計一百十葉原刻本字多舛誤今錄此本藏于家其間可證者改之可疑者缺之時嘉靖改元五月十日抄起至十八日錄竟鋤東報三子皆出痘方愈柳煥志喜

又曰右王彥輔塵史三卷序云於政和五年所述東都舊事為多原書為世廟時郡人柳大中家物自慶元刻本摸寫差謫特甚亡友朱又安購得之余假歸隨闕隨正凡改

足數百字疑者闕而逡巡踰期月至今年仲夏乞容所馬  
君憺鴈未遑重勘今日晚涼手調鉛黃偕馬君對校塗滅  
謫字為淨本矣柳歸朱氏嗚呼又安之墓宿草已平遺書  
遂鵬空為掛瓏之劍可勝歎耶甲申七月立秋前四日丙  
戌朔旦震澤葉奕訖<sup>於</sup>之虞山之覃思館

又曰又安諱明恭吳縣之洞庭東山人世與予同里又安  
為人多而木訥<sup>訥</sup>口不能道詞成童操觚稍業制舉弱冠折  
節讀書好古文詞蓄書聚百餘卷集金石刻漢唐碑碣數

十帖徬閱撫覽忻忻如也旅食山虞居止與余相接閱字  
析義移日忘倦時有所獲手以賞錄蓋余忘年友也先是  
又安娶姜舉子弥月卒踰年子又卒又安悲悼遂不起時  
年二十一歲崇禎十六年十一月也閱月其父母卜寔於  
虞山之西麓予前罹鼓盆之戚寢門之哭不暇今校此編  
并識哀於卷尾云林宗

又曰此書為從兄林宗所藏跋尾馮定遠代書今結為宗  
弟勸虞收置校之毛氏刻本此為勝也時康熙八年春季

洞庭葉萬識

括異志十卷

宋張師正撰

末題云正德十年歲次乙亥仲春癸丑日長洲俞約齋錄

隆慶六年歲壬申正月二十四日買樂稿南書鋪穀記

青瑣高議前集十卷後集十卷

宋劉斧撰曰此翦燈新語前茅也如此鄙俚而能傳于後  
世事固有不可解者阮亭書於京邸匏墨齋

雜誌二卷

宋江臨幾撰

題籤云宋板校正卷上首葉題云玉峯菴竹堂珍藏末題  
崇禎壬午年下學齋抄藏下末葉朱題云重九酒後燈下  
校過一次又朱跋云此書崑山葉氏家藏本乙未得之書  
賈缺後四頁至冬借毛氏宋本校過照宋補足墨改者皆  
文莊公手筆也雖經數月閱終非完璧不知何日再得補足  
也又墨題云丙戌春三月重閱過一次又補四頁前題云

補缺四頁照宋刊玉峯下學齋補錄後題崑山葉氏家藏  
末葉朱跋云乙未冬用價一星買湖州書賈借毛氏本校  
過一一改正尚未全備俟有善本再校可也新安慶曾識  
卷首首葉墨題三月暖風穀雨天踏青少婦失花鈿露汗  
透塵漿濕襪多少騷人醉眼看後有朱跋云此葉文莊公  
踏青詩也先輩筆跡得者寶之勿遺失此頁以識不知者  
慶增書後葉朱書補錄七條并跋云按文獻通考江鄰幾  
雜志三卷又名嘉祐雜志明時會稽商氏刊之稗海中前

後銓叙失次其間魯魚帝虎謬戾殊甚今年秋友人自甬  
上至携范氏天一閣舊抄有嘉祐雜志一冊亟假以歸視  
余架上抄本江鄰幾雜志分上下二卷與文獻通考不合  
雖從來刻校正殆非宋時原本矣然是本既從崑山葉文  
莊公棗竹堂傳抄又為新慶<sup>安</sup>孫曾氏補訂屢費丹鉛尚多  
譌舛洵乎藏書之難也范本亦非完善燈下閱盡偶有遺  
亡輒錄之紙尾時又得高似孫剡錄梅安居梅礪詩話數  
十百種生平快事不多遇也雍正壬子長至後二日勿藥記

睽車志

宋郭彖撰字伯象

何儋然序作德象費袞序作次象自序作佺象

趙勿藥跋曰按文獻通考睽車志五卷知興國軍厯陽郭

彖次象撰此書吾友人從朱氏曝書亭借鈔後有續添又

有何澹言然序費補之跋郭次象自序各一首每事列有標

目卷帙分明殆是宋槧原本矣明會稽商氏嘗刻之稗海

中序跋皆缺標目亦刪削不存合併殘添增為六卷其間

脫落譌謬又凡幾許刻書書亡斯言信然取校一過悉為



補足稱完善亦快事也癸丑冬十月乙卯勿藥記

夷堅志十卷

宋洪邁撰

朱文藻曰此書明呂肩昌重刻案宋史作甲乙丙志六十卷丁戊己庚志八十卷通考作甲至癸二百卷支甲至支癸一百卷三甲至三癸一百卷四甲四乙二十卷大凡四百二十卷今此本併省為十卷各以十干編集而甲集有序殘缺序中稱支甲云云要是數種中之一

其非全書面目明矣甲乙己三集抄補中有朱墨評語  
筆跡俱佳

### 研北雜志

後有朱跋云此書原簽託谷易箴隔柘湖手校谷易未詳  
何人而筆殊妙柘湖則何柘湖也卷首有項藥師圖記歷  
數名家收貯而後乃入辟彊園亦不偶矣丁酉長夏校及  
附志武林外史

又朱跋云丙申七月借張親家超然藏本校後有武林外

史跋并錄新安慶曾識

又朱跋云乾隆癸亥冬月錢唐丁敬手校一過

清溪暇筆二卷

明姚福撰

末有跋云清溪暇筆見于伍氏所刻者逸其大半甲寅歲  
偶得抄本因備錄以城茅齋以爲博洽者之一助云爾  
孟冬十月錄完題其後

太平御覽一千卷目錄十卷

宋李昉等撰

朱文藻曰此書活字印本按黃正色序稱閩省梓人用活字校刊纔印其十之一二閩人散去浙人倪炳鋟諸黎棗若是則活字本非完善矣今余所見板本惟杭太史董蒲家有之小營巷孫氏所藏是活字本與此本同然則活字本者仍是全書而行世較廣黃序云云未詳何故也此本舊缺十卷又零星缺佚計百四十餘葉乾隆戊子吳文西林館于東軒以未經寓目索梓架觀之

病其字句訛脫難讀錯簡甚多遂借杭氏板本校讐其脫  
謬處更甚乃旁攷引用諸書之現在行世者校正亦間有  
兩本不同者仍之尤喜因此得見古本面目其他有可以  
意會者朱書改補雖未必盡合原本取其大意無悖粗可  
誦讀而已終年校畢缺卷則余為補抄又借得孫本增抄  
缺佚僅三十餘葉無從更覓而吳丈與予之用心于此書  
為無負矣此書與冊府元龜太平廣記合璧事類並為宋  
代所纂輯彼三書者今皆有善本獨此書無人校為重刊

者然其中引用諸書大半失傳吉光片羽賴以稍存讀書  
好古之士所當究心而玩味之也往往在吳下見宗文文游  
與余言其親串有藏宋槧半部屢與借觀不獲因相與浩  
歎希世之珍固宜秘惜然借得其人亦何必過吝耶

古今類事二十卷 蜀宋抄

宋委心子撰

目錄事後題云瞿峯劉壽卿宅今將蜀本重新寫作大字刊  
行買者詳鑒

卷末墨筆跋云正德戊辰在翠雨堂抄完下有閱騷堂印

又墨筆跋云此書乃吳尚質求售計二百五十四葉字畫  
行款種種整齊而序文倣章草可喜因贈之陶齋以備披  
覽此亦能<sup>善</sup>好事者所遺留讀者當寶之嘉靖庚寅冬十一

月二日燈下吳門袁表識時年六十三

下有袁父  
邦正印


又墨筆跋云閱騷堂乃陳白陽印此數字亦類白陽當是  
其家藏物袁得之耳

下有又  
玄子印

合璧事類前集六十卷后集八十卷續集五十卷別集九十卷外集六十卷

題曰前后續集膠庠進士謝維新去咎編別外集并建安  
虞載子厚編皆宋末人

朱文藻曰案黃正色太平御覽序稱合璧事類為四大  
部書之一與太平御覽冊府元龜太平廣記並著今攷  
是書為宋末所輯故宋藝文志尚未入錄撰人亦倖草  
莽儒臣成一家言與御覽等書之奉勅修撰者不同似  
未可同曰語也








小眠齋讀書日札

槐塘街人汪沆述

誠齋易傳二十卷

宋廬陵楊萬里輯淳熙戊申自序明嘉靖壬寅開州守尹耕梓行  
其子承議郎楊長孺狀申本省云先父故寶謨閣學士楊某所  
著易傳自淳熙戊申八月下筆至嘉泰甲子四月脫藁十有  
七年而後成書平生精力盡於此書則其著述之勤復非後  
世所及



嚴氏詩輯三十六卷

宋朝奉大夫華谷嚴粲著淳祐戊申自序其書擺落毛鄭舊說  
出以新意或會其旨於數章或發其微於一字至音訓疑似名  
物異同時代之前後制度之纖悉訂證精密開卷瞭然前有竹  
溪林希逸序

嚴桂軒毛詩集解三十卷

宋廬陵段武子昌武著其學詩總說一曰作詩之理二曰寓詩之  
樂三曰讀詩之法論詩總說一曰詩之世二曰詩之次三曰詩之序

四曰詩之體五曰詩之派大旨本之東萊叅以晦翁詩傳蒼翠辟言  
間出新意凡注中段曰二字皆其已見也是書淳祐八年邱山羅  
使君瀛令其姪漕貢樾鉸板以傳語見武子先生姪迪功郎贛州  
會昌縣丞維清中行在國子監狀中近世流傳鈔本亦尠矣

### 大衍索隱三卷

宋朝奉大夫太府寺簿兼樞密院編修官武陵丁易東撰上卷  
原衍中卷翼衍推繹河圖洛書大衍之數為圖六十有五下卷  
稽衍歷攷自漢及宋諸儒並以數言者五十七家其餘言理不言

數者不錄

周易原音八卷

元大中大夫黃州路總管兼管內勸農保八著前有進呈皇太子  
踐陵陽年璫著序保八字普菴雒陽人

春秋揆

明黃石齋道周著曝書亭鈔本

丙子學易編十五卷

宋陵陽李秀岩心傳著嘉定九年自序編繫丙子者創稿於是

年正月元日盡是歲除夕故以為名也按唐書藝文志易自卜商傳以下凡八十五家中興館閣書目百十有二家其說可謂繁矣是編之作惟取王弼及張子程子朱子四家之傳而間以周子邵子之說補之自唐以上諸儒字異義之異者亦附見焉觀其自跋曰上古之經莫尊於易而諸儒多以私意亂之東周之時以象占言易而亂於支離兩漢之際以讖緯言易而亂於附會魏晉之間以名理言易而亂於虛無近世以來以人事言易而亂於穿鑿皆易之蠹也歷論經術之不明皆有卓見

素王事實

不著纂輯人姓氏末有嘉靖癸巳自新齋余氏刊行跋按此書  
雜述曲禮孝經家語左氏傳諸書薈萃成之計四十四篇有王廣  
謀句解首卷載元至大二年釋奠先聖儀極詳似此書成於元人  
嘉靖間重梓

疊山集十六卷

宋謝文節公枋得著明景泰中監察御史黃浦梓行廬陵劉雋  
序○近得康熙丙寅弋陽縣譚瑄新雕本彙為四卷詩文不少於

前殊多帝虎陶陰之誤

水東日記四十卷

明崑山葉文莊公盛著其書專於紀古事覈古綜今關諸軍國號  
為通博以其事成於淞水之東故名水東日記云此書舊不分卷  
帙公七世孫方蔚因書疑非完書意為標題析作四十卷異日當  
訪舊本正之

高奇往事十卷

明括蒼何鏜輯鏜字振卿號賓巖官觀察使所著尚有天下名



山記

綠天耕舍燕抄四卷

無撰人姓氏似屬明末人詩話上自三百篇漢魏下逮唐宋元明歷論詩之源流體格皆有特識

常熟破山興福寺志四卷

明程嘉燧輯崇禎壬午錢氏牧齋序牧齋一稱聚沙居士按志云寺始自齊始興五年邑人柳州牧倪德光捨宅建牧齋無始興年號但有延興中興二號皆止一年始興二字疑誤

茶花譜

不著撰人姓氏康熙己亥自序云樸靜子題於漳署之天海山堂  
應官於漳郡者所輯也所載洋茶三十條共四十一種各綴以詩  
寶珠川茶暨山茶槩不入焉

何椒邱集三十四卷

明刑部尚書廣昌何文肅公喬新著羅圭峰玘校正嘉靖壬午廣  
昌令余宗器偕公之子承鳳合公之謚議傳贊銘碑文又為一卷共  
三十五卷刻之舒芬序

自警編九卷

宋趙善瑋著嘉定甲申自序明洪武中刻於蜀嘉靖乙巳刑部郎中唐曜出守廣平鉞於郡齋按善瑋宋宗室仕光寧時不甚顯是編述有宋諸賢言行政事頗詳然撫靖康以上事為多南渡後稍畧矣播遷會盟結元入金皆宋事之大者顧置弗錄何也

瑯琊代醉編四十卷

明蘇州張鼎思詹父著囊括羣書考据精核

西樵野記

明吳郡侯旬言輯共一百七十餘則所紀半屬荒誕予謂著述  
必上裨於身心家國次亦有闡風雅始不妄費毫瀋若夷堅諾皋  
艷異諸書終無取焉

燕貽閣集七卷

明金正希先生聲著先生大節炳耀日月文章特其緒餘然讀  
其據實奏報及備陳方畧二疏千載下猶凜凜有生氣也

燕居功課二十七卷

明萬曆中商邱安世鳳凰引著始自志道終於游藝其間法戒並

垂傲而行之於讀書衛生未嘗無小補云按鳳引一字舜庭宋吏部  
筠廊偶筆云同里安舜庭先生童子時向郡守求試郡守指路  
旁此房實賣四字令為破題安云曠安宅而弗居求善賈而沽  
諸郡守首拔之

瓊臺吟稿十卷

明禮部尚書邱瓊山先生濬著李東陽序先生纂述自大學  
衍義補朱子學的而外文翰甚多此特其詩集耳詩格辯香在白  
傳放翁之間亦時雜入擊壤集中語曰觀其與友人論詩絕句云

眼前好景口頭話便是詩家絕妙詞可以知其宗旨矣

木天禁語

元人范德機槔集李唐翰苑諸公論詩之旨也木天翰苑之名禁語則秘旨耳明正德庚午吳郡倪璋刻於慈谿縣署

閩中攷一卷

明閩人陳鳴鶴汝翔輯萬曆辛亥陳薦夫序之曰吾友陳汝翔閩中攷一卷自唐林諤閩中記宋梁克家三山志并福州新舊二志而外博極羣書攷信載籍上摩碑版下采里言掇拾既廣駁

正亦宏稽城邑之建置証古蹟之互異覈年代之外訛收人文之  
散佚可謂古志拾遺今乘補闕者矣

閩中海錯疏三卷

明甯波屠田叔本暖疏并按晉興徐興公勸補疏鱗介之品二百  
有奇一披閱而陸海之珍藏龍宮之怪異悉具掌中田叔著述尚  
有夏小正太常典錄諸書此則其入閩權厓時所作也前有南  
海周喬先序

閩畫記一卷

明晉安徐興公勸輯萬曆己亥自序云吾閩自宋迄元迨於今日能  
畫之士雖不摩肩比屋亦自脫俗超凡不佞染指斯技留心辨正或  
見殘山賸水於敗縑爛繭之中或剔片鱗隻羽于苔壁蘚牆之上  
或檢載籍而得其名或因咏題而紀其實編為畫紀要皆略其玄黃  
取其駿逸俾欣賞披圖識精神於故紙因人論世知不朽於千秋云爾

皇明正音七卷

明天順中海鹽李宗浩景孟編集有明開國諸公之作也嘉靖壬  
戌宗浩曾孫儒烈重梓於閩之臬署宗浩一字梅庵舉景泰甲戌



進士西溪先生李衡之子

雜字韻寶五卷

○詩話補遺三卷

嘉靖丙辰王嘉賓序

○滇程記一卷

後有自跋稱博南山人

○滇載記一卷

與滇程記皆謫戌永昌時作也

○古今諺一卷

○古音複字五卷

嘉靖己亥王廷表序

○古音駢字五卷

嘉靖戌戌自序

○古音略五卷

○古今風謠一卷

以上並升菴楊氏著其宗曾孫

宗吾校刊

靈源寺紀四卷

明寺僧寔訥可南輯寺在東洞庭碧螺峰之下鉸鉞峰之西去月

溪橋百武梁天監元年地湧甘泉澄瑩無滓病者飲濯即瘥時善

集律師杖錫至此因茲靈異遂勅梵刹以泉為名

百戰奇法十卷

作者姓名未詳明嘉靖丁未河中楊維約溥刻於張掖并為之序  
後有陝西按察司副使晉城鍾爾正鑑跋

絕妙好詞今輯

未分卷帙竹垞先生彙選國朝諸公長短句也始自梅村計二百餘  
人此本借鈔於曝書亭

翠樓集三卷

淮南劉平勝云份選輯有明一代閨秀之詩平勝一字青文  
祝子罪知錄十卷

明祝希哲允明著鼓舌搖唇變亂黑白其彈駁先賢幾使千古無  
復全人若論王珪魏徵為不忠說本明道先生陳橋之篡燭影斧聲  
之弑說本陳桎張魏公之殺曲端為妨賢害國說本何氏備史許衡  
之不當仕元說本邱濬亦未見有特識也

士林詩選上下二卷

明嘉禾懷用和悅輯用和一號鐵松以漕粟入官

清波雜志十二卷

宋周昭禮輝著輝居清波門之南因以名集語見張貴溪序中  
此書稗海所載殘缺不全是冊是為天籟閣所藏足本後歸曝  
書亭朱氏內有阮亭初白兩先生校正小跋墨痕如新尚可想  
見前輩風致按三卷中云輓詩自古皆五言至嘉祐末方為七  
言此語創聞記之

鴈門勝蹟詩集一帙

明成化間代州王鏐著詩不一體凡山川城池古蹟寺觀祠廟

槁梁塚墓物產一一形諸吟咏復於各題下詳著事實較之元  
遺山兩山行記獨述鳳山景物似加詳也鑰號空谷樵者領  
鄉薦此集乃罷開封府學司訓歸所纂前有郭信李瑤序

荆溪林下偶談四卷

宋荆溪吳氏著按明嘉興郁善嘉慶秀州拙修居士跋云此翁吳  
姓第不知其名與字與葉水心先生交好觀其篇中亟稱水心先  
生不置故知之然考之水心集中只有水心即事兼謝吳民表  
宣義六首及答吳明輔一書而已他竟無吳姓文字昔分八卷今

作四卷

文章緣起一卷

梁太常卿任昉著詳列秦漢以來文章名目之始按論之名劉勰  
文心雕龍謂仲尼微言門人追記故仰其經目稱為論語羣論立  
名實始於此荀子禮論樂論莊子齊物論慎到十二論呂不韋  
八覽六論又其後也至漢則有賈誼過秦論昉乃以王褒四  
子講德為始誤矣連珠始於韓非見北史李先傳昉以為始于揚雄亦非也

呼桓日記五卷

明嘉興項鼎鉉著初名夏五日記後病瘧因改題呼桓呼桓者  
晉桓鎮惡威勇患瘧者呼其名輒愈故易之也

毘陵忠義祠錄四卷

明葉司韶夔輯正德甲戌邵二泉寶序無錫縣侯世卿位梓行  
按祠自文忠烈以下凡十有五人均死德祐之難者

琴心集

不載撰人姓名僅書求凰客三字蓋祝京兆允明作也中有丁孃  
暗態宴余儀衛二詩猥褻過甚應為秀鐵面所訶。天籟閣

項藥師藏本上有私印

時務八事攷二卷

明青谿童時明輯上卷宗藩漕運北虜南倭下卷兵制鹽政屯田

黃河

丹浦歟言五卷

明內鄉李堯著辨正四部謬誤多前人所未逮按堯字于田嘉靖  
癸丑進士選翰林庶吉士歷官提學副使

西域行程記西域蕃國志

不分卷帙



明吏部驗封司員外陳誠苑馬寺清河監副李暹同輯誠暹  
並永樂時人○曝書亭鈔本

書法雅言一卷

明嘉禾項德純穆著按德純為子京先生長君法書名墨克初天  
籟閣下中宜其品第之周瞻也德純一號無稱子王百穀為之傳

三岡識略十卷續識略一卷

國朝華亭董閔石含著閔石一字榕城別號蓴鄉贅客是書  
所紀多昭代典故始自順治甲申終于康熙丁丑共五十四年三

岡謂紫岡竹岡沙岡閭右卜居處也

花史左編二十四卷

明構李澹雲王路輯萬曆丁巳自序澹雲又輯花史右編若干卷  
尚未成書此則其先脫稿者故以左編名之

金壺記二卷

宋釋適之撰八書故實採綴典麗

祐山雜說一卷

明平湖馮汝弼著

西湖高僧事略一卷

宋瑀瑤寺講師元敬節菴輯先是節菴薈萃耆臘自晉逮  
宋卓錫錢塘者得二十四人又增六人繪像建閣祀之後慮流傳弗  
永復命東嘉僧元復撫其事實各繫以贊而授之梓寶祐丙辰  
吳郡莫子文序元季兵燹舊本散逸明虎跑僧無已重為開雕  
正統戊辰武林汪通後序

廣慈編二卷

無撰述人姓氏末書葦菴居士天王淑民書又廣慈編補一卷

後有包鴻遠跋

燕子磯志六卷

明江陰陳子培本輯文一卷詩五卷前有圖攷嘉靖丁巳薛甲

序

讀史漢翹二卷

淮安施匪莪端教輯黃廷才序匪莪工于集句有嘯閣集古傳  
世

無事編二卷

明嘉興項不損真纂馮亮序末載文章九命足令汲古者短氣不足觀也

殘元世系攷一卷

明歸安茅止生元儀著自順帝遜去其子孫主盟部落者十八傳而滅止生又著有北虜貢市略一卷附刻卷末止生鹿門先生坤之孫繕部國縉之子

高帝大學實錄一卷

明南京尚寶司卿蔡悉編推原高帝致治之道本諸大學故以

名書按趙元社皇明定保錄云洪武五年上謂禮部侍郎曾魯曰大學治平之本豈可舍此而他求二十三年上御謹身殿觀大學謂侍臣曰治道必本於教化民俗之善惡即教化之得失也大學一書要在修身修身教化之本也觀此則知是錄之非溢美矣

胡曾咏史詩一卷

明錢塘胡德甫文煥刻于格致叢書注頗詳核

東京夢華錄十卷

宋孟元老著紹興丁卯自序其後序瀋熙丁未浚儀趙介之  
師俠作畧曰祖宗仁厚之德涵養生靈幾二百年至宣政間太平  
極矣禮樂刑政史冊具在不有傳記小說則一時風俗之華人物  
之盛詎可得而傳焉宋敏求京城記載坊門公府宮寺第宅為  
甚詳而不及巷陌店肆節物時好幽蘭居士記錄舊所經歷為  
華夢華錄其間事關宮禁典禮得之傳聞者不無謬誤若市  
井游觀歲時物貨民俗尚則見聞習熟皆得其真予頃侍  
先大夫與諸耆舊親承謦欬校之此錄多有合處今甲子一周

故老淪沒舊聞日遠後予生者尤不得而知則西北寓客絕談矣  
因鋟木以廣之使觀者追念故都之樂當共起風景不殊之嘆  
介之此序藏書家有未見者因備錄之

闡德錄一卷

秀水朱茂暘輯茂暘為文恪公第五孫陳述文恪立朝節槩  
獨詳

質庵集

明會稽章敞著敞字尚文永樂甲申曾榮榜進士仕至



禮部左侍郎楊溥為作傳云質庵有稿四十卷藏於家則今所傳蓋什一也

### 北地記四卷

明天津汪來為北地守時所輯郡人孫倌序云太守汪公覽山河之雄勝嘆人物之遼廓緬懷古昔上嘉仁賢萃之為紀宦游者摘經畧之要鄉產者取出處之節著作者撮忠愛之

詞從事者表宣達之義

### 崇禎宮詞二卷

國朝常熟王露齋譽昌撰錢塘吳靜川理注番禺屈翁山大均  
序

西溪梵隱志四卷

國朝海寧吳藥師本泰輯順治辛卯自序

翠橘堂箋臆二卷

明奉新閔耳中奎著後附詩文二卷

義勇武安王集

虞山錢宗伯謙益編先是元巴郡胡琦編關王事蹟五卷明高

陵呂文簡枬重修名義勇武安王集宗伯取二書刊定釐為八篇而仍其名又太倉顧伊人涓購得天啟間胡棟所編關帝志六卷撫其逸事續錄二篇附之牘末以補前集之未備

### 獨醒雜志十卷

宋廬陵曾達臣敏行著淳熙乙巳楊萬里序周必大謝諤樓鑰趙汝愚陳傅良尤袤及其子三聘皆有跋語按樊仁遠作達臣行狀云達臣潛隱不仕號浮雲居士又號歸愚老人嘗聞聽事之北隅為獨醒齋又號獨醒道人此書上自朝廷典章下至

稗官雜家里談巷議無不記覽足備一朝掌故矣

### 淮城日記

淮陽張無功天民輯敘述路振飛王燮二人防守江北之事特

詳較三藩紀事本末甲乙實事案頌天臚筆等書為得其真

### 車駕幸第錄三卷

明楊石淙一清編正德己卯宸濠謀逆武宗下詔親征凱旋駐蹕南京遂至鎮江幸一清私第驩燕累日多所述作同時扈從守土諸臣亦相率賦詩歌咏一時之盛錄成一帙名車駕幸第云

革節危言一卷

明漳州戴廷槐著首述歲年十二月及太歲支干名義次詳十二辰肖二十四氣七十二候末附以氣候總論

讀書雜錄二卷

明海鹽胡遯叟震亨著康熙己未陳光綽序遯叟所著尚有通攷纂續文選唐音統籤靖康盜鑑錄海鹽縣圖經秘冊彙函等書其唐音統籤康熙四十四年 聖祖命購其全書令織造府兼理鹽課通政使曹寅鳩工刻於揚州即世所傳全唐詩是

也

河上楮談三卷汾上續談一卷

明新詮朱秉器孟震著

大易疏解九卷

宋蘇軾著明杭州顧觀王賓梓行按東坡先生自海外歸謂錢  
濟民曰予在海外了得易書論語三書悉以付子慎勿示人三  
十年後會有知音今去先生數百載矣世竟無傳習之者可嘆也  
已

西樓樂府一卷

明高郵王鴻漸磐著嘉靖辛亥鴻漸之甥張守中梓行王應元為磐撰傳云鴻漸少為諸生惡其拘也棄之縱情山水工於詩畫尤精音律所著有西樓樂府野菜譜等書

桃源詠 華嵩游草 瓶史

明公安袁中郎宏道著

甲秀園集四十七卷

明鉛山費無學元祿著屠隆陳繼儒周嬰並序按無學父名

堯年嘉靖壬戌進士官南京太僕寺卿甲秀園其讀書處也  
雙清堂集六卷

明杭州顧思益汝學著湯顯祖序

黃元龍集十一卷

明新安黃奭著 國朝康熙癸丑吳菌次綺序元龍弟於升僕  
開雕詩七卷赤牘二卷醒言一卷偶載一卷又元龍著有言提  
錄二卷潘景升之恒序

永嘉先生八面鋒十三卷



不著撰人姓氏明姑蘇張益序云此書瀉熙中制以其無所  
不該觸之即解因賜是名予偶得高太史季迪館閣館閣本  
因錄之為緗帙重舊有止齋序今亡之按南濠跋謂八面鋒一  
書宋嘗有板刻第云永嘉先生而不著其人攷之宋陳傅良  
君舉葉適正則當時皆稱永嘉先生相傳此為君舉所撰或曰  
葉氏為之今觀其間多舉君舉平日之語其為陳氏無疑也弘  
治中監察御史袁大倫出按吳中偶獲舊本授吳江令劉濟民  
刻之

節物出典五卷

國朝錢塘王需人復禮輯

品茶要錄十篇

宋建安黃道輔儒著簡未有東坡先生跋

品茶要錄補一卷

明新安程幼輿百二採夏茂卿樹芳茶董中雋語續輯之者  
繹史一百六十卷

鄒平馬宛斯驥撰李映碧清序為部五一曰太古部三皇

五帝共一卷二曰三代部夏商西周計二十卷三曰春秋部  
十二公時事計七十卷四曰戰國部春秋以後至秦亡計  
五十卷五曰外錄部紀天官地志名物制度等計十卷紀  
事則詳其顛末紀人則備其始終十有二代之間君臣之  
蹟理亂之由名法儒墨之殊途縱橫開合之異勢瞭然具  
焉按分甘餘話云康熙四十六年 聖祖南巡至蘇州一日  
垂問故靈璧知縣馬驥所著繹史命大學士張玉書物色  
原版明年四月令人贖白金二百兩至本籍鄒平縣購版

進入內府人間無從見之矣

姬侍類偶二卷

宋松庵周守忠著共一百七十六句計八十有八聯嘉定十三年自序

忠節錄六卷

明海州張朝瑞襟采宋端儀革除錄張芹備遺錄王詔忠  
質竒秘錄何孟春三續備遺錄馮汝弼羣忠事略備遺錄補  
黃佐建文事蹟革除遺事杜思革朝遺忠錄鄭應旂革朝

遺忠列傳郁充遺忠錄鄭曉建文遜國記朱睦㮮遜國記汪  
宗伊皇明表忠錄許相卿革朝志革朝五忠傳周應治山東  
壬午死事七忠傳郎瑛萃忠錄諸書成之者也萬曆壬寅焦  
竑序朝瑞又嘗輯貢舉攷南國賢書孔門傳道集皆有裨風  
教

燕山叢錄二十二卷

明海虞徐伯昌昌祚著萬曆壬寅雲間李順卿叔春序末附  
長安里語一卷惜佚之

在野集二卷

明雲間袁景文凱著天順甲申同郡山東兗州府張璞校  
刊並序又補遺二卷刻於正德丙寅陳鎬序景文詩渾樸蒼  
古世傳白燕一律實非至詣也

齊山詩集六卷

明齊山寺住持祖浩同徒道璫編集弘治甲寅蒲中鄭紀序  
按齊山在池州城南三里許羣峯皆齊等故名或云唐刺史  
齊映嘗好游此山遂名之未知孰是

向氏青箱集一卷

明慈谿向曼倩杰裒先世詩歌成之者天啟癸亥潯州府向夢  
輝繡梓按集稱慈谿向氏為宋丞相文簡公之後遠祖有恒  
扈從南渡遂占籍焉

順庵集二卷

明豫章胡若思儼著熊釗胡廣鄒緝楊士奇並序宣德  
壬子寧王驪仙重為開雕并繪像簡端系之以贊

胡祭酒續集六卷

明胡若思儼著

素王紀事一卷

明成化癸巳劉珣序脫去首簡不知輯者姓氏弘治己酉鄧州知州鄭鼎重梓

莆陽刺桐方氏科名記二卷

明方萬有纂萬有子應倣續編曰刺桐者識始居地也

百越先賢志四卷

明嶺南歐楨伯大任撰萬曆壬辰東越游朴序百越者東盡會



稽西盡牂牁也先賢者志及兩漢而止也


世恩錄五卷

明岐陽王李文忠後裔輯文忠初賜姓朱洪武三年復姓小字保兒末附盱眙李氏族譜表圖

淞故述一卷

明雲間細林山人楊運之樞撰運之領嘉靖戊子鄉薦仕臨江郡丞是述可補顧宗伯清松江府志之未備

閔經二卷閔經杓一卷




太霞子著

居竹軒詩集四卷

元廣陵成禮執廷珪著張仲舉翦危太樸素部彥清肅並  
序劉叔讓欽編次付梓卷尾有周瑯跋 禮執詩工於假對  
如生世幾逢堯甲子高風不減漢申公越來溪上波聲小  
魯望祠前月色多皆可誦也

文體明辨六十卷

明吳江徐伯魯師曾纂又綱領一卷目錄六卷附錄十四卷



目錄二卷通八十四卷其書以常熟吳文恪公訥所纂文章辨體為主而損益之萬曆辛卯陝西道監察御史吳興顧爾行吳江縣廣平趙夢麟並序

全孝錄一卷

明莫旦吳孝子傳云孝子名璋字廷用姓吳氏吳江人年十一而孤母陸氏以節自守永樂癸卯命選天下孀婦之貞者給事內庭而陸以例行宣德丙午隨親王分封廣東改封江西饒州孝子棄家往來二藩間屢啟本求見不允與人言輒流涕

乃以思親二字願其所居之堂士大夫皆為詩若文以慰之時母子  
不相知者二十年矣孝子哀痛不已誓欲求見正統丁卯冒死啟  
本情甚懇切王憐而許之遂得入養瞻所見焉而陸已病篤不  
能言孝子彷徨計無所出乃退而焚香籲天刲股作糜以進陸  
啖之遂甦於是母子相勞苦抱持以泣王聞獎諭而遣之方欲  
東還而陸以舊疾卒於旅舍孝子銜哀茹悲千里舁櫬歸葬  
先塋之北哀慕終身一時名人自謝東山吳匏菴而下歌詠其  
事者甚衆孝子子洪仕至刑部尚書彙錄成帙名曰全孝云

正德丙子長洲徐源序

禮攷一卷

明汶上吳嶽輯吉凶禮凡五曰士相見禮曰士冠婚喪祭禮引儀  
禮禮記經文於前附己意訓釋於後合而名之曰禮攷溫陵洪朝

選序

邃庵集一卷

明石淙楊一清為中書舍人時卜居長安右門其室繚垣複  
院因以邃庵名之李西涯東陽倡為之解繼而名流為銘為說

為記為跋為賦為辭為古今詩以抉發邃字之義者凡若干篇積久成帙集正德辛未湖東費宏序石淙門人陝西按察使馮汝揚梓行

### 金精風月二卷

明寧都賴曜編嘉靖十四年自序按金精山去寧都城西十五里道書所云三十五福地是也先是延祐間道士劉大明搜集前賢題咏刻之名曰金精風月後失傳明董文僖圭峯自中秘抄歸曜復增以詩文而仍其名

滇攷二卷

天台馮再來甦輯計四十七篇自戰國至明末治亂興廢如指諸掌

四書章圖二十二卷

元徽州程子見復心著總要三卷大學句問纂釋一卷中庸句問纂釋一卷論語注問纂釋十卷孟子注問纂釋七卷共二十二卷延祐初上之朝將畀以職親老辭歸即授鄉郡教授程雪樓鉅夫王彥博約趙子昂孟淵元復初明善鄧善

之文原袁伯長楠虞伯生集楊仲宏載臧魯生夢解並為之  
序劉天瑞珪劉雲心夔周南翁應極范德機惇吳養浩善徐芳  
谷明善余漕皆贈以詩

百花鼓吹七卷

明無錫王化醅彙輯唐人雜咏百花詩五卷宋元明咏梅花詩  
二卷末附張豫源牡丹詩一百首萬曆戊申嚴一鵬序

嵩陽書院志二卷

國朝嵩陽耿逸庵介輯書院舊無志逸庵創修康熙甲子竇



克勤郭文華焦欽寵並序按書院

五代周時建與嶽麓睢陽

白鹿稱天下四大書院

天玉經三卷

陰陽風水之書不著時代及撰人姓氏

百川學海

宋左禹錫圭輯凡漢唐宋諸儒所撰志記譜論與夫銘狀箴史之類共若干種以十千分帙曰百川學海取揚子百川學海而至于海之義也明弘治間無錫華汝德程重梓錢鶴灘福序

士翼四卷

明崔仲鳧銑著嘉靖甲午自序云銑退處相臺之十祀非聖人之志不存非翼經之文不閱省己履事準古驗今道雖晚聞愚有一得已乃劄記所明稍修章句發揮性道訓訂經史或伸正理或駁陂見名曰士翼蓋以輔彞典也

搗聖錄二十四卷

明武水朱旋菴廷旦輯雜撫前事披瞽警瞶有裨風教不嫌其辭之俚也

楮記室十五卷

明淮陰潘塤輯為類六天地人鳥獸草木夷狄嘉靖甲申自序  
塤一號平田野老

理學類編八卷

元臨江張美和九韶輯是編專以周程邵張朱諸子之書為主而本之六經語孟又參之諸儒論議而附以已見美和孫拱洪武甲子跋云家祖此書凡三易稿乃成初命之曰格物編吳伯尚當見之謂是編所集天地鬼神人物性命之說乃格物

之一端耳不足以盡格物之義因易今名並為之序

培壘居禊錄四卷

明海鹽鄭思益孟端胤輯思益為端簡公曾孫是書禊采古今格言並端簡家誠牘世覺民厥功甚鉅

偶得紺珠一卷

明三山黃復子秉石著韓仲雍陳萬善並序昔張燕公有紺珠見之令人記事不忘書名或本此耳

檜亭稿九卷

元天台丁仲容復著李桓李孝光危素楊翮並序仲容晚年流寓金陵城北所居亭前有古檜列植因以命名其集則仲容之婿饒介之編次也

古林金石表一卷

國朝秀水曹潔躬侍郎輯自上古周秦下逮宋元共八百本經以碑緯以撰者書者之姓名及所之立之地與世與年合而成表簡端有自序

石刻鋪叙二卷

宋建昌曾宏父撰竹垞先生跋云其叙孟蜀九經及思陵御書  
石經本末特詳又南渡以後秘閣帖亦詮次有序復攷宏父本  
名愐紹興十三年以右朝散郎知台州府事其以字稱者避光  
宗諱也訂摭極精是書予借抄於先生曾孫繩武寶若璫璣卷  
末敘述歐陽文忠集古錄散逸源流亦頗明晰尾有鴻祐壬寅集  
古錄跋竹垞先生以為此書後序誤也宏父字幼卿一號鳳墅逸  
客

經制攷畧八卷

明陳秋濤子壯輯

雙槐歲抄十卷

明香山黃廷美瑜著嘉靖己酉大庾劉節序曰是書也聖神  
功德書焉人文典禮書焉天地祥眚書焉經史異同書焉懿行  
政美書焉有關倫彞非徒費歲月于鉛槧者比也自序云是  
書載筆於景泰丙子迄於弘治乙卯四十載而成編雙槐亭  
名在廣郡會城予解組後棲息處也按廷美仕終長樂令孫  
佐為之鏤版

任松卿集十卷

宋奉化任叔寶士林著是集一刻於元至正四年再刻於永樂三年胡若思儼為之序最後其耳孫一鳴重刻于泰昌元年今版已漶漫且多脫簡矣予少時讀先生所著開元佑聖諸宮觀碑銘愛其簡古欲購其集不可得雍正庚戌先孝廉偕萬編修經修輯寧波府志網羅文獻得全集携歸挿架經年積思慰於一旦誠厚幸也按趙文敏撰先生墓誌稱其曾館吾杭宗陽社尊師之宮教授弟子數十百人故杭州碑版一時多出其手

帶經堂集跋云士林



向章集十卷萬曆鄞人孫能傳從館閣  
藏本抄出尚有王厚齋序今已佚之

寶善堂稿二卷

明宗室慶成王宗川著萬曆乙亥河南布政左使孔天胤序保  
寧府知府趙訥後序

神州古史攷一卷

吾鄉倪叟魯玉璠著按自序云地理一書相關經術有助文章  
某因据今之版圖取前史諸地志列於郡縣之首凡世俗相傳  
者或與古合或多舛互並皆抄內以備異聞又上搜舊聞旁撫

遺逸帝王英雄先賢耆舊逸民孝子列女之篇風土城郭宮殿  
聖賢冢地伽藍寺塔之記或附麗山川連文史籍或標其題  
目不別區類凡兩京十四省共為一百五十餘卷謂之神州古  
史攷至唐以後者別為一編名曰方輿通俗文叟之志可謂宏  
矣今鏤版者僅杭州一府九縣餘未開雕安得有力者為之鐫  
行不負其畢生精力耶

武陵小史彙編一卷

顧氏宗譜也明裔孫顧又曇葉墅亮生起隆恬如存愉全輯

練忠貞事蹟一卷

明泰和鄧相奎子章輯忠貞死義九族被戮靡有了遺先是公子觀仔宣仔未生時以姪人特為嗣被難時人特適游吳越間聞禍遂潛避福建長樂縣家焉萬曆間恤錄靖難後裔乃得其八世孫纓以奉祠祀練氏子姓無復在江右而在閩中矣又宣德元年勅赦公女瓊還鄉嫁於陳用昌其勅命藏陳氏後人

筆史二卷

明盱郡楊因之思本著臨川邱毛伯兆麟序

茗史二卷

明甬上萬惟咸邦寧纂搜輯雖未該備語較新穎

易通六卷

宋趙以夫著按以夫仕至太中大夫試禮部尚書兼修玉牒官兼侍讀前有進呈表

玉筍集八卷朝京紀行詩一卷

明鄧伯言著臨川何淑蒙陽梁寅會稽戴正心並序

樂府統宗

不分卷帙明姚弘誼採掇南北樂府新舊牌名類入九宮十一調仍各以引子分列於前以過曲具贅於後而詞中遇字有多寡句有長短板有不同腔有不一者亦隨其牌名以附綴之曰統宗者蓋言統者繼也宗者法也總攝南北宮詞以便作者知有所取法也弘誼一字青蓮居士

### 山谷刀筆二十卷

宋黃魯直先生生平與親舊往來手筆也按宋史本傳稱先生嘗游瀟皖樂山谷寺石牛洞之林泉因自號山谷老人天下

皆稱山谷而不名

雪鴻堂詩集

不分卷帙明夏元寵錫祚著元寵一字書巖長洲人崑山籍  
庠生崇禎末詩稿散逸姪靄士方鳳為之詮次僅存什一矣

忍齋集五卷

明萬曆朝鮮大匡輔國崇祿大夫領中樞府兼經筵事  
洪暹退之著忍齋其別號也集末附載左議政金榮貴所  
作墓碑言其系出華胄父文僖公位宰相忍齋官吏曹時

以忤權臣下詔獄尋典試發策歷舉前代戚里宦寺之禍  
坐直言見謫晚年三登首揆深以盛滿為懼承一恩命必固  
辭至十數章蓋東國大臣之賢者其集竹垞翁輯明詩綜未  
見趙上舍信得之燕市全孝廉祖望為跋其尾

筠軒清閥錄三卷

董容臺著攷鑒雅博項子京鄉林清課瞠乎後矣

紫薇集四卷

宋東萊呂本中著前有龜堂老子弁語其喜雨詩云暝陰籠

樹山更好爽氣侵人土自香春日即事詩云雪消池館初春後人  
倚欄干欲暮時皆婉約可誦

雪溪集五卷

宋王銍著阮亭先生跋之曰銍最有名譽其詩頗鮮合作若卷  
中發石牛一絕云句云松竹陰中山未盡梅花林外有行人予甚  
愛之

東溪先生集二卷

宋高彦先登著登漳浦人為太學生時曾伏闕上書論李邦



彥張邦昌吳敏三人之奸

園冶三卷

明計無否成著鄭元勳阮大鍼並序

柳亭詩話三十卷

國朝山陰宋長白纂長白原名俊以字行康熙乙酉自序

客齋詩話六卷

宋溫陵陳基虞志華輯水真淥淨不可唾魚若空行無所依樓大防游龍井作見玫瑰集志華目為古詩何也

牡丹史四卷

明薛鳳翔著所紀只亳州餘不及也

奕史一卷

明王百穀樺登著

饌史一卷

元人撰不詳姓氏段成式食品謝諷食經引用為多

剡溪草一卷

明越中僧佛引西來著一剡上吟二失鶴和孫太初詩三楊花

詩四和陸魯望四明山九咏五喜月篇六海上吟七題起園十二景

名花譜一卷

不詳著者姓氏稱曰西湖居易主人輯應屬杭人纂述也採撮荒陋免園冊子耳

陶靖節先生詩集四卷

國朝康熙甲戌錢塘詹允諧夔錫輯注未附東坡和陶詩一卷按張演云梁昭明太子傳稱陶淵明字元亮或云潛字淵明顏

延之誄亦云有晉徵士潯陽陶淵明以統及延之所書則淵明  
固先生之名非字也先生孟嘉傳稱淵明親先親君之第四女  
嘉於先生為外大父先生又及其先親義必以名自見豈得自稱  
字哉統與延之所書可信不疑晉史謂潛字元亮南史謂潛字  
淵明皆非也先生於義熙中祭程氏妹亦稱淵明至元嘉中對  
檀道濟之言則曰潛也何敢望賢年譜云在晉名淵明在宋名  
潛元亮之字則未嘗易此言得之矣愚嘗讀晦翁語錄曰作詩  
須從陶柳門中來乃佳不如是無以發其蕭散沖遠之趣不免

於局促塵埃無由到古人佳處信然

### 三墳一卷

五代偽蜀道士杜光庭好撰偽書隱於青城山中托云風雨石裂得觀此書宋元豐中毛正仲漸附會其說稱奉使西京歷唐州之泌陽道無郵亭寓食民舍有題於戶曰三墳書某某借去因呼主人取閱傳錄示世可謂篤信不疑者矣按漢書藝文志錄古為詳而三墳之書已不載豈真有神物呵護寥隔千載始出人間耶且政典篇先時有殺無赦二語本之尚書胤征姓紀篇清

氣未升濁氣未沈一段剽竊列子天瑞篇文辭淺近其偽無疑也

溯洄集十卷

國朝魏柏鄉裔介彙選昭代諸公之詩已有清覽觀始二集此則其續選者方外閨秀概置不錄頗為遺憾

遵生八牋

明萬曆間杭州高濂輯襍綴舊人論述閒附已作為類八一清修妙論二四時調攝三起居安樂四延年却病五飲饌服食五燕閒清賞七靈秘丹藥八塵外遐舉大旨始則規以嘉言繼則享以

安逸終則成以善行循是由之明哲保身息心養性之道備於此矣

江月松風集十二卷

元錢思復先生著先生諱維善錢塘人領至正辛巳鄉薦官至副  
提舉鄉試時以羅剎江賦命題鎖院三十人不知羅剎江之為曲江  
也先生獨引枚乘七發為據大為主司所稱故又號曲江居士詩格  
清蒨圓美與山村先生相伯仲前過虎邱購得此冊為嘉禾曹  
氏舊鈔陶陰馬馬訛謬不少抵廣陵即假馬君佩兮小玲瓏  
山館藏本校之字竄句乙耳目斬新復增續集詩十首遂成合

璧先生為吾杭前輩而遺集罕有傳者因述其梗概於左時雍正上  
章閏茂陽月既望槐塘街人敬跋

予既校先生集附識得書緣起越四日檢顧俠君元詩選其序先生詩曰江月松風十二卷焦澹園經籍志不載錢牧齋列朝詩集錄思復詩九首得之賴良大雅集所載者而已練川陸子垂家藏思復手書詩集後歸於秀水曹倦圃友人金陶鈔得之合之甫里許氏所藏與陸氏原本無異倦圃云予家藏元人真蹟有思復詩乃知思復詩遺佚者多矣此卷實倦翁所藏想即得之陸氏者



其末卷題仲瑛碧梧翠竹堂錢舜舉弁山雪望圖次廷璋長史  
留宿過顧仲瑛可詩亭題息齋畫方寸鐵七首皆他本所不載或  
慘翁補入也

西湖志餘稱思復以羅剎江賦得名常作西湖竹枝詞十首有  
云阿姨住近段家橋瞿宗範戲之云此段家橋創見却與羅剎江  
不同也檢校全集竹枝詞無一首載者因增入之

龍唐山志五卷

國朝釋性制編順治乙未吳孔嘉序山距昌化縣七十里寺

曰晉濟宋咸淳四年明瞻禪師開山瓶盂極盛

五湖指掌二卷藩鎮指掌二卷

愚向讀諸史於晉之五胡唐之藩鎮每苦紛雜不得明晰嘗欲  
取晉唐二書并北史魏書北齊書周書十六國春秋舊唐書五代  
史十國春秋諸紀傳攷其事蹟分疏本末便於省覽日月荏苒  
有志未逮雍正癸丑客山陰倉橋因游蕺山過舊肆得閱張氏此  
書先得我心亟購以歸同學王麟徵趙端人施北亭各借傳抄因  
識數語張氏名大齡字元羽眉山

成都文類五十卷

宋建安袁說友慶元間為四川安撫制度使兼知成都軍府事  
時所輯也上自西漢下迄清熙凡文之有關於益者概從撫載秀  
水朱氏謂楊升菴全蜀藝文志本此而附益之信然

春秋稽疑四卷

明周藩宗正鎮國中尉睦樸著睦樸字自字灋甫字號西亭高皇  
七世孫周定王之裔也家起萬卷堂以藏書製述極富覃精經學  
著有五經稽疑若干卷此特其一耳

詩說紀事二卷

明吳郡吳伯良之驥著其言曰驥家世習詩自三百篇至六朝  
一一書之因詩名編是曰詩說自嘉隆萬曆以來交游詩篇情境  
觸懷更多存沒之感因詩以紀事故名曰詩說紀事上則取法乎韓  
詩外傳次則效顰於唐詩紀事云爾

青泥蓮花記十三卷

明宣城梅禹金所輯歷代姬侍倡伎也記分內外內曰禪曰元  
曰忠曰節曰外曰藻曰用曰豪曰遇曰戒首以摩登伽女者欲

人斷姪機枯愛河此身得解脫耳

潘默成集六卷附錄一卷

宋金華潘良貴著按良貴字子賤一字義仍榮擢進士第歷  
任州縣紹興初入為都司諫忤時相罷後除中書舍人兼攝  
起居郎終於家有雜著十五卷晦翁為之序是編六卷係

國朝康熙甲申金華曹定遠掇拾散亡重鐫之者

瀛奎律髓四十九卷

元方虛谷回輯至元癸未自序云瀛者何十八學士登瀛洲也

奎者何五星聚奎也律者何五七言之近體也髓者何非得皮得  
骨之謂也斯登也斯聚也而後八代五季之文弊革也文之精者  
為詩詩之精者為律所選詩格也所主詩話也學者求之髓由是  
可得也方回者誰家歟嘗守睦其字萬里也

### 嵩陽石刻記二卷

國朝黃陂葉井叔封編耿介俞汝言並序按井叔出宰嵩陽  
因取境內石刻無大小古今完闕蒐覽摹搨考其世次錄之  
其書或不甚善而其人與詩文足傳亦並收之第此編所紀僅

及嵩南而嵩北界連偃師鞏縣即緱山昇仙太子碑亦不備  
錄井叔歷官至工部主事既歿阮亭為志其墓

五經蠡測六卷

明福甯蔣仁叔悌生著洪武庚戌自序按五經中禮記亡闕今  
猶題曰五經蠡測仍其舊也

楓林易圖

元米楓林升著其自序云予自中年以經書授圖教子每於本  
文之旁著字以明其意義其有不相連屬者則益之於兩字之

間苟有不明不盡者則又益之於本行之外學者讀本文而覽旁註不見其意義之不足也惟易旁註則有前圖者易之為易其本也圖象而已文王周公孔子之書實為圖象作註脚故明此經者不得不求其本也河出圖洛出書天不愛道泄諸象數一可已二何居作河圖洛書合一圖第一聖人之則之也八卦成列而又因而重之其傳於今也各有橫圖圓圖而六十四卦圓圖中又有方圖則亦悉矣帝出乎震成乎艮其方位之象又何為哉作先天後天合一圖第二先天後天其始其終既各有序



矣連山歸藏首艮首坤今不能知而周易首乾坤終既未濟經  
分上下其間卦序乃復如彼作周易卦序圖第三卦變也卦主  
也互體也卦數也卦位也納甲也之六者時禘見於經傳必各著  
其全使人可通攷焉者也作六圖第四渙安夏氏有讀易十字區  
予平日竊窺於易得三大義二者經傳訓釋之機要也則以附六  
圖之後聖人處憂患之道自履至巽其傳古其指深卦之名義  
殆未足以盡之也作三陳九卦圖第五揲著以求卦因變而用爻  
比義從長宜勿拘一說作著卦變占圖第六夫子言著卦之德

曰圓曰方固非直曰七奇八偶而已作著<sup>七</sup>八卦八圖第七邵子天根  
月窟之吟非為今易安註脚也豫章蕭氏周易卦序之學區別於  
三畫六畫之源而象意昭融玩味乎正變始終之故而教道明著  
前纂為圖今錄其全文於後而繫以邵子之詩履運終身同一揆也  
作三十六宮圖說第八圖為之前而後周易旁註可得而讀矣




小眠齋讀書日札

默記一卷

宋王銍性之著所紀掌故熙寧以前軼事為多

班馬字類五卷

宋婁機編樓攻媿鑰序云瀋熙壬寅余丞宗正同年李聖俞為簿暇日以一書相示蓋婁君機所編史漢字類也予讀之因相與言曰古字不多率假借以為用後世寢廣隨俗更改多失造字之意此好古者所嘆也以史籀之大篆



或云書法已壞其書俗惡已不可究叔重之說文而云野  
陋淺薄謬妄欺世後之字書又可知矣西漢去古未遠文  
章固非後人所及而學亦多古雖已變秦文科斗書廢要  
之假借簡朴髣髴古意其興亡之大端忠邪之異趣千載  
自不可誣而綴文之士又摘取奇字以資華藻片言集字  
施之鉛槧自有一種風味故誨蒙漢隲等書作者不一此  
書更取史記之字合為一編從韻類分彙然可覩其志勤  
矣蓋孟堅生於東都源流叔皮以成信史寧長親事武帝

紬金石室之藏網羅天下放失舊聞孟堅竇祖之多用其  
文不敢改定婁君尤為知所本矣然亦有難解者班之于  
馬特有遺失父意泯沒如羸肩之不言生有以起自布衣  
而去也夫之類殆不曉其意又其甚者垓下之圍以項羽  
之用兵未嘗接戰<sub>至</sub>以楚歌而潰去疑無此理至誤儒者  
謂惜乎項羽韓信不曾一戰引孔明仲達以為比史載甚  
詳而孟堅畧不及此是可遺耶嘗有意一一證之性嬾未  
暇婁君此書將傳于世觀其趨向進退未已或更考究以

補孟堅之闕以發揮子長之餘不亦善乎聖俞啞言笑曰  
婁君屬我以序久未落筆當盡以子言寄之○機自跋云  
世率以班固史多假借古字又時用偏旁音釋各異然得  
善註易曉遂為據依機謂固作西漢書多述司馬遷之舊  
論古字當自遷史始因取史記正義索隱西漢音義集韻  
諸書訂正作班馬字類互見各出不沒其舊而音義較然  
違舛尚多更俟增易滔然辛亥夏至日本興婁某書

事類賦三十卷

宋鴻化中博士吳淑進一字題賦百首太宗嘉其精贍因命註釋之擢為水曹郎更其名曰事類賦紹興丙寅迪功郎邊惇德序云其書文約事備視李嶠單題詩丁晉公青衿集用功蓋萬萬矣明無錫華麟祥校刻以行

### 廣事類賦四十卷

國朝無錫華希閔著倣吳氏之體而增廣其未備聞此書鄒兆升欣助之功居多非出於華氏一手也近日吾鄉姚侍御之駟著有類林新詠大槩倣事類賦但易文為詩耳



兵鈴十六卷

國朝廣寧盧承恩瀋陽呂猶全輯康熙乙卯年山陰何良棟序書分內外篇內篇八卷雜採孫子鬼谷子素書武侯心語孟德新書李衛公問荅兜鈴經百戰畧劉基作諸家之說外篇八卷曰軍政軍例陣圖軍器火攻水攻軍藥軍占八類承恩字天顧有自序蓋將家子也此書未授梓山陰王君甸雯得攜鈔六冊贈新將軍予得借觀記其大畧

香乘二十八卷

明周嘉胄輯此書初成十三卷李繼楨序後續成二十八卷崇禎十四年自序嘉序字江左揚州人

南陽村白衣人遺稿七卷

不著姓氏一曰萬感集二曰張張集三曰夢覺集四曰真臘凝寒集五曰東將詩六曰歎氣集七曰零星稿詩不入格間有一二性靈語內可誦也

荊川先生集十二卷

明唐順之著無錫安如石為之梓行晉江王慎中序荊川

之學固為有明一代魁傑而序中上擬于季札子游過矣  
梅村集四十卷

國朝吳偉業駿公著錢謙益陳瑚盧弢並序康熙八年門  
人顧湄輩為之開雕病中有感詞云脫屣妻孥非易事竟  
一錢不值何須說其怨艾者深矣讀者原其心可也

續文獻通攷二百五十四卷

明上海王圻著續馬氏通攷而增補其不備宋嘉定以後  
及遼金元暨明萬曆以前典故加詳焉馬氏本二十四門

圻又增節義氏族六書謚法道統方外諸攷而以節義附  
學校氏族附封建六書附徃藉謚法附王禮又以黃河太  
湖河渠附水利海運附漕運之末于道統一門尤三致意  
雖其間踳駁不免舛漏亦多要亦留心經濟有用之學視  
侈言風雅空疎無當者相去萬萬矣圻字元翰嘉靖乙丑  
進士厯官陝西布政司叅議所撰續通攷外尚有兩浙鹽  
志海防志三吳水利攷稗史彙編諸書

通典二百卷

唐京兆杜佑君卿撰佑自序云某少嘗讀書而性且蒙因不達術數之藝不好章句之學所纂通典寔采羣言徵諸人事將施有政夫理道之先在乎行教化教化之本在乎足衣食易稱聚人曰財洪範八政一曰食二曰貨管子曰倉廩實知禮節衣食足知榮辱夫子曰既富而教斯之謂也夫行教化在乎設職官設職官在乎審官才審官才在乎精選舉制禮以端其俗立樂以和其心此先哲王致治之大方也故職官設然後禮樂興焉教化溥然後用刑罰

焉列州郡俾分領焉置邊坊遏戎狄焉是以食貨他為之首

卷十二選舉次之卷六職官又次之二卷禮又次之卷百樂又次

之卷七刑又次之大刑用甲兵五卷州郡又次之卷十四边防

末之卷十六或覽之者庶知篇第之次也唐左補闕李翰序

云儒家者流博而寡要勞而少功何哉其患在于擇之不  
精知之不明入而不得其門行而不由其道何以徵之夫  
五經羣史之書大不過本天地設君臣明十倫五教之義  
陳政刑賞罰之柄述禮樂制度之統究治亂興亡之由立

邦之道盡于此矣非此典者謂之無益世教則聖人不書  
學者不覽懼冗煩而無以從也而學者以多閱為廣見以  
異端為博聞是非紛然瀕洞茫昧而無條貫或舉其中而  
不知其本原其始而不要其終高談有餘待問則泥雖馳  
驅百家日誦萬字學彌廣而志彌惑聞愈多而識愈疑此  
所以勤苦而難也此數語足為俗學鍼砭

禹貢雖指二十卷附圖四十七篇

國朝德清胡渭撰書之命名蓋取莊子秋水用雖指地語

喻所見之小以鳴謙也渭元名渭生字肱明一字東樵不  
習科舉業隱居著述賈精經述尤長地理之學曾與無錫  
顧祖禹景范常熟黃儀子鴻太原閻若璩百詩同為崑山徐  
健菴司寇聘脩一統志顧氏諸公於地理皆有論著渭此  
書成獻後康熙間經查宮詹昇奏呈 御覽會 聖  
祖南巡獻平成頌一篇 上賞其文 賜御書扇一  
又耆年篤學四大字扁以旌異之其從侄會恩官禮部侍  
郎少受業于渭為記進書始末于卷首禮部尚書吉水李



振裕內閣學士兼禮部侍郎崑山徐秉義並序按雖指一書攷正孔傳孔疏宋元明諸家之說主以班固地理志叅以山海經水經註及郡縣志揔其謬誤辨其疑似使後世讀經者瞭然心目之間其有功於禹貢不細渭別著有洪範正論若干卷惜未得見

### 山海經十三篇

劉歆以為出於唐虞之際列子曰大禹行而見之伯益知而名之夷堅聞而志之王充論衡曰禹主治水益主託異

物以所見聞作山海經審爾則是書與禹貢相為經緯矣  
然其間可疑者甚多顏之推曰山海經禹益所記而有長  
沙零陵桂陽諸暨後人所羈非本文也尤袤曰此先秦之  
書非禹與伯翳所作二說尤當其所有怪物固不足道即  
所紀之山川方鄉里至雖存却不知在何郡縣遠近虛寔  
無從測驗何可據以說經惟澧沅瀟湘在九江之間一語  
可以証禹貢矣

皇輿表十六卷

國朝康熙十八年經筵日講官起居注翰林院掌院學士兼  
禮部侍郎喇沙里等奉

勅撰四十三年復命經筵日  
講官起居注翰林院掌院學士揆叙等增葺先後皆有進  
呈表

聖祖兩製序以觀簡端首

京師次

盛京又次江南山東山西河南陝西浙江福建

江西湖廣廣東廣西四川貴州雲南各布政使司而以朝  
貢諸國附載卷末是書一倣史表以地繫代詳書郡縣沿革  
革不及山川風土者從表體也

## 水經四十卷

按隋經籍志有兩水經一本三卷郭璞註一本四十卷酈善長註善長即道元也然皆不著撰人姓名唐杜佑作通典尚見兩書言郭璞疎畧於酈註無所言撰人則概未之考也舊唐志始云郭璞作衆學文總目亦不言撰人為誰但云酈註四十卷亡其五新唐志乃謂漢桑欽作水經一云郭璞作然璞註山海經引水經者八豈出璞手耶不知新志何所據而指為桑欽作也西漢儒林傳言塗惲授河

南桑欽君長尚書晁氏言欽成帝時人果爾則是書不當  
見遺於漢藝文志矣金礼部郎中蔡正甫作補正水經三  
卷歐陽圭齋為之序辨託水經撰人原委甚晰 國朝

德清胡渭生謂酈註于潞水引桑欽地理志又於易水濁

潭漳水並引桑欽使若此經果出于欽無直斥其名之理或

曰欽作於前郭璞酈道元附益于後或曰漢後地名乃註

混於經並非蓋欽此撰名地理志不名水經水經創自東  
漢而魏晉人續成之非一時一手作故往往有漢後地名

而首尾或不相應不盡由經註混淆也此亦臆度之詞不可為據存而不論可也

又

水經注四十卷宋有內庫抄本明吳郡黃氏竟陵鍾氏譚氏及歛吳氏皆有槧本歲久燬廢購者難得

國朝康熙間歛人項綱得吳本於長洲故家其卷尾署云虞山錢曾據宋本校定蓋絳雲舊物也因取朱謀煒注錢叅校開雕而以山海經合槧行之綱僑居真州予友查集堂

適官其地遂屬其往印乃不戒於火板悉被焚是書之流  
傳寡矣惜哉

元和郡縣志四十卷

抄本

唐金紫光祿大夫中書侍郎同中書門下平章事兼集賢  
殿大學士監脩國史上柱國趙國公李吉甫撰起京兆府  
盡隴西道凡四十七鎮成四十卷每鎮皆圖在篇首冠于  
叙事之前并目錄兩卷總四十二卷其有序云古今言地  
理者凡數千家尚古遠者或搜古而畧今採謠俗者多傳

疑而失寔歸卅邦而叙人物因邱墓而徵鬼神流于異端  
莫切根要至于邱壤山川攻守利害本于地理者皆畧而  
不書將何以佐明王執天下之吭制羣生之命收地保勢  
勝之利示形束壤制之端此數語可為作地理書者之圭  
卓是編宋高熙三年敷文閣待制張幾仲子顏開雕于襄  
陽幕府程大昌洪邁俱有跋語程跋云圖今亡矣獨志存  
焉耳予從瓶花齋借觀中關河北道一卷山南道一卷淮  
南道二卷嶺南道二卷凡六卷又不獨圖之缺失也焦氏



經籍志稱五十四卷蓋唐書藝文志之訛也此書流傳  
甚稀藝林當共寶之

太平寰宇記二百卷

抄本

宋朝奉郎太常博士直史館賜緋魚袋樂史撰前有自序  
一百七十二卷起至末所載東夷南蠻西戎北狄二百國  
附論云四夷之猾夏尚矣明達之士論備之要無代無之  
房司空上書諫伐高麗云比來犯罪死囚每令三覆重惜  
人命而億萬吏卒無一罪戾委之鋒刃寔為寃酷薛補闕

上書諫諸蕃侍子久在京師恐其知邊塞盈虛險易悅華  
夏服玩聲色或窺圖史兼達古今如有劉元海之徒終成  
大慙劉起居武指云秦逐戎狄出塞限閼華夏是為中策  
三賢所陳可謂篤論是編廣陵馬氏及予友全謝山趙誠  
夫俱有藏本傳鈔既久舛漏居多惟瓶花齋所藏為崑山  
徐氏傳是樓舊本魯魚差少尚稱完善

元豐九域志十卷

序目逸去錯字頗多惜無善本校勘此書借閱瓶花齋異

日赴廣陵甯從小玲瓏山館另借校正之

明一統志九十卷

資政大夫吏部尚書兼翰林院學士李賢等奉勅修前有  
天順五年英宗御製序考前明以京畿府州直隸六部天  
下分為十三布政司以統諸府州縣而都司衙所則錯置  
其間志中所載為府一百四十九為州二百十八為縣一  
千一百五邊陲之地都司衙所及宣慰招討宣撫安撫等  
司與夫四夷受官封執臣礼者皆具載焉披閱一遍詳畧

失宜蹇駸不少景范頌氏譏其疎漏宜矣

方輿勝覽七十卷

宋建安祝穆和夫編嘉熙己亥新安呂午序所載浙西浙東  
福建江東江西湖南湖北京西廣東廣西淮東淮西成都夔  
州潼州利州東利州西十八路皆南渡偏安之境土也每郡  
所託首郡名次風俗形勝土產山川學館書院樓閣亭榭井  
泉館驛橋梁佛寺道觀古跡名宦人物題詠凡十八類標目

曰事要

歷代賦彙正集一百四十卷外集二十卷別集二卷

國朝海寧陳文禎相國康熙間官詹事時奉

敕編刻分類三十首天象次歲時次地理次都邑次治道次典  
禮次禎祥次臨幸次蒐狩次文學次武功次性道次農桑次  
宮殿次室宇次器用次舟車次音樂次玉帛次服飾次飲食  
次書畫次巧藝次仙釋次覽古次寓言次草木次花果次鳥  
獸次鱗蟲共一百四十卷為正集其餘勞人思婦觸景寄懷  
哀怨窮愁放言任達別為區定曰言志曰懷思曰行旅曰曠

達曰美麗曰諷喻曰情感曰人事分類凡八共二十卷為外  
集其單詞剩句散見諸書無完本可較者於集外別為二卷  
聖祖仁皇帝御製序文以弁其首松柏有心一賦既載草木  
又載性道後先參錯想一時編輯之誤耳

羣芳清玩十二卷

明李璵惠時彙刻共十二種一鼎錄梁虞荔撰二刀劍錄梁  
陶弘景撰三研史宋宋芾撰四蘭譜宋貴學撰五畫鑒宋湯  
垕撰六石譜宋杜綰撰七瓶史明袁宏道撰八奕律明王思

任撰九茗爰明屠本峻輯十香國明毛晉輯十一采菊雜詠  
明馬宏道集十二蝶几譜明嚴徵道撰

荒政叢書

國朝錢塘俞森輯首叙義倉社倉之本末事宜次採宋董煟救  
荒金法林希元荒政叢言明屠隆荒政考周孔教荒政議鍾  
忠惠公化民賑豫紀畧劉世教救荒畧及 國朝魏禧救荒  
策七種乾隆乙亥秋杭嘉湖紹四府疊遭風潮螟蟲之災市  
價翔貴斗米三百錢有司早得此書倣而行之或不至餓殍

之載道乎雖然古人成法固可率由時地不同又當循其制而損益之則善矣

### 先憂集十冊

國朝仁和陳芳生輯胡作柄序為類五十七一總理荒政二務本三節用四田制五水利六常平倉七義倉八社倉九保甲十酒禁十一原荒十二占候十三預防十四廣樹藝十五脩省十六祈禱十七捕蝗十八急上聞十九罰蔽災二十檢踏二十一籍戶口二十二撫流民二十三懲幼二十四遣使二



十五任人二十六假便宜二十七犯專擅二十八留上供二十九弛山澤之禁三十蠲租三十一改折三十二官糴三十三通商三十四無抑價三十五無遏糴三十六揭販之禁三十七稱貸三十八通有無三十九勸分四十減私租四十一納粟四十二贖罪四十三賑粥四十四賑濟四十五賑鄉僻四十六罰侵欺四十七興工作四十八輯暴亂四十九救荒本草五十辟穀方五十一治疾疫五十二恤死五十三禁宰畊牛五十四慮後五十五不恤荒之戒五十六養濟院五十

七荒政餘論所採皆古人已行之事纖悉畢備司民牧者宜  
人置一策以為治譜

篆竹堂書目

明葉文莊盛編自序云為冊四千六百有奇為卷二萬二千  
七百有奇又書厨銘云讀必謹鎖必牢收必審閣必高子孫  
子惟學數借非其人亦不孝前有倦圃繡谷兩跋

絳雲樓書目

虞山錢牧齋所藏書籍之目也中載天主教書五種夫西洋

耶蘇之說荒誕不經闢邪集言之詳矣其行教者由澳門潛入各省煽惑愚氓為功令所宥錢氏願將非聖之書列之羣籍之內宜為薈攸所怒一炬而盡歸灰燼矣

### 國史經籍志五卷附錄一卷

明焦竑輯經史文集共一萬六千四百七十六部凡漢唐宋藝文志隋經籍志唐四庫書目宋崇文總目鄭樵藝文畧晁氏讀書志諸書所載四部附麗未善者以類相從悉為釐正

### 唐文粹一百卷

宋吳興姚鉉賢臣纂蓋倣蕭統之文選而為之者自序云徧  
閱羣籍掇菁擷華十年於茲始就厥志得古賦樂章歌詩贊  
碑頌銘文論箴議表奏傳錄書序凡為一百卷以類相從各  
分首第門目正以古雅為命不以雕篆為工此採集之本旨  
也然有唐一氏之文如魏鄭公之請節儉慎刑請尚誠信諸  
疏傳奕之闕佛表房喬之諫伐高麗郭震之覘西虜劉祥道  
之陳選事諸疏歸崇敬之釐正學制議柳玘之述家訓呂才  
之卜宅祿命葬篇諸文皆有關于治亂風俗略而不錄竊非

鄙意所安明嘉靖間太倉國子生徐燦購得古本鋟之梓歲  
久漫漶萬厯間吳下金應祥復購徐本重刻之予家所藏本  
程進士灝見贈卽萬厯間所刻行間字裡訛訛者已難更僕  
數矣

## 二十二史文鈔

國朝滿洲納蘭常安選輯乾隆十二年官浙江巡撫時刊行中  
丞工詩文著有受宜堂集頗多見道語乃以賅敗士論惜之  
此書自史記至明史共一百九卷前有有序每文之前各冠

以小傳亦知人論世之義其凡例云讀史之文有經濟之文  
有考訂之文有猷替之文有舉劾之文凡因革損益制度典  
章國計民生賢否得失以及世運之所由盛衰主德之所由  
升降風俗之所由醺疵人才之所由消長上下千古如鑑懸  
而衡陳毫釐不爽斯謂所受者大若夫風雲月露妃青婉白  
則黜而不收此文鈔取舍之太凡也

詩人玉屑二十卷

宋魏慶之著瀋祐甲辰黃易叔賜序慶之字醺甫不應科舉

種菊千叢與騷人佚士觴詠其間因自號菊莊凡詩之体裁格律命意造句用字押韻一一為之辨析又取三百篇騷選而下及宋朝諸公之作錄之持論多有拘泥處存脩詩話一則可耳

### 五禮通考二百六十二卷

國朝刑部尚書金匱秦蕙田編輯直隸總督相城方觀承同訂康熙間崑山徐氏著有讀禮通考一百二十卷最稱賅洽但止喪禮一種而吉嘉賓軍四禮尚屬闕如司冠做徐氏之體

例而足成之又於凶禮補所未備于是五禮始成完書詢經  
世之大典可以信今而垂後也首列禮經作述源流二卷歷  
代禮制沿革二卷提挈綱領俾讀者於本末源委異同得失  
之故識所指歸更多裨益前有陽湖蔣汾功無錫顧棟高德  
卅盧見曾仁和盧文弨諸序

心賞編一卷

明新城王象晉盡臣輯前有自序一孫生要覽二淑身懿訓  
三佚老成說四歎世善術五書室清供六林泉樂事採摭前



人之論說而參以己意衛生之道或有取焉

知新錄三十二卷

國朝王崇勿剪輯雜採四部之書而間附以己意所謂知新者亦就其所見耳資暇啟顏不無小助前有自序

玉海二百四卷

宋禮部尚書浚儀王應麟輯凡天地山川古今事物道德性命律歷制度禮樂刑政兵農食貨靡不畢備總二十一門析為二百六十一類以詞學指南四卷附焉王氏著述之書漸

三十種今所傳者惟困學紀聞小學紺珠等六七種惜乎此  
外均無流傳前有至正翰林國史院編脩官東陽胡助慶元  
路總管何殷園婺郡文學中山李恒序此書刊于元前明藏  
板南京國子監正德嘉靖兩加脩補萬歷十一年祭酒趙用  
賢復為校勘刊脩

建陽蔡氏九儒書九卷

閩中自龜山楊文靖公得伊洛之傳由豫章延平至朱子集  
諸儒之大成其時從遊之彥首推西山蔡文節公而家學之

昌四世九儒四世者始于西山之父謨字神興號牧堂以程氏語錄邵氏經世張氏正蒙授西山曰此孔孟正脉也令從朱子遊盡得其傳西山名元定字季通追謚文節朱子啟蒙則禹<sup>屬</sup>起藁所著有大衍詳說律呂新書燕樂原辨皇極經世太元潛虛指要洪範八陣圖說諸書西山長子淵字伯靜號節齋躬耕不仕所著有周易訓解大傳易說等書次子沆字復之號復齋官兩浙運幹所著有春秋五論教人以不遠復為法而以頌復而厲為戒學者宗之季子沆字仲默號九峯

追謚文正亦師事朱子朱子晚年訓傳諸經略備獨書經未及  
為整遂以囑沉乃考序文之誤訂諸儒之說其於洪範洛誥泰  
誓諸篇往往有先儒所未發淵長子格號素軒躬耕不仕沉長  
子模字仲覺號覺軒官典功郎次子杭字仲節號久軒官工部  
侍郎季子權字仲平號靜軒授廬峯書院山長啓承家學闡明  
經術著述頗多具載集中此書重刊于 國朝雍正癸丑年周  
學健蔡世達并為之序

西域全書四卷

國朝無名人輯前自序內稱乾隆元年錦城玉沙道人子銘氏  
撰其姓名莫考蓋從戎西藏中者所纂也首載拉撒康衛全  
圖及戍城人物各圖形次載歷代事寔多缺畧不詳又次則  
疆域山川形勢寺廟時令物產風俗刑法律例又次則封爵  
官制兵防征調差科貢賦碑碣臺站諸制度又次則入藏道  
路里數文筆雖欠雅馴而西域形勝事寔披卷瞭然亦可以  
備地志之不備據稱西藏即古之西吐蕃唐之烏斯國明之  
烏斯藏今日圖伯特又曰唐古忒內分為前後中三藏前藏



即察木多康地中藏即拉撒衛地後藏即札什隆布藏地前  
又有安明珠花世繁二序此書予假于嚴上舍果亭瓶花齋  
見而借鈔因綴數語于末簡

### 五代會要三十卷

宋建隆中宰相王溥選進中有缺紙數頁商邱宋氏古林曹  
氏藏本亦并失之無由購補矣五代之典章制度禮樂刑政  
俱藉此書以傳洵可寶也內載周廣順三年勅下文武臣僚  
幕職州縣官舉選人等內有父母亡歿未經營葬其主家之

長不得輒求仕進所由司亦不得申舉犯者必行典法嗚呼  
此制雖百世行之可也

王荊公唐百家詩選二十卷

自明皇至韓偓共一百四人云百家者舉成數也荊公自序  
云欲知唐詩者觀此足矣而李杜韓諸鉅公俱不入選斯言  
恐不足為標準宋乾道己丑盤谷倪仲傳重為鏤板閱六百  
餘年至 國朝康熙癸未商邱宋漫堂初購得八卷囑山陽  
邱迴刊行嗣又續得十二卷於江陰藏書家補刊之遂成全

壁前有漫堂及邱迴序跋迴字通求漫堂下門士也

### 金石錄三十卷

宋趙明誠德父編著德父家多前代金石刻因倣歐陽公集古錄所論以考書傳諸家同異上自三代下迄五季鐘鼎甌  
鬲槃匱尊敦之款識豐碑大碣顯人晦士之事蹟凡見於金  
石刻者皆令正其謬謬去取褒貶寔足以補史氏之缺誤第  
一至十卷為金石文字目錄第十一至二十卷均屬跋尾此  
書世鮮善本舊惟濟南謝世箕曾為刊行原本流傳亦少



國朝乾隆間兩淮鹽運使盧見曾取謝氏影鈔本及義門何氏  
手校吳郡葉文莊本重為開雕前有德父自序後有政和七  
年河間劉跋序並李易安諸跋運使德州人汲古好士另刻  
有金石三例感舊集經義考諸書其序內力辨易安改嫁之  
誣亦卓見也

太平御覽一千卷

宋太平興國二年詔翰林學士李昉等編集自墳典邱索六  
經子史稗官藝說前言往行並錄兼收以天文地理人事并

木昆蟲飛走動植類聚羣分綱條目貫具載靡遺宋時編四大類書而御覽為先其次為冊府元龜為太平廣記為合璧事類然元龜獨紀君臣事寔廣記尤多怪誕事類泛引詞人詩賦各有偏弊惟御覽端于經究核于史盡變于子推廣于諸儒之文集不泛不畧足備文苑之用宋世刊本久已湮滅明浙人倪炳伯文鳩工重鐫始成完書萬歷元年太僕寺卿常州黃正色序此書徵引羣籍至一千六百九十種而所引詩賦銘箴雜著等類不列于目然所引諸書近代存者亦不

及牛如戴良零丁等篇微此書後人無由知其緣起矣

續資治通鑑綱目二十七卷

明成化間命大學士商輅等編纂始宋太祖建隆元年盡元  
順帝二十七年合宋元二代計四百八年之事蹟倣朱子凡  
例而續成之前有憲宗御製序及進呈表此書雖屬刊本字  
畫工妙宛同繕寫序首有廣運之寶印文四字似勝國內府  
所藏也

本草類方十卷

國朝年希堯輯前有諸症歌訣分甲至癸十部雍正乙卯有序  
刊行醫者察脉審症按其方而用之於活人之功不為無補  
云

### 對制談經十五卷

宋龍圖閣學士謚文康葉時著舊文百篇明京兆杜涇分為  
十五卷文康登淳熙甲辰進士第歷官吏部尚書與朱子相  
友善遂精周礼此書以周礼為主而以羣經及漢唐史附益  
之所論述皆君人治平之具宰輔致澤之術以其可資制科

之用因易名對制談經其寔即公所著之禮經會元也惟改竄標目每篇字句多有刪節非復禮經會元之舊為可惜耳  
禮經會元四卷

宋葉時著計百篇其立言之旨具見對制談經一書跋中時字秀發號竹楚先世宦遊浙西樂錢塘風土因家焉歿葬吳興元至正二十五年六世孫江浙等處儒學副提舉廣居將此書獻之江浙行中書省右丞潘元明命鏤板以傳前有元明及陳基序

談薈三十六卷

明西安徐應秋輯雜採四部靈怪奇異之事用資譚柄曰以命名應秋登萬歷丙辰進士由部郎歷福建布政使司字雲林號玉芝其書刊于閩中年久漫漶

國朝康熙癸未署衢州守靳治荆重為補鑿近浙撫熊大中丞有民人控發婦三十六月產子者指為姦生因舉此書所載溫磐石胡約馬吳德諸婦俱孕三十餘月而生告之疑案遂定則譚言儲說未為無小補也

程氏貽範集三十卷

明成化間休寧程敏政輯甲集七卷首載王言公移以記跋等文附乙集二十卷備載行實以序記等文附丙集一卷歷代像贊以輓詩奠章附丁集一卷譜辨戊集一卷譜號蓋溯自程氏姓得之始以迄有明累朝文人而紀之以垂奕世之模範也其程氏之女以節烈孝行著者並採摭而並登焉

本草綱目五十二卷

明萬厯間蘄州李時珍著本草舊本一千五百一十八種時

珍增三百七十四種分為一十六部每藥標正名為綱附釋  
名為目正始也次以集解辨疑正誤詳其土產形狀也次以  
氣味主治附方著其体用也其子建元於萬曆三十四年進  
呈其疏云向來各藥有當折而混者如葳蕤女萎二物而併  
為一條有當併而折者如南星虎掌本一物而分為二種生  
薑薯蕷菜也而列草品檳榔龍眼果也而列木部八穀生民  
之天也不能明辨其種類三菰日用之蔬也罔究的別其名  
稱黑豆赤菽大小同條消石芒消水火混註以蘭花為蘭草



卷丹為百合此冠氏衍義之舛也謂黃精即鉤吻旋花即山  
蘆乃陶氏別錄之訛也歐漿若瞻草葉重出掌氏之不審天  
花括樓兩處圖形蘇氏之欠明五倍子構虫窠也而認為木  
質大藟草田字草也而指為浮萍似茲之類不可枚舉重者  
芟之缺者補之凡三十稔而後成云云其用力可謂勤矣前  
有王鳳洲原序 國朝順治間吳毓昌重刊時珍官四川蓬  
溪縣知縣號東璧

李太白詩文集三十卷附錄一卷

國朝錢塘王琦載菴註琦之序曰李集之註傳于世者最少楊子見蕭粹齋胡孝轅三家外寥寥不多見蕭粹齋作李詩補注所以補楊子見之闕而未能盡補其闕胡孝轅作李詩通能正楊蕭二家之謬而亦未能盡正其謬予承三子之後廣為綴輯以繼其業云予讀其註句疏字郝頗稱詳瞻其於作者本意殊少發明殆有鑒于注杜者穿鑿附會曲為之解故姑闕焉以俟後人之自領悟耳

御選歷代詩餘一百二十卷

自一卷以至一百卷共詞九千零九首自十六字至二百四十字共調一千五百四十闋一百一卷起至一百一十卷唐五代宋元明詞人姓氏一百十一卷起至一百二十卷所紀歷代詞話計詞人九百五十七人詞話七百六十三則前有康熙四十六年

御製序奉 勅編纂官則翰林院侍讀學士沈辰垣翰林院修撰王奕清翰林院編修閻錫爵余正伊

聖學宗傳十八卷

明紹興周汝登編上溯伏羲帝王聖賢近及有明諸先儒共傳八十四篇其旨以堯舜禹湯文武周公孔孟遞相傳授不外此學宋周子所謂太極程子所謂識仁明新會所稱自然新建所指良知殊途同歸其授受亦此聖學也前有鄒元標陶望齡二序

國朝順治十七年九江教授劉邦胤重刊潛菴湯氏復為之序行

習學記言序目五十卷

宋永嘉葉適著嘉定十六年門人山陰孫之宏序云初先生輯錄經史百氏條目名習學記言未有論述自金陵歸研玩羣書更十六寒暑乃成序目五十卷子宋以先志編次而丐越帥汪某鏤板按宋氏適本傳適曾知建康府兼沿江制置使金兵大入適募人刼營俘馘以歸後為中丞雷孝友所劾奪職奉祠凡十三年卒贈光祿大夫謚忠定此書則罷建康府奉祠後所成但史稱十三年而序稱自金陵歸更十六寒暑乃成殊有不同萬歷溫州府志謂學者稱適為水心先生

所著尚有荀揚問荅及水心集此書根柢于經史諸子以呂氏文鑑終焉持論多心得語并寄慨于南渡後時事之不振也

小柴桑喃喃錄上下二卷

明會稽陶奭齡君奭著奭為石簣之弟仕在廣東肇慶推官其紀載多有牖世砥俗之助但多托於禪語未離魔障前有崇正乙亥自序此書借閱於沈大令賡堂

月老新書十二卷

序文逸去不知纂人姓氏內引用紹興以前故寔皆稱皇朝則南渡後村夫子所輯酬應之書也

希姓補五卷

國朝蕭山單昌其隆周輯本新都楊氏希姓錄而補之者

春秋明志十二卷

明熊過著自序其書商榷於唐應德者一二異同於季彭山

山者三四

周易折衷三十三卷

元潼川趙采著采字德亮號隆齋其書以程朱傳義為主而附以已見其自序曰易該象數理未作之前其体因象數而立既作之後其理因象數而顯斯言也得易之微旨矣

錢志十五卷

宋鄱陽洪遵撰明新安鮑山校鏤而為之序云金刀泉貨之用流通于世宜乎不朽然不免水火沈滅之虞周秦以上其制不能盡傳漢魏以降代有興鑄而小大輕重之差輪郭孔背之異方圓厚薄之殊楷篆籀隸之不同物既無存法將焉



攷至梁顧烜輯略同異著為錢譜嗣後封演輩數家相繼從  
而廣之猶未備也迨宋鄱陽洪氏著錢志十五卷摭摭殆遍  
援證該博上有有虞下至五代極於遠夷異域凡其造作之  
由沿革之故體制法式并起滅之年月纖悉不遺足以稱錢  
之董狐矣近日予友吳道周蓄古錢極富摹印成帙自宋以  
上足以補洪氏之未備由宋以來可續入稱志云

周易集傳十八卷

元胡廣儒學提舉龍仁夫撰仁夫字觀復廬陵人學者稱麟

洲先生按周易十翼舊卷自漢費直始以彖象參入卦中晉王弼又以文言附乾坤二卦後世仍之不改龍氏乃分彖辭象辭文言各自為卷頗合古義惜逸去十卷無從得購完書矣

晁文元道院集要三卷法藏碎金錄十卷

宋晁迥撰按文獻通考云迥字明遠澶州人幼從王禹偁學太平興國五年進士至道末擢右正言直史館知制誥入翰林為學士加承旨天禧中判西京留司御史臺居六年請老

以太子少保致仕終少傅年八十四文元謚也又晁公武郡齊讀書志云五世祖文元公道院別集十五卷法藏碎金錄十卷今攷集要止三卷有治平中王古序云公所著書曰道院別集曰自擇增修百法曰法藏碎金曰隨因紀述曰耄智餘書予常得遍閱之以為名理之妙雖白樂天不逮也因刪其重複總集粹精整比義類使便觀覽列為三卷題為道院集要云似集要一書合採諸書而成之不獨芟汰別集十五卷也

救荒活民補遺書三卷

明江陰朱維吉輯先是宋嘉泰中從政郎董惛慮民凶歲有不遂其生者乃取歷代救荒之政為書三卷上之朝廷元張先大又取當時救災卹民之事編萃而附益之維吉復取董氏張氏之說芟其浮靡補其遺失凡前朝史傳所紀君臣論答有益於救荒者增輯成書間或附以論斷

宗鏡錄節要三卷

元闍中僧了一取智覺禪師宗鏡錄編節之者泰定三年

自序

廬山通志十二卷

廬山秀甲寰宇舊無專志明嘉靖間揚州桑子木喬輯有廬山紀事一書歲久失傳

國朝順治中釋定高聞極重編

天台山外方志三十卷

明萬厯間釋無盡傳燈撰蒐輯典雅序事有法山志中之最佳者

房山雲水洞記一卷

不著撰人姓氏從秀水朱氏借錄

明七太子傳一卷

明秀水陳孟常懿典著附以廟祔十五王傳及漢唐人傳

春秋四傳糾正一卷

明俞汝言著大旨凡六一日尊聖而忘其僭二曰執理而近于迂三曰尚義而隣于鑿四曰億測而涉于誣五曰稱美而失情寔六曰摘瑕而傷鑿刻

周易衍義

元大德中將仕佐郎南康路儒學教授深溪胡震著未削稿而及子光大補輯以成倦圃曹氏鈔本

周易文變易緼四卷

元天台陳澤雲應潤著至正丙戌黃文獻潘序云觀澤雲所註之易乾坤二卦已無餘緼至於變文三百八十四有旁通他卦之義爻爻有發揮事事有攷証造理精微立說洞徹餘如刪正太極八卦爻法逆順等圖探賸索隱自非灼然有見於

聖人之心者不能也

伯牙琴一卷

元錢塘道士鄧牧心牧著前後各有自序其祭旌德觀先賢

與祭和靖祠二文近日輯西湖志之藝文惜佚不載

稽古定制一卷

明太祖高皇帝命翰林斟酌唐宋制度以定貴賤墳塋碑碣  
丈尺屋宇間架及食祿之家興販禁例編類成書永為世法  
前有十九年御製序



魯般營造正式六卷

無撰人姓氏每式有圖各附詩歌及論說內有祭魯般仙師  
文一首辭極鄙俚按趙岐注孟子公輸子名班魯之致人而  
古樂府艷歌行公輸魯與般被之用丹漆又似兩人矣因論  
魯般事書之以質博雅

歲華紀麗四卷

唐韓鄂撰 國朝高文恪士奇校鐫

謝華啓秀八卷

明成都楊慎編

國朝康熙辛未高文恪士奇重梓序云間亦補苴其罅漏頗為  
點勘其舛差用廣芸編流傳來本

長溪瑣語一卷

明晉安謝在杭肇淞著

青藤山人路史二卷

明山陰徐渭著雜採四部間有辨証

賀監紀畧四卷

明鄞縣閭性善與弟性道同輯按鄞縣月湖中有賀秘監祠  
署曰逸老堂蓋取李翰林四明逸老之語同邑薛千仞岡序  
性善字與同性道字天廼

冷耶小言一卷

明東莞鄧雲霄著論詩盛推嚴滄浪極詆李于鱗在嘉隆間  
可謂不為習俗所移者雲霄一號衡疑外史

珠玉遺稿一卷

明寧波李時行循義著按循義幼有異稟博極羣籍偶為學

使者所遺上書自陳使者怒試以滄浪遺珠賦卞和泣玉論  
循義援筆立成遂以才聞後登嘉靖二年進士授池州推官  
治行有聞召入為御史以事忤嚴分宜出為衡州知府歸此  
稿即學使者所試合賦論二題為名故曰珠玉遺稿云

### 古詩上乘七卷

明高安況叔祺編上自五帝下迄有唐按叔祺號丹湖仕至  
貴州按察司提學副使

### 大學衍義節畧二十卷

明南京禮部尚書楊廉剛節真西山大學衍義而成者嘉靖  
五年表進于朝

### 白雲寺志

不分卷帙 國朝康熙丁丑陳琮季璧輯林遜序寺在福州  
古田縣因關五里白雲峯左創於宋紹興九年曰白雲寺者  
因主山而得名也琮遜俱邑人

### 篆文辨訣一卷

明句章應在止善輯仁和莫可易震生增次海鹽孫爾振允

揚篆正

吳釋傳一卷

明沛國劉鳳子威著所識不盡吳產凡駐錫吳中者並附錄焉

食貧錄一卷

明遂昌包萬有似之輯中引葉子奇草木子云祖宗富貴自詩書中來子孫享富貴則賤詩書矣祖宗家業自勤儉中來子孫享家業則忘勤儉矣有家者可為龜鑑

慎言集訓二卷

明清江教英撰嘉靖丙戌有序英號東谷此則東谷十書中之一也

建康集八卷

宋吳郡葉夢得少蘊著少蘊有石林集一百卷此則其帥建

康時所作文獻通考作十卷今世傳鈔祇八卷少蘊別號石

林所著避暑錄話燕語放言玉礪等書猶散見諸說部中

詩話總龜

宋氏一閱撰分門類兄雜不雅馴考訂亦欠精確後編尤甚  
然晚唐五代詩人事跡及一二殘篇斷什多賴以存亦詩家  
不可廢之書也一閱舒城人建炎初嘗為袁州守能化民息  
訟後致仕寓居袁袁志載有二詩亦可觀附後馬蹄西去夕  
陽催濃淡寒山翠作堆北雁無情怕秋熱帶將寒信過江來  
數葉荷衣一短蓑春波亭上倚斜暉無人會得詩中話閑凭  
闌干又獨歸

建炎以來朝野雜記



甲集二十卷乙集二十卷蜀井研李心傳伯微撰宋南渡後  
朝章國故大綱細目粲然悉備較葉紹翁四朝聞見錄詳贍  
十百也

太平治迹統類七十三卷

宋眉山彭伯川叔融撰畧用袁樞通鑑本末例前集四十卷  
中興後集三十三卷見陳振孫書錄解題趙希弁讀書附志  
但前集中頗多譌闕從繡谷吳氏借閱為校錯字若干還之

皇明書畫史四卷

明正德間嘉定劉璋輯崑山黃雲序第四卷繫附錄元人工  
書畫者璋字圭甫此書從麓邨安氏借抄

百寶總珍集十卷

無撰述人姓氏觀其文義每稱紹興乾道年號及聖宋等語  
為南宋人所輯無疑一物綴以七言絕句一首後又益以疏  
解辭旨鄙陋市僧之所為也但中多不經見之物可新耳目  
儲書家亦不可闕耳麓邨安氏抄本

佩文韻府一百六卷

聖祖御製序文編始于康熙四十三年梓成于五十年十月凡  
一萬八千餘頁韻學之盛未有過于此書者也其体一曰韻  
藻二曰增本三曰對語四曰摘句

### 十國春秋一百十四卷

國朝翰林院檢討仁和吳任臣志伊撰補五代史之未脩也右  
春坊左中允兼翰林院編修東明袁佑及寧都魏禧并序凡  
例云宋初路振編九國志不列南平以南平止江陵一隅不  
予其為國也後振孫編作荆南志續之或稱十國志焉神宗

時劉恕又著十國紀年蓋從五代史例也今十國仍以歐史為斷而南平易曰荆南則從溫公通鑑之稱又東漢稱北漢亦從通鑑云檢討在康熙間由諸生舉博學鴻詞科入詞館所著尚有山海經廣注字彙補等書

### 楚占逸旨八卷

明嘉靖間應城陳士元撰凡四部所載楚事雜采諸書以類相從大字以提其綱分注以闡其義其中雖採錄未備亦足以資談柄考士元著有歸雲別集若干卷此則別集中一種

也

苦瓜和尚畫語錄一卷

右共十八章苦瓜亦稱大滌子亡友張畏廬沉跋其後比于宋趙王孫葵齋謂其人同其行同其履變也無不同蓋勝國後裔也

錢塘湖山勝槩詩文一卷

明吾杭夏時著天順癸未太常少卿會稽陳贇序內記一篇七言絕句詩一百首考時字以正官廣西布政使司時又輯

有成化杭州府志最為該洽

嘉興府志補一冊

明邠衡撰補弘治柳玟府志之闕失也繪唐宣宗宋孝宗二  
御容及漢王爵都尉朱買臣唐丞相陸宣公宋山陰令陳舜  
俞諸像于卷首而各像以贊

靖炎兩朝聞見錄

宋太學生陳東著

北狩見聞錄


宋曹勛撰記徽欽二帝北轅事

建康實錄二十卷

唐許嵩撰始自吳起漢興平元年終陳末南朝六代四百年事大小悉載識  
惟序目及第一頁已逸去當購足本補之

五石瓠

明劉纖著所記甲申靖難諸事



著述十種總目

詩古訓十二卷

爾雅釋文補三卷

廣雅疏義二十卷

說文統釋六十卷

兩漢書辨疑四十四卷

後漢書補表八卷

補續漢書藝文志二卷

後漢郡國令長攷一卷

三國志辨疑三卷

邇言六卷





右拙著十種竝已成書久思就正有道而卷帙紛繁無力剗  
劂因先刊序例若干篇如左全書梗概略見一斑所望鴻儒  
碩彥匡其不逮焉錢大昭識

男東垣釋以成  
同人既勤謹校

詩古訓自序

詩有魯齊韓毛四家申公受詩於浮邱伯作魯詩齊人轅固作齊詩燕人韓嬰作韓詩三家並列漢學官置博士弟子其時名卿大夫士通詩者皆三家也大毛公亨作故訓傳以授小毛公萇時小毛公爲河間獻王博士不在漢朝未得列學故左氏襄十四年傳引都人士詩首章服虔解詁以爲逸詩焉迨賈景伯許叔重馬季長鄭康成獨伸毛義以難三家而毛氏遂盛行其後齊詩亡於曹魏魯詩亡於西晉韓詩至北宋猶存無傳之者而毛詩巋然獨存豈書之存亡亦有幸有不幸耶夫毛氏淵原子夏得聖人之真傳其所釋與金縢儀禮國語左氏孟子合最爲盡善大毛公親受業於孫卿宜與

之同然荀子正名臣道諸篇中所引六條皆毛氏所無師徒  
異說鄭箋以毛爲宗然素衣朱紵十月之交竝從魯詩其釋  
坊記引先君之思二句亦用魯詩解爲定姜之詩韓詩鄭所  
先通采用尤多又許氏說文自序言其稱詩毛氏今則所引  
與毛異者甚多又如江有汜江有沔江之永矣江之漾矣靜  
女其祿靜女其姁薈兮蔚兮嬋兮蔚兮赤舄几几赤舄擊擊  
粼粼駱馬嘽嘽駱馬嘽嘽舞我戩戩舞我憂心如惓憂心忡  
忡傳沓背憎嘽沓背憎瓶之罄矣斲之空矣無然詵詵無然  
咻咻營營青蠅營營青蠅葛藟藟之葛藟藥之擊鼓其鼗擊  
鼓其鏜不敢不躋不敢不趨挑兮達兮戛兮達兮衣錦繡衣  
衣錦褰衣是褻裨也是繼裨也四牡駉駉四牡騶騶穢彼淮

夷

翼部

憬彼淮夷皆兩引互異施鼠濊濊施鼠濊濊施鼠濊濊

己部

且三引互異者蓋傳毛氏者本亦不一猶魯詩之有韋張

唐褚齊詩之有翼匡師伏韓詩之有王食長孫也鄭君所箋者一本許君所讀者一本許君又時引衆家之本是以兩引互異也然則先儒詁訓經文同異胥足討論矣予撰詩古訓十二卷凡三家之有可證者必引而申之外此則攷異同辨通俗正刊謬采衆說兢兢於抱殘守闕而已非敢與毛異也守漢儒之遺說以求無悖於義理且於四家冀有小補耳若云有功於經則吾豈敢壬子三月可廬錢大昭書



爾雅釋文補自序

爾雅一萬七百九十一言爲諸經訓詁之所祖釋經者譬之  
皋雉之門非歷階由闌不得越而過也則攷據詮解宜其最  
精乃自唐以後犍爲文學劉歆樊光李廵孫炎諸舊說皆軼  
不傳其文雖時時見於他說然所存亦罕矣北宋邢叔明專  
疏郭景純注墨守東晉人一家之言識已拘而鮮通其爲書  
也又不過抄撮孔氏經疏陸氏釋文是學亦未能過人矣予  
舊有志作爾雅疏一書叅取衆說擇善而從期折衷至當究  
心者積有年所然終未底於成也歲戊申之仲秋餘姚邵太  
史晉涵爾雅正義刻成郵寄示予歎其書之精博不特與邢  
氏優劣判若天淵卽較之唐人詩禮正義亦有過之無不及

益賈乎莫尙已予舊時所畱心識記者邵書大半已有此昔  
人所謂杼軸予懷他人我先者也然千慮之得時或有之爰  
哀輯爲三卷正郭注之疏辨邢疏之舛補陸氏音邵氏正義  
之所未備審通借之互用集衆說之異同名曰釋文補者摘  
字爲注例仿元朗也今本爾雅俗字最多飛禽卽須安鳥水  
族便應著魚蟲屬要作虫旁艸類皆從兩中陸氏條例已譏  
之又或篇次錯誤如釋親中宗族母黨妻黨婚姻四類開成  
石經題識皆列於後而俗本誤列在前釋畜後題六畜二字  
左傳桓六年昭二十六年正義竝云釋畜於馬牛羊豕狗雞  
之下題云六畜而俗本或多脫載如此之類不勝俚指今竝  
攷證經籍及唐石經以求復古焉異日儻質之邵先生未知

以爲何如乾隆五十五年十月嘉定錢大昭晦之甫記



爾身牙三不月

二

廣雅疏義序

今海內治廣雅者三家一爲盧先生文弼一爲王先生念孫一爲錢先生大昭馥幸得同游素聞風悃者也錢先生之疏義先成請而讀之歎其精審當與邵先生爾雅正義並傳然治廣雅難於爾雅爾雅主釋經多正訓廣雅博及羣書多異義一爾雅有孫郭諸舊說廣雅惟曹音二爾雅爲訓詁家徵引兼有陸氏釋文廣雅散見者少無善本可據三也此非專且久不易可了昔郭氏注爾雅十八年而成邵先生且二十年今先生遲之三十年始有稿本其爲專且久不已至乎馥從事說文蓋亦有年魯鈍未抵於成於呼古人小學童而習之余乃白首紛如讀先生之書益加勵矣乾隆五十八年七

月曲阜桂馥序

說文統釋自序

上古結繩文明之端未啟中古造字書契之象聿宣岫嶠瑯  
戈紛紜莫辨蟲書鳥跡茫昧難知迨八體既分而六書益盛  
視犬畫狗而形舉見禾中人而字成一貫三爲王十合一爲  
士重日爲疊重夕爲多曰辰爲晨興夕爲夙不爲上去至爲  
下來羊則爲羣犬則爲獨自營爲私背私爲公並見本書古人制  
作具有精微後學迂疏漸滋謬誤洎乎隸楷日興以至篆籀  
失講沿及陳隋迄夫唐宋六經家自爲說三史人自爲書討  
論愈疏乖謬益甚總而計之其失蓋三十有四焉穿鑿轉寫委巷隸變  
隱謎造字借用隨俗避嫌妄改臆說貪多淺率疑古泥古新  
附新補襲謬顛倒壞字俗別增益減省離析合并立意語言  
岐異不學音譌方蜀爲苟身吳志薛綜傳蜀者何也有犬爲  
音音釋聲急聲緩  
獨無犬爲蜀橫目苟身虫入其

腹陳為東體漢魏伯陽參同契世為二山古樂府藁礎今何

出為二昌為兩日魏志文帝紀宋裴松之注引易運期議言

山也居東西有午兩日並光日居下其為主反

為輔五八四十黃氣受真人出言午許字兩日相連置年號德

許昌又北齊書安德王傳在鄴聽事見兩日相連置年號德

昌好又北齊書安德王傳在鄴聽事見兩日相連置年號德

其得二日云王為干一舊唐書王世充傳有道士桓法上

羊釋云隋楊姓也干一者王也王居昂為日十唐陸龜蒙等

羊後明相國代隋為帝也世充大悅昂為日十唐陸龜蒙等

蜎早詩以題字離合云閒來倚杖柴門口鳥下溪生為二士

枝啄晚虫周步一池銷半日十年聽此鬢如蓬

南齊書祥瑞志蕭為二士天下大樂二火為八人宋郭忠恕

士謂主字也又見南史齊高帝本紀火為八人

於閭鄉市叫曰今夜有單為尖口唐高彥休闕史進士卑長

八人過是夕遂大火單為尖口唐高彥休闕史進士卑長

狀訴吏云某姓單音丹為筆引榜者易為單音善主司初不

諭久之方云尖口方口亦何異長鳴曰儻尖方口得以互書

則台州吳兒乃四為橫目晉書五行志局縮肉富為同田元

呂州矣兒矣數橫目橫目者四字富為同田元

同續桐江集棣華堂記同田為富敬為文苟南齊書何敬容

分貝為貧羅氏之後尚世永保之敬為文苟南齊書何敬容

大作苟小為文容字大為父陸倕戲之曰君家苟  
 既奇大父亦不小又見後改敬氏為苟文句注  
 唐尉遲樞南楚新間李蟻初名虬將赴舉夢各上  
 添一畫成風字及寤曰虱者蟻也遂改名果登第  
 唐張鷟朝野僉載狄仁傑嘲盧獻曰足下配馬乃  
 中劈明公乃成二犬仁傑曰狄犬旁火也獻曰犬  
 是燒狗楊為木易隋書庾人秀傳重述木羅為四  
 記燭帝南幸江都杏娘侍側帝作拆字令  
 日杏娘十八日也杏娘曰羅字四維也  
 注引晉葛洪西京雜記武帝呼東方朔曰叱叱朔  
 林獻棗四十九枚來來者棗也叱叱者四十九枚  
 今西京雜記相為兩木一符自雲霧中來上大隸  
 記無此文相為兩木一符自雲霧中來上大隸姚  
 字相也二人名為天遣龍致於樹知崇璟當為輔  
 木相也二人名為天遣龍致於樹知崇璟當為輔  
 真為直人里松陵集野態真詩以題字離合云君  
 最先宰為田斗宋書五行志符堅時謠曰魚羊田  
 王為一士可親弓長射殺人一士王字弓長張字  
 得自怡齋

人唐馮翊村苑叢談太保令狐相出鎮淮海日支使班蒙與

重光泉淡尺一點去冰旁二人相連不欠一邊三梁四柱烈

火然添却雙勾兩日全眾莫能辨班支使云一人大字二曜

日月明字也尺一者十一寸寺字也點去冰旁水字也二人

相連天字也不欠一邊下字也三梁四柱烈火然無字也添

却雙勾兩日全比字也又宋歐陽修歸田錄仁宗即位改元

天聖時章獻明肅太后臨朝稱制議者謂撰號者取天字於

文為二人二人刀為三刀上晉書王濬傳濬夜夢懸三刀於梁

聖者悅太后目刀為三刀上晉書王濬傳濬夜夢懸三刀於梁

刀為州又益一者誓為兩口宋洪邁夷堅志葉少蘊為周崇

明府其臨益州乎實壻嘗命一黃山人筮遇晉卦

日三年後變生二女晉卦坤離二陰步為止少恩為田心

也晉字兩口晝日三接三年之象也步為止少恩為田心

集砌思步詩以題字離合云襪襪古壁垂危石切切

陰蜚應晚田心事萬端何處止少夷峰下舊雲泉

旁已犯字从巳唐張參五經角為刀下用蜀志魏延傳趙直

用也又見後角桑為四十八宋祝穆事文類聚引晉陳壽益

角妄分句注桑為四十八都耆舊傳蜀何祗夢井中生桑

以問占夢趙直直曰桑非井中之物會當移植然桑字四十

下八字壽恐不過此又唐鄭棨開天傳信記函谷關得寶符

白石赤文止識桑字識者曰桑者四  
 十八及帝幸蜀之來歲正四十八年  
 拆也字曰上為朱為斗下木知星者  
 三十下為一字  
 東艸唐李公佐謝小娥傳夫父為盜  
 寓簡黃魯直孫莘老等聚飲行令以  
 女委鬼魏劉未答黃遠云僕當奉代  
 徐為未入人之才曰卿姓是未入人  
 夜夢其牛有兩尾以問占者李仙藥  
 牛字有兩尾失字也經數日果失之  
 新語人餉魏武一杯酪魏武噉少許  
 示眾眾莫能解次至楊修修便噉曰  
 王有點吳大帝為吳王時夢人以筆  
 筆點已額王曇哲再拜賀曰王氏為  
 上加點便成主字乃當進位也  
 儀言氏字民無上可改為是乃遂改  
 氏同音古文氏與是通故或為是陳  
 宋王禹偁五代史闕文函關縣攘鄉  
 川天十四載石進識者曰天字取四  
 字兩畫加之於旁即丙  
 得自怡齋



字也四字去中之兩米爲木止一晉王敦夢一木破天郭璞

也保爲人只十北齊書文宣帝登祚改元天保識地爲土力

一宋李昉等太平御覽引詩舍神霧土力於一者爲地地加

言嬾也承天行其義也居下以山爲位道之經也山阜之篤

爲竹鞭馬宋蘇軾調謔編東坡間荆公字說成戲曰袁爲去

得衣乃越絕書以去爲姓得衣也內有人爲肉晉書索統傳宋桷

赤衣桷手把兩杖極打之統曰內中有人肉字山上絲爲幽

也肉色赤也兩杖箸象也極打之飽肉食也

比史張亮傳薛琬夢亮山上持絲告十夾一爲土御覽引春

亮曰山上絲幽字也君其爲幽州乎

土之爲言吐也陽立於三故八推十爲木唐歐陽詢藝文類

成土其立字十夾一爲土

元命包木者陽精生於陰其字八吳爲天有口越絕書以口

推十爲木八者陰合十者陽數

天又吳志薛綜傳無口爲天有口爲吳君臨萬邦天子之都

又唐書裴度傳張權輿作偽謠云非衣小兒坦其腹天上有

口被驅逐坡為土有皮調謔編東坡嘗舉坡字問荆公何義公曰

日為口舍一御覽引春秋元命包一歲三百六十五口合其一

火為人散子唐徐堅初學記引春秋元命包火之桌為西合

米初學記及御覽引春秋說題詞西者董為千里艸續漢書

董卓秉政童謠曰千里艸何貞為与上人有沙門詔田武帝

大署曰貞有司未辯顯史為屈中一御覽引春秋元命包屈

之為言舊為一日夫見前蘭為門皇為一日王宋吳曾能改

紀也清領書言皇字曰一日而王一者天也天者數一天松為十

得日昭然甚明則王故為字一與日王并合成皇字松為十

八公謂吳志孫皓傳注初丁固為尚書夢松樹生其腹上昉為

一萬日隋書劉昉傳其婦自論常云吉為十一口唐鍾輅前

求官唱名前三日夢女子曰妾有十寺為十一寸見前天為

一口依在貴境後果為湖州安吉令寺為十一寸得自怡齋

龍之虎驀目下

四

尹為甲不全身

寓簡唐蘇頌嘲尹姓云丑雖有足甲不全身見君無口知伊少人

亘為車已

脫軸

晉書桓溫傳郭璞為識曰有人姓李兒專征戰譬如車軸脫在一面李去子木存車去軸為亘合成桓字也

窮為十月十日

寓簡謝石善相字微宗戲書朝字令中貴人密授其客謬以己意問之一見輒拜曰上

天奎璧之文萬壽之象也客曰無妄言

德為人十四心

隋顏

石曰朝者十月十日皇帝天寧節也

家訓引牛角及鼻為公蜀志蔣琬傳夜夢有一牛頭在門前春秋說牛角及鼻為公流血湧沱呼問占夢趙直直曰夫見

血者事分明也牛角及鼻

羊去角尾為王

遼史耶律乙辛母

公字之象君位必當至公

羊拔其角尾既寤占之術者曰

一人負戈為成宋葉夢得石

羊去角尾為王汝後有子當王

末年詔議改元執政初議大成曰不可成字於文一人負戈

又擬豐亨復曰不可亨字為子不成惟豐字可用改元豐

兩口銜士為喜

御覽引春秋元命包兩口銜士為喜漢宋均注于口閒士移一畫之者於字體安也是為

兩口銜

白水真人為泉文

宋書符瑞志王莽忌惡漢泉文有金乃改鑄貨泉既而光武起於春

陵之白水鄉貨泉之文為白水真人是以泉為白水貨為真人也

黃頭小人為菴字

晉書五行志王

恭在京口百姓忽曰黃頭小人欲作此穿鑿之失也魯三寫

而為魚虛三寫而為虎抱朴子遐覽篇書字人知之猶尚寫

虎史志譌於三豕家語七十二弟子解子夏返衛見讀史志

亥耳問諸晉史果曰己亥於是衛以子印文誤於四羊後漢

援傳唐章懷太子注引漢劉珍等東觀記馬援上書臣所假

伏波將軍印書伏字犬外嚮城皋令印皋字為白下羊丞印

四下羊尉印白下人人下毛詩以雨為雲顏氏家訓詩云有

羊郎一縣長吏印文不同毛詩以雨為雲漢班固靈臺詩習習祥風祁祁

雲何勞復言興雲雲當為雨漢班固靈臺詩習習祥風祁祁

甘雨此其證也大昭案顏說誠是然古本皆作興雲唐陸德

明經典釋文本或作興雲漢韓嬰詩外傳呂氏春秋漢書食

貨志漢無極山碑史記以湯為暘五帝紀居郁夷曰暘谷唐

今竝依尚書字淮南子曰日出湯谷浴於咸池則湯谷亦有

池證明矣大昭案今本淮南子作湯谷蓋後人又因史記而

傳及後序諸文榮澤釋文皆作熒隱元年釋文且云熒陽或  
作榮非梁顧野王玉篇熒字下亦云熒陽縣漢韓勅修孔廟  
後碑河南熒陽太尉劉寬碑陰河南熒陽晉右軍將軍鄭烈  
碑熒陽將封人唐盧藏用撰書紀信碑因高祖於熒陽字皆  
从火此其證也又案閔二年左傳熒澤唐漢書以合為郃子  
開成石經及宋岳珂刊正三傳竝从火  
侯表合陽侯喜惠帝紀作郃陽誤高帝紀及吳王濞  
傳與此俱作合陽下雖不注郃陽郡名是平原之縣也  
以鳧為  
鳥穆天子傳天子乘鳥舟龍卒浮於大海大昭案梁昭明太  
子文選七命乘鳧舟今為水嬉唐李善注引穆天子傳作  
鳧舟晉郭璞注舟為鳧形知鳥以彪為彪虎部彪白虎也从  
舟及注中鳥字皆鳧字之誤  
釋獸彪白虎釋文引晉呂忱字林彪下甘切又必以育為胄  
狄切是忱時爾雅已誤而陸氏不能正其失也  
去部育養子使作善也虞書曰教育子大昭案周禮春官大  
司樂漢鄭康成注舜命夔教育子釋文育音胄本亦作胄是  
周禮注本從古文尚書作以仁為人焉論語雍也篇井有仁者  
育後人據東晉尚書改之以仁為人焉魏何晏集解孔安國  
曰問有仁人墮井將自投下從而出之否乎梁皇侃義疏或  
問曰仁人救物一切無偏何不但云井中有人而必云有仁  
者耶荅曰仁者能好人能惡人其雖惻隱濟物若聞惡人墮  
井亦不往也宋朱子集注劉聘君曰仁當作人大昭案此必



蓋傳寫誤也大昭案魏張指廣雅以螻為漏禮內則馬黑脊

王篇廣韻竝訓取也字亦从金

康成注漏當為以篆為琢之禮器大圭不琢注琢當為篆字

螻螻站臭也

玉不琢注琢謂以筮為巫更二曰巫咸三曰巫式四曰巫目

雕刻為文也

五曰巫易六曰巫比七曰巫祠八曰巫參九以疋為匹孟子

曰巫環注此九巫讀皆當為筮字之誤也

篇力不能勝一匹難音以屯為毛宋宋祁筆記引蕭該漢書

義匹張如字丁作疋

混屯太昊之良佐漢有屯莫如為常山太守又有毛姓云毛

伯文王子也漢有毛樗之為壽張令漢書儒林傳魯伯授太

山毛莫如少路毛應作屯字音徒本切毛屯屯多相類此傳寫

誤耳大昭案釋文注解傳述人有毛莫如屯屯亦作毛則唐本

仍誤以五為七次路七就與此乖字之誤也

也觀禮四享漢鄭康以爰為夏魏志注引漢蔡邕明堂論五夏

成注四當為三

為夏爰字為女旁爰今以禴為禘禮郊特牲故春禘而秋嘗

為夏以此知應為爰也

以燈為居釋山左右有岸居陽湖孫觀以朱為木禮檀弓公

察星衍說當作燈見廣韻

當為以荃為魚笱莊子外物篇荃者所以魚晉郭象注荃

者魚笱也是以羊為蹲鴟顏氏家訓江南有一權貴讀誤本

人饋羊肉荅書大臺為太壹漢書江充傳初充召見犬臺宮

外有走狗觀也師古曰今書本犬臺壹犬臺壹為壺矢

壹有作太壹字者誤漢無太壹宮也壹犬臺壹為壺矢

象壺矢因曰壺矢此說非也師古曰晉說是也壹犬臺壹為壺矢

歡笑字榮駕鸞為駕定元年左傳魯大夫榮駕鸞為駕

如傳弋白乘乘馮為馮詩鄭風太叔於田乘乘馮馮

誤字从馬詩爰其為奚其爰詩小雅四月爰其適歸漢鄭康成箋

引詩及唐石經並作爰惟家語引作奚視諸為示諸儀禮士

今文作示俗誤行之次非為伏飛呂氏春秋知分篇荆有次

說文流澤自字

七

得自怡齋



埴老子道經埴埴以爲器唐傳奕本作埴釋文作埴大昭案

宣古無埴字當作埴手部埴長也古亦用宣淮南子八埴作

宣髮爲寡髮易說卦傳其於人也爲寡髮釋文本又作宣

日宣虞云爲白故宣髮堅人爲堅冰

冰見君以宣爲寡髮非也堅人爲堅冰

見謊爲見疏

高誘曰謊爲誣妄之誣下云欺其君何往

近王舅傳近己也箋近辭也聲如彼記之子之記宋毛居正

六經正誤近說文作近云近者古之適人以木鐸記詩言从

記今釋文唐石經皆作近同王篇近今作

郭璞注未詳大昭案所部禧禮告誤也

也俗本誤告爲吉今依爾雅校正授玉爲授王

將授玉本或誤作王故漢

張衡誤以爲尊晉侯爲于鼃鼃爲鼃鼃

其行先或从齒作鼃又鼃鼃鼃鼃

其行鼃鼃大昭案釋魚鼃鼃鼃鼃

作鼃鼃鼃鼃竝七宿切鼃式支切爾雅作鼃鼃二字義同已

非詩之本字而鼃字本或誤从去釋文遂音鼃爲起據反音

桂陽	水注	畫當	愈李	寢唐	昭案	延傳	白為	論僊	晦朔	疏注	扶以下	之宣	舉人	志鈞	祝蓋	婁篇	失之	龕為
盧聚	關大	為畫	翺論	作胡	下文	臣聞	為俎	僊篇	注云	注云	本九	宣十	人以	鈞著	蓋傳	篇亦	矣矣	秋胥
東南	昭案	蓋承	語筆	卦切	文云	忠臣	祭為	白芟	趙盾	正義	經及	二年	為賦	著一	寫誤	作禱		
過合	當作	其誤	解亦	資暇	上下	不私	為俎	料大	彪曰	服虔	唐左	年左	題著	月之	鈞者			
涯縣	涯水	云當	云當	集論	雷同	私臣	儀禮	大椿	而大	本扶	傳屈	左傳	疑是	象又	為鈞			
南出	音相	涯水	涯水	論語	非陛	不忠	冠禮	芟即	芝也	一作	正義	尸之	者王	輔弼	著執			
涯浦	近而	為湟	為湟	宰予	下之	通鑑	祭字	日及	一名	日及	宋淳	熙刊	疑是	翼王	玉為			
關為	譌漢	軍路	漢書	武寢	福則	私俱	之誤	宋史	潘尼	日及	遂疏	遂疏	本之	天子	執王			
桂水	桑欽	博德	武帝	帝紀	作和	作和	和臣	田敏	云木	莊子	遂扶	遂扶	誤	科場	錢若			
地經	水經	出桂	紀遣	大昭	為寢	為寢	私臣	傳不	木槿	朝菌	宣二	宣二	戶之	場戶	倚云			
得自	理志	涯水	伏波	案唐	寢室	寢室	臣後	知日	也抱	朴子	左傳	左傳	為尸	漢書	復鄰			
怡齋	南海	出	將	韓	之寢	之寢	任漢	及	子	子	遂	遂	尸	律歷	志			

中宿縣有沅浦關此正南伐越之道若作湟水則出祁亭為

金城臨羌塞外與此不相涉也詳拙著兩漢書辨疑祁亭為

祁亭續漢書郡國志穀熟有祁亭大昭案史記曹參世家取

如字據此則贛誤而虎逆施廣韻贛乎畎切獸名似犬多力

字贛于犬切从二虎从貝大昭案釋獸贛有力注出西海大

秦國有養者似狗多力獷惡俗本作贛正廣韻所辨其誤者

伏誤而犬外嚮於四羊句注以升為斗又誤為斗法琬碑天

分斗極竟作升字誤矣升音陞升音斟宋洪适隸釋漢苦縣

老子銘有升星字漢司隸校尉楊孟文石門頌上順升極漢

白石神君碑米升五錢皆斗字也昔人以其文易混改升為

斗俗作斗宋淳化閣帖晉簡文帝書對字作斗又於斗旁加

點以別升字周華嶽頌亦同至隋龍藏寺碑指以織為注又

讓而升升字作斗又以斗加點為升不經甚矣以織為注又

誤為苧釋文織音志今誤為注遂稱織絲為注志注聲相近

或寫為苧絲續耳為續身又為續耳漢高誘戰國策注續身

則又轉誤矣續耳為續身又為續耳漢書古今人表作續身

云舜友呂氏春秋孝行覽仲虺為中薊又為中薊書仲虺之

堯舜得伯陽續耳然後成仲虺為中薊又為中薊誥荀子堯

問篇作仲歸史記烈風淫雨疑義滋生尚書大傳越裳獻白雉其使曰吾國久無

別風淮雨意者中國有聖人乎漢鄭康成注淮暴雨之名也

餘姚盧學士文弼鍾山札記自後諸書所引皆作烈風淫雨

說苑辨物篇書舜典正義詩蓼蕭臣工及周頌譜正義所引

皆無有作別風淮雨者劉勰文心雕龍練字篇尚書大傳有

別風淮雨帝王世紀云列風淫雨別列淮淫字似潛移淫列

義當而不奇淮別理乖而新異傳毅制誅已用淮雨元長作

序亦用丁尾鈎須字形乖則宋董道除正字謝啟丁尾亂真

別風李頤注夫萬物無定形形無定稱在上為首在下為尾世人

謂右折曲波為尾今丁子二字雖左行曲波亦是尾也案說

文丁字作巾是無尾也故曰亂真又荀子不苟篇鈎有須注

郎丁子有尾也丁之曲者為鈎此轉寫之失也馬頭人為長人持

今鈎曲而丁直故云失實此轉寫之失也馬頭人為長人持

十為斗虫為屈中苛為止句

竝見許君自序

蕭子雲改易字體邵陵

王頗行偽字前上加艸能旁作長百念為憂言反為變不用

魏江式論書

更生為蘇先人為老

魏魯郡太守張猛龍

為罷追來為歸

表亦有此語

更生為蘇先人為老

魏魯郡太守張猛龍

竟文流畢自序

九

得自怡齋

碑有此亂旁為舌指下無耳龍鼉从龜奮奪从瞿席中加帶

惡上安西鼓外設文鑒頭生毀離則配禹壑乃施豁巫混經

旁舉分澤片獵化為獨寵變為寵業左益土靈底著器

山海經龍即動切孔也故从穴蕭子雲以下並見顏氏家訓

然以爲楷式北朝喪亂之餘書跡鄙陋加以專輒造字小兒

爲醜神蟲爲蠶並見論用又代文將无混无並見經典文子

爲學老女爲母並齊梁開俗書見平聲則罕字靈靈濡遷

遷通上聲則響響覽秉啓典去聲則據裔裔大

昭案魏帛比干孟孟驗驗舜入聲則術術屬屬隲隲慄慄

壺壹隸釋漢人用字有假借者有通用者有奇古者有雄作

雄漢執金吾垂作垂漢北海相農作農漢清河相肺作肺梁

丞武榮碑景君碑陰張君碑上

清真人許長啟作紀魏碑浮屠石蓋銘膝作膝耨作耨並見

史舊館壇碑剛般若東作東矩作短潛作潛馴作巡啄作喙洋作庠驚作

務並見魏中嶽嵩陽寺碑銘蔑作蔑蔽作弊菊作菜寔作寔往作住厥作

厥顛作顛辛作采因作曰桴作枹翽作翽曳作电葩作葩慮

作憶螭作螭帶作帶訴作訴雛作雛瀏作溜闔作闔隨作隨

轡作轡闕作闕睇作睇騶虞為騶驥漂搖為漂颺並見魏碑

黎作藜野作楸剗猾作多孤竹作菰並見漢梁陽長姑臧作

藏河閒作澗龍驤作驪驃騎作驃並見比踐作作祚何人作

河伽藍作籃五臺作吾並見隋龍藏寺碑鷹揚作陽萬頃作傾羽儀

作議疾瘳作抽齊固作個禁旅作禁並見隋鷹揚郎將莒作

膏騰作騰薨作亮躔作躔並見唐臨高寺碑躔字又見周石

得自怡齋

竟充畢目字

十

作厘者廣韻以纏為纏之俗詩何取禾三百厘兮釋文厘本

亦作厘張敬說墓志葬於漣澗之陽隋舍利塔銘俱免蓋纏

唐孔泰師碑門人議服俱纏至極之悲鴻訓寺碑河纏膝理

李思訓碑憂纏國家王居士塲塔銘離蓋纏陸東之蘭亭詩

適足纏師作師無作無岡作嶮央作央並見齊造邢作郝隋

利害像記造濟作濟魏涇州刺史儒作儒宴作宴並見唐不長為

矮不食為齋門坐為穩小兒為仆孀人瘦弱為丕勒人亡絕

為歪終音人不能行為否臘音大女及姊為妹大音山巖窟為屈音

門橫關為門攬音浮在水上為余音浸入水下為夾音身隱忽

出為呬和鹹口上多髭為𦘒見音胡並宋時人俗別字錄不正為

竭小大為鐵目水為淚合手為拏並見明吳元轉舌呼曰啐

綽音捻鼻膿曰擤亨上難人以言曰噬音謀人之財曰𧲧音

見明宋廉篇海取其少而易於書寫則為丨川川乂丁𠔁而而司

取其多而不可改移則爲壹貳參肆伍陸柒

宋程大昌演繁露古者一二三俱以弋爲母而隨數附合以成其字今官府文書凡其記數皆取贅同而點畫

多者於是壹貳參肆之類本皆非數借以爲用貴其不可改換耳若八九十之用捌玖拾則全無附益也大昭案壹貳參

肆伍等字經典及古籍俱已通借不如於宋也此委巷之失  
五經文字每部後以壹貳等字標題柒又作漆

也漢羗國爲郡碑武勳榮造羗里爲隣邨閣頌醴準爲龍黃令

高彪虎變爲帀漢衛尉衡方碑麋鹿爲鹿漢泰山都尉孔宙碑禮器碑熊羆爲熊

漢酸棗令 劉熊碑 交朋爲友 費鳳碑 叔伯爲卦 漢三公山 隕久爲

恒鄒閣壽考爲壽禮器萬季爲年千歲爲歲華山廟碑帝師

爲京禮器碑城龜爲郭漢孫叔敖碑堯驛爲舜費鳳碑夏漢鄭

固碑司隸校尉魯峻碑  
某艸爲什碑  
衡方芝蘭爲蘭穀  
漢李翊夫人碑  
韓魏

爲韓漢巴郡太守樊敏碑毘魯爲郢孔崔碑歿甲爲兵漢合陽令曹衡方碑矛戟

兌文流澤自予

十一

得自怡齋



為戟

魏大饗記碑

肯後為前

漢桐栢淮原碑孔龢碑

署少為老

漢桐栢碑

凌漢為

深

漢楊君石門碑

本末為本

漢白石神君碑

棗桌為栗

漢孝廉柳敏碑

莛麥為

麥

漢史晨孔廟後碑

圖目為面

曹全碑

血脈為脉

漢周憬功勳銘

山入為出

鄭固碑

蘇碑

孔有縣為無碑

漢景君碑

俊父為俊

郝閣頌

彥聖為彥

曹全碑

朝廷

為朝

景君碑

里為鄉

禮器碑

太叔為尉

孔宙碑

刺史為刺

漢北軍中碑

琦碑

郭仲碑

申乙為甲

華山廟碑

叔辛為庚

魯峻碑

兼愛為愛

三公山碑

好諱為善

漢議郎元賓碑

表裏為表

張遷碑

因直為曲

校官碑

信諛為

陵

景君碑

曲官為早

漢張納功德敘

稟為既

華山廟碑

史醞醪為醇

史晨碑

碑

元儒先生叟壽碑

尋繹為尋

禮器碑

恩念為念

史晨碑

必勝為

勝

漢博陵太守孔龢碑

不畱為敢

史晨奏銘

蓋有為蓋

武榮碑

飄謂為孰

漢繁碑

陽令楊君碑

楊君碑

括囊為括

漢國三老袁良碑

繼序為繼

漢太尉陳球碑

古咎為昔

鄭固碑

鄒神僊為僊華山廟碑漢才飄為藝漢王元賓碑淳褫除

為襄衡方碑與領為要漢車騎將臂次為掖帛帛為布竝曹器

皿為器十平為千竝禮碑億萬為萬華山廟碑閭也為者孔蘇

夙夜為夙景君碑銘參贊為贊漢郎中制作為制校官寒暑為寒

袁良秋寒為冬漢趙君碑傳寫為寫漢敎阮誦讀為讀漢高朕

禮殿氣醯為乞漢無極山碑樊宣髮為宣華山廟碑鳥用山則與

馬不殊杭用人則與林莫辨俞用山則與刀無別燕用火則

與火相侵泰舉舉春樂譬之皆从夫凡俗書从夫之字失義

从収从水而作泰舉从収从手从丰而作泰舉从収从禾而作

泰譬从艸从屯从日収从日而作春樂从午从収从禾而作

而作春其謬誤至此収从日而作春樂从午从収从禾而作

作兵奕非非从反科隸亦作什隸字从此俗作吳非允鳥光切



拜切木戶戈切木古兮切𣎵匹刃切分梟莖皮也宋普活切  
 械匹卦切秣郎擊切𠂔呼跨切𠂔卑履切𠂔息進切𠂔楚江  
 切由專勿切田待季切𠂔分也从収从𠂔𠂔子也从由从刀  
 夾从大俠二人古狎切持也夾从夾有所持失𠂔切盜竊裹  
 也

父×  
匚  
弓  
秀  
日  
米  
普  
替  
之  
易  
諺  
之  
放  
也  
古  
老  
切

夫从大一丈夫也甫無切二地之數也而至切二古文上字

从儿口山閒陷也𠂔莫飽切𠂔古文酉字乙甲乙𡗗也乙元鼻

古文肱字从反丁居月切也象隱商形也左房也夕月

引之形反古及字一古本切一明豐切一芳切一民切一芳切一兵切一季切一也一秀切一也一古

契也。目从口含。一曰古文丹。宇米莫禮切。采蒲莧切。音日無。

色也。古切。舊廢。  
偏下也。它計切。

冑。冑。鬱。鬱。粵。正。足云。𠂔。𠂔。眇。眇。目。目。

[illegible]

直之近似  
艸也从月由堯聲也胃从肉由𠂔聲也皆直又切鬱芳

先王克畢子予

得自怡齋

362

亦皆羊盍切。医从匚矢於計切。医古文簋字。栝炊竈木也。从木舌。他念切。栝隙也。从木昏古活切。兩再也。兩二十四銖。从一兩。平分皆良獎切。苗艸生於田者。从艸田。武鑣切。苗菑也。从艸由。徒歷切。鼓春分之音。从壹支鼓擊也。从友壹皆工戶切。汨治水也。从水曰于筆切。汨汨羅水名。从水日莫狄切。敕擊馬也。从友束楚革切。敕誠也。从友束朏力切。晨早昧爽也。从辰。曰晨房星為民田時者。从日辰皆倉鄰切。氏至也从氏。下著一丁。禮切。氏木本。从氏大於未居月切。底柔石也。从厂氏職雉切。底山居也。从厂氏都禮切。專布也。从寸甫芳無切。專六寸簿也。从寸衷職緣切。震誰也。从口隹又屬詞也。从白。白弓艸木之華。未發象形。乎感切。下瑞信也。子結切。佰相什佰也。从人百博陌切。佰古文宿字。替曾也。从白既七感切。替。廖一偏下也。从白𠂔他計切。𠂔从馬二其足之戌切。𠂔从馬。○其足絆馬也。𠂔立切。𠂔山無艸木也。从山己墟里切。𠂔古文𠂔字。𠂔耳垂也。象形。𠂔葉切。取捕也。从又目七庚切。

而譌為三四之四。壻壻毒吉壯莊仕荏之類。从士而譌為土。地之土。舩船再再體或不分。皿皿朋多形常莫辨。

宋婁機漢隸此隸變之失也。黃絹幼婦外孫齋曰。

後漢書曹娥傳注引。

此隸變之失也

得自怡齋

晉虞豫會稽典錄曹娥碑成蔡邕題八字曰黃絹幼婦外孫  
齋曰世說新語楊修見八字解曰黃絹色絲也於字為絕幼  
婦少女也於字為妙外孫女之子也談馬礪畢王田數七宋  
於字為好齋曰受辛也於字為舜  
處厚青箱襍記義興有許鹹廟其碑許劭所作唐開元中諸  
孫重刻碑陰有八字云談馬礪畢王田數七徐延讀之曰談  
馬即言午言午許字礪畢必不卑石卑碑字王  
田乃千里千里重字數七是六一六一立字  
宋鄒大廣東九曜石題名不識姓氏但云長樂寺為日隱西  
靈溪之原楚相潁川之裔烏飛於左春藻其羽  
柱苑叢談有客至京師屢訪青龍寺僧不遇怒題門曰龕龍  
東去海時日隱西斜敬文今不在碎石入流沙一僧解之曰  
龕龍去合字也時日隱西寺字也敬  
文不在苟字也碎石入沙卒字也  
見前天為婦為橫山倒出左右七宋莊綽雞助編王介甫作  
二人句注婦為橫山倒出左右七婦字謎云左七右七橫山  
出此隱謎之失也以覃寘鉅寇命名以蘭霽盪表字唐陸  
小名錄引吳錄孫休詔曰禮名子欲令難犯易避孤今為四  
男作名字太子名覃音如湖水灣瀨之灣字蘭音如迅令之  
迅次名虎音如兕輓之兕字霽音如儼首之儼次名鉅音如  
艸萃之萃字盪音如舉物之舉次名寇音如哀寬大之哀字





作囿照作嬰生作匡司作獄承作癩禎作奉周潘尊師碣文

士獄馬蘭筆書金石文字記案唐書隱逸傳司馬承禎字子微事潘師正傳辟穀導引術則此碑稱弟子者司馬承禎也

聖作堊或作璉君作囿或作厠周順陵碑月作㊦或作厠造岱獄觀

順陵碑初作璊或作圃授作楸或作釐周契苾又作釐周鄭證

作鑿或作鑿周蕭元又作鑿王欽若等冊府元龜文宗太和

二年詔天后所撰十二字竝却書其本字宋宣和書譜則天出新意持臆說增減前人筆畫為十九字大昭案武后時金

石中不經見者共有二十二字然而字本篆文堊字已見管子鵬冠子戰國策等書思字論語先進篇可為大臣與釋文

單行本作思云古文臣字本今作臣又宋板戰國策宋使者日思請受邊城亦作思

其體囿字宋郭宗恕汗簡謂義雲章以因為國此亦稍變獄字在焂部司空也復說獄司空息茲切蓋許君本以為司字

廣韻亦云司字書泰誓天作下民作之君古文尚書作囿此

囿字近之則大半已見於武后之前特武后欲造此字而用舊文也 橙栢不列於字書宋王應麟困學紀聞菩薩莫正於梵

夾

唐釋元應一切經音義菩薩本

潛虛以天為萑

潛虛正順

誼也

以真誥以卷為弓

宋黃伯思東觀餘論梁陶宏景真誥所謂弓即卷字蓋從省文陳景元據

真誥

以此謂

奚氏避難山上施秧

山部新附秧字徐鉉曰奚氏避難特造此字大昭案

出魏

酈道元水經

瞿氏篆書吾旁加广

唐元結有浯溪唐廣

淮水

注其說小異

此造字之失也次敘為序

敘次第序

次山

之銘而造為之

从豕為遂

豕从意也

秉栗為榛

秉果實如小

麟大

牝

母野為牧

母朝歌南七十里地周書武王與紂戰於母野牧養牛人也

擧卦為巽

鹿也

為風者巽具也

分小為別

小分也孝經說曰故

夾持為夾

也

夾盜竊

沛濕為濟

沛沈也東入於海濟水

膝辭為薛

薛皐

艸

賈賈為商

賈行賈也商

童僕為僮

童奴也僮

辭受為辭

辭

受也

辭籀

段借為假

段借也假

符弓為節

弓瑞信也

鐘鼓為

竟文亮畢自予

七

得自怡齋

鍾

音鍾樂也秋分之

威義為儀

義已之威義也儀度也

黼敘為秩

次第也

秩

積朔望為望

望月滿與日相望臣朝君在外望其還也

召穆為昭

召廟召

明

安寧為寧

寧安也寧

散眇為微

微散妙也微

居處為居

居也居

也

修齊為脩

脩飾也

晏安為晏

晏安也晏

分械為械

械分離

也

銖兩為兩

銖兩再四

奕基為奕

奕圍基也

生霸為魄

始霸月

霸

也魄

陰神也

也疑為稽

也稽留止也

盅虛為冲

盅器虛也老子曰

搖

絜澗為淨

澗無垢也淨

附婁為培

附附婁小土山川也

培

培

平

遠為原

遠高平之野人所

盡液為津

盡氣液也

氣象為氣

氣象為氣

饋

客芻米也

樽壹為專

樽壹也專

管厚為篤

管厚也篤

梓李

為漆

漆木汁可繫

樽桑為扶

樽桑神木

破瓠為碎

破瓠也

碎磨也

與敫為奪

敫彊取也奪

勉勞為彊

彊勞迫也彊

欺詒為給

欺詒也

欺詒

言三

三



垂貌朶樹木垂朶朶也大昭案易諧首為稽諧下首也三旬三旬觀我朶頤釋文京房本作瑞

為周周旬帀徧也五緡為兩緡履兩枚也蔡中郎以豐同豐行豐

禮之器也讀與禮同豐豆之豐滿者也大昭案豐字李丞相禮三公山等碑多已借作豐字是其誤不始於中郎

持束為宋束木苾也宋居也二語竝見唐此借用之失也陶李陽冰上李大論古篆書

淵明謂不求甚解晉陶潛集五陸元朗謂不可不知釋文條

作力俗以為約勑字說文以為勞俵之字水旁作曷俗以為飢渴字說文以為水竭之字如此之類改便驚俗不可不知

顏黃門謂從正則惟恐不識家訓吾昔初看說文蚩薄世字

其非略是不張司業謂相承則不敢改為五經文字或云隸

訥言謂可知而不可行唐長孫訥言謂冰凝渴竭之類瑩中

謂可觀而不可泥復古編宋陳瓘序字書小學亦元孫字書

正俗相半唐顏元孫彥升字樣雅俗適中唐唐元度九經字

于祿字書

隸變不同如總據說文即古體驚俗若依近代文字或傳趙

寫乖譌今商較是非取其適中為新加九經字樣一卷

宦光以正俗互出為不得已明趙宦光說文長箋凡例

書如長陴戔人不免正包希魯以綴補花字為不可少元包

俗互出之謂不得已目趙文湊轉學王褒之體北周書趙

撰說文補義稱說文無花趙文湊轉學王褒之體

字遂贅補刻行貽笑後世依說文及字林刊定六體成一萬

祖以隸書紕繆命文湊等依說文及字林刊定六體成一萬

餘言行於世及平江陵之後王褒入關貴游等翕然並學褒

書文湊之書遂被遐棄文湊漸恨後知好北宋人專宗田敏

向難反亦攻習褒書人謂之學步邯鄲焉北宋人專宗田敏

之書唐石經多添改字詹事兄說是北宋人依監本增改此

隨俗之失也論語郁郁為耶耶周監於二雅外祖何向之戲

之曰耶耶乎文哉絢爾雅泄泄為洩洩爾雅釋訓憲憲洩洩

即答曰艸翁風必偃爾雅泄泄為洩洩釋文本泄作洩宋邢

說泄變作洩當以唐避諱故見四書攷異急就篇漢彊為代

彊魏書崔浩傳浩寫急就章必稱馮代彊以不取犯國大

昭案漢史游急就篇有馮漢彊魏起漢比每以漢彊為諱

說文充澤自字

六

故改為代魏初國號代故也又案水經注廣漢為廣魏見紛  
 水經以廣漢為廣魏亦避嫌也  
 紘為紛煙梧桐為白鐵顏氏家訓或有諱雲者呼紛紘為  
 正月為一初宋陸游老學菴續筆記王羲之先諱正故法帖  
 政代敬氏為苟文者為苟且之苟文章之文純易尊為  
 露葵顏氏家訓蔡朗父鏐變榴為金罌越王錢鏐改榴為金  
 罌又宋鄭樵通志艸木略劉季奴曰金季奴南人或呼劉為嘉  
 金是以有金寄奴之號又元徐碩至元嘉禾志劉伶墓在嘉  
 興西北攷證錢氏諱鏐呼城乃為墻戊乃為武梁鎮東軍墻  
 劉為金俗因呼為金伶墓城乃為墻戊乃為武梁鎮東軍墻  
 皆作墻避太祖父誠之嫌名也册府元龜開平元年司天監  
 上言請改日辰內戊字為武從之大昭案墻隍廟記開平二  
 年所建故云歲在虎頭為武頭虎子為豹子北史魏高宗紀  
 武辰避戊為武  
 頭也又高祖紀太和三年伯淵為伯淡天淵為天泉北史崔浩  
 年薛豹子即虎子也  
 即伯淵也又高宗紀興安此避嫌之失也始皇改皐為罪辛  
 二年天泉池即天淵池也

鼻犯法也从辛从自言鼻人蹙鼻王莽加疊為疊晶部疊楊

苦辛之憂秦以鼻似皇字改為罪漢文帝以對人口

古理官決罪三日得其宜乃行之從疊從

而改對為言部對或从士漢文帝以為責對而唐元宗以鄭似

鄭而易莫元唐書地理志開杞遯難而改把廣韻九麻爬或作

公之後遯難改焉西棘因仇而易晉書棗據傳本姓昌黎

生以金根為金銀唐李綽尚書故實昌黎生者名父子也嘗

銀車悉改根字為銀金州郡志以遯適為遯道宋書州郡志

遯適晉以壯月為牡丹顧炎武日知錄刻金石錄者於李易

知壯月之出爾以拓拔為柘枝席上腐談柘枝舞本北魏拓

雅以為牡丹宋張湜雲谷襍記月令仲夏令民無艾藍以

以燒炭為燒灰染母燒灰注為傷火氣也案灰字必是炭字

呂氏春秋仲夏無刈藍以染無燒炭以蜚遯為肥遯宋姚亮

高誘曰艸木未成不欲天物是也得自怡齋

卷之六

七



語易遜卦肥無不利肥字古作蜚與古蜚字相近即今之

飛字後世遂改為肥字九師道訓云遜而能蜚吉孰大焉張

平子思元賦云欲蜚遜以保名注引易飛遁以王夫為王夫

无不利謂去也曹子建七啟云飛遜離俗

唐顏師古匡謬正俗春秋襄五年楚公子王夫以于莘為羊

字辛漢書古今人表于莘云桀臣以水排為水囊後漢書杜詩

辛呂氏春秋慎大覽作羊辛以水排為水囊傳造作水排

注排當作囊大昭案排乃古以臧繩為臧錙匡謬正俗漢書

字囊乃俗字章懷說非也

繩貫錢故總謂之繩耳學者謂繩為以蒲地為菩提歸田錄

錢乃改為錙無義可據殊為穿鑿

崇化坊顯聖寺者本名蒲地寺以司吾為桐梧宋書州郡志

俚俗道其舊名轉為菩提寺

徽五年改名以磋為課以驅為駐以帆為席以裝為仗宋周

為桐梧令

孟公集文苑英華序如切磋之磋馳驅之驅掛帆之帆仙裝

之裝廣韻各有仄音流俗改磋為効課以駐易驅以席易帆

以仗易裝老子更載為哉洪範變頤為陂二句竝唐此矣改

今皆正之

之夫也以求莫為求瘼匡謬正俗詩皇矣篇求民之莫傳莫

定也箋求民之定謂所歸就也屬詞



言三系牙

二

竹報怨有仇以胃始名賢不改其族乃改二字以存夷齊大

昭案漢書西域傳有謁者竺次則非東漢人避仇而改明矣

庫姓改庫有後漢書竇融傳金城太守庫鈞詹事兄說古讀庫

曰舍是其證也廣韻四音尺遮切也漢劉熙釋名齊魯謂庫

庫字云姓也此流俗臆造之字別作玉王互判有後漢書侯霸傳

並移點於上有蕭音玉篇廣韻之字玉王互判有後漢書侯霸傳

一點音權兩點上下用音鹿此臆說之失也切韻之三百體襍廁

部居王有父切韻首列三謙字之二十形好為奇異唐李陽

兼謂諱字凡二十見無一同者如以七十一家之書忠恕都為

依據者僅十之一至如岫嶠文騰公石室文崔彥裕纂古之

類似古十五萬言之籍孫強又欲增加者至一十五萬八千

六百四十一言唐孫強復增五萬一正度則襍字有書唐釋

千一百二十九言益多不經之字矣隋書經籍志襍字指張推

唐書藝文志見顯卿則襍字有指一隋書經籍志襍字指張推

則俗音可證

隋顏之推證俗文字略二卷或說即唐志張推證俗音也

王邵則俗語可編

隋王邵俗語難字一卷唐書藝文志以為李少通撰

出七十五篇於魏家真偽莫分傳

五十二體於蕭家穿鑿孰正

梁蕭子雲有五十體書見唐書藝文志宋郭忠恕謂其

多穿此貪多之失也揚子雲之識字務在好奇

漢書揚雄傳劉棻嘗從雄

學作韓退之之為文僅云略識唐韓愈昌黎集略識字記

元孫未知符融之符

通志氏族略符氏姬姓魯頃公之孫公雅為秦符節令因以為氏後漢有符融

又晉書前秦載記符洪初姓蒲其孫堅背有艸付字遂改姓符氏大昭案干祿字書謂从艸者為印蓋未知

符融之姓陸士衡不識樹背之背

詩衛風伯兮為得護艸言

機詩焉得忘憂艸言樹背與

謂終葵如葵艸明當問一士族

曰王珽杼上終葵首當作何形

謂六駮是駮獸詩秦風晨風

陸璣鳥獸艸木蟲魚疏六駮木名其皮青白駮犖遠而望之有似六駮之獸因以為名其木則梓榆也毛直以為獸之六

駁則與苞樂棣榘謂彭蜺為可食晉書蔡謨傳謨初渡江見

以二螯烹食之吐下委頓方知非蟹後詒謝謂芍藥為無香

尚說之向曰卿讀爾雅不熟幾為勸學死詩鄭風溱洧贈之以勺藥傳香艸也陸璣疏無香氣大此淺

率之失也顏介非一莖六穗之導家訓戴侗議不行而進之前

六書鄭漁仲論武非止戈之非反正通志六顧寧人譏重非

有罪弔非持弓見日知錄大昭案周禮秋官司厲其奴男子

奴婢古之罪人也童僕與奴婢同且其字从辛辛卑也故許

君云爾顧氏譏之誤又人部弔問終也古之葬者厚衣之以

薪从人持弓會毆禽大昭案吳越春秋善射者陳音曰臣聞

弩生於弓弓生於彈彈起古之孝子父母為禽獸所食故作彈以

守之絕鳥獸之害急就篇唐顏師古注上古葬者衣之以薪

無有棺槨當苦禽獸為害故弔問持此疑古之失也薛尚功

以商鼎為皆真宋薛尚功鐘鼎王子弁以漢鑑為無偽宋王

彝器款識法帖

堂集張舜民以方鼎為夏時器宋趙明誠金石錄方鼎銘藏

時器也字畫劉原父以簠銘為張仲作之金石錄原父於是正

奇怪不可識董彥遠以虎彝為非虞是周呂宋李公麟得虎彝

能無失百書宗彝虞氏器也董道以為周人裸用趙德甫以六器為周

虎彝雖彝蓋周所制也見廣川書跋初商末金錄重和中安州民耕地得六器方鼎三圓鼎二

此泥古之說也梵剎僧塔西域之野文釵釧襖衫閨閣之俗

號勘辦椿打出於吏牘拋攤賭謎行於街談並見詹事兄潛

繾綣逍遙崑崙邂逅皆有經典之正文九繾綣當作緊綦楚詞

漢王逸章句緊綦糾繾也一作繾綣系部緊繾綣絲急也綦攘

臂繩也逍遙當作消搖於門釋文單行本又作逍遙釋文單行本又作逍遙

遊篇釋文亦作消搖漢開母廟石闕銘則文耀以消搖崑

崑當作昆倫書禹貢織皮崑崙史記夏本紀作昆倫倫以消搖當

老乞充舉自序

三

得自怡齋



<p>字又韓詩外傳以鰈為鰈攷說文玉篇廣韻諸書皆不以鰈</p>	<p>篇鮭魚也亦作鰈鰈比目魚也鰈細鱗也文選上林賦謂之鮭注</p>	<p>郭璞曰鮭比目魚也狀似牛脾細鱗也文選上林賦謂之鮭注</p>	<p>釋文鰈本或作鰈同魚部鰈虛鰈本鰈不地東方有比目魚焉</p>	<p>而撒天後漢書張衡傳浮虛鰈本鰈不地東方有比目魚焉</p>	<p>獲蒙而上征文選作鰈蒙虛鰈本鰈不地東方有比目魚焉</p>	<p>也鰈本惠莊子逍遙遊篇惠鰈不知鰈鰈本獲漢書楊雄</p>	<p>餘本纂儀禮注古文纂皆作鰈大昭案食部纂具食也或作</p>	<p>食本疏論語述而篇飯疏食釋文本或作蔬憲問篇飯蔬</p>	<p>長田君碑亦作零樊毅修華嶽廟碑垂曜萬幹又作幹</p>	<p>我九齡釋文單行本作九聆云本亦作齡大昭案漢斥章</p>	<p>播詔注詔長三尺杼上椎頭一名埏九齡木聆禮文王世</p>	<p>所秉書思對命者也又穆天子傳帔帶九齡木聆禮文王世</p>	<p>與侑同十笏本回六律五聲八音在治詔注詔者臣見君</p>	<p>器加罔為罔李善作絳者域之譌也八俯本湓漢書郊祀志</p>	<p>為域與罔同音俗儒因其為捕魚之八俯本湓漢書郊祀志</p>	<p>九畝注畝與絳古字通大昭案古無絳字當為或或之重文</p>	<p>屋窳然釋文字亦作畝又作闕是闕與畝同文選西京賦設</p>
--------------------------------	----------------------------------	---------------------------------	---------------------------------	--------------------------------	--------------------------------	-------------------------------	--------------------------------	-------------------------------	------------------------------	-------------------------------	-------------------------------	--------------------------------	-------------------------------	--------------------------------	--------------------------------	--------------------------------	--------------------------------

兌充畢自予

三

得自怡齋



為比目魚蓋亦與文魮本山海經文魮之魚其狀如覆鉢

是生珠玉郭璞注魮珠母蚌類書禹貢螭

珠玉部作玼珠云夏書玼从虫賓即此矣

幕人掌帷幕幄帟綬之事大昭案旗幟本識史記高祖本紀

逸周書王會解幄上張赤奔作奔旗幟本識史記高祖本紀

墨翟云幟帛長丈五廣半幅字詁曰幟標也幟或作識或

作志大昭案志字徐鉉所補古用識字或作幟假借用耳

魅本螭宣三年左傳作螭

此骨偏磨之磨大昭案么言其小磨言其病猶詩言既微且

瘡也晉說得之骨部本作𩇛隸變移麻於骨字之上又案鵠

冠子任用么磨今俗板誤作𩇛楚些本些郭音些廣雅些詞

明夏樹芳詞林海錯猶引作磨楚些本些郭音些廣雅些詞

也隋曹憲音息計息賀二

切謂語餘聲知些即告也巴飲本俞漢書禮樂志巴俞

本獯犬部獯疾跳

通用痾痾曲諛聞本宵

脊也有勞義諛聞本宵

索隱鄒誕生宵音諛諛亦小諫言本當書益稷漢孔安國傳

文當本亦作讜字魏李左塾本埠後漢書齊武王傳王莽使

登聲類讜言善言也

皆畫伯升像於塾旦起射之注東切堂本窆一切經音義四

觀記續漢書竝作埠知埠即塾字切堂本窆凸字出晉葛洪

字苑倉頡篇作容突突不平也孫觀察說容字說文所無玉

篇容合也亦無塾下之義一切經音義引倉頡篇窆塾下也

鳥交切審知容即窆字之誤大閱閱本伐漢書車千秋傳

昭案如孫說則切堂字當用窆閱閱本伐又無代閱功勞臺

樹木謝荀子王伯篇臺謝甚高園囿甚廣唐楊倞疏篴本比

史記索隱引倉頡篇麤者為梳密者為巾幘本櫚南唐徐鉉

比急就篇篴疏比各異工又見釋名為巾幘本櫚說文繫傳

櫚收匿篴篴之屬大昭案釋名篴恢也恢廓覆髮上也魯人

曰頰齊人曰幌續漢書輿服志黃金鑄左右一橫簪之以安

箇結儀禮士冠禮注滕薛名箇為頰然則琲珠本蜚玉篇琲

桐是首飾之物非篴篴之器徐說非也

枚也亦梳柳本杷禮內則男女不同梳柳釋文本又作杷大

作蜚也梳柳本杷昭案木部杷落也其字承棚之下當解為

藩落之落釳砌本切後漢書班固傳元墀釳切文選作釳砌

非虛字也釳砌本切西京賦右平左城注城音砌又設切厓

賸注切古通砌大昭案填館本鏐然則古用鏐字詹事兄說

見七卷下

言

得自怡齋

填當塗泥本塗土部既仰塗聖白塗荀子榮辱篇巨塗則讓

張平子碑垂名於一塗魏大易書禮有重地易地漢

君碑謹守易魏橫海將軍呂紺本纔為緝注緋今禮俗文作

纔淺也是古用纔字曲阜桂明府馥說文原有一微黑色如紺

部黜字注馥芬本詩小雅楚茨馥芬貌也見文選蘇武詩作馥薛君

照齊魯韓詩義證苾馥音義捷為本捷漢楊君石門頌馮緝

胸忍本胸肉部新附胸肥二字云蟲名漢中有胸肥縣大昭

同漢曹全碑巴郡胸忍令張納功德敘胸忍蠻夷皆其證也

徐氏改胸為胸改忍為肥音為潤蠡而謂此縣地多此蟲

巴郡為漢中所未詳也誤炮烙本格漢書谷永傳榜礪鍛本

厲詩大雅公劉取厲取鍛禮儒行砥厲廉隅竹筠本續攷工

記梓人上綱與下綱出舌尋續寸焉注鄭司農云續籠綱者

續讀為竹中皮之續大昭案糸部續持綱紐也此即古筠字

露溥本團

詩鄭風野有蔓艸零露漙漙今釋

淡洽本挾

釋言淡

大雅使不挾

四方傳挾達也達即徹避漢諱

賄助本傳

周禮

荀子儒效篇

盡善挾洽之謂神注挾讀為淡賄助本傳

春官

禮

小行人注故

賄贈本詒

詩邶風雄雉自賄伊阻傳賄

賄助本傳

春官

書賄作傳

賄贈本詒

文亦作詒漢書劉向傳引詩賄

賄助本傳

春官

假借又作餽

賄給本澹

史記司馬相如傳澹沈澹食貨志猶未足

澹洽本挾

釋言淡

以澹其欲也

注澹古澹字大昭案古亦用澹

澹沈澹災漢書食貨志猶未足

澹洽本挾

釋言淡

大傳民無不足

無不澹者釋文單行本用作瞻

瞻禮

車轍本軼

子莊

人閒世篇螳螂怒臂

以當車軼釋文音轍史記田完世家伏

軼軼者車轍也言車轍往還如

軼軼

軼軼

軼軼結軼西馳者未有一人

索隱軼軼者車轍也言車轍往還如

軼軼

軼軼

軼軼

結也大昭案古亦通用

徹漢書文車轍漢書作徹於道史記作軼

軼軼

軼軼

軼軼

史記陳平世家門外多有長者

車轍漢書作徹於道史記作軼

軼軼

軼軼

軼軼

行者無轍跡傅氏本外多作

徹釋文梁

楫權本濯

漢書百官表上

善

云應車邊今作彳邊古字少也

柔韌本刃

禮月令及禮器注竝作刃詩

刃

刃

教切皆所以行船

柔韌本刃

鄭風將仲子傳檀弓韌作刃詩

刃

刃

釋文單行作彊忍云本亦作刃

同依字木旁作刃今此假借

也沈重云糸旁作刃為是大昭案

據陸氏說則唐初經典無

借

也沈重云糸旁作刃為是大昭案

據陸氏說則唐初經典無

借

借

借

字韌主辨本辨也周禮攷工記或審

曲面甄以辨民器注辨猶辨

字

字

字

兌父充畢自字

姜

得自怡齋

言三糸牙一丁

也史記秦始皇本紀倚辨於上銘旌本名禮祭統銘者自名  
項羽紀項梁嘗為主辨皆作辨也周禮春官小祝  
設熬置銘注銘今書或作名詢謀本勺與均古字通用易  
儀禮既夕禮注今文銘作名詢謀本勺與均古字通用易  
封雖旬无咎釋文句如字均也荀作均劉作鈞周禮地官均  
人豐年則公旬用一日焉注句均也荀作均劉作鈞周禮地官均  
旬者均之省即為句知刀鞘本削盛一切經音義引倉頡篇創  
言部訃字即詢字也刀鞘本削盛一切經音義引倉頡篇創  
削自河而北燕趙之閒謂之室自關而東謂之削漢揚雄方言劍  
爾雅刃之削謂之室釋名刀其室曰削削也其形峭殺裏  
刀體也漢書貨殖傳質氏以酒日暈本暉案周禮春官眠祲  
削而鼎食注削謂刀劍室也日暈本暉案周禮春官眠祲  
掌十輝之灋以觀妖祥辨吉凶注鄭司農云暉謂日光氣也  
暉音運然則日光為暉日氣亦為暉也暉音運然則日光為暉日氣亦為暉也  
暉得聲日旁暉與日下軍非有異義齊張景暉造像記碑景  
暉又作景暉是其證也俗儒以日旁者為暉光音許歸切日  
下者為日月氣糟粕本魄莊子天道篇然則君之所讀者古  
音王問切非也糟粕本魄莊子天道篇然則君之所讀者古  
馬彪曰爛食曰魄一云糟爛為魄本又作粕音同許慎切同  
云粕已漉麓糟也大昭案許慎云云當是淮南子注文妃嬪  
本牆哀元年左傳宿有妃嬪嬪御焉釋文嬪本又作廐或作  
牆唐石經作牆大昭案漢隸片旁字變作廣廐實一作

字詩小雅常棣兄弟圓稱債本責周禮天官小宰稱責昭二

本亦作債同漢書高帝紀此兩家常折券棄責食貨志於獻

是有賣田宅鬻子孫以償責者矣史記高帝紀亦作責

琰本湊唐碧落碑創巨徒琰借嫠婦本釐詩小雅巷伯傳鄰

字作嫠襄二十五年左傳嫠也何害昭十眸子本牟荀子非

九年左傳已為嫠婦釋文竝云本又作釐眸子本牟荀子非

舜參牟子淮南子說山訓杯水見牟子皆不從目孟子東廂

離婁篇莫良於眸子唐陸善經翼孟音解讀為牟子東廂

本箱儀禮覲禮侯於東箱惟釋宮作東廂然文選上林賦注引

魏孫炎注箱夾室前堂也峻嶺本領漢書俱作領晉王羲之

可知舊本爾雅仍作東箱峻嶺本領之蘭亭記亦作峻嶺

侯本司周禮地官媒氏司男女之無芋瞋本裕楚詞九懷遠

俗用芋眠也然人部藏事本苟文十七年左傳以藏陳事晉

不收什字空借用裕杜預注藏敕也唐孔穎達正

義藏之為敕無正訓也先儒相傳為然迄今本汔詩大雅民

大昭案藏當為苟之譌苟自急敕也迄今本汔勞汔可小

康魏志辛毗傳引作祖禰本昵釋文馬曰昵考也謂禰廟也

迄是汔迄古今字祖禰本昵釋文馬曰昵考也謂禰廟也

得自怡齋

大昭案日部晒日廟廊本郎漢書董仲舒傳游於巖郎注晉  
近也或从尼作昵廟廊本郎灼曰堂邊巖巖謂巖峻之郎也  
又司馬相如傳陛下築郎臺荀卿本郎徐鉉說今人姓荀氏  
恐其不高注郎堂下周箱荀卿本郎本郎徐鉉說今人姓荀氏  
字石碯本踏隱三年左傳石碯隸釋云板本作碯公怠違本皇  
風谷風遑恤我後左傳及禮並引作皇小雅漸漸之石不皇  
出矣不皇他矣俱作皇襄八年左傳不遑寧處唐石經作皇  
漢書律歷志秦兼序之未皇暇也儒市價本賈復古編價  
林傳亦未皇庠序之事也注皇暇也市價本賈當作賈  
璋本壽釋器璋大八寸謂之琬大昭案玉指紳本薦史記封  
紳者不道索隱鄭衆注周禮云指讀曰薦謂垂之於紳帶之  
間今案鄭意以指為薦則薦亦是進進而薦謂垂之於紳帶之  
史記多作薦也大昭案古者薦進同音音同故義亦通周禮  
夏官職方氏揚州其利竹箭注故書箭為晉又儀禮大射儀  
綴諸箭注古文箭作晉釋名箭進也闐靜太室喜易作室其  
說文翦威字作戢是薦晉同音也闐靜太室喜易作室其  
無人許稱易主孟氏故不別出闐字虞翻訓室為空顛倒本  
翻世習孟氏易當亦用室室本訓塞反訓為空也顛倒本  
到儀禮士喪禮祭服闐闐本營詹事兄說說文營訓市沽營  
不倒唐石經作到闐闐本營有環音故齊風子之營兮與



<p>本焄 焄易 焄家 劉人 作卦 焄釋 焄文 有車 麟麟 本鄰 鄰詩 作秦 鄰風 車卷 雨雪 霏霏 本</p>	<p>感大 昭案 古文 縮又 為禮 器不 然則 已盛 釋文 本亦 作</p>	<p>釋文 本亦 作</p>	<p>曰售 其容 有盛 本</p>	<p>注 其容 有盛 本</p>	<p>恭古 字少 解借 耳今 亦依 字</p>	<p>飲酒 讎數 倍集 解如 淳曰 讎亦 作</p>	<p>渠音 詎索 隱古 字少 假借 耳</p>	<p>君在 儀寧 渠能 乎宋 裴駟 集解 賈用 不售 本</p>	<p>入乎 本巨 漢書 高帝 紀沛 公不 先破 關中 兵公 巨能 入乎 注</p>	<p>煽處 本傷 日人 部傷 熾盛 也</p>	<p>祀 君子 屢盟 本婁 詩小 雅巧 言君 子屢 盟唐 石經 表記 引</p>	<p>充韓 詩作 閱遠 廟為 祀本 濯</p>	<p>釋文 本又 作</p>	<p>本唐 美吳 韋昭 注唐 隄也</p>	<p>者謂 之公 說文 引作 自營 為私 背私 為公 是營 即闔 也</p>	<p>閒肩 為韻 韓非 子倉 頡之 作書 也自 環者 謂之 私背 私</p>
--	--	------------------------	-------------------------------	------------------------------	---	--	---	--	---	---	--	---	------------------------	---------------------------------------	--	--

見文苑英華

三

得自怡齋



龔龔部龔毛 蘊隆熅熅本蟲詩大雅雲漢蘊隆蟲蟲 小山岌

大山本駁馬部駁讀若小 嵩高為中嶽本崇漢書郊祀志以

密高為之奉邑璧大六寸之瑱本宣 瑱釋器作宣釋文本或作

吉玉宣璧此 馬高八尺之駮本戎釋獸作戎釋文此新附之失

也璠璣本與左傳釋文璠璣 越越本且易夬卦其行次且釋文

作越大昭案據此則走部越下當有引易今本脫去 徐鉉

因說文別有越字而補起字非也又案古亦通用雖字詳拙

著廣雅 顛顛本蕉左傳作 瘡對本應經典皆 志記本識禮哀

疏義 注志讀為識周禮春官保章氏以志星 剗剔本髮士喪禮四

髮解也今迎迓本誨部誨相迎也 巧笑本芙女部媛巧也

貌大昭案芙有笑 酒醖本淺詩大雅行葦釋文醖字或作淺

義故笑當作芙 澁木本黏釋木 綦巾本縹糸部縹帛蒼艾色詩曰

澁之淺 綦木本黏作黏 綦巾本縹縹衣縹巾未嫁女所服

睨目本睥目部睥大目也緻密本致詩小雅都人士箋性情密致釋

不攻緻也唐孔穎達疏定假借本藉詩大雅抑借曰未知宋

本皆作致釋文本作致傳引作籍曰又趙充國傳羌侯狼何果遣使至此新補之失

也蛇虫之虫許鬼切為蟲直中切豸蟲豸之豸丈爾切為獬廌丈買切

獬廌之廌為舉薦即見切鍊鏘之鍊德紅切為鍛鍊來見切墮張之

墮許規切為情徒果切慢獸名之獾音葛切為田獵力業切堤滯之堤丁禮切

切為隄丁兮切防奔趨之趨直知切為進趨七俱切逮及之逮徒計切

大為殆且艸名之華兵苗切為筆札人姓之受都導切為承受康

鹿之麋力谷切為精麋千胡切湏爛之湏火外切為斯須相俞切蚯蚓

之蚕他典切為蠶才含切繭繡櫨之開皮變切為關古還切捷聶語之

旨才入切又為胥相居切徒正直之正八分正字為匹片四切敵迎這

得自怡齋

卷之七

之這

魚變切

為者同刺戡之戡

竹甚切

為伐

苦含切

難容兒之兒

莫教切

切為完

胡官切

全牝牡之牡

莫厚切

為壯麗美羊之美

古刀切

為美

明鄙

惡焦僥之僥

五聊切

為傲

古堯切

倖振旅之嗔

徒年切

為瞋

切怒美鐵之鉍

章容切

為鉛

余專切

錫僭

他迭切

倖

他活切

之僭為踰

僭

子念切

木柵之砦

土介切

為揩擦

千曷切

帆舡之舡

古容切

為舟船

士緣切

苾蔣之苾

古胡切

為爪

古華切

果鈇榧之榧

知林切

為桑葚

石稔切

切

啍客之啍

方美切

為圖

同奴切

謀交互之互

胡故切

為氏

丁禮切

宿

水名之派

古胡切

為宗派

匹賣切

下卸之卸

思夜切

為郵

于求切

亭鳥

鳴之咬

古肴切

為齧

五狡切

齧

以上時俗章疏

毆擊之毆

鳥口切

為毆

起虞切

逐邊徼之徼

古弔切

為徼

古堯切

倖

他念切

為檣

古活切

柏

水名之濕

他匪切

為下溼

漢立切

地名之邢

口堅切

為邢

戶丁切

侯

侯

言部

三



从豕今毛傳以岵為配以配為岵山部岵山有艸木也岵山  
訂正之無艸木岵岵釋文引三倉字林薈類並云岵猶岵字大昭案詩  
魏風陟岵傳山無艸木曰岵山有艸木曰岵與爾雅說又相  
反故疏以毛此顛倒之失也以趙為尙以齊為立漢劉向戰  
傳為傳寫誤此顛倒之失也以趙為尙以齊為立國策序本  
或晚誤為半字以趙為以金為金宋朱或萍洲可談皇祐初  
肖以齊誤為立如此者多以金為金姚祐為杭州教授堂試諸  
生山易題乾為金坤亦為金何也蓋福建刊以穴為六後漢  
本并錯坤為金脫去二點故姚誤讀作金以穴為六書樊  
仲華傳為天水太守涼州為之歌曰寧見乳虎穴不入舊府  
寺注諸本穴字或作六誤也大昭案顏氏家訓亦云江南本  
穴誤作六以齋為衣禮檀弓衣衰而繆經以禮為旦禮郊特  
乃壞字也以齋為衣注衣當為齋壞字也  
交於旦明之義也汗簡以禮為神云出古文尙書大昭案唐  
北嶽神廟碑李述篆額神作禮是旦明為神明遺其半爾唐  
以鰯為鰯見前虛鰯以惠為直惠書益稷其弼直史記作輔直  
此壞字之失也以几為机北史魏景穆十二王傳刀以樵為  
藥南史中樵以杜為杜唐書安金藏傳桑杜紘之大昭案詩  
字每如此

引竝作以算為竿北史魏孝文帝紀登升為蜚邊疆為追竝

桑杜齊陽阿故縣梁木為良魏李仲璇修孔子廟碑視肉為穴視

邨造石像記出史記李斯傳廣韻肉俗作穴大衡漳為彰瀛碣為竭隋宋

昭案唐李衛公碑有憫茲視穴句衡漳為彰瀛碣為竭

造澧水石橋碑斜蘭茗為搽後魏孫秋膏腴為腴唐新息令

眺衡彰却瞻瀛碣地極僂佛為仙唐幽棲寺尼正覺神靈為灵元集僂宮重

膏腴僂佛為仙浮圖銘入仙法海建東嶽祠記驕

諂為嬌唐張琮碑未軀榦為堰魏熒陽太守地名則溢城為

盆城采石為採石人名則羊侃為羊侃世標徐

四語同里王光祿鳴盛議南史之謬見十七史商榷此俗別之失也金華則金畔著華

牕扇則木旁作扇竝見顏飛禽即須安鳥水族便應著魚蟲

屬要作虫旁艸類皆从兩少竝見釋來麥加禾州渚加水聯

豉加糸日莫加日見六書正義字書莘尾增魚玉篇魚部鱗魚尾

鮮魚尾長也詩云有莘其尾字書从魚大昭案隋縣名咸驩

書經籍志有字書十卷字書三卷並無撰人名氏

从馬廣韻二十六咸賦驢虞書大鹿舊本無林魏受禪表

書作麓大昭案泰卦包兂後人加艸川部兂水廣也引易包

五經文字通作鹿至皆不從彡顏氏家訓謂景旁有彡始於字苑大昭金添監

昭案漢高誘淮南子注景古影字則誤非字苑始矣

下已見嶽碑漢西嶽華山廟此增益之失也以幹為干以枝

為支宋張世南游宦紀間自甲至癸為十幹自子至亥石門

頌以斜為余漢楊君石門頌余谷之婁壽碑以爵為時漢婁

祖父太常博士徵朱時司馬李氏鏡銘以鏡為竟漢李氏鏡銘李氏作竟

羊鏡銘並太室石闕以晉為竝漢嵩山太室石闕銘此減省

以鏡為竟之失也楊鳥本鵲釋文宋鄭樵注本並作鵲而金石文字記

據誤本爾雅遂謂石經驚見間本觀禮祭義見間以俠刺齒  
字當分爲楊易二字非是  
本齧史記蔡澤傳吾持梁刺孫心本慈  
部慈順也引書五品不慈今文尚書子夏本夔  
作訓古文作孫是孫心當爲慈也  
常注應劭曰子夏當爲夔  
夔知樂故可以爲太常  
長也宋倪思謂傳寫之誤以忘字作正心二字言養浩三十  
然之氣必當有事而勿忘既已勿忘又當勿助長也  
本世元申屠駟重摹秦會稽刻石跋史記攸長作脩長世字  
種其文皆以四字成句會稽刻石世有七年正與上下句法  
相合史記作三十有七年是以五字爲句矣此傳寫者誤析  
爲二五十本卒公論語述而篇五十以學易集注劉忠定此離  
析之失也閏是門五襄九年左傳晉人不得志於鄭以諸侯  
寅濟於陰阪侵鄭注此年不得有閏月戊寅戊寅是十二月  
二十日疑閏月當爲門五日五字上與門合爲閏則後學者  
自然轉訾乃龍言史記趙世家左師觸龍言願見太后  
日爲月訾乃龍言戰國策作觸訾蓋誤合龍言爲一字

龍言戰國策作觸訾蓋誤合龍言爲一字

三

得自怡齋



小魚

周石鼓詩滿有魚元潘廸音訓疑滿有重文詹事兄說

同份非文武

宋書樂志公卿奏曰於文文武為斌臣謹製樂舞名章斌之舞大昭案人部份文質備也古文

乃俗斌章邊加貢

廣韻五十三勘廣在南康郡亦作顧縣名記云章貢二水合流因其處立縣便以為

名大昭案貝部顧賜也从貝發省聲顧水之顧字史志皆作

顧水注亦云顧縣治二水合流之說不知縣名記何所據水經

間二水合顧字因以名縣 昏右著荒 唐元結謚隋此合併

之失也漢光武易地名改河南之洛為雒 雒陽本作洛陽魏

忌水光武以 隋文帝立國號滅漢東之隨為隋 廣韻五支隋

左傳漢東之國隨為大隋文帝去走又能改齊後錄

隋文受禪以魏周齊不遑寧處遂去走單書隋字 高邑一

也漢帝析之 光武本紀 无火二也道家合之 道書言黃老以

无火 宋明改駟為馱以避禍 見明帝 漢主易龔為龔以應

為氣 五代史南漢世家劉巖改名龔以應白龍見之祥有胡僧言

識書代劉氏者龔也乃採周易飛龍在天之義易名龔音儼

仇翫楚蜀四公之後各異

廣韻三十六養仇諸兩切姓梁四公子仇皆後也十七薛燕梁四公

子名翫燕也三燭楚神蜀切姓也梁四公子

之後十二齊蜀戶圭切姓也梁四公子蜀閭之後吳吞桂

四子之氏有分

廣韻十二齊桂後漢城陽吳橫有四子一守墳墓姓吳一子居徐州姓吞一子居幽州姓

桂一子居華陽姓炆此四字皆古惠切

此立意之失也名邈自稱為織名琨自

稱為袞名洸自稱為汪名約

音藥

自稱為獨

音鑠

颺異涼風段非

干木

梁世有一侯當對元帝飲譔自陳癡鈍乃成颺段此語元帝荅之曰颺異涼風段非干木並出顏氏家訓

言之失也於戲嗚呼誤分為兩舍其異基實當是一

俗謬呼

歎詞也古文尙書悉為於戲今文尙書悉為嗚呼而詩皆云於乎中古以來文籍皆為嗚呼其有古今之變義無美惡之

別末代若哀諱祭文即為嗚呼其封拜冊命即為於戲於讀如字戲讀為義分為兩義不究根本案大雅於乎小子未知

減否五子之歌嗚呼嗚呼歸予懷之悲即哀傷之語周頌於乎前王不忘允征嗚呼威克厥慶允濟即褒美之詞何以各別

為也又審食其及武帝時趙食其讀皆與酈食其同音異基而近代學者酈則異基審則食其趙則食其非也得自怡齋

兗之充畢自序

三

更無別義且荀悅漢紀三同出一姓分屬宮商復姓數字莫  
者並為異基字斷可知矣乃有五姓如張王為商武庚為羽  
辨徵羽是唐書呂才傳附近世至柳為宮趙為角則又不然其閒一  
姓而兩屬複姓數字不得訓壇為除地封土襄二八年左  
所歸是直野人巫師說爾訓壇為除地封土傳舍不為壇釋  
文服虔本作壇正義王肅云除地坦坦者服虔云除地為壇  
大昭案禮祭法注封土各別左傳義應作壇而字作壇杜氏不得  
野土也二字義本各別左傳義應作壇而字作壇杜氏不得  
其解而云封土除地為壇言封土則合於壇字之義言除地  
則不悖先儒之解巧訓貳為貳心則疑貳當作貳詩曹風  
為彌逢邇形其謬耳訓貳為貳心則疑貳當作貳詩曹風  
鳩其儀不貳傳武疑也疏以為釋詁文然則此貳字乃貳字  
也貳他得切易豫卦四時不貳釋文京作貳管子如四時之  
不貳禮月令宿離不貳丹有差貨無或差貨皆貳字之誤也  
釋文於月令篇並存貳二兩音非是貝部貳副益也貨施也  
貳又為人求物也心部貳更也忒失常也貳之謫為貳以音同  
貳爾心書任賢勿貳孟于所壽不貳古訓皆不云疑則貳當  
為貳明矣爾雅注謂有貳心者皆疑望文生義好為異說  
渙洹汎灌之字殊引詩鄭風溱洧方渙渙兮韓詩作洹洹漢  
渙洹汎灌之字殊引詩鄭風溱洧方渙渙兮韓詩作洹洹漢

書地理志引避譬嬖辟之音異論語季氏篇友便辟集解馬融讀辟為避定四年公羊傳

漢何休注引此句唐徐彥疏謂巧為譬諭今世閒論語音僻為僻非鄭氏之意是鄭讀作譬漢書侯幸傳贊咎在親便嬖

所任非仁賢故仲尼著損者三友是班固又讀此岐異之失為嬖釋文音婢亦切是陸讀如字見四書攷異

也朱點為毋釋文古人云毋猶今人言莫也毋字與父母字不同俗本多亂讀者皆朱點毋字以作無音非

也方形為臼古人曰二字同一書法唐人猶然惟曰字左角稍缺唐石經曰字皆作曰故釋文中遇二字

可疑者即加音切宋以後始以方者為曰長者為日而古意失矣杖杜讀杖舊唐書李林甫

謂吏部侍郎韋陟曰此云杖杜二字者林甫不識杖字時選人嚴迥判語有用杖杜二字者林甫不識杖字弄璋書

麇甫手書賀之曰間有弄麇之慶客視之皆掩口而笑唐

有伏獵侍郎唐書嚴挺之傳戶部侍郎蕭炎不知書嘗與挺之言稱蒸嘗伏臘乃為伏獵挺之白張九齡省

中而有伏獵侍郎乎宋有抵授賢良朝謝琮試賢良方正賜

乃出吳岐州刺史宋有抵授賢良朝謝琮試賢良方正賜

進士出身辭免云勅命未敢抵授乃以抵為祇以教主試

授為受劉安世奏曰唐有伏獵侍郎今有抵授賢良得自怡齋

卷八 虎 畢 自 序

三

未識磨名

明周暉金陵瑣事嘉靖己酉科主試教銑黃廷用所取解元無錫唐一磨主試不識磨字謂其字隱

解欲以他卷易之方遲疑間應天

府禮房吏稟識磨字遂定解元辛職方欲為賦賦書書盧

第若虛多才博物時有獲異鼠者豹首虎臆大如拳職方辛

怡諫謂之鼯鼠而賦之若虛曰非也此許慎所謂鼯鼠豹文

而形此不學之失也韓姓為何

廣韻七歌何胡歌切又姓出

小於韓子孫分散江淮間音以蔡姓為何

韓為何字隨音變遂為何氏又姓引宋何承天姓

苑今齊人小孤為小姑彭浪為彭郎

歸田錄江南有大小孤山在江中巖然獨立而

本姓蔡氏

彭浪磯轉為彭郎云小姑壻也拾遺為十姨拾遺杜工部也

世俗轉孤為姑江側一石磯謂

拾遺為十姨見宋黃震日鈔

河鼓為黃姑

通志天文略爾雅河鼓謂之牽牛又黃公為惶

恐坦齋通編蜀有喜歡舖東坡入顧詩人遇喜歡來遠夢地

恐名惶恐泣孤臣自下而上第一灘在萬安縣前名黃公灘

東坡乃更為惶

路金為露筋廟五代將路金之祠此音譌

恐以對喜歡

路金為露筋廟五代將路金之祠此音譌

之失也同是一語而有東齊中齊襍齊齊右南楚西楚關東

之失也同是一語而有東齊中齊襍齊齊右南楚西楚關東

路金為露筋

廟五代將路金之祠此音譌

廟五代將路金之祠

此音譌

此音譌

此音譌

此音譌

此音譌

此音譌

此音譌

此音譌

此音譌

西山東西趙魏周晉秦隴宋鄭韓燕代魯衛陳邠陶吳越蜀

漢東甌西甌麥屋黃石野朝鮮之不同本是一音而有青徐

沈冀揚衡幽涼荆雍梁益豫州嵩嶽海岱大野平原徐土邳

圻東海河濟河陰河汾河北江淮江湘江沔江湖淮汭淮汝

汝潁沅湘周洛冽水沛水之攸異並見方荆州曰梅揚州曰枏

並詩秦風疏引滕薛謂齒為頰見前巾幘經古謂諸為濫周

孫炎爾雅注漿人唐賈常山謂伯為穴淮南子地涼州謂鵲為鈔釋器吳

楚之間謂娣姒為妯娒漢書郊祀志注宋魯之間謂婚姻為兄弟信

十五年公沛魯以南謂螳蜋為蜋蟻三河之域謂蜋蟻為螳

蜋並見前螳蜋鄭人謂玉未理者為璞周人謂鼠未腊者為

朴並戰國東方謂以物挿地為傳史記陳餘傳集南方謂整

船向岸為機

漢書項羽傳注引如淳說

關西謂袞為襪

玉篇

謂掌物為弄

昭

九年左

關東謂輜為輶

釋名

謂弄物為去

亦左

北方謂薄為曲

史記索隱

謂七為匙

漢書地理志注引蘇林說

河北謂待為俟

釋詁

謂食

為粲

注釋言江淮謂士為武

淮南子覽

謂庾為敷

儀禮聘

魯人

謂箇為頰

見前巾幅

謂其為姬

書西伯戡黎孔穎達疏引鄭康成說

江南謂刀

擊為刺

昭二十六年左傳疏

謂犁刀為館

釋樂疏

河東謂東西為阡謂

南北為陌

並史記秦本紀集解

南陽謂穿地為竈

周禮春官

謂雨止為

霽

釋天

陳畱謂舉田為秬

漢書刑法志注引蘇林說

謂茅蒐為舊

詩疏引

成駁五

蜀人謂巾為冒絮

史記絳侯世家集解

謂櫝為苦荼

釋木

吳人謂善伊為稻緩

襄五年穀梁傳

謂塵土為拔跌

晉張華

輔謂遙為隄

漢書趙充

謂甬為鑄

淮南子精

謂櫟為檯

又汜

注 謂梁為極吳薛綜西京賦注 秦人謂猶為搖禮樂記注 謂至為實又襟記注

謂誣為諉釋言注 謂洩為洙禮內則注 謂雕禮為祀祝淮南子說林訓注 謂

覬鼠為小驢釋獸注 幽州謂額為鄂釋名注 謂葑為芥陸璣詩疏注 老嫗

為嫗史記高帝紀集解引文穎說 謂小武為瓦淮南子汜論訓注 謂雞頭為雁頭

又說山訓注 謂黃鳥為黃鸞謂芣苢為牛舌謂萑芄為雀瓢並陸璣詩

疏 青徐謂厚為後謂立為偉謂兄為荒謂女為姁謂腰為脰

謂癰為徒謂籬為梏並釋名 謂簿為曲淮南子時則訓注 謂犢為犗釋畜

注 謂麋為麇陸璣詩疏 謂小鰓為鮓謂鰕魚為鯽並釋魚注 齊人謂火

為煨釋言注又詩周南釋文 謂涼為惠釋名 謂病為瘳釋詁注 謂瘠為瘵釋言

注 謂苞為植釋言注 謂政為嗜謂箇為幌並釋名 謂視為攣

釋器 謂棖為桷左傳釋文 謂楹為輕謂庫為舍謂鏑為鏃謂

引字林 謂楹為桷左傳釋文 謂楹為輕謂庫為舍謂鏑為鏃謂



耒柄為耰謂釭羽為衛謂韋屨為屣並釋謂小嬰為僭漢書

應劭說引謂紉頭為幘釋名謂茹慮為苦陸璣謂道多為達師釋

謂談計為掉磬禮內謂枯樓為天瓜釋名謂木槿為王蒸陸璣

詩謂四齒杷為櫨釋名謂小兒被為褊詩小雅江東謂語為行

釋詁謂號為呼謂緡為綸並釋謂罟為眾謂苦為蓋並釋謂

帳為幬釋訓謂淖為塗釋器謂華為芎謂粟為粢並釋謂糧

為粳釋言謂獵為狻釋天謂益為增謂藏為挾謂大為駟並釋

言謂病為療釋詁謂暖為煥釋言謂高堆為敦釋名謂暴雨

為凍謂蟬螻為雩並釋謂麋鹿為肉釋器謂墮為牛薊謂著

為馬藻謂拔為虎葛謂莢為烏蘆謂前為落帶並釋謂蟻為

齧髮釋蟲謂瓠瓠為瓠璧釋器謂遽蔬為瓊瓊謂拔龍為龍

尾謂絲馬為雁齒

並釋

謂傷鵲為鵲鵲謂鵲鵲為鵲鵲謂鵲

為易鷃謂翰為白雉

並釋

楚人謂乳為穀

宣四年

謂多為鏹

史記陳涉傳

謂滿為憑謂轉為道謂圍為搏

並楚詞

謂倨為倦

子道應訓注

謂住為際

楚詞

謂逮為還

釋言

濯為湏

儀禮喪服傳注

謂袍為短

淮南子

謂被為扈

謂潤為潭

並楚

詞章

謂冢為琴

水經注

謂極嘯為頃

莊子庚桑楚篇注

謂相笑為吟

楚詞

章句文選

謂中庭為壇謂戶限為閭謂土塵為堞

謂池澤為瀛謂靈子為巫

並楚詞

謂長婦為熟

謂扇筴為

嬰

釋名淮南子說林訓注

謂刀頓為銖

又齊俗訓注

謂禪衣為襦

謂敗羹

為爽謂澤中為夢中謂長劒為長鋏謂冬生艸為宿莽

並楚詞章

句謂天門冬為馬韭

釋艸疏

南人謂錢為涎謂石為射謂賤

得自怡齋

三

為羨謂是為舐北人謂度為戍謂如為儒謂紫為姊謂洽為

狎並顏氏家訓自荊州至此皆古籍所載方音其那有奴諧

奴弟奴紅則皆四切母有莫比莫下莫回即瓦四音六書故

呼則皆切括人呼奴弟切吳人越人呼奴紅切母古音莫古

呼莫同切又上聲蜀人呼即瓦切吳人吳曰勾吳越曰於越並

傳居楚而楚居夏而夏並荀熊安生河朔人其反切多北音

陸德明吳縣人其音釋多南音見宋沈括補筆談公羊子齊人其傳

春秋如隱元昉隱五戕累並桓化我桓六樵之桓七脰莊十

漱浣莊三十踊僖十詐僖三十黨文十筍文十楮成二殆襄五

年于諸哀六之類皆齊語鄭康成北海人其注三禮全蒞為

芋禮祭為墮禮麴氏疾為戚攷工麋為獐畫漚漚

曰淩氏終葵為椎玉人手足擊為骸弓人題肩為擊征月令滑曰髓

則無髮為禿明堂位糠為相樂記殷聲如衣中庸祈之言是至之

為資並緇之屬皆齊語荀子每言案楚詞每言羌並見本書

羌楚人衣孫詳蔣顯曾習周官而音乖楚夏則學徒不至梁書

傳時陸倕與徐勉書云周官一書此學不傳北人孫詳蔣顯

亦經聽習而音乖楚夏故學徒不至又盧廣傳時北來人儒

學有崔靈恩孫詳蔣顯並李業興學問深博而舊音不改為

梁人所笑北史李業興傳家世農夫雖學殖而舊音不改嘗

孫騰謂曰何意為吳兒所笑吳楚失於輕燕趙失於重宋程子經說世俗

如吳楚云云秦隴則去聲為入梁益則平聲似去隋陸法言是非

信其所聞輕重因其所習釋文條例楚夏聲異此方音之失

也白裒不識皮蕃詩小雅十月之交蕃維司徒漢書古今人表蕃作皮魯國有蕃縣注應邵曰蕃音皮

見之充澤自序  
三毛  
得自怡齋

是蕃有皮音故亦作皮也晉白哀魯國記陳逸子游為魯陳

壽不知是氏見前氏為民鄭仲師以匪為筐筐車答字匪匪

周禮匪獲以為陸德明音隰為習哀十年左傳趙鞅伐齊取

隰字之誤非也陸德明音隰為習哀十年左傳趙鞅伐齊取

平原高唐以水隰音習大昭案水部濕木出東郡東武陽入海桑欽云出

陰部隰阪下溼也左傳注借隰為平原郡東武陽入海桑欽云出

為音顏師古以怗為切匡謬正俗詩甫田勞心怗怗爾雅切

大昭案顏說非也甫田詩切怗怗正與驕驕為韻猶鄒風羔裘

勞心切顏氏所見爾雅本偶誤韓退之以杜同度聲昌黎集諱

耳非切切之當為切切也韓退之以杜同度聲昌黎集諱

辨漢之時有杜度此其子顓頊之項為許緣切得史記音誤

音顓頊項字許錄切為許緣切陶甄之甄為之人切甄徹大

因謂從來謬音專旭當音專勅陶甄之甄為之人切甄徹大

觀中登進士第時林攄為同知樞密院當唱名讀甄為堅音

上以為真音攄辨不孫呼徹問之則從帝所呼攄遂以不識

字見黜案吳志孫堅屯軍甄官并得傳國璽堅以甄與已名  
 音協以為受命之符是三國以前未有晉為之人切者孫權  
 卽位尊堅為武烈皇帝諸儒為吳諱轉而音直其苻秦世祖堅隋高祖堅皆因吳音暫避其諱涯誤作涯遂  
 切胡賄漢書地里志桂陽郡臨武入涯志中漆誤為秦涯  
 誤為涯顏注不能攷正輒鼎為言畱宜音力求詩召南小星  
 音胡賄切望文生音非是鼎為言畱宜音力求  
 音畱也釋文音耶徐又音茅大昭案鼎从耶得聲耶本有畱  
 為柳古文西作耶亦从耶得聲吳志虞翻傳注古大篆耶讀當  
 成就繫畱也徐氏陸氏不知古音乃音鼎為耶茅非也況鼎  
 與下文稠猶為叶明非耶茅音矣宜從宋吳械韻補音力  
 求切王光祿說鼎字从耶象閉形今說文作鼎傳寫誤音  
 嫖為意興之興漢書功臣表孝文十一年侯嫖作嫖古字作  
 嫖漢書多用古文故為嫖傳讀典上聲為典去聲賣之典  
 寫者譌為嫖耳當音匹昭切讀典上聲為典去聲賣之典  
 周愿知江西鹽鐵畱後事李向書有故人子弟來投李公遍  
 問舊時書籍有一本虞永興手寫尚書在否其人言暫將典  
 錢愿忽言曰此向書大尼李問向書何尼混薊為筋顏氏家  
 愿曰已遭堯典舜典又被此郎典李大笑混薊為筋顏氏家  
 得自怡齋

言才采自戶

三

尤山薊注今尤似薊而生山中近世文治音雉治天下之

字遂讀薊為筋肉之筋以耦地骨用之譌治音雉治平聲野

雞之雉上聲昌黎集讀廿為念唐開業寺碑陰多宋人題名

諱辨誤以為同音讀廿為念有云元祐辛未陽月念五日

題以甘為念始見於此明楊慎說廿字韻書皆稱絙為恒詩

音入惟市井商賈音念而學士大夫亦作絙同古鄧切大昭案周禮

雅天承如月之恒釋文恒本亦作絙同古鄧切大昭案周禮

攷工記弓人恒角而短注鄭司農云恒讀為絙之絙是

恒豆同為一字唐華嚴三會普光明殿功德碑如月之鄧

巨森菌桂以馨香亦其證也今人讀為恒久之恒誤鄧

異聲邑部鄧聚也南陽有鄧縣作旦切鄧沛國縣昨何切漢

有蕭何序功第一受封於鄧其作泗水亭碑亦以鄧為蕭何

所封江統徂淮賦虞鄧城而倚軒實蕭何之所封侯表中鄧

侯蕭何司馬貞顏師古並音贊漢書地理志沛鄧縣莽曰鄧

治注應劭曰鄧音嵯師古曰此縣本為鄧應劭音是也中

以來借鄧字為之目讀皆為鄧據此則蕭相封地顏氏風

非不知當音為昨何切而獨於侯表中仍音為贊非是風

各義詩周南關雎序風之始也所以風天下而正夫婦也臣

風以動之今人讀云風以動之不宜作風也悉譌為述竟作述音妒

諷音當讀云諷以動之不宜作風也悉譌為述竟作述音妒

誤為妬直為妬切

顏氏家訓史記作悉字譌而為述妬字譌而為妬徐鄒皆以悉字音述以妬字音妬

倉頡訓詁反婢為逋賣反姓為於乖呂忱字林音看為口甘

音伸為息鄰李登聲類以系音羿劉昌宗周官音讀乘若承

戰國策音刖為免穆天子傳音諫為閔

並見顏氏家訓徐仙民音易

為神石郭景純反餒為羽鹽

並見釋文序

如而靡異邪也弗殊莫

辨復

扶又切

復寧論過

古禾切

過

古卧切

登升共為一韻公攻分

作兩音

並見釋文條例

搏則團博兼收

戴震東原集攷工記搏埴之工注云搏之言拍也釋名云

拍搏也手搏其上也又云搏博也四指廣博亦似擊之也則

搏當音博不音團而釋文列團博兩音且團音在前是直不

解搏之恒則恒桓莫別

釋山小山岺大山岺釋文胡官切又兼存袁恒二音依前二音字當

為恒依後音字當為恒二字山部皆無之尋小

敢則陬陬並

列

山岺大山當取縣巨之義則讀如恒者為工

得自怡齋

一、二、三、四、五、六、七、八、九、十、十一、十二、十三、十四、十五、十六、十七、十八、十九、二十、二十一、二十二、二十三、二十四、二十五、二十六、二十七、二十八、二十九、三十、三十一、三十二、三十三、三十四、三十五、三十六、三十七、三十八、三十九、四十、四十一、四十二、四十三、四十四、四十五、四十六、四十七、四十八、四十九、五十、五十一、五十二、五十三、五十四、五十五、五十六、五十七、五十八、五十九、六十、六十一、六十二、六十三、六十四、六十五、六十六、六十七、六十八、六十九、七十、七十一、七十二、七十三、七十四、七十五、七十六、七十七、七十八、七十九、八十、八十一、八十二、八十三、八十四、八十五、八十六、八十七、八十八、八十九、九十、九十一、九十二、九十三、九十四、九十五、九十六、九十七、九十八、九十九、一百



祀難分

成四年左傳取汜祭釋文兼收凡祀二音依前音當

讀如祀則文當作汜而讀如祀矣謝舍人不知旭勛同聲詩

風匏有三條並見潛研堂文集題跋

老反釋訓旭旭日始旦釋文旭許王切說文讀若好字林呼

切疏引詩小雅巷伯驕人好好為證日部旭从日九聲讀若

故讀若好陸氏所見說文是唐初善本古者九好同聲故蕭

希豪尤古每通用或讀若勛勛莫侯切與懋勉之懋同字仍

與九聲相近曹憲呂忱郭璞俱不誤讀自謝嶠陸德明徐鉉

之徒但知旭勛之為許王切而許老之音幾無識之者賴有

說文字林廣雅之胡景參未識司吾別體通鑑後漢乾祐二

音可以正其誤

敗唐兵於峒嶧鎮元胡三省注峒達貢切詹事兄通鑑胡注

辨正峒當為峒字之譌也古書本作司吾後人增加山旁胡

氏讀為崕峒此音釋之失也不敢言敢辱高位昭二年左傳敢

大館注並云敢不敢也儀禮聘不如言如重傷二年左傳若愛

禮辭曰非禮也敢注敢言不敢不如言如重傷二年左傳若愛

其二毛則如服焉又昭二十一年傳君若愛司馬則如奈何

亡隱元年公羊傳母欲立之已殺之如不與而已矣奈何

言那

奈何與那本是一語宣二年左傳棄甲則那蓋急言之曰那緩言之曰奈何也

於戲言於噫嘻

言噫者也言也

並見通志六書略

此聲急之失也疾藜為茨

詩鞠藭

為芎

春秋傳

不來為狸

儀禮

不可為巨

後漢書

壽夢為乘

春秋傳

勃鞞

為拔

國語舌職為殖

成十八年左傳羊舌職說苑作羊殖

包胥為庶

騶冠子楚用申庶齊用管

子宋陸佃注

顓申為申

禮檀弓注

邾婁為鄒

說文字原鄒古邾婁國

不承承

也不顯顯也無念念也無寧寧也

並爾雅

此聲緩之失也夫周

禮之教國子先以六書尉律之課學僮試以籀字六書者一

曰指事一者數之始也加一為二加一為三加一為三十者

數之終也加一為廿加一為卅加一為卌指其木之下者為

本指其木之上者為末增一於一上為上增一於一下為下

是也二曰象形日為太陽之形不虧加之為旦月為太陰之

形有闕減之爲夕水之形爲𠂆加之爲林流之形爲𡗗減之爲𠂆自爲無石之形減之爲自山爲有石之形加之爲岫艸之形爲屮加之爲艸又加之爲艸木之形爲木加之爲林又加之爲森是也三曰形聲江河沽配則左形右聲鸕鷀鸚鵡則右形左聲薺菰藺則上形下聲堂堊褰裂則下形上聲團圓圍圉則外形內聲衙衙問聞則內形外聲獄湫譴瞞則中聲左右形稟𩇛盡悶則中形左右聲𡗗與𡗗則上聲左右下形毫亭𡗗寤則下聲左右上形表𡗗則中聲上下形𡗗哀則中形上下聲𡗗𡗗則中聲左右下形樂𡗗則中形左右上聲𡗗𡗗則中聲上下左形可勾勾勾則中形上下右聲𡗗𡗗則中聲上下左右形莽𡗗則中形上下左右聲是也

四曰會意兩人相比爲从兩人相背爲北倒子爲去倒皆爲  
累倒上爲下倒止爲市反止爲出反欠爲死反人爲己反丿  
爲乚向左爲右向身爲肩向后爲司向臥爲屮背己爲𠂇背  
久爲𠂇背臣爲𠂇背止爲𠂇日在木爲東口處𠂇爲莫兩戶  
相向爲門兩手齊下爲拜力田爲男女帚爲婦人言爲信人  
爲爲僞是也五曰轉注轉則同條其貫注如挹彼注茲略舉  
四科以俟三反老爲建類之首老與耆耄同意而耆耄相受  
焉高爲建類之首高與高亭同意而高亭相受焉履爲建類  
之首履與屨屨同意而屨屨相受焉寢爲建類之首寢與寤  
寢同意而寤寢相受焉是也六曰假借文字由音聲而起不  
能字各一聲音聲由文字而明不能聲皆制字自假借之道

占卜爲占

幼骨肉

變易貨財爲財成幃張

爲覆幬邠岐爲岐異琅邪爲語助之邪於島爲語詞之於文

是也且夫

二、道六第

古說固相宜於今蠶之从

虫𡵓之从巴黎之从𦰇𦰇之从𠂔鼎之从折六𠂔之从橫水

今字亦不展於古  
𧈧𧈩𧈪𧈫𧈬𧈭𧈮𧈯𧈰𧈱𧈲𧈳𧈴𧈵𧈶𧈷𧈸𧈹𧈺𧈻𧈼𧈽𧈾𧈿𧉀𧉁𧉂𧉃𧉄𧉅𧉆𧉇𧉈𧉉𧉊𧉋𧉌𧉍𧉎𧉏𧉐𧉑𧉒𧉓𧉔𧉕𧉖𧉗𧉘𧉙𧉚𧉛𧉜𧉝𧉞𧉟𧉠𧉡𧉢𧉣𧉤𧉥𧉦𧉧𧉨𧉩𧉪𧉫𧉬𧉭𧉮𧉯𧉰𧉱𧉲𧉳𧉴𧉵𧉶𧉷𧉸𧉹𧉺𧉻𧉼𧉽𧉾𧉿𧊀𧊁𧊂𧊃𧊄𧊅𧊆𧊇𧊈𧊉𧊊𧊋𧊌𧊍𧊎𧊏𧊐𧊑𧊒𧊓𧊔𧊕𧊖𧊗𧊘𧊙𧊚𧊛𧊜𧊝𧊞𧊟𧊠𧊡𧊢𧊣𧊤𧊥𧊦𧊧𧊨𧊩𧊪𧊫𧊬𧊭𧊮𧊯𧊰𧊱𧊲𧊳𧊴𧊵𧊶𧊷𧊸𧊹𧊺𧊻𧊼𧊽𧊾𧊿𧋀𧋁𧋂𧋃𧋄𧋅𧋆𧋇𧋈𧋉𧋊𧋋𧋌𧋍𧋎𧋏𧋐𧋑𧋒𧋓𧋔𧋕𧋖𧋗𧋘𧋙𧋚𧋛𧋜𧋝𧋞𧋟𧋠𧋡𧋢𧋣𧋤𧋥𧋦𧋧𧋨𧋩𧋪𧋫𧋬𧋭𧋮𧋯𧋰𧋱𧋲𧋳𧋴𧋵𧋶𧋷𧋸𧋹𧋺𧋻𧋼𧋽𧋾𧋿𧌀𧌁𧌂𧌃𧌄𧌅𧌆𧌇𧌈𧌉𧌊𧌋𧌌𧌍𧌎𧌏𧌐𧌑𧌒𧌓𧌔𧌕𧌖𧌗𧌘𧌙𧌚𧌛𧌜𧌝𧌞𧌟𧌠𧌡𧌢𧌣𧌤𧌥𧌦𧌧𧌨𧌩𧌪𧌫𧌬𧌭𧌮𧌯𧌰𧌱𧌲𧌳𧌴𧌵𧌶𧌷𧌸𧌹𧌺𧌻𧌼𧌽𧌾𧌿𧍀𧍁𧍂𧍃𧍄𧍅𧍆𧍇𧍈𧍉𧍊𧍋𧍌𧍍𧍎𧍏𧍐𧍑𧍒𧍓𧍔𧍕𧍖𧍗𧍘𧍙𧍚𧍛𧍜𧍝𧍞𧍟𧍠𧍡𧍢𧍣𧍤𧍥𧍦𧍧𧍨𧍩𧍪𧍫𧍬𧍭𧍮𧍯𧍰𧍱𧍲𧍳𧍴𧍵𧍶𧍷𧍸𧍹𧍺𧍻𧍼𧍽𧍾𧍿𧎀𧎁𧎂𧎃𧎄𧎅𧎆𧎇𧎈𧎉𧎊𧎋𧎌𧎍𧎎𧎏𧎐𧎑𧎒𧎓𧎔𧎕𧎖𧎗𧎘𧎙𧎚𧎛𧎜𧎝𧎞𧎟𧎠𧎡𧎢𧎣𧎤𧎥𧎦𧎧𧎨𧎩𧎪𧎫𧎬𧎭𧎮𧎯𧎰𧎱𧎲𧎳𧎴𧎵𧎶𧎷𧎸𧎹𧎺𧎻𧎼𧎽𧎾𧎿𧏀𧏁𧏂𧏃𧏄𧏅𧏆𧏇𧏈𧏉𧏊𧏋𧏌𧏍𧏎𧏏𧏐𧏑𧏒𧏓𧏔𧏕𧏖𧏗𧏘𧏙𧏚𧏛𧏜𧏝𧏞𧏟𧏠𧏡𧏢𧏣𧏤𧏥𧏦𧏧𧏨𧏩𧏪𧏫𧏬𧏭𧏮𧏯𧏰𧏱𧏲𧏳𧏴𧏵𧏶𧏷𧏸𧏹𧏺𧏻𧏼𧏽𧏾𧏿𧐀𧐁𧐂𧐃𧐄𧐅𧐆𧐇𧐈𧐉𧐊𧐋𧐌𧐍𧐎𧐏𧐐𧐑𧐒𧐓𧐔𧐕𧐖𧐗𧐘𧐙𧐚𧐛𧐜𧐝𧐞𧐟𧐠𧐡𧐢𧐣𧐤𧐥𧐦𧐧𧐨𧐩𧐪𧐫𧐬𧐭𧐮𧐯𧐰𧐱𧐲𧐳𧐴𧐵𧐶𧐷𧐸𧐹𧐺𧐻𧐼𧐽𧐾𧐿𧑀𧑁𧑂𧑃𧑄𧑅𧑆𧑇𧑈𧑉𧑊𧑋𧑌𧑍𧑎𧑏𧑐𧑑𧑒𧑓𧑔𧑕𧑖𧑗𧑘𧑙𧑚𧑛𧑜𧑝𧑞𧑟𧑠𧑡𧑢𧑣𧑤𧑥𧑦𧑧𧑨𧑩𧑪𧑫𧑬𧑭𧑮𧑯𧑰𧑱𧑲𧑳𧑴𧑵𧑶𧑷𧑸𧑹𧑺𧑻𧑼𧑽𧑾𧑿𧒀𧒁𧒂𧒃𧒄𧒅𧒆𧒇𧒈𧒉𧒊𧒋𧒌𧒍𧒎𧒏𧒐𧒑𧒒𧒓𧒔𧒕𧒖𧒗𧒘𧒙𧒚𧒛𧒜𧒝𧒞𧒟𧒠𧒡𧒢𧒣𧒤𧒥𧒦𧒧𧒨𧒩𧒪𧒫𧒬𧒭𧒮𧒯𧒰𧒱𧒲𧒳𧒴𧒵𧒶𧒷𧒸𧒹𧒺𧒻𧒼𧒽𧒾𧒿𧓀𧓁𧓂𧓃𧓄𧓅𧓆𧓇𧓈𧓉𧓊𧓋𧓌𧓍𧓎𧓏𧓐𧓑𧓒𧓓𧓔𧓕𧓖𧓗𧓘𧓙𧓚𧓛𧓜𧓝𧓞𧓟𧓠𧓡𧓢𧓣𧓤𧓥𧓦𧓧𧓨𧓩𧓪𧓫𧓬𧓭𧓮𧓯𧓰𧓱𧓲𧓳𧓴𧓵𧓶𧓷𧓸𧓹𧓺𧓻𧓼𧓽𧓾𧓿𧔀𧔁𧔂𧔃𧔄𧔅𧔆𧔇𧔈𧔉𧔊𧔋𧔌𧔍𧔎𧔏𧔐𧔑𧔒𧔓𧔔𧔕𧔖𧔗𧔘𧔙𧔚𧔛𧔜𧔝𧔞𧔟𧔠𧔡𧔢𧔣𧔤𧔥𧔦𧔧𧔨𧔩𧔪𧔫𧔬𧔭𧔮𧔯𧔰𧔱𧔲𧔳𧔴𧔵𧔶𧔷𧔸𧔹𧔺𧔻𧔼𧔽𧔾𧔿𧕀𧕁𧕂𧕃𧕄𧕅𧕆𧕇𧕈𧕉𧕊𧕋𧕌𧕍𧕎𧕏𧕐𧕑𧕒𧕓𧕔𧕕𧕖𧕗𧕘𧕙𧕚𧕛𧕜𧕝𧕞𧕟𧕠𧕡𧕢𧕣𧕤𧕥𧕦𧕧𧕨𧕩𧕪𧕫𧕬𧕭𧕮𧕯𧕰𧕱𧕲𧕳𧕴𧕵𧕶𧕷𧕸𧕹𧕺𧕻𧕼𧕽𧕾𧕿𧖀𧖁𧖂𧖃𧖄𧖅𧖆𧖇𧖈𧖉𧖊𧖋𧖌𧖍𧖎𧖏𧖐𧖑𧖒𧖓𧖔𧖕𧖖𧖗𧖘𧖙𧖚𧖛𧖜𧖝𧖞𧖟𧖠𧖡𧖢𧖣𧖤𧖥𧖦𧖧𧖨𧖩𧖪𧖫𧖬𧖭𧖮𧖯𧖰𧖱𧖲𧖳𧖴𧖵𧖶𧖷𧖸𧖹𧖺𧖻𧖼𧖽𧖾𧖿𧗀𧗁𧗂𧗃𧗄𧗅𧗆𧗇𧗈𧗉𧗊𧗋𧗌𧗍𧗎𧗏𧗐𧗑𧗒𧗓𧗔𧗕𧗖𧗗𧗘𧗙𧗚𧗛𧗜𧗝𧗞𧗟𧗠𧗡𧗢𧗣𧗤𧗥𧗦𧗧𧗨𧗩𧗪𧗫𧗬𧗭𧗮𧗯𧗰𧗱𧗲𧗳𧗴𧗵𧗶𧗷𧗸𧗹𧗺𧗻𧗼𧗽𧗾𧗿𧘀𧘁𧘂𧘃𧘄𧘅𧘆𧘇𧘈𧘉𧘊𧘋𧘌𧘍𧘎𧘏𧘐𧘑𧘒𧘓𧘔𧘕𧘖𧘗𧘘𧘙𧘚𧘛𧘜𧘝𧘞𧘟𧘠𧘡𧘢𧘣𧘤𧘥

言訛鳴鶴峩峨穀葉松朶獨猷朗服秋燠崇宗膺躋穆參翠

崴野看怛忌李籽和咏暮期徒迳妣娑融蝠鏊鐵櫟戾虹雲

謨暮豁豁則可以互移杲杳杅杓暗暑椎集裹裸伐戍芹斲  
易昉謨蒼怡怠棘棗櫨藁詳善步虵裒袍怒恢妃改拱萃批  
萃慕悞忠忡旰旱栞析吟含召叨占吓屋垢詎唁哂曷叶古  
襲襪襲襲舛舛則難於變易雖窮原按本代有專家而希古  
抗心當宗許氏求制作之大意五百四十部已得其全攷經  
典之微言九千三百文必窮其奧大昭識慚檇昧學愧豹窺  
積二紀之勤劬殫一生之精力覃思研精欣然有得揆願索  
隱卓爾末由撰集斯編聊附述者定名統釋以示來茲蓋卷  
有六十例成二五焉一曰疏證以佐古義凡經典古義以及  
星象郡國山川訓二曰音切以復

古音

徐鉉本音切用唐孫愐韻徐錯本用朱翱所音又有五  
音韻補十卷錯所加也三家並不知古音往往誤讀又

**F. O. I. REQUEST**

異以復古本

取以折中焉

四曰辨俗以正譌字

別爲一卷附於本書之後

五曰通義以明互借

凡經典之同物同音於古  
本是通用者皆引經證之

六曰從母以明孳乳

如完剗髡軌忼𧈧沅阮荒𧈧玩𧈧頑邴  
翫冠等字皆於元下注云从此若予之

隨母以明孳乳之本  
許君亦有此例也

七曰別體以廣異義

凡重文中之籀篆古文奇字皆有所

從其有鄙見所及而許君未言者亦略釋之經典兩用者則引而證焉

八曰正譌以訂刊誤凡許

君不收之字注中不應有此皆傳寫者妄改又字畫刊刻脫誤者竝校正之仍云舊譌爲某今據某書改正不敢憑臆奮

筆九曰崇古以知古字也

如鳥部鷗鷗鷗之類經典亦有不  
从鳥者此古今字爾今於某字下注

用某云古十曰補字以免漏落

如由希免鼎穉矧凶罪斬厥弁佐  
差匿稻曷壽簋諤劉泝麗蕝朶絳

其荒也。初，曲音卅，爽筮皖，朶綦串三十九字，从此得聲者甚多。而書中脫落此字，有子無母，非許例也。今酌補之，亦別爲一卷。今於許氏本注升爲大字，而仍用楷書。徐氏本皆以附後。而本注則用楷書學。於自撰統釋附於分行，而比諸經疏大者，便之。今仍其例。抵讀書以通經爲本，通經以識字爲先。經學必資於小學，故鄭司農浚通六經而先明訓詁。小學必資於經學，故許祭酒專精六書而竝研經義。許君有五經異義十卷。苟學者以此爲指歸，斯通儒無難於幾及矣。乾隆五十有五年十月，可廬居士錢大昭書於得自怡齋。





## 兩漢書辨疑序

兩漢書刊誤劉原父與其弟貢父其子仲馮同撰今已不傳惟載於前明監板中此所載者宋元人所採耶明人所採耶從足本全行收入耶抑僅摘若干條而其餘尙多刪棄者耶不可知也然宋史藝文志稱劉氏書凡四卷趙希弁讀書附志云東西漢各一卷則其書大約無多監本所採之遺亦無幾矣外有吳斗南補遺秀水朱氏稱其博洽以予攷之亦醇疵互見援引多而裁斷少又以諸經解說糾纏於史學未免失之支離耳錢君可廬出示所撰兩漢書辨疑四十四卷卷帙之富已十倍於劉氏五倍於吳氏而校譌補闕精澁確當披卻導窾闡幽決滯生於幾千百年以下追及幾千百年以

上之事恍如掌上羅文一一皆可指按視三劉氏吳氏不可同年而語矣兩漢文字近古與五經相出入不識字不通古學者固難與語此可廬精於說文溪通古訓穿穴經史傳記墓銘碑碣善求其閒識純而心細實事求是不屑爲支蔓語故能折衷羣疑而於官制地理所得尤多洵班范之功臣史家之指南也予向因專力治經未遑究心乙部然於讀史之道固亦略識其梗概異日拙著尙書後案成當研攷諸史庶幾與可廬共相析疑矣乾隆四十四年春三月王鳴盛序

兩漢書辨疑跋

攷史之學始於清江三劉氏之兩漢刊誤自後漸多雖不必各有專書而自史記以降二十一史攷之者亦旣遍矣然予謂攷兩漢特難何者史記所據惟世本楚漢春秋已亾如尙書左氏春秋內外傳戰國策固童子之所講習者也三國志裴氏之注已詳晉唐而下史才不逮於古不能爲簡輿之文而載記亦日繁其近者去今未遠其軼猶時時見於他說故攷之恒易兩漢之書不通訓詁則文字之假借不明不熟悉其典章則掌故之沿革不備不能徧得其遺碑斷刻之文詞則一人之歷官行事固有不得其詳者矣而星歷器數之術圖讖緯候之書又儒者所謂隱僻迂怪不足道者實皆兩漢

之絕學後之人不能以意通之者也然則何從而攷之乎劉氏刊誤雖佚不傳前明北雍雕板尙採其說入注中繼之者有崑山吳斗南之補遺全書具在今取而覆案之如前所云者果能得其十之一二乎大抵劉氏失之淺吳氏失之支蓋劉氏所刊者不過文詞同異羨闕之間吳氏則庸引衆說而不能自知其當否二家雖爲學者所稱道其爲功於班范之史猶未也夫顏師古之於漢書章懷太子之於後漢書皆集衆家之長注之亦旣備矣後之攷者誠難然使不能舍注所已言別有證據以釐正其是非又何足云攷哉故非學博而思精者不能爲也從父可廬先生研精史學尤致力於兩漢爲辨疑四十餘卷自周秦以迄唐宋遺書之存於今者無不

綜覽其徵引既博又深於六書經訓之學熟於金石刻劃之  
文故攷核尤精密異時傳諸讀史之家其功過於三劉吳氏  
遠矣書旣成先生命塘序其後塘不敢辭也先生嘗病熊方  
補後漢表條例疏闊舛午甚多遂別爲一書未幾而是書復  
成蓋先生之勤於著述如此已亥仲春族子塘謹識



後漢書補表序

宋儒嘗言讀史易令人心粗夫史非能令人粗人自粗耳則雖以之讀經亦何能免於粗也宋儒又每以博聞多識比之玩物喪志故其於史也略識興亡之大綱用人行政之得失而已自謂括其要矣其他典章制度因革損益之樊然具列者率無暇畱意卽有所撰述亦不能通貫曉析事事合符其病皆由於譊譊拘拘不能廣搜博攷以求其佐證而且專己自用不師古人其或時異勢殊有必不可以沿襲者而又不

能得變通之宜此而謂之爲粗其又奚辨向鮑子以文欲重雕宋熊方所補後漢書年表余爲之佐校訂而其書之舛漏殆不可枚舉首載同姓王侯表冠以因子追封之齊武王續



魯哀王仲於史例卽不合念校書與自著書不同如欲盡加更正旣於熊氏之勤勤掇拾者大沒其剏造之勞且改之亦必不能盡善何也其規模之已定者不能易也勢不得不出於委曲遷就欲遂以爲完書也其可得乎故當時但卽因其書而略正之惟綴一二校語於下不相襍廁使人知爲熊氏之書而已私欲別爲一書自愧力有未能也嘉定錢君晦之其學浩博無涯浹其思緒細密精識洞達治經而經通於周秦漢魏之書無不爬羅剔抉曩於都門欲請其所校書繕錄之會君南歸已僦潞河之舟不果未嘗不時往來於懷而思一覩之爲快也頃獲其所撰後漢書補表讀之非若熊氏之僅取材於范書陳志也凡山經地志金石子集之有會於是

書者固不網羅綴緝而其體例一依班氏之舊諸侯王王子侯分爲二表功臣侯與外戚恩澤侯亦分二表視熊氏之但以同異姓爲別者較然明矣其不得不與班氏微異者班書百官公卿表前敘百官沿革若後漢則有司馬彪之續志百官已詳無庸複出故但云公卿表此又變通之得其宜者也凡熊氏所漏脫者悉攷而補之於是此書乃始完善而無少遺憾矣夫史莫重於表志而自漢東京以至於隋志尙閒見之表則全闕表也者標也標明其義類使綱舉而目張馬班之爲是也亦兼以補紀傳之所未及今則年代懸隔古籍散亡如東觀記謝承華嶠之書皆不可復見唯卽舊文之畱傳者而薈萃之然亦未嘗不增益於范書之外俾夫善讀史者

更得參互攷證以資其間見於凡政治之污隆職官之賢否  
一開卷而瞭如指掌以之爲津筏也可以之爲龜鏡也可余  
之所謝不能者而錢君優爲之見今板行諸史旣以續漢書  
志繫范書之後亦當以此補表并繫之於以配馬班而始無  
不完不美之憾此豈讀書略觀大意者之所能乎哉錢君之  
於史事其精確也如是況於治經乎特是予今雖欲盡發其  
所藏而已自傷耄及非復前日之尙可讀矣摩挲此編有餘  
慕焉乾隆五十六年長至日餘姚盧文弨序

後漢書補表自序

古老五等之封或以功或以德或以先世之德見於史傳尙矣漢興高帝約非劉氏不王非有功不侯迄於中葉外戚五侯天爲晝霧自平津富民而後以丞相侯者指不勝屈封已濫矣中興大縣侯視三公小縣視上卿鄉亭視中二千石都亭者城內亭也其城外者爲離亭但謂之亭建武之初鄧賈吳寶兼食數縣降及後世紹封者食故國半租有功者食鄉亭得縣益寡和帝始封鄭衆而奄尹日恣厥後貂璫之徒口含天憲分茅裂土駢肩接踵至有同日十九侯之盛順帝又聽養子襲爵小人道長作福作威固寵乘權由來者漸魏武因之遂遷九鼎故於諸侯特立宦者一門以著履霜之不可

不慎也范氏本無年表東觀記謝承華嶠諸書今竝不得見至宋熊方始作補表以弭蔚宗之闕其時古籍散佚尙少乃所據者祇後漢書三國志二書取材旣隘體例亦疏因別撰斯編正史而外兼取山經地志金石子集得諸侯王六十人王子侯三百二十四人功臣侯三百六十四人外戚恩澤侯八十二人宦者侯七十七人偶有異同加辯證焉班書百官公卿表前敘百官沿革後列公卿姓名最爲詳善司馬續志惟載百官於公卿姓氏則仍闕如今則三公拜罷各依本紀臚列其列卿之可攷者亦以次補入謂之公卿表不言百官者表所不及也彙爲八卷以踵班氏後之讀史者或有取云乾隆四十二年冬至日錢大昭晦之氏書

後漢書補表條例

前書諸侯王王子侯分爲二表井然不紊熊氏合同姓王侯爲一於體例亦多未當今仍依班氏

熊表脫漏甚多於同姓王侯則脫東海王陽濟陰王保陳畱王協恒農王辯東海王祇東安平侯茂梧安侯譽臨邑侯讓原鄉侯平睢侯閔六安侯盱眙鄉侯平湖陸侯某脩侯巡防子侯章安壽亭侯崇孝陽亭侯成蠡吾侯翼參戶亭侯<sub>博</sub>新昌侯佗合肥侯某繒侯敞曲成侯建成平侯某平通侯某凡二十五人於異姓諸侯則脫列侯寇張平阿侯王述長羅侯常翁爰戚侯趙牧建平侯杜憲高昌侯董永率義侯張暉平阿侯耿阜滑侯公賓就高柳侯堪列侯谷崇列侯滿頭武進

侯趙慮赭亭侯李愔海昏侯沈戎守節侯崇楊鄉侯王賞建  
忠侯彭寵僮侯葛文衛公姬常北平侯王元才安喜侯王孟  
才蒲陰侯王顯才新市侯王仲才唐侯王季才潁陽侯申屠  
志餘汗侯陳靖利取侯畢尋首鄉侯段普夕陽侯邢崇簡陽  
侯某平林侯某山鄉亭侯蔣澄陽羨西亭侯蔣通歸義侯滇  
岸率衆侯其至鞬陽平侯桓焉列侯陳省列侯羅橫羌侯號  
封廣鄉侯摯填曲成侯王暘邠鄉侯黃瓊東陽亭侯宣豐壽  
成侯皇甫規高陽侯陳蕃列侯張奐臨潁侯賈某富波侯周  
均西鄉侯鮑吉鍾離侯馮邯無錫侯陰盛安次侯王敏都亭  
侯張納元鄉侯張溫亭侯田疇宜春侯彭翼宜春侯施游列  
侯傅吳列侯劉岱清苑鄉侯劉若高樂鄉侯鄧展南鄉亭侯

董蒙西鄂都鄉侯呂某好時侯秋都亭侯閭柔華鄉侯靈中  
陽鄉侯夏侯都亭侯祖湟鄉亭侯題尉猛亭侯當樂鄉亭  
侯生元就亭侯神都亭侯衢成遷亭侯慎常樂侯俊高梁亭  
侯曷長安亭侯豐平陵亭侯夏侯濩澤侯鄧鯉脩侯董重  
亭侯劉廣都鄉侯呂強凡八十四人今悉補入凡熊表所無  
之侯槩注出  
處以便  
檢尋

關內侯前書不列表中東京尤不足貴

本紀安帝永初三年吏人入錢穀得為關

內侯桓帝延熹四年賣關內侯靈帝光和元年開西鄉賣關  
內侯中平四年賣關內侯假金印紫綬傳世入錢五百萬

熊氏亦概收之失於濫矣然所收十九人之外尚有高峻戴

涉鄧彪陰興曹成黃儁李休桓典翟歆

太平御覽二百一引東觀記耿氏

三人之類何以又遺脫耶今關內侯槩不收入惟桓榮世襲



因替兼有戶邑不得不錄

熊氏同姓王侯表云安衆二人海昏一人見前書王子侯表  
異姓諸侯表云平陽高昌歸德二人凡四人見前書功臣侯  
表平昌周承休紅陽凡三人見前書恩澤侯表予謂前後各  
自爲書熊氏旣爲後漢作表凡後漢所有之侯俱宜載入且  
旣云已見前書而安衆一侯又見異姓表中何自相矛盾也  
今一一備載以資攷證

前書凡王侯輩其人後爲帝者表內不書名所以尊君也熊  
氏不明此例一槩書名失矣今胥遵班例

前書凡言隨父者必是別封熊氏於世傳勿替之王侯概言  
隨父且言隨祖不知而作殊失班氏本旨

前書別封之侯由其父推恩者例得隨父若其子孫自立功業得侯者只宜另編乃熊氏於例應隨父之費亭侯曹操則爲另編而於例不應隨父之郕侯趙謙江南亭侯趙溫附於趙戒之下亦失史法如此之類不可枚舉

前書高祖約非有功不侯故班氏於功臣之外別立外戚恩澤一門極有深意熊氏不知其例合爲異姓一表今仍依班氏分出

恩澤追封之王侯班氏不載蓋以慎名器也熊表亦竝收之非史法矣今從孟堅之例如齊武王縝魯哀王仲平壽敬侯鄧訓安陽侯鄧香壽張敬侯樊重宣義恭侯陰訢宣恩哀侯陰陸安成思侯竇勲袁親愍侯梁竦陽安思侯郭昌當塗穆

侯宋揚安陽鄉侯周景舞陽宣德侯何眞族亭侯張遐鄱陽記  
皆不載惟征羌節侯來歙則鄉哀侯侯霸皆自立功勛與推  
恩追封者不同故錄之

順帝陽嘉四年初聽中官得以養子爲後世襲封爵故宦者  
嗣封例得注養子某嗣熊氏概不注出於史法亦疏今於宦  
者侯二世則列養子二字以別他侯

熊表於某王下皆書州名非前書例也然卽其所載攷之亦  
多不合如淮陽王聖公下列陳州二字案兩漢俱無陳州之  
置說者謂州字當是衍文然淮陽在前漢已爲國至章和二  
年始改爲陳國建武時淮陽地屬豫州不得稱陳也況襄三  
成陽又皆沈州之部乎盧抱經學士云濟北惠王壽傳云分

太山郡爲國則當係以太山而熊氏則注云沈州河閒孝王  
開傳云分樂成勃海涿郡爲國則當竝係三郡之名而熊氏  
則注云冀州皆非也今竝不載一依班氏

列侯下注郡名本班氏之例也侯之都鄉卽都亭之類耳熊  
氏因常山國有都鄉縣凡封都鄉者槩云常山則大不然  
熊表又多謬誤盧學士云列侯注郡邑名自當求之本傳乃  
有章懷注中引據舊書自有明係所屬者如武邑侯耿植注  
云屬信都而熊氏署云安平不其侯伏湛注云屬琅邪而熊  
氏署云東萊蓋熊氏但知以續漢書郡國志爲據不知事實  
之有不符也至於鄉亭之侯但當先攷其本縣有是亭否其  
亭之名固有與縣名同者不可混也范書中有明指其爲某

縣之鄉侯如抗徐之爲烏程東鄉侯楊茂之爲烏傷新陽鄉侯烏程烏傷皆會稽屬也二人所封皆其縣之鄉也熊氏於抗徐不係以烏程而係以南陽蓋誤以爲南陽之東鄉縣也於楊茂兼書烏傷新陽鄉侯下係以會稽又係以汝南是誤以茂爲兩縣之侯也夫旣明曰鄉侯而可曰縣侯乎卽二人之體例已錯出謬妄如此學士又云熊表置臨邑侯復於王威之上而其子駒駘之嗣侯反遺之本傳並不錫光封鹽水言國除侯而但稱列侯又沒其不從王莽之大節而泛稱曰降征羌侯來歙爲光武祖姑之子而以爲甥宣城侯美襲其兄之封而以爲隨父鄧騭諸弟竝未受封而書其子皆曰嗣袁逢嗣侯謚曰宣文而以爲宣父與鄉亭一例宣城漢壽皆書叛曹

操所害亦云誅皆其謬之甚者也

熊表有不當載而妄載者如譖汝陰侯信云以起兵定江南  
詣降封案信自有始封之事可述起兵定江南更始時事與  
後漢無涉如此之類甚多

西京無鄉侯亭侯故郡名下不著縣字茲有之者所以確指  
其封地所杜且以別於縣侯也

桃鄉侯福當塗鄉侯亢皆任城孝王子當列同姓中熊氏載  
入功臣表而云姓闕文慎靖侯暨本傳明云南陽宗室而入  
異姓紕繆極矣

熊表云褒成侯孔伋以夫子後元和二年賜侯案孔伋傳元  
和二年拜僖郎中賜褒成侯損及孔氏男女錢帛褒成侯損

卽孔建壽未嘗賜僖爲侯也熊氏將損字誤屬下句可爲噴飯馬端臨封建攷亦沿其誤

前書公卿表三公九卿外兼及列於九卿之水衡都尉右扶風左馮翊京兆尹其餘長樂等官皆不收所以衛尉載李廣而不載程不識也熊表於太僕衛尉少府兼載長樂并太子太傅中二千石太子少傅二千石大長秋二千石將作大匠二千石城門校尉比二千石北軍中候六百石司隸校尉比二千石等官亦竝采之由不明官制故也今則四府九卿外止取河南尹執金吾其他不敢闌入

熊表旣載長樂等官於前則後當云長樂某官某爲某官庶可分別今熊氏於此類但云某官某爲某官不復載長樂二

字後之讀史者其惑滋甚

熊氏百官表中亦多舛誤盧學士云如何苗本不與何進同意而乃以謀誅張讓并歸之虞栩代陳禪爲司隸校尉而反謂禪實代栩袁敞代劉愷爲司空而敞之拜反在愷未遷官之前若夫遺漏之處又指不勝屈矣

前書百官表凡其人郡國表字已見列傳者表不重出史法之簡而該也熊氏無之予所作表有可攷者不論傳中有無一概書之以表與紀傳非出一人之手不妨互見也

表中有互異之處必加攷異以定折衷

近人鄧縣萬斯同補歷代史表於後漢有雲臺功臣表但取二十八將附以馬援一人疏漏淺率甚矣外戚宦者二表從



可概見

萬氏分將相與九卿為二表已非史例而將相大臣中又濫取不常置之強弩虎牙建威建義等祿號將軍視熊表更自鄧無譏矣

凡九卿不得拜罷之年者太常則有南陽任愷任延傳巴郡馮

緄本傳南郡胡廣前後三任蜀郡趙典山太僕遷光祿勳則有汝南周

舉由大鴻臚遷河內杜喬荀淑傳琅邪伏黯儒林傳南陽岑杞岑彭傳賈

參賈復傳汝南周暢永初袁敞安帝時東海劉嘉劉虞傳衛尉則有

馬廖靈帝時馮石順帝時楊彪靈帝時太僕則有杜密桓帝時坐黨事免

朱雋靈帝時前楊彪靈帝時种拂韓融獻帝初侯昱永平時袁敞

安帝時鄧康順帝時宗俱宗俱碑袁基獻帝時趙典楊秉廷尉則有

馮緄

前後三任見緄碑傳作兩任誤

郭賀郭楨郭儋

延熹時

吳訢吳恭霍諝

桓帝

時

大鴻臚則有魏郡馮順沛國陳寵

永元中

南陽樊梵東萊劉

寵安定梁棠蜀郡趙典

由少府遷

陳畱爰延

桓帝時

沛國曹嵩

靈帝時

志

注宗正則有劉松琅耶劉猛劉匡

永平時

陳畱劉軼

建初時

東萊

劉寵

兩任並桓帝時

江夏劉焉

靈帝時

大司農則有南陽卓崇

陳國何

熙南郡胡廣劉據

左雄傳

琅耶伏質

桓帝時

魏郡李嵩君遷

桓帝時

不韋

上黨鮑德

由南陽太守遷卒於官

濟陰張馴子儁

靈帝時任初

河

南尹勲伯元

延熹時

沛國曹嵩

靈帝時

廬江周忠嘉謀

獻帝時

朱

寵

陳忠傳

元賀

第五倫傳

少府則有安定梁雍朱儁南陽宗俱房植

荀淑

傳梁太后臨朝日食地震之時

淮陽朱鮪

光武時

中山鮭陽鴻孟孫

注丹傳永

時平蜀郡趙典

章帝時由將作大匠遷

南陽鄧褒

桓帝時

魏郡霍諝王璋

後漢書

七

得自怡齋

桓帝時執金吾則有段熲汝南袁逢靈帝時河南尹則有郭鎮

楊秉段熲朱儁霍諝馮緄歐陽祉應順京兆宋嵩杜密遷太僕

恒農楊懿南陽朱野朱穆傳郭唐任光傳鮑吉御覽二百一引袁

術附記於此

嘉定錢大昭識

補續漢書藝文志序

班孟堅漢書因劉子駿七略作藝文志西京書籍略見其梗概矣後代史家遞相祖述隋書舊唐書文獻通考作經籍宋孝王關東風俗傳作墳籍其名不同其書一也范氏後漢書本未及撰志司馬彪續漢書有律歷禮儀祭祀天文五行郡國百官輿服八志而不及藝文東京諸儒撰述泯焉無間良可淡惜嘉定錢可廬先生精通經史其說經之書實事求是得未曾有其於兩漢三國有辨疑一書王光祿稱賞不置以爲突過三劉今復有補續漢書藝文志二卷予受而讀之蓋取蔚宗本史所載及書之見存於今代引證於古書著錄於別史暨藏書家所錄者輯爲此編以補司馬氏之闕漏部分

條析悉依前書於一代著述固已搜採無遺洋洋美備矣不  
登上古之書者依劉知幾之說斷代爲史例不當載古人且  
東漢時古書之存亡亦非幾千百年以下所能審知也乾隆  
五十三年三月餘姚邵晉涵序

後漢郡國令長攷自序

漢書百官表云萬戶以上爲令萬戶以下爲長續漢志云每縣邑道大者置令一人千石其次置長四百石小者置長三百石侯國之相秩次亦如之應劭漢官又云三邊始孝武皇帝所開縣戶數百而或爲令荆陽江南七郡惟臨湘南昌吳三令耳及南陽穰中土沃民稠四五萬戶而爲長桓帝時以江南陽安爲女公主邑改號爲令主薨仍復其故大昭案前漢令長見於紀傳者少故不具論後漢則本史之外復有碑碣可證雖其間亦或有沿革而東都制度可見一斑故作郡國令長攷注以出處其所不知則闕如也乾隆五十三年十二月嘉定錢大昭書



### 三國志辨疑自序

史有二體紀傳編年是也紀傳中有二體陳氏三國志李氏  
南北史之與諸史是也諸史中班書約而仍明略而勿陋敘  
事最爲肅括蔚宗史才已不逮古而自稱體大思精自古未  
有者蓋謝承華嶠司馬彪諸書竝在范前取資旣多用功益  
密又因而非創易於措辭也陳承祚之於三國疆宇鼎立地  
醜德齊兼之互相詆毀各自誇張斯其載筆誠難折中又列  
國雖有史錄多詳魏而略吳華曹而陋蜀其滙而修成一史  
者承祚爲創是以用力尤難乃能彙實錄小說家之所言有  
條不紊類事無煩宜平時人稱其善敘事有良史才范頽等  
表稱辭多勸戒明乎得失有益風化而夏侯湛張華輩竝相



推重也裴世期鳩集羣籍以注此書其所徵引於漢有華嶠  
謝承後漢書司馬彪續漢書張璠袁彥伯後漢紀劉艾靈帝  
紀獻帝紀袁思光獻帝春秋樂資山陽公載記孔衍漢魏春  
秋習鑿齒漢晉春秋獻帝起居注獻帝傳於蜀有譙周蜀本  
紀王隱蜀紀孫盛蜀世譜於魏有王沉魏書吳人曹瞞傳郭  
頒魏晉世語孫盛魏氏春秋魏世譜魏世籍魚豢魏略陰澹  
魏紀母邱儉志紀魏武故事魏名臣奏於吳有張勃吳錄胡  
沖吳歷韋昭吳書環濟吳紀於晉有王隱虞預晉書干寶晉  
紀習鑿齒晉陽秋孫盛晉陽秋陸機晉惠帝起居注李軌泰  
始起居注傅暢晉諸公贊於地理有司馬彪九州春秋荀綽  
九州紀虞預會稽典錄趙岐三輔決錄摯虞三輔決錄注常

瓊華陽國志王範交廣二州春秋王隱交廣記左思蜀都賦  
魏都賦庾闡揚都賦太康三年地記襄陽記於人物有皇甫  
謐帝王世紀高士傳逸士傳列女傳魏文帝列異傳王粲英  
雄記張隱文士傳葛洪神仙傳周斐汝南先賢傳張方楚國  
先賢傳陳壽益都耆舊傳陳術益都耆舊襍記蘇林陳畱耆  
舊傳虞溥江表傳零陵先賢傳先賢行狀漢末名士傳魏末  
傳於官制有山濤啟事無名氏晉百官名志晉百官表褒賞  
令於襍書有顧愷之啟蒙注晉武帝中經簿荀勗晉中經簿  
張儼默記張華博物志東方朔神異記楊孚異物志干寶搜  
神記傅休奕傳子葛洪抱朴子袁準袁子劉向說苑新序衛  
恒四體書勢序殷基通語陸氏異林應璩書林虞喜志林司

馬彪戰略應劭風俗通徐衆三國評孫綽評蔣濟萬機論孫盛異同評異同襍記魏文帝典論決疑要注於文章有摯虞文章志荀勗文章敘錄於別集有孔融高貴鄉公陳思王植嵇康石崇潘岳諸葛亮姚信王朗傳咸張超等集於家傳有王朗傳暢荀氏廬江何氏會稽邵氏等族又有杜氏新書山濤行狀袁氏世紀裴氏家記陸氏世頌陸氏祠堂像贊於譜牒有孫氏嵇氏劉氏王氏諸葛氏庾氏阮氏孔氏陳氏郭氏崔氏諸譜於別傳有濟北王志鄭康成荀彧禰衡邴原吳質劉廙任嘏孫資王弼嵇康華陀管輅趙雲費禕虞翻諸葛恪荀勗程曉潘岳潘尼孫惠顧譚盧諶鍾會母張氏陸機陸雲諸家外此羣經傳注倉雅詁訓方言土語諸子百家之說無

與史事而引以詮釋字句者又不下數十種夫世期引據博洽其才實能會通諸書別成畦町若依後世新唐書五代史之例可自作一史與承祚方軌竝駕乃不自爲而爲之注者謙也竊嘗論之注史與注經不同注經以明理爲宗理寓於訓詁訓詁明而理自見注史以達事爲主事不明訓詁雖精無益也嘗怪服虔應劭之於漢書裴駰徐廣之於史記其時去古未遠稗官載記碑刻尙多不能會而通之攷異質疑徒淺淺於訓詁豈若世期之博引載籍增廣異聞是是非非使天下後世讀者昭然其見乎予舊於兩漢書有辨疑四十四卷於地理官制頗有所得名儒碩士時或許之近日復於三國志輯錄得三卷仍仿漢書辨疑例不敢立議論以測古今

得自怡齋

不敢妄褒貶以騁詞辨而其詳略不能與漢書盡同者蓋史事籍注證而申兩漢之注簡簡則易滋疏略三國之注博博則疑義鮮存有無待辨證而明焉者也雖然校書如埽落葉隨埽隨積以予之見聞有限無論志中罅隙更俟補苴卽拙著內亦豈無紕繆待指者漢書刊誤所望吳斗南爲之補遺云乾隆五十八年六月嘉定錢大昭書於濟南客舍

邇言自序

乃諺爲無逸之所戒然齊人有言孟子以證乘勢南人有言孔子以識無恒夏諺周諺引於經傳齊鄙語引於呂覽鄒魯諺引於漢書則淺近之言亦聖賢所不廢乎夫今古一亘古人所言今人謂之古語在古人自視未嘗不以爲今語也筆之於書遂爲故實若然則今人所爲俗語安知不爲幾千百年後之故實乎舊有無名氏釋常談又有宋龔頤正續釋常談皆寥寥二三百事無甚可觀因於涉獵之暇類次俗語俗事之見於經史子集者爲邇言六卷於以見一話一言亦不可無所根據焉至於爬羅剔抉務使里巷中隻語片辭俱合於古則請俟諸異日壬寅中秋晦之甫錢大昭記



知聖道齋讀書跋尾目錄

卷一

羣經音辨跋


刊正九經三傳沿革例跋

七經孟子考文跋

南軒易說跋

周易本義跋

大易法象通贊跋





書義矜式跋

書義主意跋

尙書譜跋

三禮考注跋

禮記正譌跋

自校禮記注疏跋

自校儀禮注疏跋

二

三

春秋經傳集解跋

唐律疏義跋

唐會要跋

唐大詔令跋

唐書直筆跋

鈔本舊五代史跋

五代史補跋

江南野史跋

唐餘紀傳跋

舊聞證誤跋

靖康要錄跋

靖康孤臣泣血錄跋

北狩見聞錄跋

六朝通鑑博議跋

慶元黨禁跋

蜀鑑跋

江東十鑑跋

丙丁龜鑑跋

昭忠錄跋

金史跋

大金集禮跋

南遷錄跋

二

歸潛志跋

姜氏秘史跋

二

綏寇紀略跋

東家雜記跋

歷代地理指掌圖跋

天下郡國利病書跋

歷代宅京記跋

宋東京考跋

元故宮遺錄跋

異域圖志跋

高麗圖經跋

越史略跋

安南志略跋

西洋番國誌跋

禮部譯字書跋

文淵閣書目跋

讀書敏求記跋

卷二

夢溪筆談跋

示兒編跋

演繁露跋

庶齋老學叢談跋

餘冬序錄跋





古今類事跋

兩晉南北奇談跋

昭明文選跋

阮亭選古詩跋

古今歲時雜詠跋

人海詩區跋

陶隱居集跋

李相國論事集跋

二

周曇咏史詩跋

玉京集跋

徐常侍集跋

咸平集跋

鉅鹿東觀集跋

祖龍學文集跋

山谷刀筆跋

鄱陽集跋

西渡集跋

鴻慶居士集跋

盡忠錄跋

定傾論跋

盤洲文集跋

周益公集跋

范石湖集跋

龍洲道人集跋

僞斜川集跋

二

格齋四六跋

伯牙琴跋

二

熊朋來家集跋

六十家名賢小集跋

二

宋未刻詞跋

遺山樂府跋

石初周先生文集跋

陳剛中詩集跋

說學齋稿跋

漢校官碑跋

碧落碑跋

馬楚復溪州銅柱記跋

二

三

北宋石經跋



知聖道齋讀書跋尾卷一

一領 文淵再校 天祿善和千卷尙未能讀  
幼卽焚膏老猶炳燭有見輒書璣綴末幅過此  
以往庶幾日續南州彭元瑞

羣經音辨跋

小學必不可少之書讀一字於未注者記出何經  
何句亦溫書一法是書宋凡三刻寶元二年崇文  
院開雕慶歷三年畢工文元親與其事紹興九年



已未臨安府學重雕十二年壬戌汀州寧化縣學  
再重雕余所見二本皆南宋時刻其次序首中書  
門下牒次自序次本書七卷次慶歷進呈銜名次  
臨安學銜名次王觀國後序寧化縣學銜名此翻  
雕亦出寧化讎校頗精審而序牒銜名顛倒特甚  
至以已未銜名連刻壬戌之後未免爲裝潢者所  
誤徒形率爾矣

刊正九經三傳沿革例跋

古人有所作必先立例匪特著書卽刻書亦然此  
荆溪家塾刻經例也未見所刻之書不知此例之  
善非此例不知所刻之善今岳氏本易書詩春秋  
左傳禮記皆入天祿琳琅

命武英殿影槧頒行續又見論語孝經孟子烏虜  
相去六百年安能盡所刻之九經三傳而讀之哉

### 七經孟子考文跋

秘書多寫本惟是正文字之書不可不刻傳寫旣

多展轉譌誤恐歸於無可考正此本鈔自海估猶  
可見唐時經典舊文足與陸氏釋文張氏文字唐  
氏字樣參互其中傳寫之誤以館中檄取刻本校  
正之歐陽公日本刀歌徐福行時書未焚逸書百  
篇今尙存令嚴不許傳中國舉世無人識古文觀  
卷中尙書與中國本無不同者足徵詩人託興之  
語不可泥鑿也

南軒易說跋

是書宋史及文獻通考俱不著錄新編書錄解題亦無之竹垞經義考云十一卷未見又引董真卿云乾坤闕今止存繫辭傳天一地二以下至雜卦傳浙江經進倦圃曹氏寫本與此正同余得之馬氏叢書樓

周易本義跋

曩讀朱子易本義於雜卦傳咸速也恒久也之下注咸速恒久直鈔本文不得所以注之意及得宋

本觀之乃感速常久了然明白廼知傳刻之訛耳  
宋本無八卦取象歌分宮卦象次序上下經卦名  
次序歌上下經卦變歌不知何時孱人并彖上傳  
履卦象下傳夬卦文言傳坤卦三處所引程傳亦  
宋本所無蓋後人所附益多矣

大易法象通贊跋

鄭滁孫元史有傳經義考列大易法象通贊七卷  
中天述考一卷然中天述卽在七卷中非別有書

也

書義矜式跋

王充耘號耕埜吉水人登元統甲戌進士授永州同知著讀書管見外有四書經疑貫通失傳見千頃堂書目經義考載讀書管見序云授承務郎同知永新州事非永州也

書義主意跋

此與書義矜式命題畧同而簡陋殊甚或僅破題

數語蓋劉氏書林所輯行卷非耕塾意也未附羣英書義諸作者皆建昌府人乃吾鄉前輩一典實存之亦可寶

尙書譜跋

是書專攻古文當時陳第極駁之其所列古文中一二句法字面與它經畧同者卽以爲規倣不無過當然議論却有依據

三禮考注跋

是書鈔於楊東里有跋刻於夏時正而羅念菴序之此帙的係明槧序跋皆不存今從經義考鈔出及所引鄭瑗之說附著卷尾俾讀者得以考其真贋云

禮記正譌跋

余初視學江蘇金生曰追以廩生久次來考歲貢出所校公羊傳一冊見貽且曰追於諸經俱有考訂此初稿也它日成書當質之座下越六年余再



來詢其人歿兩年矣書已散佚令嘉定學博輾轉向其門人問之僅有儀禮禮記兩種稿本蟲殘鼠齧幾不可次第細繹方稍有條理大約儀禮較完善禮記則尙屬未成本多引日本國七經孟子考文書中山井鼎物觀足利諸本皆是也因略爲部次鈔存之而舊所貽公羊已爲友人攜去失之嗟乎書之成否與傳不傳亦皆有命也歟

自校禮記注疏跋

乾隆丙午五月二十九日

大駕幸 避暑山莊未預扈從時領禮曹退食少  
閒暑窓清課取北監本禮記注疏用朱筆臨金氏  
正譌加以尋勘少有節潤義取易曉其金所校而  
此本尙未譌者計不下千條猶是善本別有所得  
以墨筆綴其間凡月有二日而竣少恒苦注疏難  
讀卒業三復文從字順安得羣經之盡若斯也炳  
燭之光良用自憇且留爲家塾課本

自校儀禮注疏跋

臨禮記正譌竣繼臨儀禮又依濟陽張蒿庵本句  
讀之 武英殿刻十三經後附考證多採通解儀  
禮圖集說殊精核四庫全書從永樂大典輯出宋  
張淳儀禮識誤李如圭儀禮集釋更當時未見書  
矣竝以墨筆採著於錄間有愚臆亦附末簡凡再  
旬有七日始一過視禮記遲速大不侔信乎儀禮  
之難讀也

二

宋熙寧後爲儀禮學者絕少故古本亦不多見通解及儀禮圖移記附經遂滋後人之誤集說譏之是也顧其書復移置鄭注且所採殊少與儀禮圖同惟集解及陳鳳梧鍾人傑兩刻本注全亦多舛合可藉以得鄭氏之真若疏則通解外別無它本可校矣蒿菴句讀甚諦唐石經外無所參正墨守監本而已

三

集說用橫讀法多以此篇校證彼篇儀節文字未可盡從然自士冠禮末五節移前外僅著其說而不敢遽改又作正誤附每篇末差勝於南宋人之直竄古經也

春秋經傳集解跋

王伯厚困學紀聞第六卷衛侯賜北宮喜諡曰貞子賜析朱鉏諡曰成子是人臣生而諡也自是遂

爲言諡家故實然卒未聞有繼者至何義門校本始云杜氏注云皆未死而賜諡及墓田傳終而言之近得不全宋槧本作皆死而賜諡及墓田傳終言之少二字而義尤協似勝王氏所據之本夫未死何以終言况生而稱諡古書多有之何休所謂諡者傳家所加也義門說似確而所稱不全宋槧本未見未敢以爲據及校 天祿琳琅所收宋本春秋經傳集解凡七其四本宋官刻末記云淳熙

三年四月十七日左廊司局內曹掌典秦玉禎等  
奏聞壁經春秋左傳國語史記等書多爲蠹魚傷  
損不敢備進上覽奉勅用棗木椒紙各造十部四  
年九月進覽監造臣曹棟較梓司局臣郭慶驗牘  
其二本麻沙刻末記云謹依監本寫作大字附以  
釋文三復校正刊行兼刻圖表於卷首淳熙柔兆  
涒灘中夏初吉閩山阮仲猷種德堂刊二刻皆精  
好然未死賜諡之文皆與今本無少異也最後得

一本急繙昭公二十年傳注讀之則無未字而字  
正符何說其通部款式與諸宋本不同不附入釋  
文自序連卷一不另篇而桓公二年傳中珽字尙  
闕筆在順祖未祧之前然則伯厚據其譌文義門  
証以殘帙而余獲見北宋最初完善之本得以考  
正疑誤爲真快也退直亟識之重刻岳珂本春秋  
經傳集解之後

唐律疏義跋



乾隆癸巳從武進錢竹初借鈔唐律疏義三十卷  
按唐書志律疏三十卷無忌李勣于志寧刑部尙  
書唐臨大理卿段寶元尙書右丞劉燕客御史中  
丞賈敏行等奉詔撰永徽四年上曝書亭集有跋  
徵引更詳簡首松雪翁序與此書不相蒙竹垞跋  
云乃傳霖刑統賦解序世儒以加於長孫無忌等  
唐律三十卷之前遂疑疏義爲霖等所注誤矣則  
知誤冠趙序其來已久蓋刑統賦解王亮增注而

此書譌釋文者爲王元亮名近而譌耳然亮益都人元亮汴人斷非一人也

唐會要跋

是書傳鈔都無善本舊曾有一部雜取新舊兩書六典開元禮元和郡縣志冊府元龜通典通鑑玉海通考及諸說部文集校改十餘年頗覺爽豁間爲友人偕去不戒於火以是本見歸脫誤與舊畧相等就所記憶少加訂改俯仰二十年手眼俱退

不能如向之精密也

### 唐大詔令跋

是書原闕十四卷之二十四卷八十七卷之九十  
八卷計廿三卷又無別本可校旁證它籍未能一  
一改正咎人每譏新唐書諸志太畧猶幸六典會  
要元和郡縣志唐律疏義諸書尙存此書與文苑  
英華所收亦可考見當時典章制度補新書所未  
及不徒以其文也

唐書直筆跋

宋史本傳夏卿字叔縉泉州晉江人與修新唐書  
世系諸表其手定直齋謂其別撰唐兵志三卷此  
書乃其修史時發凡斷制精確足爲古今通例其  
文仿公穀與峭有灋北宋人猶近古若沿入胡寅  
尹起莘手則迂庸不足觀已

鈔本舊五代史跋

永樂大典散篇輯成之書以此爲最以其注明大

典卷數及採補書名卷數具知存闕豈有不沒其實也四庫全書本如此後武英殿刻本遂盡刪之曾屢爭之總裁不見聽於是薛氏真面目不可尋究後人引用多致誤矣幸鈔存此本不可廢也

### 五代史補跋

五代史補五卷毛氏汲古閣鐫本其書多瑣屑類說部歐陽公採入史記者十之二三餘大槩無足取甚矣史才之難也毛子晉後跋謂六一病薛史

繁猥汰卷帙之半陶氏復病其闕畧補之陶氏誤  
此書當眞宗時序云祀汾陰之後歲在壬子乃眞  
宗大中祥符五年在歐史前所補者薛氏也汲古  
閣刻書後多有跋大半紕繆如此

### 江南野史跋

龍衮吉州人今永新尙多龍氏此書所紀多譌如  
先主尊徐溫爲義祖而以爲尊其父榮樊若水量  
江面造浮橋而以爲采石僧卓庵之類至牛僧孺

葬母永新唱歌與李氏有國事何涉乃野史中最  
蕪冗者若極力鋪侈國老宋齊邱而爲九華餓死  
稱屈則全乎鄉曲畛域之見爾

唐餘紀傳跋

南唐書馬陸兩家今俱有鐫本是編全襲陸書至  
有通篇不過增刪數字者倒置前後改竄名字塗  
人耳目以博著述之名可慨也序謂南唐書亡逸  
已久得其殘本良心所發終難自欺抑又可嘆矣

顧亭林謂明人譌述多出勦襲永樂時修五經大全詩全襲劉瑾詩傳通釋春秋全襲汪克寬胡傳纂疏一代之風氣如此時文錄舊習慣自然至用之以自附於立言此宋元以前所未有者對校一過各注於上方

### 舊聞證誤跋

宋人雜記傳說最多而宋史極繁冗以此書證之則年月事詞牴牾者夥矣揚善之言不嫌從長已



非信史若惡直醜正如王孝先之求復張尙賢之  
干謁宋子京之反覆趙元直之很侈烏可遽不辨  
此書從永樂大典輯出原書先舉舊聞後申證誤  
惜鈔胥不知體例間有脫處今逐條校注信爲言  
宋事者萬不可少之書朱竹垞嘗有志重修宋史  
曾舉宋人著述足資史事者數十家亦列李心傳  
名蓋指朝野雜記若繫年要錄及此書則竹垞所  
未見也

靖康要錄跋

靖康要錄六冊得自馬氏叢書樓譌脫特甚幸爲徐商老採入三朝北盟會編者十之六七逐一校竄乃可讀按晁氏讀書志陳氏書錄解題及宋史志俱不載譔人姓名浙江遺書目錄云卷末今上卽位知是高宗時人作余考書中紀秦長腳事凡四如辭奉使割地遷官乃其佳事至乞存趙氏一狀并没馬仲之名或作此書時猶在紹興中年高

宗韞中置刀時也

靖康孤臣泣血錄跋

是書爲徐商老採入三朝北盟會編可以覆校其所載爭立異姓事專歸秦檜而不及馬伸未爲直筆若范瓊則悖逆暴亂越數年方伏誅顧以收葬高伯振爲高義亟艷稱之所謂放飯流歎而問無齒決是無是非之心矣其紀徐揆上書亦不詳蓋心有所歉也至李忠愍初名若冰出使時欽宗惡

其與弱兵同音改之書中乃以若水爲其兄且指爲它人之誤殊失核矣

北狩見聞錄跋

曹勛字功顯陽翟人宣和五年進士宋史有傳其松隱集今尙存是書蓋勛建炎二年自北歸至南京時所上領巾九字當日以爲授受之正四聖擁衛黃羅覆將且詫爲符瑞故其書寥寥數語傳之不廢徐商老全採入三朝北盟會編此與蕭照瑞

應圖同一院體文字也

六朝通鑑博議跋

仁父此書爲南宋而發非爲六朝也與李舜臣江東十鑑錢文子蜀鑑同意欲用襄蜀以規復中原故借古事以指今勢宋當是時襄蜀皆無恙襄爲兵衝蜀爲財府東南之所託命其後元旣陷蜀降襄而臨安隨之是誠謀國之著蔡而慷慨激烈望其君相之奮發有爲則忠臣義士之用心也洎開

禧用兵厥子季章迎合韓侂冑以取參政觀序論  
所云將勇而賢乃欲以郭倬輩當之亦不善讀父  
書矣

### 慶元黨禁跋

慶元黨禁宋史藝文志馬氏經籍考俱不著錄四  
庫全書館從永樂大典輯成書中載專僞學之禁  
者京鎰何澹劉德秀胡紘四人而京何劉皆籍江  
西仲遠又同縣所居在進賢門外十里曰京家山

後人諱之曰丁家山吾鄉得入政事堂者仲遠後至明始有劉文端一燦名在東林鄉人至今譽劉而詆京烏序名爵之重輕有在哉

### 蜀鑑跋

蜀鑑爲宋南渡後之蜀言之也觀其敘述往事於所以保蜀與所以失蜀者三致意焉序中得之則安失之則危竊之則亡似乎豫知有吳曦之旤而元之亡宋必先取蜀固非如華陽國志錦里耆舊

傳徒資地理掌故已也方正學重刻序則爲蜀王  
言之易曰辭也者各指其所之於此可以悟立言  
之法其後輔建文致靖難之變蓋其防制宗藩之  
意胚胎已蚤矣

### 江東十鑑跋

孝宗嘗有志恢復高宗苦禁之至三敗而帝之志  
隳矣宋之終失中原魏公爲之也舜臣乾道間進  
士蓋一時議論如此其書徒作憤發語而毫無設



知聖訓言言是月一  
施實際視李仁父六朝通鑑博議遠矣

### 丙丁龜鑑跋

宋以火德王故有大忌丙午丁未年之說徽宗信術士遂於乙巳借春讖緯之學侈諛之爲豈所謂遇災而懼哉卒之靖康元二之變禍敗已極南渡不振至理宗而國勢愈岌岌草茅之士有怵心焉故敘列朝之事以爲是書夫少昊唐堯皆以甲辰卽位少昊八十四年堯七十載皆再遇丙午丁未

究無減於五帝之聖不錄可法者而徒錄可戒者  
反若此爲天運之必然諉諸無可奈何者是書以  
爲因時納忠則可矣非立言之正也

### 昭忠錄跋

是錄爲宋遺民入元後所作出於聞見中有忠義  
傳所未載足補宋史之闕至所紀文山脫身京口  
從者十二人事則未核考指南錄公夜渡揚子江  
至眞州閉門見逐又至揚州城下而余元慶李茂

吳亮蕭發攜金竄去其偕至通州者杜潁金應張慶夏仲呂武王青鄒捷而金應病卒於通今其墓尙存予持節時屢過碑下然則同逃者并公爲十二人耳錄中姓名無一合雖皆幕府英賢然不預鎮江之役至劉洙卽公所託名而尹玉前死於五木之戰錄中已載之更自相矛盾矣

### 金史跋

元修三史以金史爲最善今傳刻本金史訛脫特

甚蓋對音譯字校勘不易又南北監外無專行本  
故也予曾見一本前有江浙行中書省牒畧云皇  
帝聖旨裏江浙行中書省至正五年六月二十六  
日准中書省咨至正五年四月十三日篤恰帖木  
兒怯薛第二日沙嶺納鉢幹脫裏有時分阿魯禿  
右丞相等奏去歲教纂修遼金宋三史書卽日遼  
金史書纂修了有如今將這史書令江浙江西二  
省開板就彼有的學校錢內就用疾早教印造一

百部來呵怎生奏呵本聖旨那般者欽此於是本省委叅知政事左右司都司提調下江浙儒司委自提舉校正杭州路委文資正官首領官提調鑊印裝褙至九月日成書乃初成書之年栞印官本不特可資正定且足知當時條格也

大金集禮跋

大金集禮四十卷原闕卷十二之十七卷二十六卷三十三又卷二十七之半其中有方止而無圍

止其自注見行幸門皇太子門皆無之今鈔傳本  
俱同元史禮志云蔡流弗東圖籍散逸韓企先等  
所論禮官張瑋與其子行簡所私著自公紀亦亡  
其傳故書之存僅集禮若干卷其藏史館者又殘  
缺弗完然則自元時已非全書矧五百年後乎顧  
禮志所載郊禮及立仗天德行幸儀仗第七八節  
今書所無則又非元舊矣余藏此書十年暇日以  
金史對勘又借館本馬氏叢書樓本校定正其錯

簡譌字及舊鈔越行之誤小注混入本文之不可讀者一一改準又間錄禮志之可以補其所未備者前後校三過庶幾此書善本矣

### 南遷錄跋

謙牧堂藏鈔本金張師顏南遷錄一卷以金源文字傳者甚少亟錄之點校既畢證以金史則此書怪甚按金史世宗諸子顯宗趙王執輦越王斜魯鄙王允中越王允功鄭王允蹈衛紹王允濟潞王

允德豫王允成夔王允升顯宗早卒追謚宣孝太子而書以爲元悼其妃徒單氏生章宗而書以爲趙氏允蹈母元妃李氏而書以爲宋徽宗之女允升至宣宗時始薨而書以爲世宗時誅愛王乃宣宗時反者劉全詭稱指爲允中之子石古乃而書以爲允蹈之子所稱磁王濰王淄王三朝不知當金何帝名封位系無一合者甚至以章宗爲不正其終以世宗小堯舜而妄加新臺之恥竊怪師顏



身列秘省隨其主遭難播遷何敢於鱗肆至此又怪元修三史於金史極爲謹嚴滋溪曷碩圭齋諸大儒豈未見此書無惑乎浦元玠敘而疑之也惟所紀元圍中都三番拒守尙得當時事狀大抵圍城中人心離散之際草野道聽橫議駕說而嫁名於搢紳文士所謂亡國之妖言不足存也

二

書中年號金代所無諸人多金史及中州集歸潛

志所無以元爲北國而又別出蒙國欲藉以撓元  
不知其何所指書錄解題謂非北人語有曉然傳  
會者歲月皆牴牾不合四庫全書總目謂出宋人  
讐鑿之口然葉隆禮宇文懋昭何嘗若此蓋草野  
無知者所爲亦南燼竊憤二錄之流而已

### 歸潛志跋

歸潛志坊鈔僅八卷王阮亭周雪客黃俞邨所見  
也此十四卷其足本近長塘鮑氏刻入叢書又以

金史中州集注其異同頗便觀繹卷中敘崔立碑事乃京叔平生疚心處鮑氏附注元裕之外家別業上梁文郝陵川辨甘露碑詩謂可得是非之公京叔裕之乃兩造之辭其以伊誰受賞一語歸獄京叔則京叔並不諱言之且以其時京叔安用崔立所賜之進士出身爲也陵川乃裕之門下士觀其集中裕之墓誌京叔哀辭於二子軒輊可見要之碑辭之作無論爲元爲劉而裕之乃左右司員

外郎京叔布衣情事有間裕之入元不仕京叔於  
金亡五年之後復出就試魁南京選充山東西路  
考試官亦未免蛇足矣

### 姜氏秘史跋

右從山塘書肆借鈔惜多譌字又悞複十行安得  
善本讐正之姜氏弋陽人吾鄉顧未見此本也嗟  
乎當建文時北有叛藩鴟張日熾而朝廷所銳意  
更張者裁併驛巡倉稅僧道官月不絕書謀國是

者如此方黃諸公亦大可哂歎矣其沿革璣屑或明史所未具作地志者不可廢是書

二

建文無實錄作者意在補之故其書用實錄體所累多官文書惜僅仕銓曹祇詳改革官制事至疑程濟爲有其人則生當百年後所謂立乎定哀以指隱桓未可卽此以爲非信史也明史惠宗本紀以火起帝崩爲正後附出亡疑案先光祿公爲纂

修時分譔也朱竹垞潘稼堂在史館時所辨後來  
非不知之亦春秋疑以傳疑之義耳

### 綏寇紀畧跋

文體仿紀事本末標題仿杜陽雜編參以西河後  
鑒錄流寇大局可見矣其惜武陵哀寧南持論未  
爲平正九卷末特載商邱事更非無意矣

### 東家雜記跋

此南宗孔氏之書也余視學再過三衢拜廟下問

此書則亡矣館中副本尙是宋槧輒仿其行款鈔之作者不惟敘次詳贍有法而身從南渡喬木之感首邱之思寓焉觀其命名可深長思也惟書中以曹元魏混爲一則務簡而率又喜載秦始皇鍾離意劉義恭及海外亶洲諸事則違不語之旨矣

歷代地理指掌圖跋

費袞梁谿漫志論是書劇審是書要以九域志爲藍本其春秋列國一圖後人以冠左傳之首南宋

最盛坊刻若建之勤有堂杭之陳解元書鋪多應  
舉兔園冊子駕名人以爲壟斷耳書中避宋諱猶  
是南渡槧本後經明人翻雕更羸入明代地名愈  
可怪矣

天下郡國利病書跋

天下郡國利病書百二十卷從芝庭尙書借鈔中  
闕第三十八卷第六十九卷第七十一卷而第六  
十八卷前後俱有脫文其編或斷或連又多不載



所引書名序中所云本不曾先定義例也顧祖禹  
讀史方輿紀要多詳山川阨塞意主兵事但取正  
史故事而精是書凡邊防水利漕運河渠賦稅戶  
口物產風俗有關利病者著於錄其體更大脫漏  
亦多蓋惜乎其爲未成之書也有此兩書而太平  
寰宇記以下諸輿地之書皆譌言彙說矣

歷代宅京記跋

據序跋是書與肇域志天下郡國利病書同時所



多述儀注風俗人物并及瑣事諧語少引正史紀志而輒採宋稗類鈔等稗販之書意僅勉爲說部而無當於地志體例閱此益見亭林宅京記之嚴正也

元故宮遺錄跋

是帙作於元亡後將廢徹之際故不及輟耕錄所紀之鉅麗其敘次亦間參差則以所從入之徑不同然亦可見其恢規矣竹垞全鈔入日下舊聞互



宋與高麗往來由登州後以遼阻改由明州宣和六年兢從路允迪傳墨卿使高麗還進此書時已得燕山而北道不通故書中約畧其詞曰由燕山路陸走三千七百九十里而已方王俛病求醫於宋留二年遣還附言約金滅遼之不可書中所云宣和戊戌歲人使至上章乞降醫職以爲訓導上可其奏遂令藍苗等往其國越二年乃還蓋卽所求之醫但戊戌乃重和元年次年始爲宣和宣字

或重字之誤耳當時外邦議論如此而採風入告者方侈言天德地業萬國畢朝庸詎知越一年而金師至汴城下道君內禪南走以馴致靖康之事也考朝鮮史畧與書中世系不同武弟曰堯曰昭旻爲武子誦爲旻子而運之子曰昱宋史與此合而無隆欽享三王蓋當仁宗以後絕不通者四十三年中事也

### 越史畧跋

部領始建爲國其王在宋爲阮氏在元爲陳氏明  
三定復棄爲黎氏是書乃陳氏有國時土人所作  
紀阮氏以上事雖文辭簡陋而世次頗詳多足補  
前史所未備宋史繼黎氏者爲李公蘊而此書以  
爲姓阮不得其故昨讀黎崩安南志畧載陳氏篡  
國後凡李氏宗族與齊民姓李者令更爲阮以絕  
民望今安南多阮姓以此

## 安南志略跋

崩降元後居沔上著此書語多避忌但詳中國與安南交關之事於元兵傾覆國都敘次落莫絕無內詞反不如越史略雖野樸猶足廣異聞也

## 西洋番國志跋

作者隨三保太監下西洋紀所親見乃卒伍中解文者敘次了了勝於元汪煥章島夷誌略明史外國傳多採之



禮部譯字書跋

禮部譯字書十種明相傳舊本四譯館所行用譯字生所習官籍也今惟暹羅緬甸百譯蘇祿八百南掌六帙可備稽考百譯卽契夷八百八百媳婦國也若回回西番高昌西天則久入版圖會歸同文之治至精而易曉此不足據矣

文淵閣書目跋

自元史不立藝文志明史僅載明朝人撰述於是

五百餘年古經籍在官存亡之可見者惟此目而已焦氏國史經籍志校以是編似尙未窺中秘者不足信也穀城于慎行筆塵中載文淵閣書散佚檢討彭肯亭典其事多取以歸肯亭爲余高伯祖今子孫家無一卷先人亦無言公藏書者筆塵蓋躉言至明神宗三十三年重編內閣書目此著錄者十失其九文淵閣僅存其名今則冊府鴻開寶函麋集四庫全書三萬六千卷充牣閣中多此目

所未見信乎稽古右文度越前代爲萬世一時之  
嘉會矣

讀書敏求記跋

書中無甚考證間有舛誤每拳拳於板本鈔法乃  
骨董家氣習朱筆評閱者更陋徒作狂語耳

知聖道齋讀書跋尾卷二

夢溪筆談跋

此書的係宋本避諱字皆合上有朱書乃近人校  
琴川毛氏刻本所注墨書自署別號曰海岳考閩  
福清人郭造卿字建初號海岳爲戚繼光上客著  
述極博父萬程戶部主事母盧氏所載宏治九年  
舉葬父母見冰花事極合其人從事幕府徧遊九  
邊故與定襄侯郭登相識評者尙三百年以上古

香可挹也

示兒編跋

是書說經多尙新解說詩文多科舉之學獨於六書最深採摭極博多根柢於許氏說文陸氏釋文故援據頗正暇日瀏覽間以淺陋所省記者附注以示諸孫

演繁露跋

借春秋繁露以自名其書固屬誤見容齋已駁之

且其中或驚遠遺近事出正經無煩紀錄者高似  
孫演繁露詰惜其書不存宋末言博學者以王伯  
厚程泰之並稱是書遜困學紀聞遠甚大約其學  
博而寡要其議論廣而不堅於考證中時墮類書  
窠臼分別觀之亦責賢者備之意耳

庶齋老學叢談跋

是書可採者不過數條餘多鈔撮少識解隸事則  
不脫詞科習氣論詩則不脫頭巾習氣紀姚平仲

事不知其名甚至譽賈似道夏貴不容口可怪也

### 餘冬序錄跋

意在仿黃氏日鈔而大惜有二其一乃平日贈送題跋文字裁翦錄存不免應酬氣其一刺取典實相近者比附錄之如古事比之類不免類書氣於經史理學詩文禪學政事一切沉濫少心得處然不肯爲無根之談高於徐應秋輩數等矣

### 孫子算經跋

曝書亭集中有孫子算經跋云首言度量所起合  
乎兵法地生度度生量量生數之文次言乘除之  
法設爲之數十三篇中所云廓地分利委積遠輸  
貴賈兵役分數比之九章方田粟米差分商功均  
輸盈不足之目往往相符尤在得算多多算勝以  
此定是編非僞託予觀書中設問有長安洛陽相  
去九百里又佛書二十九章章六十三字乃後漢  
明帝後語此與九章算經云張蒼定而中有上林



苑同一後人僞作也考唐六典明算試九章海島  
孫子五曹張邱建夏侯陽周髀五經綴術緝古謂  
之算學十經予曾見海虞毛氏影宋鈔凡七種但  
闕海島五經綴術三種耳斧季跋自詡刻畫影摹  
不爽豪髮每種末有校勘銜名元豐七年九月二  
十八日進呈奉御寶批宜依已校定刊版朝奉郎  
秘書監丞上騎都尉賜緋魚袋韓治朝散郎試秘  
書少監上騎都尉賜緋魚袋顧臨朝議大夫守秘

書少監上護軍賜紫金魚袋劉攽中大夫守尙書  
右丞護軍東平郡開國侯食邑二千三百戶賜紫  
金魚袋呂大防通議大夫守尙書左丞上柱國平  
原郡開國公食邑二千八百戶食實封伍伯戶李  
清臣正議大夫守中書侍郎上柱國馮翊郡開國  
公食邑二千三百戶食實封伍伯戶張璪正議大  
夫守門下侍郎上柱國南陽郡開國公食邑二千  
一百戶食實封壹仟戶韓維金紫光祿大夫守尙

書右僕射兼中書侍郎上柱國東平郡開國公食  
邑六千二百戶食實封壹仟玖伯戶呂公著正議  
大夫守尚書左僕射兼門下侍郎上柱國河內郡  
開國公食邑四千一百戶食實封壹仟伍伯戶司  
馬光是宋本乃經三省秘書監校定其時衆正盈  
朝一刊行書籍細事而精密若此其實封數目皆  
用增筆字與食邑不同乃當時官文書式亦識小  
之一也按呂大防李清臣韓維呂公著司馬光五

人銜名皆元祐元年所任之官蓋刻成後始列者

重修政和經史證類備用本草跋

忠義之在人心未嘗一日而亡長孫無忌等修隋書諱忠節曰誠節符堅曰永固劉昫唐書志稱唐爲皇朝胡三省通鑑注以宋郡縣釋地理撰述不以爲嫌朝廷不以爲罪厚之至也證類本草一書乃元時所鑄有麻革信之序署年己酉刻者張存惠字魏卿平陽人其自識云泰和甲子下己酉歲

日南至晦明軒謹記考金章宗泰和三年甲子越三十年天興四年甲午哀宗自焚於蔡是時元定宗雖未紀年號而金之爲元至已酉已十有五年矣信之金源名士與元好問裕之劉祁京叔齊名但署甲子竊取淵明魏卿爲人它無所表見而倦倦之意托溯年以懷舊其辭隱而顯非細讀其文烏足以知當日情事哉

石經考跋

舊藏鈔本譌脫殊甚戊申春曾取各本書校改一  
帙近門人蔣少逸彙此本差勝抄者然尙有落葉  
因重過一遍較爲清爽其所輯自史傳外不過洛  
陽伽藍記水經注金石錄東觀餘論廣川書跋隸  
釋郡齋讀書志書錄解題及近人金石文字記而  
已視竹垞經義考中所臚至爲簡略且嘉祐石經  
無所考訂乃作疑辭光堯石經近在杭庠祇寥寥  
一則殆未成之書也

求古錄跋

此金石文字記初本後乃增益詳覈排比時代始成書耳然錄用洪景伯隸釋例全鈔本文俾遺篇墜簡不見於它書者得此僅存則視記爲勝要之二書不可偏廢也借全書底本寫此原鈔於檢校等字皆闕筆猶是亭林早年作

石鼓文定本跋

自楊用修贗作石鼓全文而世人安於作僞若馮

惟訥古詩紀孫承澤春明夢餘錄皆爲用修所愚者也此公白云見薛尚功本而所列竝不與鐘鼎款識同且曾至京師摩挲石鼓而所載多鼓所無之字其今字音訓都用用修之說僅改數字以就已之句韻而辨証絕不及用修一字是爲人所給而反欲以給人者可嘆也已

清河書畫舫跋

從來賞鑒家多不學卽文章亦不免雖然使一一



考據精核則名蹟之真者幾希矣讀米菴此書合之真蹟日錄法書名畫見聞表其所藏有限特向項子京家裨販耳其書綱目錯雜時代顛倒人已之說不辨全不知著書體例視珊瑚網書畫彙考遜甚若近代銷夏二書則高不如孫也

江村消夏錄跋

錄中有唐明皇恤獄詔注書畫舫云宋初有毛應佺此詔出宋太宗但詔詞不似勅州官語亦未可

盡然也米菴蓋據仕學規範有毛應佺其人亦知  
疑之江村愛贗古復改從明皇不知此勅載曾敏  
行獨醒雜志又有賜衣勅一道皆宋天聖中賜毛  
應佺者書末明云祖宗重郡守之寄雖遠方小郡  
勅書亦且徧賜今帥守皆無之何以云不似勅州  
官語耶且天聖乃仁宗年號首云三聖謂太祖太  
宗眞宗也若太宗則安有三聖若唐明皇則高祖  
至睿宗五聖矣卽首二字且不解兩公何鹵莽乃

爾

鑑誠錄跋

余鈔是書欲採一二入五代史記注餘都無足取  
大氏論詩尤墮魔道至以輕薄爲教化其最所激  
賞者不過打油釘鉸而已至載秦宗權謀逆乃神  
逼使爲之更害道之言矣毛氏刻入遼遠秘書中  
此其專本

古今類事跋

古今類事二十卷從 內府影宋本鈔出其書如  
前定錄之例鍾輅所云達識之士知其不誣奔競  
之徒亦足自警小說家之近正者也全書總目標  
出所引如成都廣記談聞錄廣德神異錄唐宋遺  
史賓仙傳蜀異記摺紳脞說靈異記靈應集皆後  
世不傳之書故可貴然太平廣記中徵應定數兩  
門是其藍本也

兩晉南北奇談跋

朱子謂南北史除却通鑑所採祇是一部小說此  
正朱子所謂小說耳且裁截無灋不足資也洪容  
齋有晉書精語南北史精語不知與此體例奚似  
聞武林尙有其本已上之四庫館還朝當借錄之

### 昭明文選跋

古今書籍版行之盛者莫如文選予所見宋本夥  
矣細校字畫款式題識確然無疑者凡四其一有  
國子監准勅序文云五臣注文選傳行已久竊見

李善文選援引該贍典故分明若許雕印必大段  
流布欲乞差國子監說書官員校定淨本後鈔寫  
版本更切對讀後上版就三館雕造候勅旨奉勅  
宜依所奏施行是爲國子監本其一每卷末刊校  
對校勘覆勘銜名三四人其覆勘贛州州學教授  
張之綱贛州司戶叅軍李盛贛州石城縣尉蕭倬  
贛州觀察推官鄒敦禮皆章貢僚屬是爲贛州本  
其一有識云右文選版歲久漫滅殆甚紹興二十

八年冬十月直閣趙公來鎮是邦下車之初以儒雅飾吏事首加修正字畫爲之一新俾學者開卷免魯魚亥豕之訛且欲垂斯文於無窮云右廸功郎明州司法叅軍兼監盧欽謹書是爲明州本其一有識云此集精加校正絕無舛誤見在廣都縣北門裴宅印賣又識云河東裴氏考訂諸大家善本命工鐫於宋開慶辛酉季夏至咸淳甲戌仲春工畢把總鐫手曹仁是爲廣都本彙記之以資識

別今坊間間有大字白紙闕宋諱本乃明袁褧尙  
之影廣都本重雕始嘉靖甲午成於已酉計十有  
六年之工力自識云匡郭字體未少改易尤足亂  
真也

### 阮亭選古詩跋

阮亭有禪機而無道力其說詩多露才揚已之談  
固宜來談龍之譏也惟此選能獨出手眼足爲學  
詩端其龔徑七言至金元全取題畫詩亦是一病



古今歲時雜詠跋

全書四十六卷其分目以時節末四卷以十二月  
每門前古詩宋綬所編五代以上人作次今詩蒲  
積中所補本朝人作所謂古今以時代非以詩體  
也視近世月令廣義輯要日涉編歲時類傳諸書  
較爲大雅乃知古人雖兔園冊子政自不同耳予  
所藏乃明神宗乙未影宋鈔本

人海詩區跋

人海詩區四卷購自馬氏鼓書樓不著編人姓名  
視日下舊聞所收爲多彼誌地此選詩各有指也  
所收元詩爲多亦其勝處于忠肅條下注有吾杭  
語蓋浙人所輯

陶隱居集跋

陶隱居集一卷明時舊鈔本猶在張天如未輯漢  
魏百三家以前卷末自文休承以下傳寫敘次并  
井可寶也據跋崇禎元年鈔校字避熹宗諱可證

知不足齋叢書  
卷二

三

也

### 李相國論事集跋

書名文集而卷目皆標論事蓋集中之一種全集已亡而此種又闕七之一也四庫全書改題爲李相國論事集以入史部甚當其事新舊唐書通鑑多採入皆櫟括其辭亦有史鑑所無者脫誤無從校正惟名臣奏議中錄其文十餘條而訛處與此本正同是鈔胥傳錄之謬已久矣隨文改正庶幾

可讀非敢以爲定本也

二

新舊兩書絳本傳皆以此書爲藍本今逐一注出則新書所採視舊書多至倍事增文減確乎有之昔人反以此爲新書詎病毋乃好爲翻案之過

周曇咏史詩跋

此書晁氏陳氏俱不著錄惟焦氏經籍志載云八卷此從項藥師朱錫鬯舊鈔本錄得唐人文字單

知不足齋叢書  
行 者 甚 少 全 唐 詩 僅 採 其 詩 而 無 講 語 觀 此 亦 可  
見 當 時 體 格 也 續 得 宋 本 再 校 究 多 不 可 通 奈 何  
奈 何 本 乃 季 滄 葦 所 藏 極 工 雅

### 玉京集跋

玉海天禧四年十一月壬戌詔丁謂等作天章閣  
奉安御集五年三月閣成庚子奉安時輔臣編御  
集爲三百卷內玉京集二十卷乃御集中之一此  
僅六卷非足本

徐常侍集跋

散騎實祖孺子見集中亭記其母及身皆葬洪都  
西山故爲吾鄉人鄉中徐氏最繁衍則未知其後  
何派也此集未見雕本從范氏天一閣假鈔校以  
它本差少譌闕吾鄉宋人大集六一山谷澹庵象  
山皆有祠堂版校刻俱未善若平園誠齋盤洲則  
闕如矣安得好事衆舉之

咸平集跋

開帙十二奏疏伉直危切自魏鄭公陸宣公外千古所罕見也其詞多對舉文體亦相近范文正公墓誌謂奏凡五十二上文集五十卷然則集外所遺者多矣諸臣奏議中有上太宗論旱災論邊事兩篇此集不載鈔附於末

### 鉅鹿東觀集跋

鉅鹿詩嫌太易其勝處卽在無難集七卷凡詩二百六十三首別有十卷本詩三百五十九首近有

東觀集補遺三卷則十卷本之第四至第六也曹氏選宋詩存用十卷本此其子閑所編卷數與序合非不全也

### 祖龍學文集跋

龍學詩文坦明徑達不爲鈎棘態宜其宦達而壽當日曾掌制與廬陵臨川游友孫明復僚壻梅聖俞賓客李泰伯其文章宜多而集中詩僅百餘首文僅四十二首又無鴻篇鉅什何也是集其曾孫



衍所編附益一時倡訓之作又其家數世文字一章一句皆入之僅能成編可謂賢子孫不忘其先人者矣爲人後者所宜法也

### 山谷刀筆跋

此書與文集別集外集中書簡微有異同不可偏廢其以歷官編次尤足考見當時出處之跡與黃澠編詩目入年譜同意少年時嘗以蘇詩編年有施注而黃詩無編年本欲取任淵史季溫史容三

家之注以譜敘次及同時人倡和附見都爲一編命曰黃詩三集補注亦有零雜稿本而忽忽三十年不能成書官事牽冗耳目重眊安得好事者助我老興爲鄉邦成一巨帙也

### 鄱陽集跋

鄱陽先生集晁陳兩家不著錄馬考亦無之宋史本傳著易義詩義詩文集凡五十卷此本標文集僅詩十二卷非足本也近嘉善曹氏輯宋百家詩

知不足齋叢書  
存所選鄱陽集無出此外者浙江遺書目錄亦寫  
本十二卷或流傳祇此今饒州諸宗皆祖先生宗  
人澤濂云祠有二大匱猶是先生藏書它日當訪  
之無則當勸鑄之

### 西渡集跋

雙井四洪所著今傳世者惟玉父此集而已卷中  
庚戌舊廬傷懷一首乃疊丙午遷居韻而遷居詩  
返在卷末殆亦出後人掇拾非原編也校以鮑氏

知不足齋鈔本別有補遺四首錄入之

鴻慶居士集跋

曩聞蔗林說館中鴻慶居士集校閱甚難此本從知不足齋借讐再過差少譌字仲益論伏闕事使其說得行則陳少陽之旤不待汪黃矣因是終身讐李忠定至謂青城之辱由於刼寨夫金之輕宋與必亡宋豈在刼寨與否議論一頗僻卒不能自還可戒也南渡後人謂金人必立異姓由於無忘

在莒之句此仲益鱣忠定之報其平生不直秦檜而附和議集中以岳武穆爲跋扈盛推呂惠卿親萬俟卨惜莫儔真縱橫之士至所爲朱宗墓誌自敘爲金人搜索望門乞匍求脫之狀則不能自文矣

盡忠錄跋

余獲見季滄葦所藏正德年初印盡忠錄尙無補錄二卷有滄葦手跋其夫人唐氏乃毘陵孝廉孔

明父之女荆川四世孫也以是書見貽朱墨皆荆川筆云細閱書中絕無批評但有圈抹不得其讀書之意既取荆川右編勘之圈者皆入右編抹者節去始知卽其纂右編時腳本滄葦之言益信因以校竟湧識如右

### 定傾論跋

定傾論一卷馬氏叢書樓舊鈔本從徐商老三朝北盟會編錄出非有專本也又按林泉野記庶文

名當叟集

盤洲文集跋

是書世不多見從館中藁本錄出乃內府天祿  
琳琅所藏虞山毛氏影宋鈔本也洪氏父子兄弟  
以忠節文章著於南渡而遺集傳刻絕少余嘗欲  
取忠宣之松漠紀聞及重輯文集文惠之此集文  
安之泉志翰苑羣書文敏之野處類藁容齋隨筆  
續筆三筆四筆五筆存堅志經子法語史記法語

南朝史精語總爲一部曰洪氏全書計不下數百  
卷今饒歙杭諸洪多祖忠宣安知無好事數典者  
刊布之

周益公集跋

吾鄉大族多醵金爲宗祠又刻其先聞人文集曰  
祠堂版若六一南豐山谷澹庵象山文山諸集皆  
有之惟益公誠齋盤洲三集最巨無雕本歲辛卯  
從吳估鈔得此本寫手譌舛特甚越二十年庚戌



以內府本細校麤可讀聞駕堂太史將入國門當以授彼就其宗謀之

范石湖集跋

標目文集以賦騷爲首卷接詩三十三卷而無文或當時未編成或後佚之此猶舊鈔有李太僕名印太僕以字行姓其本名也景泰時人今現行秀野草堂刻本少贊一首以賦騷爲末卷冠以楊誠齋全集序陸放翁西征小集序餘俱同

龍洲道人集跋

龍洲集十五卷內詩十卷賦一首詞二卷雜文二卷附錄一卷編者無識以前十卷爲詩集後五卷爲文集且混附錄爲序跋可哂也龍洲嘗上書請光宗過宮又以書扈時宰陳恢復方略惜其書皆不傳又嘗在辛稼軒席賦羊腎羹云拔毫已付管城子爛胃曾封關內侯死後不知身外物也隨尊俎伴風流挽張魏公云背水未成韓信陣明星已

隕武侯軍平生一點不平氣化作祝融峰上雲今  
集中皆無之

僞斜川集跋

弇州謂以劉過集贗作蘇過集自元末已然此卽  
龍洲集前十卷但少獨醒賦一篇真元槧也近四  
庫全書館從永樂大典散篇錄出斜川集詩文門  
人趙味辛刻之以貽余余篋中亦有舊鈔龍洲集  
存此舊刻爲校本良佳

二

叔黨卒於宣和五年見晁以道所作墓誌此十卷  
中周益公楊誠齋陳君舉陸放翁韓南園屢見安  
能欺人但可炫藏書不讀者耳

格齋四六跋

三松集不見於宋史藝文志焦氏國史經籍志載  
王子俊集十八卷此卷竹垞鈔存宋本者其跋謂  
之格齋四六乃其一體不得卽冒三松集也

伯牙琴跋

自跋云詩文六十餘篇今其詩亡矣別本末附沖  
天觀記超然館記清真道院碑記三篇當鈔補之  
牧心宋遺民元無人之名其寄意也

二

此都南濠家藏本近鮑氏知不足齋棐行於三篇  
外又增昊天閣記洞天詩集序二篇并詩十三首  
爲其叢書一種

熊朋來家集跋

天慵之學極精細大似劉仲原父其論武成月日  
春秋周正周禮籩豆實律同合聲辨且密矣論易  
詩叶音近代顧寧人易音詩本音所從出也至必  
欲改定洪範雜卦傳玉藻未免南宋人習氣若欲  
用女冠比北尼求雨易笙魁漆木爲匏以召人之  
清廉則迂矣是集乃經學之書非其它詩文集可  
比通志堂刻入經解中并第七卷雜說統名曰經

知不足齋叢書  
說字句亦不能無譌本傳云家集三十卷攷焦氏  
經籍志正同今不可得而見矣此七卷自卽從經  
解錄出標以家集而沒其三十卷之數鈔賈之作  
僞也

### 六十家名賢小集跋

陳起芸居於臨安府大街睦親坊設陳解元書鋪  
收刻海內詩人小集雖數什亦名一家命曰江湖  
集蓋一時舉場游客炫名之資并名公貴人小卷

間及北宋所遺皆登梨棗本無一定家數卷數後  
以夜月梧桐皇子府春風楊柳相公橋之句爲史  
彌遠羅織起從遣戍書亦官戲而零落之餘彌形  
珍重好事者各就所得掇拾成書彼此出入不同  
近錢唐吳尺鳬彙爲六十四家盡汰北宋人定名  
南宋羣賢小集作跋自詡完善余所藏有二本此  
本購自馬氏叢書樓較吳集少七家許棐樂雷發  
劉過林同孝  
姜夔周文  
璞僧紹蒿多三家楊甲陶又一本三十二家與此



本同者二十家此本無者十二家

北宋魏野蔣堂  
洪炎高登南宋

王阮王鉅趙汝鎡姜夔周  
弼樂雷發羅公升黃希旦

書估云从徐氏傳是樓

鈔出者兩本可竝存當更鈔吳氏所有七家補之  
而四庫館有兩宋名賢小集百五十七家則更鉅  
觀計兩本已有七十二家卽全鈔亦未爲大願難  
售也

二

厲樊榭作宋詩紀事於此諸家集外頗有所摻補

多從說部志書攬撫其勤可尙一一鈔入不似宋詩存徒從是編乞生活且選落多未愜也

宋未刻詞跋

於謙牧堂藏書中得宋元人詞二十二帙題曰汲古閣未刻詞行款字數與已刻六十家詞同每帙鈐毛子晉諸印皆精好余舊藏李西涯輯南詞一部又宋元人小詞一部合此三書於六十家外又可得六十二種安得好事者續鐫爲後集

遺山樂府跋

嘉慶戊午立夏曝書閣之終卷此公於此事全無解處第五卷全是壽詞逾形塵坌固宜集中不入此體也鈔手多譌脫亦無庸再校矣

石初周先生文集跋

癸卯夏坊估以馬氏叢書樓此帙來鬻中有阮亭手題詞甚貶斥石初生前至元歿洪武年八十有八身閱有元一代興亡當庚申君末造吏貪將殘

兵驕寇熾生民流離塗炭之苦身丁患難一發之  
於篇什視少陵三吏三別酸楚過之有小雅大東  
告哀遺意垂爲世鑑是謂真詩阮翁但解流連光  
景修飾句法嵌一二稀用字爲工而已此詣奚足  
以知之校竟且識以俟論定

陳剛中詩集跋

是集皆紀行之什其交州藁及後附致安南諸書  
可補元史及地志所未及

說學齋稿跋

辛楷官詹寄余說學齋集云是歸熙甫手鈔本倦  
倦以表章爲言余以校舊所藏本多其半太樸存  
詩二卷曰雲林集竹垞有跋且辨太樸以洪武三  
年卒於京師無守余闕廟事乃其子於幃爲安慶  
教授因以傳會也當以雲林集與此帙竝鈔以存  
太樸之全雲林乃金谿山名太樸少時讀書之所  
故以名其詩集此集中



石墨鐫華所輯考唐書宗室世系表傳高祖子韓  
王元嘉六子訓潁川郡公誼武陵郡公譔黃國公  
工辭章家多書文句詳正祕府不及爲通州刺史  
辭疾歸垂拱中元嘉徙絳州刺史與譔及越王子  
沖謀合宗室舉兵事發自殺譔上黨郡公與譔俱  
死神龍初追復元嘉爵土以第五子訥嗣則碑所  
未載也譔能文章抱忠義爲唐初宗室之望諸說  
不及特錄以誌

馬楚復溪州銅柱記跋

吳任臣譔十國春秋載銅柱記文取校之譌數十  
字蓋由未見拓本康熙戊午博學鴻詞與薦者雲  
集京師竹垞得此不與任臣共之何也李臯名少  
一字蓋宋人避宣祖諱非歐陽子誤五代史補亦  
作李臯竹垞云柱在辰州府百餘里溪蠻境上案  
雍正七年改土歸流以永順宣撫司爲永順府保  
靖宣撫司爲保靖縣隸焉卽宋下溪州地也柱在



知里通言書  
今保靖縣十里舊茅灘東

二

拓本四紙蓋柱形正方其越行處多麤入銜名不  
可讀考所列保靜感化高來南富諸州皆宋誓下  
二十州之名而宋史谿峒諸蠻傳載彭文綰事在  
天聖三年上距晉天福五年八十五年矣蓋皆後  
來蠻酋所增鑿也今移裝於末仍標明若干行下  
傳云太平興國七年詔辰州不得移部內馬氏所

鑄銅柱計至天禧元年凡三十五年卒移之蓋當時漢土以銅柱爲界也

—  
—  
—

碑中人名見宋史谿峒諸蠻傳者三一建隆四年  
前溪州刺史田洪贊歸順此云弘贊宋避諱也一  
咸平六年南高州義軍指揮使田彥強來貢一是  
年溪峒團練使彭文綰送還先陷漢口五十人詔  
授檢校太子賓客知中彭州後爲彭儒猛所攻殺

則與碑銜名俱同矣碑中多覃姓讀若蟬通志氏族畧始見注溪蠻姓它字書氏姓書俱無之

### 北宋石經跋

嘉祐石經存者計十二版三百五十四行周禮卷第一訖序官宮正三十行序官凌人訖掌舍府二人史三十行序官九嬪訖逢人女御八人女三十行大宰五曰保庸訖八曰山澤之賦三十行大宰之小治訖小宰以敘其事三十行小宰曰廉辨訖

而觀治二十四行大宗伯禮若王不與祭訖小宗  
伯辨吉凶三十行肆師牲繫於牢訖類造上三十  
行司尊彝享裸用虎彝雝彝訖司几筵加莞席紛  
純三十行典瑞玉器而奉之訖典命凡諸侯之適  
子三十行典祀司隸而役之訖世婦有操事於婦  
三十行墓大夫所供職喪訖大司樂大合三十行  
赤腳仙人下當寧韓范宮默名世輔是時海寓  
久又安文治張皇垂掌故寫經鐫石立汴都判者

宋祁後王洙下遶草澤上皇姪趙楊張謝章梠胡  
一行小篆一行隸貴以古文存古意點畫猶講說  
文書體裁不襲經生字豈意于今六百年十二版  
耳僅流傳小長蘆叟季野氏二三策未見周官法  
帖譜系蘭亭考好事羶薌競揆討書家但解八法  
工俗學安知六經寶一從大盜壅洪流難向黃河  
沙底求獨怪當年刻甫畢便行新法廢春秋 北  
宋石經向來記石刻者不之及卽河南志古蹟有






# 四部寓眼錄卷上

## 經部

周易集解十七卷 汲古閣本 津逮秘書之一

海甯周廣業



唐李鼎祚撰鼎祚資州人仕祕書省著作郎唐書無傳觀其避代宗諱知在中盛間也易注百家獨行王鄭鄭多參天象王全釋人事鼎祚著書自謂刊輔嗣之文補康成之易所集子夏傳以下孟喜焦貢京房馬融荀爽鄭元劉表何晏宋衷虞翻陸績干寶王肅王弼姚信王虞張璠向秀王凱冲侯果蜀才翟元韓康伯劉瓛何妥崔憬沈麟士盧氏崔觀伏曼容孔穎達三十二家又引九家易乾鑿度以己意參附其間大抵以象數爲主凡漢晉諸儒卦變之法備見此書而虞仲翔十居六七宋朱漢上章俊卿明黃梨洲皆推其說爲變學鼻祖賴有是也汴上西亭子朱睦㮮跋云唐藝文志十七卷據鼎祚自序十卷不知唐史



何据崇文總目及邯鄲圖書志亦稱七篇逸蓋沿唐史之訛今考李序有云別撰索隱以參卦爻彖象王氏略例仍附注末凡成十八卷則是注十卷別錄七卷并略例爲十八卷唐志專舉李書爲十七初未嘗訛特別錄早佚耳朱氏于嘉靖丁巳取宋板重梓其卷第未知何若此汲古本乃強割爲十七卷以符唐志之數則誤矣書在唐志及鄭樵通志俱名集注通志別有兩集解一注云馬鄭二王四家一注云張蟠皆非鼎祚今之集解又不知誰所改也舊在杭州嘗於盧匏廬齋見盧雅雨先生刊本因述其概於目治偶鈔中已越二十年矣續文獻通攷云是書姓名中有晉人宋衷宋音森然則今本作宋衷譌也

周易舉正三卷 亦祕書之一

唐郭京撰京仕蘇州司戶參軍自謂得王輔嗣韓康伯手寫注定傳授真本以比世本多有謬誤脫漏因舉正一百三節傳諸學者洪容齋隨筆嘗取其二十餘條余觀其書于賁云不字定本草書勢如小字于師云定本之字行書而下

引脚稍類行書言字于旅云注棄字誤作乘未有隸書以前棄字與乘字相類則不知定本爲草乎行乎隸乎其增改者不曰細尋注義誤自昭然卽曰轉寫筆誤理自可知皆影響欺人之語不足據也或云後人僞託非郭氏原書通志堂經解津逮祕書俱有之

周易本義十二卷 宋本

宋朱子撰是書世所誦習者皆俗本其原本卷第上經注中明言依呂氏所更定爲經二卷傳十卷復孔氏之舊而按尋俗本絕不相符沿襲旣久世莫之怪余雖知其非亦苦無以正之是本爲宋咸淳己丑九江吳革刊於新安者數原劉宏校正前列易圖九起河圖經上下二卷每卦注文雙行連綴於卦彖爻辭之下傳分彖上下象上下繫上下文言說卦序卦雜卦爲十卷而彖上傳下注云從王肅本末附五贊起原象筮儀所謂呂氏更定復孔氏之舊者如此吳序云昨刊程傳於章貢郡學今敬刊本義於朱子故里與同志共之意當時傳刻

本少然既有是版越今五百餘年尙有存者何俗本敢於牴牾乃爾蓋自蔡淵等割裂本義分綴之王弼本屢入彖曰象曰文言曰等字已盡變朱氏之例元儒合刻程傳朱義其上下經悉依程本至明刪傳存義并繫辭說卦等本義五卷刊行之此俗本所從出也今坤文言直其方也節下履彖傳上天下澤節下俱有程傳乃當時刪之未盡者宋本本義並無之此亦其明證矣夫五經取士易居其首既墨守朱義不應紊其篇次往時出題多合爻彖將象曰二字作題中字面不知又言曰彖曰象曰俱漢儒所增豈易之本文有是乎當急重刊是本以復朱子之舊 本義初名易傳自此書出而注疏幾廢然在朱子却非甚愜意之筆嘗謂其門人度正曰學者宜觀啓蒙蓋易傳初年所作發明彖象文言之義後作啓蒙發明象數以極天地萬物之蘊雖大旨皆謂易因卜筮而作而二書所述精粗略有不同觀其答劉宰君房論易書曰卜筮法今已不傳諸儒言象數者例皆穿鑿言義理者又太汗漫此本義啓蒙所以作也然本義未

成書爲人竊出有誤觀覽啓蒙且欲學者就大傳所言卦畫著數推尋自今觀之如河圖洛書亦未免有剩語要之此書難讀不若詩書論孟之明白易曉然則朱子之意未嘗以本義爲至當不易之書而元明以來必專奉爲著蔡何也王肅本經二卷傳十卷各爲甲乙唐人作本義尙如此故朱子特用其本今刪去用王肅本四字注而改周易彖上傳第一爲原本周易彖上傳第三以接經文自此至雜卦第十二皆冠原本二字失其真矣恐世人罕見真本並識之王應麟漢藝文志攷證易經十二篇注上下經及十翼今易乾卦至用九卽古易之本文鄭康成始以彖象連經文王輔嗣又以文言附乾坤二卦至於文辭連屬不可附卦爻則仍其舊自是學者不見古本

南軒易說三卷

宋張栻撰栻字敬夫號南軒其易說本如干卷今止繫辭以下三卷又起天一地二章非完書也元贛州路學正權管學事胡夢父序云程伊川易傳止于卦

而不及繫辭學者惜之至正壬辰魯人東昌王分司廉訪章貢等路自言嘗得南軒解說易繫繕藏爲至寶倫合程傳並行斯爲完書乃出示知事吳將仕及路學宿儒命刊之學官宏父與其校正因序其概云南軒說易不及程之精而明暢過之朱子本義往往取其說焉

郭氏傳家易說十卷

聚珍本

宋郭雍撰雍事詳宋史忠恕子也是書述其父說參以己意淳熙初學者嘗哀集二程張載游酢楊時及郭氏父子凡七家爲大易粹言行于世原書佚此就永樂大典錄出家林汲太史惠余一部惜缺其末本

周易詳解十六卷

從大典鈔出

宋李杞撰杞字子才自號謙齋居士自序略云聖人之經所以示萬世有用之學故經以辨理史以記事有是理必有是事二者常相關也後世空言爲學岐經與史爲二尊經太過而六經書反若虛懸無薄故是書以史證經取文中子

易聖人之動也於是乎用以乘時之語名曰用易詳解時嘉泰癸亥也其證史如乾之初爲舜耕漁之時二爲岳荐升聞之時三爲歷試諸艱難之時四爲堯老舜攝之事五爲同心戴舜光被養生之事六爲堯舜禪讓之事用九則堯之兢兢舜之業業禹之不矜不伐湯之慄慄危懼文王之翼翼小心也雖不必屑屑求合而大致相近亦說經一法特其後多用老莊及諸子之語雖沿干寶虞翻之例終嫌未醖耳用王弼本而豫隨先妄大壯睽蹇中孚七卦全闕其解解晉缺四三五上四爻象蓋由大典脫落非原闕也

讀易詳說十卷 從大典鈔出

宋李昉撰光字泰發上虞人崇寧五年進士官至參政謚文簡宋史有傳紹興間以論和議忤秦檜謫嶺南自號學易老人其作是書往往因象抒忠依經立義於卦爻之詞皆卽君臣爲言證以史事不務元談而爲切實之學其闕卦略同詳解而彼多大壯此多大畜又晉復後四爻並闕文言及繫辭以下不著蓋

其文義已分見于六十四卦故不重出云是書宋史名易傳諸家書目或作讀易老人解說或作讀易說並十卷此依大典作詳說 每卦彖辭下載彖傳大象傳爻辭下載小象其說即取文言繫辭而發明之昔費直治易無章句但以彖象繫辭解說上下經今則或列正文或入詳說於體例爲乖其雜引莊老荀楊亦與詳解同

易例二卷

惠棟撰棟字定字元和人所錄皆漢晉人注條分件繫各自爲目而未有說蓋未成之書益都李文藻得其本於周校書永年釐爲二卷屬順德張錦芳刻之其言飛伏世應之法頗詳蓋漢晉儒者說象無不兼數者

周易卦爻經傳訓解二卷

鈔本 瑣川吳氏家藏

宋蔡淵撰淵字

建安人書成於開禧己丑止上下二經其訓解率取朱子

本義略爲節潤割繫句下如乾卦乾字爲一節注云乾健也陽之性也元亨利

貞爲一節注云元始也亨通也利宜也貞固也其下則接以象曰天行健云云象曰大哉乾元云云謂卦有象而後有彖大傳曰彖者言乎象者也故列釋象於釋彖之前初九潛龍勿用畫爲三節分注云初仕也九爻也潛龍爻位之象也勿用占辭也以象曰潛龍勿用陽在下也繫其後下五爻並然坤以下倣此較今俗本本義但少文言耳自序云文王彖辭周公爻辭皆曰經分上下二篇孔子釋之爲傳凡十篇經傳古皆別行費直王弼等雖破碎傳文音韻不屬然傳附於經讀者易曉未爲大失今既存二十篇之舊復依王氏所分而高下之使可參攷又不混雜庶有得焉蓋本義甫出在開禧時已有亂其例者無怪今俗本盛行童習而白首草之解也自序又言在天謂之易在人謂之性性與易非二理也案繫辭一陰一陽之謂道繼之者善成之者性生生之謂易易性二字未可混而爲一不若程子所言上天之載無聲無臭其體謂之易其理謂之道其用謂之神命之於人謂之性爲精也至以象先彖其說似近不知天行地



勢誠象也其下或言君子或言先王皆指用易者言亦可先於彖乎大傳所謂彖言象者謂若元亨利貞正言乾也牡馬之貞正言坤也可顛倒孔子之傳以強合之乎孔子之傳可先於周公爻辭乎且其解於本義外絕無發明不足讀也

周易像象述十卷原鈔五卷

明吳桂森撰桂森字叔美從錢啓新一本學易啓新東林耆宿有易像象三書曰管見曰像鈔曰續鈔而管見尤爲篤實叔美是書名爲傳述師說實自闢新義入載始成青出於藍其本用王弼而摘朱義爲夾注論說于上下經最詳分明融洽一洗依傍割裂之陋卽本義亦多所辨正惟詞氣太煩有似語錄故而存之則善本也叔美當天啓之末人皆以學爲諱而獨早絕名心鑽研易理所養可知首列像象金針總論言讀易之法萬數千言非深有得者不能道自序在天啓乙丑同郡張璋序在崇禎丙子錢一本字國瑞武進人萬歷進士

周易述十七卷

明潘士藻撰士藻字去華號玉笥山人折衷王鄭採掇羣言蓋王主理而莫詳於房審權鄭主象而莫備於李鼎祚去華哀輯之參以己意而成書萬歷丙午瑯琊焦竑序

陸氏易解一卷

漢陸績撰早佚明姚士粦從李氏集解陸氏釋文纂輯之僅數十條而已

古周易訂詁十六卷

明何楷撰楷字玄子閩漳浦人崇禎癸酉司關濟墅剔清利弊署燕思堂之左廂爲解經處以古本爲主取漢晉以來各本異同注其下援據精博自爲折衷自爲跋

周易尋門餘論二卷 鈔本

餘姚黃宗炎撰宗炎字晦木忠端之子太冲先生之弟邃於易學宗主王注程

傳深闢陳圖南及邵氏先後天圖以爲此皆黃冠之唾餘釋氏之牙後不當駕軼聖人之上卽濂溪紫陽皆不免擲掄是亦大公至當之論不能阿好者也其論易爲文字之祖於六經中最宜先講六書因就小篆之近古而可通者取之餘皆正以古篆所說字義亦精確此論本在象辭附錄之今摘鈔又有圖學辨惜未暇閱

了齋易說一卷鈔本 嘉禾曹潔躬家藏

宋陳瓘撰瓘字瑩中自號了翁南劍州人徽宗朝以直諫官終知郴州所說上下經每說一卦融貫諸卦之義時有精確處紹興十二年其子正同知常州軍事刊於毗陵鈔本顛倒訛闕不可讀

易筮通變三卷鈔本

宋雷思齊撰思齊自署臨川道士有易圖通變五卷歸圖繪校對故不見此三卷論卜筮九六大衍命著等無甚精義

周易要義十卷 鈔本 曹溶吳城等藏本

宋魏了翁撰了翁字華父蜀臨邛人慶元己未進士官至參知政事僉書樞密院事嘗著九經要義鶴山集中有周易折衷止天官亦不全餘書未之見也易義所錄止注疏之說參攷諸家音釋而孔氏所引緯書多汰去之庶幾言之醇者末卷全載王氏略例其首則穎達表進序也

易學濫觴一卷 原本未見差謬十之三

元黃澤字楚望四川資中人嘗作六經補注延祐五年東平王子翼刊之惟易春秋二注未成其說謂易欲明象春秋欲明書法較諸經尤難而易之明象者自漢諸儒至於虞翻往往流於繁瑣或涉支離誕漫學者厭之王輔嗣出而爲忘象之說其所云義苟應健何必乾乃爲馬爻苟合順何必坤乃爲牛朱子亦有取焉由是象學亡矣宋儒程主於理朱主於占於象亦未甚通楚望立志甚高自謂積四十年研索默有所悟又皆心得而未遽筆之書嘗作思故吟爻背

吟以見意追補注刻後深慮家貧年老不可終默著易學濫觴一卷其言引而不發欲讀者自沿流以溯本原云延祐七年自述如此前有臨川吳澄敘此與春秋指要並行指要未見而汪克寬纂疏引之直名補注也澤有學易吟十二章濫觴所錄四章今附于此萬事多於近處迷貪前說後更參差不從言外窺三聖虛說淮南有九師并困乾枯乾有水案乾爲金金能生水豐腴暗味觀生輝如何天地都顛倒却道賢人正得時不是浮花爛熳開有枝有幹有根莖一聲也自喉嚨出六脈元從臟腑來莫向壁間看舊畫也依火後撥寒灰要食一斛黃連後恐怕餘甘稍自回天機地軸誰曾見脈絡相關也要知隻眼不開千眼閉一波才動萬波隨便成傀儡終非活已出蠶蛾不是絲直要渾然方見易斷章取義且尋詩案易取象非若詩之比興自有不易之理卦情物理兩堪疑此處誰能析隱微鳴鶴胡然逢子和高鴻何事不雲飛干將有氣須衝斗龍馬雖神必受羈役使陰陽全是易躊躇未易泄天機

周易衍義十六卷 鈔本 舊無卷

元胡震撰震字 自署廬山深溪胡某述其子光大輯次敷衍本義而已

易變圖說一冊 鈔本 此書不入四庫

國朝全祖望撰祖望字紹衣號謝山浙江鄞人康熙壬子北闈舉人乾隆丙辰進士充庶常明年左遷外補著書甚富是冊集漢魏以來言卦變者各具其圖自序云卦變之說不始孔子泰否之彖詞曰大往小來小往大來文王言之矣損六三爻詞曰三人行則損一人一人行則得其友周公言之矣是以漢儒自京鄭荀虞以至陸續蜀才崔瓌之徒皆以卦變解經爲易中一大節目顧去聖已遠後世各以己意求合於經或以反對或以旁通或以乾坤爲主或以兩爻互移或兼宗六子或專主十辟案卦變皆以乾坤復姤臨遯泰否大壯觀夬剝十辟虞仲翔去夬剝非也或以一爻至六爻遞變爲次或以一陽至六陽相生爲推移各守師承均多謬戾讀之者遂欲盡廢之不知聖人以卜筮作易象數義理一時俱

到豈可專主義理而盡斥象數哉予觀漢晉諸儒注疏凡後儒論說無一非先得者今書雖失傳猶幸李氏集解存十一於千百近董守詒著卦變攷略毛奇齡著推易始末俱賴是書追尋墮緒予因據其說而列之爲圖使學者有所參見焉其圖首漢魏諸儒卦變圖黃宗羲所定虞仲翔卦變圖于令升卦變說又李挺之程伊川沈守約朱子方淙山朱風林來梁山黃梨洲毛西河諸圖末載諸儒非卦變說反覆九卦圖說武林沈麐堂先生手抄余從嵩門借觀世無傳本惜未及抄

尙書攷異六卷 抄本

明梅鷟撰此辨梅氏古文也自序謂伏生所傳尙書二十八篇并序一篇共二十九篇聖經本真止此至武帝時孔安國等專治古文尙書篇數滋多又分堯典慎徽以下爲舜典分皋陶謨帝曰來禹以下爲棄稷分盤庚爲三篇顧命王若曰以下爲康王之誥凡複出者五篇其所治古文十六篇多怪異之說經書

所引皆不在其內人不盡信故不顯于世此先漢孔安國之僞書也至東晉補造之書二十五篇改棄稷爲益稷以盤庚有三篇太甲說命泰誓仍爲三篇又合顧命王出以下爲康王之誥此東晉假孔安國之僞書也其舜典粵若稽古二十八字則又齊永明中吳姚方興所增自謂得之大航頭以獻亦入之梅賾書唐孔穎達作正義宋蔡沈集傳皆用此僞本然粃糠不得雜嘉穀魚目不可混明珠乃作攷異逐節逐句考其盜竊之由自謂恢復聖經不得已非好辨也廣案梅書之僞朱子啓其端吳草廬始暢其說然未窮其來歷未足以勝之今梅氏所考先孔安國序次舜典次大禹謨五子之歌胤征仲虺之誥湯誥伊訓太甲三篇咸有一德說命三篇太誓二篇武成旅獒微子之命蔡仲之命周官君陳畢命君牙冏命等皆別抉無遺而其辨禹謨精一之訓有苗之格及泰誓所關于人心治道尤大惜不能抄國朝閭百詩程綿莊惠定宇輩聞皆有辨駁余雖未及見料亦不能出其範圍也



尙書疑義六卷

寫本有闕書一曰東間草堂印章一曰萬古同心之學

明馬保衡撰自序略云自後世觀聖人之事必得聖人之心不徒以迹求之事者勢之所趨而至焉者也心者理之所極而安焉者也勢之所趨萬有不同理則一而不變田不變以達于無窮然後可得聖人之心觀聖人之事而聖人之道始克有於我矣尙書自漢孔氏作傳而穎達疏之于道概未有聞宋蔡仲默承師訓發明義理亦未悉得聖人之心而達聖人之道故於蔡傳所明者從之疑者輒錄於篇嘉靖壬寅十一月題余觀是書大段宗主蔡氏而旁參古注及諸儒之說亦頗明悉然此書可疑者多馬所言亦祇得十五六耳

洪範正論卷寫本此書當有刊本

德清胡渭撰取諸儒之說而折衷之以宋人擅改易洪範爲謬極是書傳會選六卷

明劉三吾等撰三吾仕洪武朝爲翰林學士序略云蔡九峯書傳成于朱子沒

後不無可議如堯典大與日月皆左旋洪範相協厥居爲天之陰隲下民有未當者乃請於朝徵求名儒集先儒之說參校蔡氏得失諸說或卽錄于蔡說之下或徑更以他說凡別出者六十有六條與修者國子祭酒胡季安左贊善門克新右贊善王俊華林致仕編修張美和國子致仕博士錢宰翰林修撰許觀張信編修馬京盧原質齊麟張顯宗景清戴德彝國子助教高耀王英定公靜教授高讓學正王子謙教諭張仕諤何原銘傅子裕周惟善俞友仁訓導趙信謝子方周寬洪初王廷賓萬鈞唐棐儒士熊釗蕭尙仁揭軌靳權張文翰王允升張師哲蕭子尙解震每節後經傳各有音釋攷據頗核凡祀字皆作禋字餘詳提要 蔡氏集傳五十八篇據唐孔穎達本也漢藝文志云尙書經二十九篇注云伏生所授者傳之者歐陽大小夏侯等但其中泰誓一篇出自漢武之世論衡云宣帝世河內女子發老屋得之以非伏生所傳伏原本但有堯典皋陶謨禹貢甘誓湯誓盤庚高宗彤日西伯勘黎微子牧誓洪範金縢大誥康誥

酒誥梓材呂誥洛誥多方多士立政無逸君奭顧命呂刑文侯之命費誓秦誓二十八篇而已此所謂今文也其古文舊藏孔壁皆科斗書人無識者孔安國以漢隸書校寫之謂之隸古定較伏本多二十五篇而秦誓與河內女子所獻不同又分堯典爲舜典分皋陶謨爲益稷分盤庚爲三分顧命爲康王之誥并序即百篇之序共五十九篇其同序者同卷若太甲盤庚說命泰誓皆三篇共序凡十二篇故總之爲四十六卷即孔安國所作傳而穎達所作正義者也其餘錯辭磨滅者汨作九共九篇稿飫帝嚳釐沃湯征汝鳩汝方夏社疑至臣扈典寶明居肆命沮后沃丁咸乂四篇伊涉原命仲丁河亶甲祖乙高宗之訓分器旅巢命歸禾嘉禾成王政將蒲姑賄肅慎之命亳姑凡四十二篇並亡方西漢時孔傳遭巫蠱不行後漢扶風杜林於西州得漆書古文尙書一卷以示東海衛宏濟南徐巡其後賈逵爲之作訓馬融作傳注史以爲古文遂行則建武時孔本尙存矣至所謂百兩篇者武帝時張霸按百篇序僞造之與中祕書不

合雖下霸於吏而不毀其書論衡及趙岐孟子注皆稱之孔穎達曰霸僞作舜  
典汨作九共九篇大禹謨益稷五子之歌胤征湯誥咸有一德典寶伊訓肆命  
原命武成旅獒罔命二十四篇除九共九篇共卷爲十六卷并伏生爲五十八  
篇四十六卷與孔氏所傳篇卷之數適合漢書所引泰誓云誣神者殃及三世  
又云立功立事惟以永年及武成之文疑皆出百兩篇也此漢書所謂古文也  
今所謂古文則又東晉梅賾字仲真所奏上其大禹謨五子之歌胤征仲虺之  
誥湯誥伊訓太甲三篇咸有一德說命三篇泰誓三篇武成旅獒微子之命蔡  
仲之命周官君陳畢命君牙罔命凡二十五篇文平易與今文之艱澀者絕殊  
論者以爲紀錄之實語難工而潤色之雅詞易好故訓誥誓命有難易之不同  
或言訓誥錄當時號令其間多有方言古語在當時人所共曉而於今反難知  
誓命則當日史官所撰隱括潤色粗有體製故在今不難曉要皆揣度迴護  
詞元明以來攻梅書之僞者不遺餘力矣然孔穎達已言諸序文頗與經不

而安國之序絕不類西京文字亦皆可疑鄱陽程伯圭曰西漢未有學左傳者劉歆始欲表章而諸儒詆罷之今安國序及傳皆引左傳明非巫蠱以前之書然則孔傳既僞其書安得真哉

尙書砭蔡編一卷

明袁仁撰仁字良貴號蓑波蘇州人與季本同時友善故解經亦往往與本相似是編糾蔡氏書傳之誤數十條如三百六句乃宋歷非古歷方命當從蜀志梅賾事不出晉書宣夜係漢鄒萌所傳并州不在冀東醫無閭卽遼東不得既有幽州又爲營州說築傳巖爲版築遜于荒野爲甘盤西伯勘黎爲武王四輔非三輔之義皆確有所據亦有意爲立異如鮮食非肉食怪石爲資服飾之類此則不可訓矣經義攷云未見曹溶學海類編作尙書蔡傳考誤前有沈道序詳提要王圻續文獻通考道統考云齊時儒士罕傳尙書之業徐遵明受業于屯留王聰聰傳授浮陽李周仁及渤海張文敬李鉉河間權會並鄭康成所注

非古文也下里諸生略不見孔氏注解武平末劉光伯劉士元始得費彪義疏乃留意焉又曰南北所爲章句好尙不同江左易則輔嗣書則安國河洛尙書周易則鄭康成

毛詩陸疏廣要四卷汲古閣本崇禎己卯刊

題唐陸璣撰明毛晉參璣字元恪吳郡人晉字子晉常熟人案陸疏見隋經籍志作毛詩草木蟲魚疏二卷注烏程令吳郡陸璣撰唐藝文志作陸機毛詩草木鳥獸蟲魚疏二卷二志機璣差異李濟翁資暇錄云陸璣字從玉非士衡也愚宗人大著作祝嘗有顯論不得見而子晉据陳氏書錄云中引郭璞爾雅注知非吳陸璣因改題曰唐然旣列在隋志而唐志亦序于謝沉劉瓛之前孔穎達詩正義陸德明釋文俱引其說則亦非唐人也元書逸闕崇禎間子晉得之於原文之後蒐列爾雅郭鄭諸家注及凡有裨經訓之書刪繁補略證以見聞命曰廣要析爲四卷陸疏不依本經章次草首秉蒨卽蘭也木首梓椅梧桐鳥

首鳳獸首麟而魚蟲附于獸後毛氏因之今改依經文章次草始荇菜木始甘棠且升木之惟筍及蒲于草据毛氏自序云因陸氏所編若干題目繕寫本文爲之廣要更有陸氏所未載如葛桃燕鵲之類循本經之章次而補遺焉是循本經者惟毛氏補遺爲然其原疏並未嘗爾今補遺無有而陸疏已非其舊故并識之

詩地理考六卷 汲古閣本

宋王應麟撰應麟字伯厚自號深寧居士浚儀人今鄞人凡詩中地名皆詳引地志及各家之說證之第六卷則專解詩序中地名篇首周南召南說者非一要以鄭譜周召俱采地名南爲江漢汝旁諸侯國爲正若集傳謂周國名南南方諸侯之國則是京師與南土並稱爲國反不如東遷之風猶得稱王矣夫文王之德顯于西土而其時東北近于紂都西北迫于戎狄故風化所被荆揚江漢之域尤多其繫之周召者文王作豐之後分岐邦周召之地爲二公采邑及

武王克商又分陝以東周公主之陝以西召公主之是當日宣布文王之化者實惟二公故武王陳詩觀俗授之太師以周公懿親而位冢宰取其自家而國自北而南之詩屬之周公曰此周公所陳之南也召公爲諸侯長取凡南國之詩屬之召公曰此召公所陳之南也豈謂周爲天子之國乎其稱爲南則更有說呂氏春秋曰禹巡省南土塗山氏之女候禹於塗山之陽乃作歌曰候人兮猗實始作爲南音周公召公取風焉以爲周南召南程氏亦言鼓鐘篇以雅以南季札觀樂有舞南篇者文王世子有胥鼓南則南之爲樂信矣南在周初已稱風首宜乎屈原宋玉等所作楚辭直追三百也

詩集傳名物鈔八卷

元許謙撰謙字益之號白雲金華東陽人金仁山弟子也元史有傳是書主集傳參序傳及諸家之說有名物略加詮釋而每詩俱有論列其引仁山說必稱子金子二南末載二南相配圖退何彼穠矣甘棠于王風以野有死麕爲淫詩



而削之此則王魯齋柏所定也魯齋受業黃勉齋而仁山之師故白雲取之夫朱子廢序言詩鄭風既概斥爲淫詩魯齋乃并二南淫之宋元人進退六經主張太過自矜師授遂謂往古可非實未敢以爲然也前有吳師道序

毛詩寫官記四卷

毛奇齡撰奇齡初名甦字初晴此全集之一種設問答以辨正朱注其問有曰敢取是答有曰謹荷

梁溪詩經補注二卷 未全不入四庫

戴震撰震字東原休寧人內閣中書舍人充文淵閣檢閱四庫全書纂要分校官此書採他書補毛鄭之闕孔廣林校刊未完又有復天文略二冊亦孔氏所刻續通志稿也從沈嵩門借觀

毛詩古音考四卷

明陳第撰第字季玉三山人成於萬曆丙午

禮經本義十七卷

國朝蔡德晉撰德晉號敬齋無錫人究心三禮以薦舉纂修官國子助教儀禮名禮經者蓋本朱子儀禮經也禮記傳也之語本義以五禮爲綱各分節次條諸說其下案儀禮於三禮中最爲近古鄭氏注本首士冠禮士昏禮士相見禮其後又有士喪禮必言士者禮不下庶人而鄉飲聘射覲燕皆非有爵者不能行惟冠昏喪相見則士所必當講習者也冠禮之爲士禮記冠儀無大夫冠禮及天子之元子士也數語乃鐵板注脚是天子諸侯大夫皆自士始也士昏禮首曰下達納采用雁言自天子下達庶人皆如此也蓋冠昏喪相見皆天子之達禮而上可兼下下不可兼上詳其下之儀進而大夫而諸侯而天子不過遞加盛焉耳此作經本旨也蔡氏以嘉賓吉凶爲序而軍禮闕焉冠昏旣吉禮之首此下接鄉飲鄉射燕大射公食大夫而以士相見第八爲嘉禮之冠雖曰以類相從違古意矣記傳分繫諸禮之下又依朱氏採禮記各條補其闕其末卷

逸經更取諸書補之皆未脫宋元習氣惟喪禮注最詳且以繼父同居不同居等爲後儒增入僅附錄之辨論甚力然古人夫死妻嫁視爲常事必以後世之例繩之亦迂

鄭注古文論語二卷

漢鄭康成注早佚此後人所集凡百數十條題宋浚儀王應麟輯或者疑之雖搜羅尙有未盡而漢詁得見一斑亦爲勝事大抵古注辭質而理長如第一條慍怒也怒有藏于心者有徵于色者或微或甚所該甚多故何晏集解無以易其說今日含怒意辭則巧矣却只見得一邊若子文無慍色子路慍見便說不去而又別無以解之此訓詁之學所以益晦也

論語筆解十卷

宋劉入昌黎集  
今分上下二卷

唐韓文公撰中稱李曰者趙郡李翱習之也祕書郎許勃序云始愈筆大義則示翱翱從而交相辨明非韓所獨制書凡百許條多駁古注別出新意如因不

失其親孔訓因爲親失其義此言凡學必因上禮義二說不失親師之道則可尊矣溫故知新舊說尋繹非也故者古之道新謂己之新意夫子矢之言仲尼見衛君任南子用事乃陳衛之政理告子路云予道否不得行汝不須不悅也天將厭此亂世而終豈泰吾道乎有馬者句上言己所不知必闕之不可借他人之言以筆削譬如有馬不能自乘而借他人乘之其改易字面如六十而耳順耳當作爾猶言如此也既知天命又如此順天曾謂泰山謂當作爲冉有爲泰山非禮不如林放問禮宰予晝寢作晝寢人之生也直作德貨殖作資權吾以女爲死矣死當作先浴乎沂浴當作沿磴磴乎小人哉人當作之鄉原作鄉柔猶之與人也之當作上又君子不器合子貢問君子爲一章宗族稱孝二句在前行已有恥四句在問其次下子貢方人連君子道者爲一章禮云禮云連上爲訓伯禽之言皆絕異聞至若解吉月爲行吉禮之日月不必月朔卽戎爲諸侯朝會于王各脩戎事之職東周謂平王東遷志在復修周公典禮亦俱有

理微子篇云先言微子以其先去之也後言比干以其諫之晚矣中言箕子則仁兼先後得聖人中焉又云箕子明夷與文王同乎易象尙書洪範見武王申其師禮箕子非止商之仁蓋萬世之仁乎季氏篇云餘篇但云子曰此皆書孔子曰足見春秋之作深惡三桓弟子避季氏彊盛特顯孔子之名以制三桓二說甚精然季氏篇舊以爲齊論之文故稱謂偶不同亦非無見也 唐以詩賦取士學者尙詞華而昧經訓自孔穎達顏師古諸儒而外說經者寥寥昌黎自以上繼孟子其所作原性原道等篇已未能醖乎醖至說論語多所穿鑿宋儒改經實祖此矣

論語集說十卷

宋蔡節編字

永嘉人官樞密副都承旨淳祐五年表進至淳祐丙午文學

掾姜文龍請刊於湖泮其書除引注疏外俱採南軒晦庵諸家之說而大要不離集注其異者如解在齊聞韶云韶本揖遜之樂今田氏已成代齊之形子聞

而憂戚之至至忘肉味言是樂乃至於齊之國也崇德章誠不以富二句云引以明人之愛惡如是不爲有益祇自取異而已以冉有退朝爲從季氏自魯君之朝而退以有馬者借人乘之句爲卽史之闕文以齊景公有馬千駟節合上見善如不及爲一章見善矣若未及見之見不善而嘗試之齊景公之謂也求志達道則夷齊之謂今無其人也案退朝本釋文周氏注史文乃蘄山黃氏說旣皆未盡而蔡所別解更復支離未見其佳也宋史藝文志及諸藏書家目俱不見錄康熙丙辰納蘭成容若德得宋本重刻之

論語集解義疏十卷 知不足齋本

梁皇侃撰取何晏集解爲之疏證所引晉衛瓘繆播等十三家梁書爲之論語義與禮記義並見重於世宋邢昺作正義實用其本間有刪汰不曰皇氏背違注意卽曰舊疏不經宋儒是今非古之見大率如此於是邢疏盛行而皇義亡矣是書來自番舶不必盡依原書觀魯論本文與中原多所同異則可知矣然

如困學紀聞所載夷齊名字正楊所稱公冶長通鳥語之類均可藉以考見是可寶也注中包字皆作苞案張參五經文字云包裹也經典或借苞字爲之苞音皮表反明丁覲翻刻宋本六家文選注於司馬相如上林賦刑錯而不用下李善引苞咸論語注曰錯置也包字從草頭止此一見然亦可知非日本杜撰矣侃性最孝每日限誦孝經二十遍以擬觀世音經夫誦孝經可也以聖人之籍比西方之書得毋儒者之蔽乎是書引書多詭異殆亦坐此 本文異同日本山井鼎作七經孟子考文謂得古本如此因引文獻通考云石經論語舉一隅下有而示之三字三人行必有我師焉上又有我字之類此本與石經同亦足證古本可校也廣案黃伯思東觀餘論載漢石經與今文多不同中如孝于惟孝譬諸宮牆二處亦與此本適合又陸德明經典釋文載別本其爲人也孝弟本或作悌道千乘之國本或作導愚不知人也俗本作愚其不知人也之類此本往往與同則彼自以爲古博所傳洵非虛語

孟子注十四卷附孫奭音義二卷

漢趙岐撰岐字邠卿事詳後漢書其注之經後人竄改者俱載孟子四考余自甲午校注馬總意林得章句指事之說檢汲古注疏深嘆趙注之善後於郡庠讀元張慶孫重整西湖書院書日記稱有孟子古注孟子注疏因疑古注必有異于今之注疏者訪購積年始於鮑綠飲<sup>博</sup>處得抄宋注本善而錄之俄吳兔牀齋寄示曲阜孔氏新刊本參以日本七經孟子考文補遺然後趙注真面目得稍見焉古注考中已詳言之甲辰春遊京師家太史林汲先生復以此本見遺則安邱韓岱雲所新刻也與孔氏里居不遠刻之年亦相先後却兩不相謀而其本余乃皆得見之豈非厚幸也與

春秋地名一冊

晉杜預撰此釋例中一種也曲阜孔氏重刊

春秋胡氏傳附錄纂疏三十卷

元板缺二十九卷其  
三十八卷係抄補



元汪克寬撰克寬字德輔新安人以春秋舉于浙先是宋建安胡文定公康侯  
名安私淑程子紹興初以春秋進講奉勅作傳三十卷元世設科三傳之外獨  
 取此書克寬既以是經舉鄉書乃發其類例考其援引所自出而凡三傳注疏  
 之要語諸儒傳說之精言悉附焉而斷以己意始于元統甲戌脫稿于重紀至  
 元丁丑其叔氏澤民字叔志序之虞道園集又爲之序其自序在至正六年丙  
 戌越二年戊子刊成門人吳國英序所探書目自董子繁露以下至洪氏春秋  
 本旨凡數十家內唐趙匡春秋纂例陳岳春秋折衷論李瑾指掌義何濟川本  
 旨齊氏本旨劉炫規過盧仝摘微宋王氏箋義胡瑗論宋氏新義許翰解朱長  
 文通志黎錞經解劉本中論任公輔明辨程迥解字可久沙隨人王葆字彥光集傳薛季宣  
士龍永經解項安世平菴江陵人家說吳仲迂字可翁號可紀聞又經傳發明趙良  
嘉人鈞釋義萬孝恭番陽人百問胡寧字和仲號莘通旨黃澤字楚望補注洪興祖  
字慶善本旨皆不傳于世林堯叟字唐翁句解近與杜注合刻無復單行文定又  
 丹陽人

有春秋通例今亦不傳趙氏纂例金仁山謂宣州有版本朱子或問論語集注多採之而永樂大典已不復錄其書可惜也 胡傳本一家之言瑕瑜不掩自用以掇科第而尊奉之者遂欲束三傳於高閣甚且助之攻排三傳而左氏尤被其毒明儒陸粲作辨疑始知胡氏之失然德輔作疏亦能不甚阿附蓋其最不經者開章便說以夏時冠周月謂周改正不改月魯史本書十一月孔子改作春正月此宋人改經結習遂妄意孔子亦如此耳夫孔子自言吾學周禮今用之吾從周雖夏商之禮尙不敢行于本朝豈有筆削魯史而擅改周曆又以私曆而冠王字者乎余讀汪氏疏深有取焉其言曰魯史名以春秋則似元書曰春正月是周曆已改子丑月爲春也禮記稱季夏六月以禘禮祀周公父引孟獻子言七月日至可有事于祖而曰七月之禘獻子爲之也則是以建巳之月爲季夏矣前漢律曆志武王伐紂之歲周正月辛卯朔合辰在斗前一度戊午度孟津明日己未冬至是歲大寒中在周二月己丑晦外傳伶州鳩言武王

伏殷之日歲在鶉火月在天駟日在析木之津辰在斗柄星在天龍以唐曆邇而上之日月星宿無一不合則泰誓之春卽武成之一月明矣後漢陳寵傳周以子月爲春商以丑月爲春蓋因周曆以建子爲春而遂言商亦改時也朱子常云周禮有正月有正歲則周實是元改作春正月夫子行夏之時只是爲他不順欲改從建寅又曰劉質夫以春字爲夫子所加但魯史本謂之春秋則似元有此字今考春秋文九年書春毛伯來求金二月叔孫如京師三月夫人至僖十八書夏師濟齊五月戰鹹宣九年秋取根羊八月滕子卒九月會扈成十七年冬公會伐鄭十一月公至十二月日食而又書冬大雨雪春無冰以紀異則經所書之春夏秋冬皆周正四時之首月文定引商秦爲證謂周不改月然新莽以十二月朔爲歲始不改月魏明帝以丑月爲正改三月爲四月唐武后改十一月爲正月十二月爲臘月夏正月爲一月肅宗以子月爲歲首又以十二辰紀月則曆代時月或改或不改豈可引彼以喻此乎孔氏正義以爲月改

春自移春非王所改似亦臆度之詞近有主建寅而未改月者考春秋所書災異及日食交限則不合又有謂周雖改月數而不改夏時春秋四時之序皆魯歷所更然夫子之時猶存告朔之餼羊則魯實承周之正朔未嘗改歷後世稱魯歷又謂之春秋歷特因春秋而逆推之耳或又謂周以子月爲歲首而春秋以寅月爲正月每年截子丑月事移在前一年如此則真事與月差兩月矣先儒以此爲千百年不決之論姑記以俟來哲此段辨論甚詳核文定當亦爲之俯首但打頭先如此截斷餘可知矣且如天王使宰嚭來歸惠公仲子之賵左傳釋書名之例但言緩及豫凶事而已穀梁倡爲賵妾之說夫仲子旣以爲魯夫人之讖歸我隱公更爲立其子桓公而奉之其時元妃早卒穀梁安知惠公之非再娶而必爲妾也春秋妾母書夫人小君薨葬者成風敬嬴定嬀齊姜皆是也何獨嚴于仲子宋儒又甚之謂宰爲冢宰以天子而使六卿之長贈人之妾爲非禮之極賁宰卽以賁王不知天子冢宰從無出使之理公言爲妾天子

何尙致贈此顯而易見者而故文致其詞又宣十六年冬大有年此紀瑞也胡傳則據程氏以爲記異宣公弑立逆理亂倫螽蟥饑饉之變史不絕書宜也獨是冬大有年特爲記異此仲尼言外微意無論專記凶荒不幸人之豐熟如日抄所譏且由其說一似孔子作春秋心目中竟無復有周先王魯先公而概任我意爲貶斥有是理乎有是事乎春秋教人忠孝之書宋儒以爲刑書見禮便錯而先躬蹈悖逆何以儆世垂後又如隱二年書滕子杜氏以爲時王所黜極允胡氏則云孔子手削是則一匹夫耳既改正朔又黜陟五等諸侯將孟子所謂天子之事者竟與問鼎出君同科乎說經至此去聖意益遠矣 纂疏人名地名俱引杜氏張洽等注而地名以元時所在實之音釋多本釋文間有更易均可資考證也 余既書此以正胡氏之失復讀陳晦伯經典稽疑內載問辨錄春秋正旨一則其論尤暢并錄之春秋天子之事卽所謂王者之迹也蓋西周盛時禮樂征伐自天子出列國諸侯各守侯度以奉天子之明威東遷之後王室衰微已

甚天下不復尊周列國各自爲政僭亂百出不知有天子之政此亂臣賊子所以交作而無忌也孔子爲是懼以爲周德雖衰天命固未改也文武之典制雖不共守然有可考知也天子之號令雖不行于天下然天子固在也於是作春秋託文武之憲章而記之魯史筆削褒貶一以爲準以明天子之法以尊周室以見天命之未改是爲天子之事蓋謂此天子之政令固在有可取而行也非謂假天子之權也知我者謂志在尊周罪我者謂亂賊之作由天子之無法天子之法明則亂賊罪狀顯著如有舉行憲典者彼將焉逃是天子之法由我作春秋而明豈不罪我乎若曰無位而託南面之權則是平王以前政教號令天子自行之平王以後政教號令孔子另行之也而文武安在哉而時王安在哉夫尊王也而與竊柄同則竊柄者何誅明法也而與干紀同則干紀者何責乎其亦誤矣經典稽疑條駁亦極辨 續明道續志曰前輩說經重變先儒舊說非如近時學者斷以胸臆不復參考蘇侍郎說李迪與賈邊過省時同落第以

當仁不讓於師爲論題賈解師爲衆與傳注異李落韻有司奏稟詔落賈而取李重變舊說也蓋北宋尙重古注如此胡氏傳春秋盡變古說元用以設科江西高州有馮翼翁者字子羽治春秋所說不盡宗胡氏延祐庚申考官斥之令歐陽圭齋得所賦科斗文字大賞擢之及試禮部仍以不專主胡傳癸亥再貢亦然特以陽燧賦工甚及第嗟乎胡傳何如古注又何如三傳而自有此書以來學者墨守不敢異議使子羽不遇歐公及不甚工詞賦欲求成進士也得乎春秋億六卷

明徐學謨撰學謨字叔明吳人生萬歷間有海隅集若干卷此外編之一種也春秋自三傳後說者言人人殊大都咀嚼文字傳會義例以求合聖人筆削之意叔明則以爲繼弒一也或書卽位或不書卽位紀元一也或言王正月或不言王正月單言春王而不言正月伐國一也或名或不名或爵或不爵專將帥師一也或去其公子或不去公子弒君一也或明其爲弒或不明其爲弒皆出

于魯史之本文或闕或備或略或詳聖人未嘗意爲增減也蓋聖人之意要以存人道正王德善善惡惡是是非非刪繁舉要據事直書而已故繫王於天則文武之威靈猶在託筆於史則周公之衰鉞具存卽有所褒諱貶損皆天子之事史官之職也已無與焉故曰其事則齊桓晉文其文則史其義則某竊取之說春秋者孟氏盡之矣于是徵三氏之文併范楊何孔諸家疏解與胡傳哀輯之而凡所謂正例變例者一皆略之名春秋億如其言誠可謂卓然有見矣然春秋旣爲魯史國君言動何一不書加以鄰國聘會告赴例如後世起居注實錄其文必不止如今所存者則筆削之說信矣孔子所削左傳間取而補之凡傳有經無者乃左氏得自舊史之文不必他有所採也公穀後出故經之外不能更添一事此左傳所以與春秋相輔而行缺一不可者也今人動詆左氏正以便其鑿空之論耳何足以說經乎徐氏書成于萬曆丁丑雖敷衍經傳無甚精論以視宋儒之臆斷則遠矣有自序



春秋孔義十二卷

明高攀龍撰攀龍字存之號景逸無錫人諡忠憲以六經惟易春秋爲魯太史所藏而孔子手定者諸儒意揣多失本旨而春秋尤甚因作易孔義春秋孔義二書同郡秦珮先後梓之春秋信經而略傳雖左氏亦被彈駁其論書法亦皆前人所有惟文意簡覈無甚迂拙穿鑿之弊是其所長崇禎庚辰刊其姪世泰序

春秋書法鉤玄四卷

明石光霽撰光霽字仲濂淮南人官國子博士以其師張翠屏所輯五禮類要文詞浩汗乃撷其要大書以爲綱采精義細書爲目名書法鉤玄以便初學類要本擬陸淳纂例所取多啖趙之說仲濂以纂例但詳于經而於傳意猶略纂疏會通諸書備于傳而于比事屬詞之意或未盡因爲益所未備朱書其綱墨書其目仍分吉賓軍嘉凶五禮其無可歸者首曰雜書法末曰書法拾遺所採

之語三傳及胡氏張氏爲主閒及啖趙諸儒洪武二十五刊于寶監有自序校正則助教黃莊蓋明初制義取士熟此以入場屋充然矣

春秋通論四卷

國朝方苞撰苞字靈皋號望溪桐城人仕內閣學士大意謂春秋爲魯舊史孔子竊取其義經筆削者數處餘盡原文後儒妄加揣測失之甚遠因比事屬詞條分縷析成通論九十九章其類四十有高安朱可亭賦混同顧用方琮等序雍正九年成乾隆九年刊

半農先生春秋說十五卷

國朝惠士奇撰士奇字大牧吳人康熙己丑進士官翰林侍讀休歸自號半農居士著述甚富其諸經說多成於晚年春秋類舉其事以經爲綱分繫三傳以己意斷之各有精義彈駁舊說皆有證據非若宋元諸儒徒以口舌取勝也

春秋長曆十卷抄本

國朝陳厚耀撰厚耀字泗源海陵人康熙丙戌進士官蘇州教授以通算改授檢討終右諭德以杜元凱嘗作春秋長曆而世久失傳唐書大衍曆亦不載春秋曆唯元未趙子常訪春秋屬詞所論日月差謬詳載杜曆及唐大衍曆日月異同與合朔日食經傳不同處意爲補述首錄漢書以下律曆志爲集證次古曆法論章部紀元及推冬至置閏法次歷編起隱訖哀以章紀之每十九年爲一章終春秋凡四章次序十二公之年經傳有書日者悉附注之而以杜歷大衍歷古歷證其合否又作退二月法起隱元訖僖五以僖五正月朔旦冬至也曆編隱正月小辛巳朔三月小庚辰朔退兩月譜正月庚辰朔以後俱退二月辛卯朔者杜歷也庚辰朔者陳氏歷也其意蓋以杜歷多謬故雖襲其名而駁杜甚力如云僖五爲部首則僖四爲部末餘分俱盡宜爲閏月杜歷無閏不知其歷元始於何年而又云日南至爲朔旦冬至歷數之所始豈以朔旦爲日出之時不始于夜半子初耶殊不可考又謂是年正月應小以歷家最忌章首正

月小故借上年月晦辛亥日爲此正月辛亥朔支離已甚又謂周以建子月爲正月始東遷後非文武之制周初用十一月爲歲首而不改月亦不改時仍稱冬十一月但以爲歲首此襲蔡九峯之說而最不經者至其著書緣起全倚趙子常春秋屬詞而輒目趙爲宋人余於推算甚疏不能詳其得失據事以推恐未必能使元凱首肯也原杪無卷後亦未全四庫分十卷云

春秋讞義九卷 抄本揚州馬裕家藏

元王元杰撰元杰字子英吳江人至正間飲鄉薦以兵興不出教授鄉里以終初程朱於易書詩禮具有訓釋獨春秋未有成書元杰因獵取易傳義詩傳訓辭禮記制度四書集注紫陽語錄凡其言有發明春秋之義者悉爲採列而證以胡氏傳其斷以己意者名之曰讞蓋取葉少蘊之說所謂春秋天子之刑書也至正十年庚寅禮部尙書吳郡干文傳壽道序稱其竭慮窮思幾二十載始成今觀其書于程說間有異同而朱說則極其尊奉讞詞不過敷衍胡傳或取

伊川易傳足之殊少精核原十二卷今自昭公以下早佚而無雕本無由考補矣春秋至宋世可謂厄會其始王安石目爲斷爛朝報其非聖無法固不待言其後說者紛起又多穿鑿附會盡失聖人本旨夫春秋本魯史也魯史官雖無聞以晉之董狐齊之太史南史楚之左史推之其書法必不在齊晉下說韓宣子來聘見魯春秋明言周禮盡在魯矣但史之爲職君舉必書二百四十二年紀載甚繁而其書藏之太史非盡人所得見孔子道旣不行懼王法之終淪也于是取春秋之史錄其事之有關世教者別爲一書以授弟子餘皆棄而不錄所謂筆則筆削則削竊取其義者祇是如此其自隱元年春王正月至西狩獲麟一皆原文何嘗增損一字乎後人妄以私意窺測聖人卽春王正月四字已糾纏不了胡傳夏時冠月周正紀事尤極荒謬者前已詳論之矣桓元二年正月十年十八年正月書王餘不書王宣五年至八年不書王九年書王凡此或書或否誠難強解然要之史文也程氏於桓元年云桓弑君而立不天無王

之極也而書春王正月以天道王法正其罪也至二年無可說則云桓無王書王正宋督之罪也十年之王胡氏曰桓至是十年其數已盈宜見誅於天人矣王元杰因之獻曰桓惡極而天討不加王道幾絕故經不書王至十年而書王者存天道王法也十八年復書王者以天道王法正桓公之罪也宣九年時書王正月存王道以正魯君之罪也如其言必魯史每年書王而孔子忽存忽削也王之存削匹夫以意爲之桓爲先君而削王以正其罪書王又正其罪是無周天子無魯先君者實孔子先自蹈之矣有是理有是事乎又如閔二年秋八月辛巳公薨成十五年三月公如京師夏五月公自京師遂會晉侯齊侯宋公衛侯鄭伯曹伯邾人滕人伐秦胡氏皆以爲仲尼親筆夫公薨不地隱公有成例矣不必始閔遂事亦據實而書安見其親筆哉據僖二十八年天王狩于河陽左傳曰晉侯召王以諸侯見仲尼曰以臣召君不可以訓故書曰天王狩于河陽此則仲尼釋史之書法如此亦非親筆卽云親筆亦以尊王而非削王及

正先君之罪也孔子曰吾猶及史之闕文也又曰多聞闕疑多見闕殆書王不書王仍史之舊耳其曰知我罪我則以國史非盡人所見而孔子所修人人得而見之故也豈真託二百四十二年南面之權如宋儒所云哉

春秋左傳翼疏三十二卷

新安程晉芳撰此程魚門先生遺稿也其說經之書有周易知旨編尚書今文釋義尚書古文解略毛鄭異同考禮集釋與翼疏共六種各若干卷先彙梓其自序六篇曰勉行堂集翼疏之作以元凱所注於典物多所未備孔穎達不習于地學詮釋多遺因哀集賈服舊注及宋以來數十家爲之輔翼雖自謂非敢規杜實亦征南之功臣也 先生篤志經籍投老孜孜家本足書及校理四庫遇有祕冊善本靡不鈔錄故所見益多所學益邃爲人方頤脩髯有溫厚君子之風余初聞先生名而未識癸卯冬將入都丁君小正從杭州寄余書五函囑分送其一與魚門及林汲兩先生迨攜至京己甲辰春仲逼試期因轉求邱芷

房師致之先生得書卽枉駕見過隨走脩謁藹容款接甚驩自是數往一日先生痔發端坐一室不能行旣入見案頭陳一冊卽春秋左傳翼疏稿也取讀數葉考据之精疏證之確皆前人所未及先生言河南某願以付梓方寫樣與之因出示彙刻諸序文真所謂學業醖儒富也會余遷寓內城蹤稍疏而先生已在假欲南歸關中畢大中丞聘脩通志於六月入秦病軀觸暑竟病歿于西安官舍年六十有三遺孤藐爾大中丞爲經紀其喪嗣子護櫬旋里翼疏之刻竣與否未可知諸遺藁未知能藏棄否也先生賦自我來京國一百二十韻敘生平略備餘富詳傳中不復記小正更有與孫敬軒先生希書余亦猥承倒屣嘗見其手錄所著禮記疏證甚詳悉云錄竟見示是秋病瘡醫書醫療卒以不起年纔四十九耳先是有愛女許字其妻兄林明府露之子未婚而歿女義不他適隨亦病亡先生爲余言之容甚慘戚欲爲啓徵詩不果嗟乎兩先生窮經著書其人固均足不朽然或屬稿而未成或成而未傳天亦何惜數年之假而遽



奪之也矧譴陋如余幸不見棄于儒者庶幾有所考問以抒其一得而半載之間人琴兩歎旅館蕭岑繙閱遺編不禁淒然淚下但魚門先生易詩等書俱未得見敢概登其目姑就所見本錄之而并識其略于此

周禮復古編一冊

宋俞廷椿撰廷椿字壽翁撫州臨川人謂冬官原未始亡特秦火之餘雜出五官中耳後人補以考工不知百工之事無與司空也尙書司空掌邦土居四民時地利太宰之職六曰事典以畜邦國以任百官以主萬民小宰六職六曰事職以富邦國以養萬民以生百物禮經王制曰司空執度地居民山川阻澤時四時量地遠近興事任力以至使居民財之類尤粲然可据後人徒以司徒爲地官遂以土地之事雜之故司空之職皆汨乎其中况周官三百六十未聞其有溢員小宰官府六屬皆曰六十今五官之羨者四十有二而其六十員中又未必盡其官屬因取其羨與不宜屬者悉還司空如天官之獸人鼈人鼈

人獸醫等十一員地官之封人載師閭師等二十三員春官之典瑞典同巾車等六員夏官之弁師司弓矢等九員凡四十九員又謂大司空小司空雜出于他官如大司徒之職掌建邦之土地之圖云云大司馬之職九畿之職云云其改隸各自有說自以爲犁然當心不啻寶玉大弓之得而鄆讎龜陰之歸也有自序

### 孝經刊誤一卷

宋朱子定于淳熙丙午其分經傳如大學之例又刪去經所引大雅甫刑之文傳則并本文刪之自謂衡山胡侍郎玉山汪端明皆疑此書出後人傳會可免鑿空妄言之罪廣案經有刪改實始宋儒至元吳草廬且刪且補古經得完者鮮矣蕭山毛奇齡極不以爲然余讀其與門人問答諸篇未嘗不拊掌也此通志堂經解有一種題晦菴先生所定古文孝經句解後學朱申周翰注全用古文而以朱子刪定之說附其說蓋卽刊誤之有注者注亦淺 廖氏經傳例稱

孝經純用古體寫今此本從朱子集雜著中取出止用今文魏了翁謂刊誤原本文公之子在以授了翁始刊之李肩吾周蓋因是古體寫之

古文孝經指解一卷

宋司馬光撰用古文二十二章而其解仍載明皇今文之注于前自序云今文舊注未盡者引伸之不合者易去之又有范祖禹說自序以古爲据而申以訓說焉 古文久失傳隋王劭得孔傳於河間劉炫世或疑炫所自作崇文總目云今孔注不存而隸古文與章數存焉陳振孫亦云古文有經無傳以隸寫之則并劉炫僞注亦云矣近日日本國有古文孔傳自言劉炫直解中有邢昺正義疑後人所錄此豈可据信者哉彼又言明崇禎己卯江邦玉作孝經大全集衆本同異諸家注解采摭不遺餘力獨不及孔安國傳何大全一書中原絕少而彼國獨存也

李氏學樂錄二卷 列入毛氏西河全集中

國朝李塨撰塨字恕谷蠡縣人學樂于河右先生前一卷其所鑒定也樂錄有寧府五聲圖訣其圖已亡第記其訣因擬爲圖附時下四字調譜其七調圖後亦附時下七調譜河右盛稱其闡發千年之祕覺萬古元音尙在人間也五聲訣曰要識宮曲一清三濁卑不踰尺高不越腹商之所記兩濁兩清下從火立上用金成何以爲角三清一濁物作下止民乃上觸徵聲最激全有四清宮懸甫接徵招可聽其訣傳自唐人五調箋字譜云後一卷因古稱六律後言七調不同復作六律正五音二圖蓋六律有陰陽之分而陰皆統于陽故十二律只曰六律而五音叅以二變則清濁之音皆正矣

律呂新書二卷

宋蔡元定撰元定字季通學者稱西山先生建州建陽人師事朱子年四十不就科舉太常少卿尤袤祕書少監楊萬里以律曆論薦于朝召之以疾辭慶元中坐黨禁流道州卒後贈迪功郎是書二卷一爲律呂本原凡十三篇一爲律

呂經辨凡十篇朱子序深美之謂近世諸儒莫及也所著又有大衍詳說燕樂原辨皇極經世太元潛虛指要洪範解八陣圖說陰符經解運氣節略脈書行世詳杜範所作傳

經典稽疑二卷

明陳耀文撰耀文字晦伯汝南人取四書五經之疑義依據前賢善說條列件繫大醒人目於紫陽每多牴牾中多訛字無本可覆余訂正十之七八焉

四書釋地三冊 其二冊皆續

國朝閻若璩撰若璩字百詩號潛邱太原人原止五十餘條續者八十餘條又續百六十二條三續百二十二條凡四書涉於地理者前二篇最詳二續下兼及人名大都先得我心中載湛園未定稿孔子作春秋書字者僅十二人弟子無以字稱者稱閔子騫是直述時人之辭當時父母昆弟皆謂之者而時人亦同稱之曰孝哉閔子騫此所謂不間於父母昆弟之言也中庸華嶽二山名對

下二水周禮豫州山鎮曰華雍州山鎮曰嶽爾雅釋山河南曰華河西曰嶽嶽山在禹貢名岍在國語名西吳管子書作西虞在前漢志名吳山後漢志名吳嶽山實一山也二說余向主之而未及此之暢特錄之案華嶽作一山者如裴駟史記集解序云譬疇星之繼朝陽飛塵之集華嶽此書先從沈嵩門借觀旣而婺源方君體攜贈遂得有之

#### 四書逸箋六卷

應城程大中撰語孟各二卷學庸一卷所稱似稍僻要皆先儒所吐棄者如引韓非說儲謂伯夷以將軍葬於首陽山之下及夷齊採薇而食擇葛而衣引晏子春秋景公好馬故多至千駟之類每卷後有附錄附記數條第六卷人物遺事可資多識至記夢之類則全遊戲矣

#### 十三經注 永懷堂本不入四庫

明金蟠葛籛同校蟠字千仞改姓沈名雲翔籛字靖調並東吳人刻於崇禎庚

辰前有岷山朱天麟序金葛姓名分署諸經蓋各就所校之經書之金有序稱  
借葛子爲之似金爲主而世但稱葛板十三經則永懷固葛氏之堂歟當時盛  
行稱爲善本自汲古注疏出葛板驟衰然實互有得失其最可怪者孝經注明  
用唐元宗而題曰漢鄭氏注凡例并言十三經章句一遵漢魏本來而自以孝  
經不附實康成止書鄭氏爲闕疑將以欺世耶抑實不知有石臺注而誤認爲  
鄭耶說另詳孝經跋中鄭注久佚吾鄉陳君鱣集之成一卷明崔銳洹詞有跋  
孝經古注云唐皇訓已簡明但未見聖人之一爾不明言何人所注殆以明皇  
注爲古注耶

北海經學七錄一冊不入四庫

曲阜孔廣林所錄鄭志也鄭志久佚孔氏取五經中所引集爲一冊然四庫書  
目尙有三卷未知原本歟抑亦後人所輯歟

七經孟子考文補遺三十二冊二百卷

易三冊書三冊詩六冊春秋左傳六冊  
禮記十冊論語孝經共二冊孟子二冊

日本山井鼎物觀等撰山井複姓亦單稱山鼎字君彝西條掌書記觀字叔達東都講官先是彼國有足利學者舊藏宋板五經正義一通又古博士傳寫本五經論語孝經孟子鼎與州人根遜志往探得之三年罄其藏歸西條侯令錄上其所校蓋据古本以校有明諸刻經注之異同凡三十二卷名曰考文享保十一年丙午物茂卿序之其略如此寫進後至十五年庚戌物觀平直清及諸生又做鼎目錄逐條校補名曰補遺編成刊布之分卷冊如右山鼎自作凡例云世稱十三經今日七經者據足利學所有也學所藏經書古本五經之外論語孝經孟子耳且爾雅孟子古不列于經經之者自十三經始輓近之詞也今奉命錄上校所同異題曰七經孟子考文亦尚古也一所錄有曰考異者字若句有異而莫識其孰可者兩存以廣異聞但經文及注以古文爲主疏以宋板爲主以其多異同出入者爲主也故初題古本或宋板以下統之其餘諸本異同具記其本名下

足利寫本云是唐以前王段吉備諸氏所齋來存于此者

有曰補闕者世流布本有缺字



及句者据所校補之有曰補脫者釋文所闕據元文補之有曰正誤者字句無所脫而誤寫灼然者也有曰謹按者似涉兩可而實窺其不然者斷以己意有曰存舊者篇題之文卷數之分後纂修十三經者擅以己意更改幾失古觀如禮記按唐藝文志文獻通考等皆曰鄭玄注二十卷孔穎達正義七十卷今校之古本宋板與志考相合而今諸刻十三經本分六十三卷永懷堂所刊注本隨其篇數分四十九卷之類皆後世梓者胡亂改易遂失其真如此之類各隨其處詳記之也凡斯數者各逐經文標目其補缺者存上下數字使相接續而中間圍其所補之字以別之但其闕漏之處諸本皆闕而崇禎本世所稱接續備具者多係強補甚難信用故据宋板別摘其字稱某作某又別標補闕目充其原所闕之字以朱圍今係重圍別之一以見崇禎本妄改一以爲補諸本闕漏之便爾一所校諸本有曰宋板者足利學所藏五經正義一通字體平穩如錢大款格寬廣每行字數參差不齊絕無明世諸刻輕佻務整齊之態且凡遇宋帝

諱輒缺其點畫如殷作𠂔弘作弘胤作胤敦作敦𠂔作𠂔徵作徵敬作敬讓作讓  
諱慎作慎之類各避所諱臣向得九成宮石刻穀梁傳殘本高祖諱淵作汭太  
宗諱世民作廿巳又嘗閱唐玄宗八分書墨刻孝經亦爾唐宋避諱之例可見  
以此驗爲宋板無疑有曰古本者亦足利學所藏寫本易三通各三本略例一  
通書一通三本詩二通各十本禮一通十本論語二通各二本皇侃義疏一通  
十本古文孝經一通孟子一通七本皆此方古博士所傳其禮記書尾猶存永  
和年中清原良賢句讀舊跋又活字板禮記其和訓用朱點別有一法世所謂於古止  
點非復今時專用假名者比皆古博士家所授受者每卷末有落款可徵蓋儼  
然古物也而凡古本經文注文與宋明板頗有異同助字甚夥而體例不一者  
間亦有之殆轉展書寫者之所較歟論語集解與義疏全同如適莫章今注疏  
本無注而此有之又文獻通考石經論語舉一隅下有而示之三字三人行必  
有我師焉上又有我字之類今古本正同亦足見其可據也孟子有題辭注疏本或

無及章指古文孝經今梓行者多誤而此本頗佳有劉炫釋尚書孔安國傳字體太奇多古文今別爲古文考且如晉書杜預奏議引書傳云亮信也陰默也宋明本皆無亮信也三字而此本有之易王弼注與略例別行此類皆唐以前所傳無疑有曰足利本者亦本學印行活字板也乃後人隳括古本者而五經論孟世或有之學中所存今僅禮記一通耳其周易論孟又別得之友人云有曰正德本者明正德刊十三經注疏世稀有之其曰嘉靖本萬曆本崇禎本皆明刊十三經注疏世流布本也四本通稱今本而此編所校以崇禎汲古閣本爲主參以諸本以崇禎本世所尙也但論孟無疏可校故止經文及注而皇侃義疏別擬刊行焉其校讎各本又有永懷堂板卽金蟠本外此惟陳澧集說蔡沈書傳程頤易傳朱本義林堯叟左傳直解朱子四書集注陸德明經典釋文而已其謂古本出唐以前恐未可信宋板避敦字爲光宗嫌諱則亦在南渡以後所刊書目寥寥其稱摯虞崔駰二集卽漢魏百三家中所有也蓋亦邊方之

善本有可存者故詳記之至其文字異同除論語備錄皇疏本外摘其尤異者在過夏雜錄

### 說文

漢許慎叔重記此汲古翻宋本也自云宋本字小今改而大之部叙皆在後近揚州有刊本以四聲分韻案古無四聲韻鄭康成注經不曾有音切惟王輔嗣注易始言某音某者二杜預注左亦但有音自元魏胡僧神珙入中國方有四聲反切以之編次說文不知始何時魏了翁答遂寧李侍郎書云巽巖先生初作五音譜以許叔重部敘爲之後在遂寧出示虞仲房仲房改用徐楚金韻譜老先生雖勉從之終弗愜也故其序及跋旣云要自別行又云要須各行大抵始一終貫其形也始東終法其聲也許氏原無反切後人漸加附益至徐鼎臣始以孫愐唐韻音切爲定自音切行人以爲便於檢閱而不知字之本乎偏旁故老先生謂偏旁一切都置則字之有形無聲者豈不愈難檢閱蓋不以韻譜

爲然也聞韻補今已不存或使府別刊元本五音譜賈端修所定置之學中亦是一事據此則是宋人始以說文爲韻譜繼遂以韻譜作說文矣

五經文字三卷新加九經字樣一卷石刻原搨足本

唐張參撰字樣則開成間唐元度撰二書見新唐書藝文志通志藝文略刻石久遠非漫卽肥是本筆墨分明其瘦勁絕類歐率更字樣以補張氏之闕必合觀乃可見張唐各有序國史補云參爲國子司業手寫九經每謂讀書不如寫字此止五經者蓋奉勅所定也其中間亦有誤徐鍇說文繫傳曰張參作文字網爲古殺字而刊石作殺腦字匕旁齒轉寫者以匕在右乃作剗云齒字不亦疏乎

千祿字書一卷宋本

唐顏元孫撰顏真卿書元孫爲師古姪孫仕朝議大夫滌沂毫三州刺史贈祕書監卽杲卿之父而真卿其第十三姪也先是師古於貞觀中訂正經籍字體

世稱顏氏字樣後杜延業續修名羣書新定字樣傳至元孫時漸多訛闕爲參校同異以平上去入四聲爲次其言俗通正三體所謂俗者例皆淺近唯籍帳文案券契藥方非涉雅言用亦無爽通者相承久遠可以施表奏牋啓尺牘判狀固免詆訶正者並有憑據可以施著文章對策碑碣將爲允當蓋以筮仕觀光者必於此折衷用捨故名干祿注云進士考試心違正體明經對策貴合經注古文有自序真卿書此于湖州刺史宅東廳院蜀中中先有石刻甚完此則宋寶祐丁巳衡陽陳蘭孫重刊之彬江精舍者案集古錄云真本訛缺不傳宋時止楊漢公摹本今此本亦多訛字如序云真卿伯祖故祕書監貞觀中刊正經籍云云考魯公集及家廟碑真卿于師古爲四世從孫不當稱伯祖且序係元孫所撰何由入真卿名或真卿書此序時不敢直斥叔父之名夾注真卿叔諱後人刪却叔諱字止留真卿字故二字獨小而旁注也然本集及石刻明作元孫今當改正元孫于師古正是祖行新唐書稱真卿爲師古五世從孫亦誤今据唐書以正序何如据

家廟碑也 元劉壎題千祿字書云魯公之屋漏痕卽右軍之錐畫沙書皆第一不知所見何本

### 廣韻五卷

廣韻者本唐天寶十載陳州司馬孫愐唐韻而增加焉者也先是唐世盛行陸法言切韻其平聲以東農非韻以東崇爲切上聲董勇非韻以董動爲切去聲送種非韻以送衆爲切入聲屋燭非韻以屋宿爲切李涪刊誤所舉其乖誤非一愐則以其注有差錯文復漏遺不無玉瑕珠類因參考蒼雅字統字林諸書補正之名曰唐韻總加四萬二千三百八十三字切韻五卷作於隋開皇初長孫訥言爲之箋注唐初學者轉有增加至唐韻而益備然猶不廢法言訥言之序及宋雍熙景德間屢加討論大中祥符元年賜名廣韻中所引前代之書止言法言切韻而前此李登聲類呂靜韻集周顒四聲切韻沈行四聲之類概不之及又不著撰人但錄孫愐之序而削法言訥言二序故晁無咎輒謂廣韻法

言所撰孫愐加字其實切韻唐韻廣韻各爲一書惟其義則相因耳宋景祐中宋祁鄭戩等更爲集韻列于學宮廣韻遂微然今切韻唐韻旣亡集韻亦不之傳獨廣韻猶存實隋唐舊迹也蓋自平水劉淵併二百六韻爲一百七韻名王子新刊禮部韻略黃公紹因之作韻會舉要遂大行于世後人遵用之無復知有獨用通用之別輾轉傳訛盡失本真惟廣韻可見古法吳郡顧寧人有藏足本穎川陳上年祺公常欲借鈔未得此本乃關中李因篤天生于京師舊肆得明經廠本康熙六年祺公與淮陰張弼力臣校刊之前載愐序據祺公序稱此卽係原本予嘗見通志堂本視此加詳不知何者爲原本明正德己卯華亭顧文僖公清在禮部時嘗取舊藏廣韻裝褱補綴有書後一篇在清江集中据言此本甚古今不知存否矣

押韻釋疑五卷

題曰附釋文互註禮部韻略卷尾圖書棟亭藏本丙戌九月重刻于揚州使館方君體亦購得其本今所謂丁度等禮部韻略

卽此也



宋歐陽德隆撰郭守正重校德隆廬陵人守正號紫雲山人世謂之紫雲韻初德隆病禮部韻略音釋未詳與余合升夢得輯此書字有釋釋有義悉本經史子集參以省監程文凡字同義異義同字異皆印之古訓斷以己意紹定庚寅袁文煊序之至景定甲子守正因書肆板行數易多所錯訛取原本重訂筆者千餘條削亦如之有校正條例甚詳又載淳熙重修文書式至理宗御名而止每卷題篇曰附釋文互註禮部韻略蓋就韻略增刪之非原本可知且其中稱新制添入處甚多如元祐初太學博士孫諤所增以及紹興以來監省續申增添之字無不備載或謂此卽丁度等所撰禮部韻略因而改換面目如上平一東東德紅切領凍凍二字通他紅切領恫恫同童等三十字通上以圈隔之同徒紅切與他紅雖異切而同聲故貫于通下以其同紐也其後籠盧紅切則又加圈以隔之以其異紐也三鍾鍾字諸容切領鍾蚣蚣等字春書容切亦不加圈與通之同同例今則每遇換切旣概頂格則于雙聲疊韻之意乖矣又如支

韻鑊字引周禮眠稜三曰鑊乃十輝之三也今三字用硃寫與凡韻下釋字亦字又字一例又如二冬通鍾五支通脂十虞通模舊皆附本韻連寫不另標目欲令舉子便於通用今則各項格另起又九魚苴字注編萑以苴之萑字係徽宗嫌諱宋本當空近人翻刻實以本字而仍用墨圍其外存舊式也今亦改用硃寫此類甚多又除押韻釋疑之名而後附貢舉條式一冊驟讀幾不可解故詳記以便讀者 魏了翁序吳彩鸞寫本唐韻云韻略之得名以音韻各有吟略韻字从音从員略字从田从各皆一形一聲茲其大端夫是書號唐韻與今世所謂韻略皆不知而作者也然其部敘于一東下注云德紅反濁滿口聲自此至三十四乏皆然于二十八刪二十九山後繼以三十先三十一仙上聲去聲亦然則其聲音之道區分之方隱然見于述作之表矣今之韻既不載聲音之清濁而平聲輒分上下以一先二仙爲下平不知先字自真字而來學者由之隨聲附和殊失古人造端立本之意又是書別出移攣二字注云陸與齊同

今別然則今韻從陸本疑此書爲是今韻列鹽談于侵後升蒸登于青後以古語三字叶今男字叶徵字叶積欠字从兵疑今書爲是叶下疑有脫誤以明重刻鶴山集差謬甚多也今書又升藥鐸于麥陌昔之前置職德于錫緝之後古語白爲薄宅爲度寫爲鵠石爲勺錫緝與職德聲爲最近蓋創始者多闕疏因仍者易周密此皆學者所當知而舉世莫之問也余得此于巴州使君王清父傳爲吳彩鸞書雖無明據而紹字茂美編裘同葉子樣爲唐書無疑若孫愐釋文較今本亦有增加處要以此本爲正華父之言如此據之則韻略亦得失忝半之書而其聲類部域雖刪去清濁之注尙仍唐韻典型不可沒也宋又有集韻今已無傳明初劉三吾等書傳會選引之稱丁度作見禹貢導黑水注瀾渚江下云渚音若此字但見丁度集韻他韻並不收

古文四聲韻五卷

宋夏竦撰竦字子喬江州德安人仕至樞密使諡文莊宋史有傳是書集古文

奇字自汗簡至鳳樓記九十八種準唐韻分爲四聲前載慶曆四年表進序列  
銜開府儀同三司行吏部尙書知亳州軍事上柱國封英國公近時歛人汪啓  
淑所刻云係西陂宋氏所藏汲古影宋抄本曲阜桂未谷馥得之共相校正上  
板案吾氏學古編云前有序并全銜者好別有僧翻本者不可用然則此固其  
好者歟全謝山嘗從范氏天一閣借抄前有晉陵許端夫序紹興乙丑浮屠寶  
達重刊于齊安郡學得非吾氏所稱不可用者歟謝山謂以郭忠恕汗簡所引  
較之正同蓋卽取汗簡而分韻錄之汗簡部居本說文而此則本廣韻絕無異  
同增減似亦非竟無用也然熊朋來杜從古輩皆嘗譏其舛謬而英公鎮襄陽  
日以誤解東帛爲胡大監旦所哂則訓故之未明何暇識文之今古特以所引  
書今並無一存故求奇字者以資考證而學古編古文品亦以之前列也英公鎮襄陽  
陽日詔賜致仕高年者束帛乃以精練十匹送胡笑檢五匹還之因取韓詩外  
傳及服虔賈誼所解束帛箋示之蓋束脩者十脔之脯實一束也束帛則卷其  
帛屈爲二端五匹遂見十端表王者謝山又云東觀餘論有載雲林子曰政  
屈折於隱淪之道也見湘山野錄

和六年冬以夏英公四聲集古韻及宗室元繼所進本二書參寫并益以三代鍾鼎器款識及周鼓秦碑古文古印章碑首并諸字書所有合古者益之比舊本差廣以備遺忘宋史經籍志玉海亦稱有宗室善繼篆聲韻其視英公所集又不知何如廣案萬卷堂刊本東觀餘論跋古文韻後作元繼所廣本其後又云作隸字書者多有譌舛亦姑藏之以廣異同觀者其自辨之據此則元繼之本卽增益英公本而雲林所參寫別名古文韻今之所傳類多隸字寫本也

增修互注禮部韻略五卷 元板末本係抄補

宋毛晃及子居正撰晃衢州人免解進士居正字義甫進士晃以監本禮部韻略太簡自元祐五年進士孫諤陳乞添收僅得一二至紹興十一年進士黃啓宗隨韻補輯亦多闕遺音切謬誤圈注脫略乃詳加考補增入二千六百五十五字校改舊本別體別音之字千六百九十一正誤字四百八十五其兩音同音互用雙抑者悉爲詳注紹興末擬表進不果孝宗朝居正奏御又增益七千

四百二字然其元書所增字實不止此魏了翁云毛氏增韻奏御之六十二年  
居止應大司成校正經籍之聘始克錢于冑庠人情趨簡厭繁故較其始著尙  
多刊削世之不遇者非特一增韻也見鶴山集此本疑是元刻趙凡夫宦光藏本也  
居正又有六經正誤亦了翁作序

羣經音辨七卷 宋本

宋賈昌朝撰昌朝字子明河南獲鹿人天禧元年進士治平中官至左僕射觀  
文殿大學士封魏國公諡文元此書署直集賢院兼天章閣侍講則成于神宗  
時也以古字多假借故一字之文音詁殊別者甚多每講一經隨錄存素中久  
之編成七卷分爲五門一曰辨字同音異二辨字音清濁三辨彼此異音四辨  
字音疑混五辨字訓得失自易書詩禮春秋三傳暨孝經論語爾雅凡字出諸  
經箋傳中者及先儒義訓載在釋文者悉取焉以說文爲字首有自序案王安  
石撰魏公神道碑作十卷比此多三卷

龍龕手鑑四卷抄本杭州吳焯及弟城藏本

遼釋行均撰行均俗姓于氏字廣濟山東人遊燕晉間釋氏舊有香嚴及經音義行均以爲未精乃寓金門搜輯之凡新舊藏經所有與夫流俗臆造之體無不畢載計六萬六千四百三十餘字注十六萬三千一百七十餘字以平上去入爲次每部復分四聲名手鑑者謂如鑑照形妍醜畢露也統和十九年丁酉書成憫忠寺僧智光字法炬作序稱其具辨宮商細分唇齒蓋其擅長專在于是華嚴字母固西方之學也注間引爾雅廣雅說文玉篇字林餘如寶燭隨函郭彥香嚴之類皆彼氏書不可究詰者也木部引博物志舜造圍棋其部又引作堯造圍棋知與儒書皆所不達每字有數體者分注古今正俗通與或作往往倒置無所據依且多重出脫漏之字存備參考則可非字書正宗也序又言行均撰五音圖附後今本無


古音駢字一冊續編一冊抄本無卷今分爲六

明莊履豐鼎鉉同輯二莊毘陵人以四聲依今韻集字之形異而音義相同者駢儷之蓋小學之支流也備檢亦佳

六書故三十三卷

宋戴侗撰侗字仲達永嘉人自謂精通六書因許氏遺文訂其得失所引經傳字體不取俗書因增損點畫成之崔銑洄詞常譏其文互楷篆形錯今古失之億且鑿今觀其字大抵用古隸乃以隸釋證之又盡合





四部寓眼錄卷下

海寧周廣業耕厓

史部

竹書統箋十二卷

徐文靖撰文靖字位山當塗人乾隆年以經學徵授翰林編修竹書出於汲冢今所傳止沈約附注本位山以是書足證古事倣鄭氏箋詩之例并詳注之訂誤釋疑補闕年八十餘方成乾隆庚午刊之但此書軼見于裴駰史記集解及水經注諸書多與今不同宋時黃長睿校東觀中祕本師春已謂其與杜征南所序不同而唐劉貺字惠卿謂竹書紀年序諸侯列會皆舉證是後人追修非當時正史如齊人殲于遂鄭棄其師皆孔子新意師春錄卜筮事與左傳合知按春秋經傳爲之因著外傳今外傳無聞乃其說則非無見當與東觀餘論所載並爲此書精論餘論見雜錄何箋家未之知也余嘗欲取今本作考異一書苦未得

暇閱統箋頗有見獵之喜惜借閱他局經昔卽還未能抄也卷分十二蓋循汲冢之舊目云

史記一百三十卷 殿本

漢司馬遷撰合集解索隱正義刻之每卷有考證較凌本爲詳

新唐書二百二十五卷 殿本

宋歐陽修宋祁撰是書爭勝于劉者惟恃文減事增實則割翦不成句法而事亦未見詳核劉原父謂歐九不讀書非過論也

新唐書釋音二十五卷 附唐書後

宋董衡撰通志藝文略作董氏無名題衡將仕郎前權書學博士以音爲主間及義訓本附各卷後故字多重見複出以今本對之頗有有音而無字者知宋本與今本必有異 玉海崇寧五年董衡爲釋音二十五卷與今作衡者異

通志二百卷 殿本

宋鄭樵撰樵字漁仲莆陽人仕右迪功郎其志凡十八帝紀二后妃傳自廿一起廿四爲年譜廿五至七十七爲二十略七十八以下皆傳也總序詆子長爲不博雅詆班氏爲剽竊而自誇諸略云其禮職官選舉刑法食貨五略漢唐諸儒所得而聞氏族六書七音天文地理都邑諡器服樂藝文校讎圖譜金石災祥昆蟲草木十五略漢唐諸儒所不得而聞通考已譏之今觀其書獨六書氏族藝文等略可節取耳餘皆抄襲前人雜以附會紕繆不可勝舉卽以至淺易者言之如兩漢帝紀除馬班范氏原文外每帝下取注中諱訓增入之惠帝名盈之字曰滿文帝名恆之字常景帝名啓之字開以至東漢靈獻並然夫盈爲滿恆爲常乃臣下諱避本字取同義者相代前人論之甚詳而夾漈不知誤認爲字荒陋如此他復何言見者驚其文辭浩瀚不復深究其失余則謂節取數略此外以供覆瓿可也 晉列傳謝万万字汲古本俱改爲萬世說新語亦作萬案千祿字書去聲萬萬注云並正廣韻願韻万字注無販切十千萬字注萬

舞字林萬虫名亦州名又姓又婉字注古万字謝散騎名万而字万石其必不取舞及蟲州之名可知此汲古之訛今反改從汲古是襲訛矣從通志爲正

北史一百卷殿本

唐李延壽撰延壽相州人其父大師病南北朝所撰諸史各相詆斥有乖名實乃以宋齊梁陳四朝爲南史八十卷魏齊周隋四朝爲北史百卷未就而卒延壽迫紹先志書成以位望卑末不爲人所重後高宗見之稱善別錄以賜諸王而藏本祕閣焉唐人作前代史例皆避諱自晉書以及北齊後周隋並然相沿千載未有改者如北史景寅景子之類本皆丙也避唐世祖諱校者謂當改正爲丙籤貼盈千累百他若淵爲海爲泉虎爲獸爲武之類則又置之不問殊可發噤因戲占一絕云北朝舊史百篇森丙景天干費檢尋莫問侯深與彥海可知隋將有韓禽蓋侯淵一避爲深一稱字曰彥海而韓擒虎則割去下一字也

繹史一百六十卷

國朝馬驢撰驢字驄御一字宛斯鄒平人順治己亥進士爲淮安推官終靈璧縣令書分五部太古十篇三代二十篇春秋七十篇戰國五十篇外錄十篇每篇爲一卷哀集經史子集傳記以事爲經條繫諸書蓋紀事本末之體而稍變之後附論斷自天地帝王以及名物象數咸備焉十年成書康熙九年李清序之板行于世凡所採錄雖事止秦末而文逮梁陳書惟四子不錄餘無不搜雖無甚祕異亦云富矣宛斯博古著聞人謂馬三代顧亭林極推服之尤精左氏所著事緯余有之

三遷志十二卷 志孟子事

國朝孟衍泰重修衍泰鄒人孟子六十五代孫也先是明嘉靖壬子蜀人史鼎山鶴創稿取三遷之名以誌孟母之教至萬曆間漢州胡繼先病其質略乃與鄒人潘榛周希孔潤飾之改名孟志天啓間呂濬及其子聖符重修仍名三遷康熙壬寅衍泰復修分爲十二卷孔孟功在萬世有志固宜然陳鎬闕里多所

漏遺而是志經數人之手亦不免疏謬如第二卷祖德懿子敬叔之後既寂無聞激公宜之爲名若字不可知而直云孟激字公宜仇氏見逸風俗通云孟子之母姓仇氏今亦不能據也激公宜卒年無考韓詩列女傳俱無孟子少孤之說惟趙岐題辭言孟子夙喪其父耳乃大書生三歲父孟激卒據內書後喪踰前喪前後雖無定時以士大夫三鼎五鼎推之相隔必不甚久遠禮曰喪從死者祭從生者祭以三鼎則孟子喪父在爲士之時年已四十內外矣如果三歲喪父將士與三鼎皆機穽間事而臧倉且追述其數十年前以爲毀鬲大非情理矣且列女傳載斷機事云織績而食中道廢而不爲寧能衣其夫子而長不乏食哉觀孟母此言其非嫠恤顯然且志名三遷誌母教也而卷十一題詠孟母贊起于明不知左貴嬪贊早在晉世其詞曰鄒母善導三徙成教鄰止庠序俎豆是效斷機激子廣以墳奧聰達知禮敷述聖道是志中第一古文也何以不及

大興縣志六卷

縣令張茂節輯茂節江南沐陽人由拔貢康熙十二年任以事去至十九年復任大興爲畿輔首邑從未有志茂節延順天孝廉李開泰等開纂起康熙二十三年訖二十四年大抵循府志之例而草創殊難諸多闕漏其至本省通志亦未及考作者亦自以爲憾事也

顏魯公石柱記五卷

唐顏真卿撰并書歸安鄭餘慶芭哇箋釋石柱記者記湖州諸縣山水陵墓古蹟寺觀書而刻之石柱芭哇得宋槧本傳考史志爲之證辨人皆服其該洽余觀魯公宦迹所至皆有紀述如集中所載麻姑仙壇之類而于吳興爲尤多是記并及屏風竹扇以爲物雖微先代所留不可泯沒也蓋自古忠孝之人性情未有不深厚者故留連景物如此否則一官傳舍於日相接之賓友吏民尙膜不相關况此邦古事哉余舊嘗館五湖之濱二年望洞庭如在對面而湖流間



之去郡城六十里又不得一遊因賦二章識之後閱吳興掌故集不啻親詣其境今復讀芭畦是編益令人夢寐蒼雪間矣是記丁小正進士所贈

中吳紀聞六卷

宋龔明之撰明之字希仲崑山人仕宣教郎自序在熙寧九年時年已九十二矣命其子昱校錄之中吳者宋蘇州府也後唐時蘇湖以南皆錢氏所有因于此置中吳軍節度希仲是書取舊所聞于祖父者自地志人物以及談諧嘲謔謔皆載之自謂倣范忠文東齊紀事及蘇文忠志林體亦取其有戒于人耳余觀朱勔等事洵可爲戒而獨盛稱丁晉公謂章莊敏惇則是非頗謬矣毛氏汲古閣重刊

齊乘六卷

元于欽撰欽字恩容益都人仕兵部尙書奉使山東乃記齊地山川沿革古蹟人物爲此書號爲典核家編修林汲先生所贈

水經注十四冊

休寧戴震校水經注舊分四十卷黃省曾朱謀瑋本並然先是水經有郭璞酈道元二家注皆不言經爲何人所撰故隋書經籍志但云水經三卷郭璞注水經四十卷酈善長注而已新唐志始以爲桑欽撰水經而注僅存酈氏考欽江南人據書傳會選在班固之前漢地理志多採其說酈注亦往往引而駁辨之則非欽撰甚明戴氏序謂上不及漢下不逮晉爲魏人纂輯似也酈注詳于本經十數倍原以補其闕略傳寫旣久以注入經勢所不免宇文歐陽每發其議而未及是正東原則云崇文總目水經注亡者五卷今所傳卽宋殘本後人又加割裂以足四十卷之數如注文江水又東逕巫縣故城注訛爲經遂與前經又東過巫縣南割分異卷唐六典云水經列天下之水一百三十七今自河水至斤員水止百二十三應脫逸十四水蓋在五卷中者也王伯厚通鑑地理通釋引水經四事唯魏興安陽一事是經餘並酈注之訛爲經者因爲審其義例按之

地望參校各本又以三十五之爲四十合其所分無復據證遂以某水各自爲篇北方之水以河爲綱南方之水以江爲綱餘水以類差次而以禹貢山川釋地及酈氏原序殿焉曲阜孔繼涵曾助之搜訪乃序而刊之其用力可謂勤矣但矯割裂之失致盡變原書體製既主張太過其中亦似有援經入注者惜未得別本參考余從 邱芷房師借觀師言葉 先生葆嘗有駁正數處恨未

及見僅爲校正一二歸之案續漢書郡國志魏郡鄴有故大河故滏水劉昭補注引魏都賦曰北臨漳滏則冬夏異沼注云水經鄴西北滏水熱故名滏口今濁漳水條下經無滏水滏口之名惟注云漳水又北滏水入焉水出鄴西北石鼓山南巖下泉源奮湧若釜之揚湯其水冬溫夏冷夫左思既漳滏並稱紹統復河滏連舉則滏亦名水矣安知戴所云逸脫十有四水滏不居其一乎顧何以經亡而注獨存也又續志遼西郡臨渝縣補注云山海經曰碣石之山編水出焉其上有玉其下多青碧水經曰在縣南今經亦無編水出臨渝縣南之文

唯濡水注有云濡水又東南至桑縣碣石山文穎曰碣石在遼西桑縣由此觀之經之逸缺而軼見他說者正復不少東原乃未見及此何也善長涿人卽巨馬河注所云東酈亭溝水注之水上承督元溝水於道縣東東南流曆紫淵東六世祖樂浪府君自涿之尊賢鄉爰宅其陰者也爲人博覽其所徵引足資考證者非少東觀餘論稱漢碑刻與水經注不同者如王純碑道元注云王紛碑又州輔碑注云州苞袁良碑注云袁梁又屬國都尉王君碑注云姓王字子雅若此之類皆考古者所必究雖引書間有謬誤不爲害也元文類有歐陽玄序金禮部郎中蔡正甫所撰補正水經三卷略云唐杜祐作通典時尙見郭酈兩注于郭言疎略于酈無言而撰人未考舊唐志始云郭璞作宋崇文總目但云酈注四十卷亡其五新唐志乃謂漢桑欽作水經一云郭璞作今言桑欽本此也說者疑欽爲東漢順帝以後人以疑一此字有誤縣疑之也今經言江水東逕永安宮南永安宮爲昭烈託孤之地得非蜀漢間人所爲乎其言北縣名多曹氏

置南縣名多孫氏置近代宇文氏以爲經傳相淆者此說近之必作經作傳之人定而後可分也漢儒林傳桑欽晁氏謂成帝時人使古有兩桑欽則可審爲成帝時欽則是書不當見遺于漢藝文志也余觀水經述作往往見于南北分裂之時借曰舊唐志可据則作者南人注者北人當時此疆彼界焉知不限于聞見意有志之士傷同風之無時故寓深意于其間乎正甫之意殆如此翰林應奉蘇君伯修購得其書將板行之屬余序

古今姓氏書辨證四十卷 從大典抄

宋鄧名世撰名世本名命世武陽高棅爲更今名字元亞撫州臨川人文昌先生孝甫之孫也是書據李心傳繫年錄王應麟玉海俱云紹興四年表上授右迪功郎今觀卷首有高棅序在宣和六年又名世子椿年序謂有三本宣政間所成者五卷遺闕甚多旣于建炎初成十四卷最後紹興辛酉由史局旋里始克全而猶未成椿年又取宋人文集行狀墓誌訂證之續爲四十卷乾道四年

序然則高所序直五卷本紹興所上者十四卷本故宋會要卷止十四中興書目又止十二也文獻通考宋志所載四十卷則椿年續成本也其書依韻編輯以元和姓纂爲主而多所辨正他所引自風俗通而下如何承天姓苑張始興姓源韻補孔至姓氏雜錄傳餘顏複姓錄顏複姓傳餘賈至姓氏譜吳氏千姓編邵氏姓解及宋熙寧姓纂以至百官公卿家譜選曹脚色無不摭錄而糾正之然仍訛襲謬者亦復不少朱子或問嘗引之原書國姓居首餘分四聲今只依韻椿年嘗作畫繼却單名椿中有云歆音橘廣韻曰人姓也出韻補因知張始興公姓源韻補在廣韻之前

### 子部

東觀餘論二卷 原序十卷今分上下

宋黃伯思撰伯思字長睿亦字長孺自號雲林子亦號青賓閩邵武人政和年官至左朝奉郎行祕書省祕書郎長睿警敏喜讀書嘗官洛下得名公卿家所

藏古器辨正款識研究字畫以淳化年所刻法帖王著緒正者多有錯午著法帖刊誤十卷卽此書所首列者也其在館閣校正冊府藏書凡著古器說四百六十二篇並載博古圖又著地志載九域圖志此書刊誤後俱論古器下卷專跋古書畫乃其子訪所集以在東觀所著故名東觀餘論長睿卒于政和八年  
年僅四十觀文殿學士李綱爲之銘墓文載梁谿集此書亦附梁谿集甚多曾急手一翻墓在鎮江府丹徒縣訪刻此于建安漕司明萬曆甲申秀水項篤壽翻宋本篤壽字子長自號城南耕隱世所傳項氏萬卷堂本也長睿好古字凡次第第字俱依說文作弟卷帙卷字俱依真誥作弓謂弓是卷之省文小宋大一宮詩瑞木千尋竦仙圖幾弔開注云真誥以一卷爲一弔非也陳景雲謂是篇字亦誤說已詳別錄新安方君體攜此書入都甚珍惜之旅貧鬻某氏而卽墨張君鶴爲之介紹余因得寓目爲且喜且感云

唐撫言十五卷

唐王定保撰定保琅琊人方慶八世從孫也登光化二年進士是書專紀進士應舉登科雜事列爲一百五門各爲論贊有關一朝典故案進士科起于隋盛于唐得失之際判若雲泥爭者既多弊亦百出就其所載干請營求已極醜態則皆白衣公卿一品白衫之號誤之士習之壞未必不由于此是書向于裨海見之此爲德州盧氏所刊雕印甚精惜訛字甚多未及校正耳

### 草木子四卷

元葉子奇撰子奇字世傑處州龍泉人仕巴陵簿棄官去洪武十一年春仲有司祭城隍神羣吏竊飲猪腦酒縣學生發其事連及子奇在獄以瓦研墨有得輒書事釋家居續成之得八篇前四篇論天地民物之理後四篇記元事及雜說嘗自號草木子因卽以名書後有正德丙子南海黃衷序云先生自序有慕虞卿之爲舊篇二十有二今約爲八凡四卷知原書不止此是編爲嘉靖己丑漆濱廖自顯所刊無自序嘗見廖刊馬總意林亦在是年意林多所刪汰意此



亦廖所刪也子奇又有太玄本旨範通靜齋集等書

文昌雜錄六卷

宋龐元英撰元英字懋賢南安人丞相籍之子元豐年官主客郎中在省四年所記官制及朝章典故甚詳以尙書省爲文昌天府故名文昌雜錄亦德州盧氏所刊以上三書從肆中買得

東京夢華錄十卷 舊借朱氏附錄

宋孟元老撰元老自號幽蘭居士紹興丁卯年追記東京歲時風俗夷堅志二十卷

宋洪邁撰邁字容齋鄱陽人所紀亦鄱事爲多

學古編一冊

元吾邱衍撰衍字子行號貞白居士太末人隱居錢唐高潔自持尤工籀篆其說古體有三十五舉又備述合用文籍品目大抵爲印章而作首有危素夏溥

二序

子閒居錄一冊

前人撰右二冊皆吾民部渭璜所校刻蓋貞白後裔也貞白制行之高游藝之妙聞之稔矣既獲讀二書覺流風去人未遠抑尙有疑焉者戊子同年惟吾姓爲榜花而貞白實係吾邱氏危太素學古錄序及貞白自序並然獨是錄陸友仁跋直曰吾子行夏溥曰先生姓本吾邱其私印有竹素書房吾氏子行云云知當時亦自謂吾氏案通志氏族略吾氏已姓夏諸侯昆吾氏後其地卽濮陽漢有吾扈吳吾粲晉吾彥俱吳人此以國爲氏者吾邱氏卽虞邱氏晉大夫虞邱子著書楚莊王相有虞邱子此以邑爲氏者單複之間源流迥別漢書吾邱壽王字子贛趙人武帝時以經術聞史記作虞邱壽王此虞吾通用之證當時貞白先世夾深音吾爲魚展武人呼魚若唔因亦呼吾若唔則非昆吾之後甚明貞白自宋初居太末今衢州也陸友仁跋稱魯郡吾子行亦不可解余觀貞

白論私印單名二名行字不肯稍苟于姓源必自有說試還質之渭璜

唐類函二百卷 萬歷年刊

明俞安期撰安期字羨期東吳布衣篤志好古是書薈萃唐人北堂書鈔藝文類聚初學記杜氏通典六帖諸類書以成或省併成文或分刪換目所取皆唐人書故名唐類函北堂書鈔久闕明陳禹謨補之此書亦有取焉時令又取歲華紀麗

御定駢字類編二百四十卷

謹案是書分十三門曰天地曰時令曰山水曰居處曰珍寶曰數目曰方隅曰采色曰器物曰草木曰鳥獸曰蟲魚而人事門則補遺也約二字爲目而詳注之仍以首一字爲標分繫經史傳集之文類書之集大成者也中引書亦有名駢字憑霄者不知撰人聖祖命儒臣纂輯經宸衷裁定雍正六年刊御製序

池北偶談二十六卷

王士正撰一至四談故五至十談獻十一以下談藝談異

千金備急三十卷

唐孫思邈撰思邈精醫小說載思邈常見小青蛇被傷贖而救之後見一白衣少年下馬拜謝迎至城郭若王者居以輕綃金珠贈之不受遂取龍宮藥方三十首與之思邈著備急三十卷每卷藏一方焉余舊在小桃源朱氏見此書其方有不宜於今者亦有言房術者但可供檢閱而已至其議論之佳者則不可廢也

尙論篇四卷後篇四卷

明喻昌撰昌字嘉言江西新建人嘉言本儒者中副榜後棄而逃禪精于醫理遊吳會所著書甚見重于時尙論篇乃較正漢張仲景傷寒論就當日所有三百九十七法一百二十三方分各經所患次第論列爲四卷又於傷寒中摘出春溫一症別爲起例及諸方脈症注釋爲四卷其前四卷與寓意草醫門法律

早刊行世而後四卷闕焉歲在丙戌武原吳先生儀洛輯傷寒分經一書以尙論篇爲本而稍加節潤攜稿就余商確凡有一得之愚無不採錄但恨不得後四卷時季弟慎齋歸自江右得陳氏新刊本檢視亦未之有先生乃周章補綴於春溫後別列夏熱脈法諸方辛病秋燥數篇共成十卷其用意良苦余固愛莫能助也然每閱市未嘗不留心搜訪甲辰四月於琉璃廠書店見有刻本則乾隆己未靖安舒斯曼長明氏所續刊也闕其第三卷余遽買以歸比較吳書春溫諸方信然矣夏熱秋燥脈法則固無有繼又得江西陳氏續刻後篇則第三卷亦在惜吳先生已於卯秋下世不得郵歸共證矣舒本前有新吳甘汝來序極言此書非僞本以喻先無子遺稿皆付其壻舒英此稿出于外孫舒斯蔚故也

### 醫門法律六卷

前人撰此書專爲庸醫殺人者作每症詳其治法而反是者糾之以律

寓意草

前人撰右三書醫家所必當讀卽醫家不能讀儒家則必當讀上醫醫國豈僅操刀圭課十全已哉惟喻氏筆力太橫議論未免有過當處此又存乎讀者之知所去取也

集部

金華子雜編二卷 從大典抄出

南唐劉崇遠撰崇遠字 河南人仕至大理司直少慕赤松子兄弟讀其書思其人恍遊金華之境因自號焉編述唐季事實自承平迄于離亂凡一百餘條案通志藝文略三卷注云記大中咸通後事紺珠集所引凡七條此僅有其六蓋就大典所有錄之卷旣不符所闕亦不少矣

金氏文集二卷 從大典抄出

宋金君卿撰君卿字文叔饒州浮梁人慶曆間進士官至尙書度支郎中其父

溫叟范文正嘗誌其墓稱君卿能以才自起於貧賤慨然有任天下之志文正又嘗榜其所作賦於郡庠爲士子式曾子固王介甫歐陽永叔皆有詩贈之至和中屢上封事言極剴切遺藁本十五卷門人臨川江明仲所輯宋史止十卷久佚此就大典所有編之前有富臨序今古詩流美啓狀雜著俱清麗可誦末有傳易之家一篇序授受爲詳而辨重卦始文王九明確云

文說一卷

元陳繹曾撰繹曾字

人戴表元弟子也首云陳文靖公問爲文之法

繹曾以所聞於先人者對曰一養氣二抱題三明體四分間五立意六用事七造語八下字中稱先尙書云今世爲學不可不隨宜者科舉之文是也科舉之文有不得不與朱子語類參者如讀四書當謹守章句集注參以或問語錄及文公大全集尙書主蔡氏參朱子語錄詩主集傳易先啓蒙次本義九圖次五贊次繫詞說卦乃可讀上下經彖象文言序卦雜卦春秋斷以胡氏取朱子語

錄及張洽之說折衷之禮記雖主古疏然制度當訂以朱子經傳通解義理當訂以朱子語錄他如古賦詔誥章表策皆科舉所用者此元時取士之制朱學偏重實始于此相沿既久古注疏束高閣矣

性善堂稿十五卷 從大興抄出

宋庾止撰正字伯周一字周卿四川遂寧人早喪父爲縣戶掾年二十四以周禮舉于鄉高宗朝進士知華陽縣罷歸以趙運使薦獻策時宰除益昌訓導累遷至重慶路監司嘗走建安奉其母蹇太宜人命受業朱子之門朱子深契之其稿古今詩四卷餘皆表狀劄子書序記頌銘跋也詩清和四六雋逸文亦淵茂粹然儒者之文而不流于迂腐於周程張朱之言尤娓娓焉

客亭類稿十四卷 從大興抄出

宋楊冠卿撰冠卿字夢錫江陵人多四六劄啓亦有詩

陸士龍集十卷 明刻本



晉陸雲撰雲字士龍雲間人與兄機弟耽齊名時稱三陸本傳稱雲著文章三百四十九篇久散是集明新安汪士賢校吳人王元懋序訛錯甚多

王子安集十六卷 明刻

唐王勃撰勃字子安太原祁人淹之孫福時之子初唐四傑之一也明末閩漳飛遁道人張燮紹和既搜刻漢魏以來七十餘家文集繼及初唐將竣而歿其序盛稱四傑有忠孝大節不徒文藻深不以裴行儉器識之言爲然謂其病止于揚己護前無所與讓爲先輩所惡視六朝傷化敗俗者相去萬里因錄王長公藝苑卮言一則于前蓋亦千載知己也賦詩計三卷序表啓書論頌贊九卷碑狀共三卷駢儷之體六朝爭尙子安仍之典麗喬皇所隸事皆唐以前書近不傳者多矣安得博雅者爲之詳注也

紺珠集十三卷 不見底本

宋人撰或云朱勝非前有王宗哲序作於紹興丁巳中云建陽詹公寺丞出鎮

臨汀出示茲集其首則云紺珠之集不知起自何代然如歐文忠歸田錄沈存中夢溪筆談之類所採北宋人書非一豈得云不知所起乎今計雜採之書凡一百三十餘種翦削過當又字句顛錯不可讀余爲訂正者幾千字始稍可上口按螢雪雜說云前輩節書並用首尾該貫第一節其緊要第二節其好句第三節其故實繁辭盡削所以便于燈窗場屋之用爾讀此書知俞氏之言爲信

杼山集十卷 汲古本

唐釋皎然撰皎然姓謝氏康樂十世孫長城人初名皎然字清晝晚名晝字皎然時人語云茗之晝能清秀因又號清晝焉始居湖州興國寺晚居杼山東溪草堂能詩妙悟禪理與武林僧清江齊名時稱二清嘗謁蘇州刺史韋應物效其體作古詩十數篇韋了不喜乃獻舊製大加獎嘆因曰師幾失聲名何不但以所事見投而妄希老夫之意人各有所得非猝能辦晝大服貞元間于頔刺湖州相與酬倡後入集賢院徵其文編次而爲之序晝又與陸鴻漸莫逆顏魯

公作韻海命贊其事高僧傳云好爲五雜組用意奇險今集所載殊少且與諸人聯句非盡皎然作也爲僧好興冥齋飯鬼多奇應貞元年卒唐志集十卷此本五七言詩六卷餘四卷歌詞及僧塔銘贊序之類

陶山集十二卷大典錄出聚珍本

宋陸佃撰佃字農師山陰人熙寧進士徽宗朝官至尙書右丞出知亳州卒通志載集三十卷早佚茲所錄詩三卷劄子狀議表五卷餘爲經論策問之屬末三卷誌銘据魏了翁師友雅言稱陶山集首辨大裘鄭康成謂黑羔裘者非云云則原集以經論爲首矣

心泉學詩稿六卷從大典抄出

宋蒲壽晟撰壽晟閩人通志稱爲壽庚弟首賦及古近詩後附詩餘讀其示兒拙婦吟等篇似好學冲淡未必類其兄之所爲又古賦云念故園之燕麥悲荆棘之銅駝爾乃託延陵之厚俗因夷獠之同波苟聲教之可暨豈古道之有他

則曾寓居江南矣

懷清堂集二十卷

國朝湯右曾撰右曾號西厓仁和人官至吏部侍郎少以能詩見賞王阮亭與查夏重齊名康熙癸巳赴熱河謝恩於都憲揆公敘寓賦瑞應寺並蒂文光果詩聖祖聞而取閱特賜和章舉朝傳誦羣公屬和爲一時盛事先是使黔中有使黔中集生平詩稿萬餘手選定者古今體千四百餘首乾隆丁丑刊有北平黃叔琳序詩裁清麗與敬業堂異曲同工

莊靖先生集十卷抄本揚州馬裕藏

元李俊民撰俊民字用章別號鶴鳴老人山西澤州人邃於經學尤長於禮金承安庚申舉經義榜第一入爲應奉翰林文字年甫弱冠也旋棄官授經鄉里逃名嵩山中元初徵入仍乞還山主文盟四五十年著述不下數萬篇遭亂遺失卒諡莊靖歲在癸卯郡侯殷正卿始集其文十卷刻之皆晚年所作門生劉

漢臣濟之君祥仲寬姚子昂實左右之號鶴鳴集長平李仲坤同郡劉瀛門人史秉直等作序越二百餘年正德戊辰總漕都憲沁水李瀚重刻從其諡曰莊靖遺集及淮東葉贇序首古賦次古今詩其卷三爲一字百題皆五絕而卷六襄陽詠史皆七絕又集唐宋人句六十餘首卷七樂府卷八序傳譔記卷九碑贊青詞卷十祭文疏表清才雅韻隨寓發舒雖遊戲之詞亦古雅絕倫

東江家藏集四十二卷 嘉靖九年刻

明顧清撰清號東江華亭人宏治壬子解元癸丑進士歷官禮部尙書諡文僖其子天秩孫應陽哀集其詩文刻之

潛齋先生文集十一卷 抄本附鐵牛翁集一卷

宋何夢桂撰夢桂字巖叟初名應祁字申甫號潛齋嚴州淳安人咸淳丙寅進士官至大理寺卿以時事不可爲引疾去入元徵辟不起其文集刊行未久失火成化乙巳八世孫淳爲湖廣憲副重刊之金谿徐瑗序其後橋李岳元聲校

定宗孫之綸重梓詩文和雅雜文僊體亦多逸致鐵牛翁者潛齋族孫名景福字介夫號鐵牛子晚年避兵武林後歸淳詩酒自娛此卷爲其從孫如晦所得序而附之

蘇平仲文集十六卷抄本

明蘇伯衡撰伯衡字平仲自號空同子其先眉人文定公長子待制遲知婺州家焉遂爲婺之金華人伯衡其九世孫也元鄉貢進士明初由國子學正擢翰林編修以曠辭宋文憲以翰林承旨致仕薦之自代以疾固辭其文雄博好擬古首卷補周書獻禾歸禾嘉禾三篇范宣子復鄭子產輕幣書以及鄭義門師儉訓趙彥嘉畏慎訓皆擬經之文末卷空同子瞽說二十八首則依倣諸子爲之他如制誥頌贊說記傳序碑文誌銘各臻其妙其于銘傳則善善從長纖微必錄卷十五則詩也宋濂劉基爲序蒙陰薄永嘉林與直編次金華判官章貢黎諒重刻

此山先生詩集十卷 寫本

元周權撰權字子衡括蒼人元初肥遯邱園詩裁清逸趙子昂爲書此山二字并贈詩云青青雲外山烟烟松上月念此山中人風神照松月遂號此山延祐間四明袁文靖公桷薦領史職旋歸肆志詠吟此集陳旅選定號曰此山先生集前有袁桷歐陽原功陳旅序後有揭傒斯跋皆在元統年

孫明復小集一卷 寫本

宋孫復撰復字明復晉州平陽人舉進士不第退居泰山著春秋尊王發微十二篇年四十未娶時相李迪以姪女妻之范仲淹富弼薦爲國子直講仕至殿中丞卒宋史稱復既病神宗命其門人祖無擇就其家抄得書十五萬言今此小集文九首詩三首僅萬字而已首爲堯權論大旨謂堯不能舉元愷誅四凶非力不能也舜起側陋世德弗耀堯將授位焉懼岳牧未必盡臣四海不盡戴故特留此使歸大功于舜以爲是乃堯之權此論大謬堯不能舉云云本季氏

之讐言卽信有之當時必自有說若果抑賢養惡以顯舜之功則直後世權詭之霸術耳堯豈有是事有心乎孔孟之所謂權亦豈有是事有心乎韓非稱堯欲傳天下于舜鯀諫不聽殺之羽山共工又諫不聽誅之幽都于是天下莫敢言此戰國誣聖之言今乃以誣岳牧而且以權稱之昔漢儒以反經合道爲權程子非之以爲權只是經自漢以下無人識得權字若明復者亦不識權字者歟

宋儒說權字亦誤經典稽疑論之甚詳

貢文靖公雲林詩集六集 寫本曹倦圃家藏有圖書

元貢奎撰奎字仲章自號雲林宣城人官集賢直學士卽尙書玩齋之父也後追封廣陵郡侯諡文靖著有聽雪齋紀青山謾吟倦遊集豫章稿上元新錄南湖紀行等書永樂間以采書收入祕府遂失其傳惟雲林集藏于家而亦未全曾孫元體蒐補成六卷宏治庚戌天台花吉識前有三山陳澧序洪熙乙巳作稱公三世孫蘭字斯馥所請云



山海漫談五卷

明任環撰環字應乾號復菴山西潞安人嘉靖甲辰進士知廣平等縣遷蘇州同知倭患起竭力捍禦以功擢按察篆事益飭厲大破倭兵詔優獎蔭一子年四十卒贈光祿卿蘇人祠事之集中序記書各數篇詩尤真率四五兩卷則附諸人所作傳碑序詩也

麟原先生文集十二卷後集十二卷抄本

元王禮撰禮字子讓自號清和道人廬陵人因所居宣溪後有憩麟山學者稱麟原先生至正庚寅鄉舉授安遠教官陞興國主簿親老告歸參政全普菴辟置幕府世事日非隱居教授明洪武聘爲福建廣西考官丙寅年卒嘗集元初以來朝野詩爲長留天地間集計一千三百餘首又滄海遺珠集五百餘首其自著詩文前後若干卷其諸孫謙被薦入京乃介大理寺卿同節以示永新劉定之因爲序原有雲陽李祁序麟原初字子尙後改子讓有易字說

成都文類五十卷錄一卷今無錄

宋袁說友等輯說友字

建安人慶元間由寶文閣學士出爲四川安撫節

度

原作制度不知何故

使兼知成都軍府事以益爲古大都會江山文物最爲雄盛乃與

僚佐扈仲榮楊汝明費士威何熹固宋德之趙震徐景望程遇孫等裒集漢魏以來迄于嘉熙之文若詩分類編輯得篇一千有奇類爲十一目釐爲五十卷首有自序其編集八人姓氏另列一頁蓋扈仲榮等分編而袁總其成故向皆稱爲袁書今日錄稱程遇孫等輯寫本又題扈仲榮撰未免偏枯謹仍其舊書之 余購此書積年今喜得見其第三十三卷祠廟門有靈應廟記三篇首爲周良翰新繁縣靈應廟記已從全蜀藝文志輯入文昌通紀至楊祖職章森二記則創獲之卽命學子篝燈錄出以俟續刻神之功德因之益烜赫矣余有志喜詩云雷杼誰云化跡湮淳熙功烈翠珉鐫武擔山外開珠館龜化城頭駐玉驍韶郡圖經曾乞借蜀都文獻足流傳元明亦有如椽筆祠錄重搜井度編

草堂雅集十四卷抄本

元顧瑛編瑛字仲瑛號玉山崑山人所收詩類同時高隱之士素所還往者黃縉陳基張雨倪瓚王禕等數十人問附玉山和韻之作新巧綺麗元人能事是詩題畫詩爲多蓋玉山好藏古書畫故物聚所好云抄本無前後疑非完書

見素集二十八卷續集卷奏議七卷

明林俊撰俊字待用號見素晚號雲莊福建莆田人成化戊戌進士官至刑部尙書太子太保憲宗朝疏劾妖僧繼曉杖謫遇事敢言數立軍功嘉靖間致仕文故作奧折無甚深致續集爲詩

可齋雜藁三十四卷可齋續藁八卷後續藁十二卷抄本

宋李曾伯撰曾伯字長孺號可齋荊州人三與漕荐不第晚賜奉常第初參戎幕歷鎮荊襄嶺蜀表啓疏奏凡代人及自作俱清雅可誦詩詞不多亦有逸致續藁刻于寶祐甲寅

樊川文集二十二卷 原二十卷外集二卷

唐杜牧撰牧字牧之京兆人世居杜樊鄉水經注云實樊川也集因以名前有裴延翰序明南陵鄭邴輯而刻之崇正年也詩文略相當

宋景文集六十二卷 大典抄出聚珍板

宋宋祁撰

午亭文編五十卷

澤州陳廷敬撰廷敬官至大學士卷一至二十皆詩廿一至廿四雜著廿五以下經解奏疏史評墓誌等

謙齋文錄四卷

明徐溥撰溥字 常州宜興人景泰甲戌進士孝宗朝入相諡文靖方憲宗時以刑部主事劾妖僧繼曉杖遣嘉靖議禮亦以直聲聞前有門生朱希周序東里集九十七卷別集

明楊士奇撰士奇名寓以字行號東里江西泰和人由明經入翰林官至大學士諡文貞文廿五卷詩三卷續集別集附錄若干卷康熙年刊

顏魯公集十六卷補遺一卷年譜附錄各一卷刊本

唐顏真卿撰真卿字清臣小名羨門子別號應方京兆長安人開元進士仕至太子少保封魯國公事詳唐書忠義傳著有興觀廬陵臨川等集俱早佚宋時宋次道集其詩文詞于金華成十五卷嘉定間留元剛

字茂潛丞相  
留正之子

守永嘉得

其殘本十一卷乃別爲補遺又次爲年譜後人復分元剛本爲十五卷以足之明萬曆中真卿裔孫允祚有重刊本此本爲錫山安國所刊有宋劉敞序稱吳興沈侯輯詩賦銘記若干篇爲十五卷首奏議表卷四以下碑誌十一書帖題名今又補家廟等碑爲補遺卷十六年譜行狀神道別爲三卷

龜巢稿十七卷抄本

元謝應芳撰應芳字子蘭常州武進人至正丙申避亂甫里依舊識劉翁築室

一區取千歲之龜巢于蓮葉之義名曰龜巢因號龜巢老人著有辨惑論思賢懷古等錄俱先後刊行明洪武十年病中自爲墓志口授友人江陰張端書之後年九十餘卒其稿首賦次詩啓序疏詞誌銘箴等十六七兩卷又爲詩前無序錄似非足本中記元人事跡足資考證吉學士今陞涇卿渭厓先生方集丹陽聞見錄見其間有涉丹陽事借閱一宿錄出見還前輩留意故鄉文獻如此

二微亭詩集一卷抄本知不足齋藏本

宋徐璣撰璣字文淵號靈淵晉江人徙永嘉官建安主簿終長泰令與徐靈暉照翁靈舒卷趙靈秀師秀議復唐詩時號四靈璣與照同姓同里同調同時故又稱二徐然非兄弟也是集五七言清逸有中晚唐風味方虛谷瀛奎律髓謂四靈詩徐在丁位題翁靈舒詩集後云五字極難精知君合有名磨礱雙鬢改收拾一編成泉落秋岩潔花開野逕清漸多來學者體法似元英觀此四靈詩致概可想見茗溪宋伯仁

字器

有水邊聞雁集四靈句云蘆花新有雁

徐靈暉四

面水連天靈淵清淨非人世秀靈吾詩詠不全舒靈當時愛且傳四靈詩亦可想見璣  
又有泉山集見東甌詩集不知卽此集否

石洞文集十八卷刻本本十九缺其一

明葉春及撰春及字化甫號絅齋惠州歸善人居石洞學者稱石洞先生隆慶  
二年以舉人中會試副榜授閩清教諭應詔上書言時政數十萬言後秩滿遷  
惠安令所至有善績今集所載卷一二爲應詔書卷三至七爲惠安政書八九  
爲公牘十十一爲順德永安博羅三縣志肇慶府志論敘十二至十六爲序記  
碑等十七八爲詩十九爲崇文擢書有錄無書其人蓋有志經世者持論皆本  
經術而實見諸施行惜不展其用康熙年刊 文集載公牘志書似非體制  
黃文節公詩集十一卷續集十一卷別集一卷

宋黃庭堅撰

鮎埼亭集四十九卷抄本

全祖望撰祖望先世宋時戚晚代有顯者祖望博覽力學歸田後著書甚夥尤留意桑梓耆舊於忠孝節烈諸人尤極力表章心極細筆極雄足爲一方文獻余從張孝廉鶴借觀一至五卷詩賦六至二十八誌銘狀傳二十九以下論記序議簡帖雜著題跋其三十九至四十九皆經史答問以有刻本不復抄門人董秉純所輯杭世駿序

戴東原文集十卷

戴震撰曲阜孔氏谷繼涵所刊有孔及盧抱經文昭序

詠史詩一卷

唐胡曾撰曾有安定集十卷皆奏表見唐志此卷皆七絕詠史詩有注始不周山至汴水不知何人所注刻甚佳意明初善本也得之書肆

周元公集八卷

宋周濂溪撰濂溪字茂叔道州營道人仕終廣東轉運判官知南康軍賜諡元



封汝南伯從祀孔廟詳宋史道學傳集十卷久佚後人輯爲七卷見文獻通考  
陳振孫書錄云遺文纔數篇爲一卷餘皆附錄此本首太極圖說易通雜著二  
卷圖譜二卷餘五卷皆諸儒議論及誌傳祭文蓋後人所附益也明嘉靖間漳  
浦王會序而刊之本朝康熙初吳縣庠生裔孫沈珂重鐫

水雲村稿二十卷 抄本今止抄十五卷

元劉壎撰壎字起潛號水村江西南豐人咸淳庚午亞榜鄉魁宋亡隱居養母  
當道辟召皆不應晚授延平教諭年七十餘卒所居淺村距城數十武深巷無  
隣有類村落因名水雲村自爲記略言人間世無非水波雲氣而已不但一家  
卽天下事亦一水雲也自志墓云無位而思救時無責而喜論事無財而好施  
予道不行守道不易學不用嗜學不厭人迂之自亦迂之終不改此可覘其學  
行矣爲文不事邊幅暢所欲言儷體亦俊逸首賦次碑記傳序贊跋九卷以下  
啓書祭文雜著牋表其卷十六曰樂語十七曰疏語十八上梁文十九祝文法

語二十詞疏皆不抄文亦不見前有明人張黼鑑序稱其裔字二至者手是編  
相示又明末吳峒曾本朝康熙年吳甫生序

杜清獻公文集十九卷

宋杜範撰範字

號立齋黃巖人嘉定戊辰進士理宗朝由臺諫薦擢至中

書右丞相兼樞密院使贈太傅諡清獻範端平初以直諫聞道德勳烈詳具宋  
史其集詩四卷奏劄十卷書劄序記跋傳等五卷前有明禮部尙書同邑黃綰  
序略云方公之復位也史嵩之深嫉之欲致毒無由知公嗜古書嘗以舌涎濡  
指翻揭乃匿鳩書葉伺其所至置几案公至果如所料遂遇毒而薨在位僅八  
十日耳理宗痛悼欲厚葬之命臺史于故里擇吉地且爲公後嗣計臺史閱杜  
村諸山里人慮錫香火地或妨其私競賄臺史輒云不吉乃葬黃杜嶺右麓二  
子濬淵皆無嗣以從祖祁公之孫後焉明宏治間壙爲居民鄭某所發盡取寶  
器會黃知縣謁選京師感異夢奏請復元季所建文獻書院以祀公詔許于墓

旁立祠黃觀同訪求墓所里老又慮春秋供事之勞給以不知因卽鄭某所居建兆域立祠堂而鄭之家亦廢是書先祖文毅公在選部日借錄得若干卷嘉靖二十六年序同邑御史符驗梓行

魏鶴山文集一百九卷

宋魏了翁撰了翁字華父臨邛人居鶴山建鶴山書屋人稱鶴山先生其集首詩次奏議雜文末爲經說明嘉靖辛亥邛州守貴溪吳鳳取舊本重校刊內有缺卷周禮折衷自職方以下並無之編次者強分以足卷數非完書也是書留局甚久苦乏同志不肯出以公好臨繳急手一翻而已益令人懷丁小正沈嵩門盧匏廬崔秋谷諸雅人也鮑綠飲得一異書惟恐人不知通假不但無吝色且諄諄以精校爲囑聞其遷居後書籍頗散亡又喪女及媳身復多病三千里外時夢寐見之

兩宋名賢小集一百十卷抄本

宋陳思輯元陳世隆補思錢唐人世隆其從孫也紹定三年鶴山魏了翁原序云臨安鬻書人陳思多爲予收攬散逸扣其書顛末輒對如響一日以所梓兩宋羣賢小集見寄求一言發眎之珠玉粲然嗚呼賈人鬻書于世而善其事者此可爲士而不如乎嘆息書而歸之秀水朱彝尊跋云思所編羣賢小集當時藝流遊客多挾此以干謁時貴稱國寶新編又稱爲江湖集者是也鐫本希覯近藏書家間有鈔本而現在著名之集率皆不錄故止六十餘家假非陳思編輯此六十餘家保無湮沒勿傳者乎宜一書賈而爲大儒所嘉嘆也此外一百四十家係其從孫世隆所編又云是編刻于宋寶慶紹定間史彌遠柄國疑劉過集中有謗己之言牽連逮捕思亦不免詩板遂燬世隆當元至正之末復合兩宋名人之詩選擇之甫完家復遭兵燹其稿本流傳日以散逸吾鄉曹倦圃先生僅得十之二三率皆糜壞乃補綴成編復汰其近日盛行諸集留得二百餘家選宋詩者當以此中求之廣案今所傳江湖集係錢唐人陳起所選起字

宗之寧宗時鄉薦第一時稱陳解元事母至孝開書肆于臨安鬻書以奉母因取江湖間名人小集數十家選爲江湖集彙刻以售人盛稱之史彌遠當國起有詩曰秋雨梧桐皇子府春風楊柳相公橋哀濟邸而譏彌遠也寶慶初爲李知孝所劾獲罪者六人起坐流配乃禁士大夫作詩後彌遠死禁始解有芸居乙藁一卷與菊潭吳惟信漁溪俞桂詩文相往復今觀竹垞之跋則名賢小集卽江湖集而陳思陳起雖同錢唐人名却不同陳起或又作陳造且鶴山序但言書賈不言解元殊屬可疑豈思與起同時開肆同事選刊歟是所當考也江湖集未見吉渭厓學士抄有丹陽葛起耕詩與名賢集正同然則實一書也俞桂寄陳芸居云生長京華地衣冠東晉人書中塵不到筆下句通神江海知名日池塘幾夢春精神長似舊芸藁愈清新桂字希郤錢唐人紹興初進士有漁溪詩藁

六家文選一百卷

梁昭明太子選唐李善及呂延濟劉良張銑李周翰呂向註案唐書善揚州江都人顯慶中注選表上之諸生傳其業號文選舉善所註釋事而忘義書成問其子邕邕不敢對意欲有所更善命補益之邕附事見義善以爲不可奪故兩書並行然則善于選既有初注覆注三注四注其外又別有李邕注矣何世絕無傳而李善注中并不附見邕名何也呂向字子向病李注繁縛與延濟等更爲注解號五臣注亦見唐書文選鏤版始蜀宰相母昭裔以裔貧時常借之不得發憤誓板鏤之也李注與五臣初皆單行不知何時合爲六臣余所見有五臣本又有明初翻元刻本止李善注汲古本雖曰李善中尙雜五臣數條疑卽從六臣摘出余嘗取陳眉公手勘項氏萬卷堂本六臣注較之益明項本出明萬歷間中多空格不可解此本題明龍藏丁觀重刊每卷並然其三十卷末有云明嘉靖壬寅四月立夏日吳郡袁氏兩庚草堂善本雕四十卷末云此蜀郡廣都縣裴氏善本今重雕于沙郡袁氏之嘉趣堂嘉靖丙午春日又云國朝改

廣都縣爲雙流縣屬成都府前無序後無跋不能究言其何時然視項氏本似過之也

右從事校讎所錄起甲辰仲夏訖乙巳季冬合官書及友人惠借共若干部於四部僅百之一耳嘗謂書之於人猶飲食然一日不得飲食則饑一日不得書則俗甚者心放軼無所歸否亦冥冥無所覺悟其害蓋甚於飢顧得書矣而境遇有豐嗇之殊姿賦有敏鈍之殊豐且敏者縹囊細帙坐擁百城淨几明窗朗吟默會日盡數寸也可日記一事也可既歷歷于心目迨其出之如就釀室惟所斟酌顧郇廚羅珍羞咄嗟立辦故其事逸而爲功多若嗇與鈍則反是羈旅犇走瘁其體離索困乏擾其胸幸獲書本無擇恆奇而刻寫動有紛歧閱繳限以時日抹改手生胝諷念口流涎昕夕孜孜掩卷盡失譬猶使目短之人驟馬花叢祇覺白白朱朱疲于應接問以白者云何朱者云何卒茫無以應非不欲審諦力限之也特視并此不得者差免俗耳古云愚夫千慮必有一得雖偶見瞥觀每書大憲不可不知因撮錄之取蘇文忠詩中寓眼字名之庶異日披覽當屠門之嚼焉丙午三月望日周廣業耕厓甫識于聽雨樓之北小書室